

三网 识 略

董含

文硕阁

wenshuoge.com

目录

关于我们	3
三冈识略序	5
凡例	6
三冈识略卷一	7
三冈识略卷二	19
三冈识略卷三	37
三冈识略卷四	56
三冈识略卷五	72
三冈识略卷六	85
三冈识略卷七	97
三冈识略卷八	111
三冈识略卷九	127
三冈识略卷十	143
三冈续识略小引	161
三冈续识略卷上	162
三冈续识略卷下	168
附录	177

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

三冈识略序

《春秋》之义，褒贬并行。风人之旨，美刺共载。夫以一人之身，而欲覃精湛思，网罗轶事，必使言之者无罪，闻之者足戒，故足尚也。《三冈》一编，近之矣。榕城登第归，养素邱园，下帷著述，性恬静，不妄交游，乃栖迟杜门，而声望益重，至于宠辱得丧，泊如也。然留心天下事，凡耳闻目击，或见邸报，或系传述，上而日薄星回，下而山崩地震，中而人妖物怪，靡不详核颠末，付诸赫蹠。此虽近悯时悼俗者之所为，乃其间忠臣孝子之姱行，贤人君子之达节，以至士女讴歌，野老吟叹，有关于世道人心、风俗伦常者，一卷之中，未尝不留连致意焉。余读而叹曰：卓哉是书，有以也夫！天下之生久矣，所不至几希澌灭者，其赖此以维持也与！昔者相台岳珂作《桎史》以补宋史之不及，南村陶九成作《辍耕录》以继元史之缺遗，二书叙事斐然，章法古雅，文采瑰丽可观。今《识略》简而核，详而赡，典而有则，不诡不滥，大旨善善长，恶恶短，间有刺讥，义归劝惩，庶几《小雅》巷伯之义。孔子曰：“多闻阙疑”，“多见而识之”。又曰：“谁毁谁誉”，此物此志也与！位置当在相台、南村间，湘山、猗园，抑末矣。是编自甲申始，序作于戊子阳月。同里卢元昌文子撰。

三冈识略自序

甲申、乙酉之际，海内鼎沸，时余年未弱冠，避乱转徙，卜居三冈之东。紫冈、沙冈、竹冈。敝庐数椽，足蔽风雨，昼耕夜诵，人事都绝。庭阴有枯槐一株，虽枝干蜿蜒，而萧然无复生意，命仆□去之。不数尺，□然有声，下遇石匣，晶莹如玉。启之，获竹简一，上刻蝌蚪七百馀字，剥落不可辨。遍徵博考，识者曰，类古记事者之文。然卒莫得而详也。厥后奔走四方，三入京洛，既而栖迟里门。自少及老，取耳目所及者，续书于后。凡五年为一卷，以月系岁，以日系月，天道将周，积成十卷，名《三冈识略》。其间或得之邸报，或得之目击，或得之交游所称述，或可以备稽考、广听睹、益劝戒者，靡不远谘详访。即事属细微，语无诠次，要皆确有根据，抑亦稗家者之流也。夫《搜神》、《洞冥》，其旨近诡；《杜阳》、《述异》，其说或诬。取两者而折衷之，岂敢曰鼓吹前哲耶？聊以资覆瓿者之一助云尔。

康熙著雍敦毕辜月，莼乡赘客董含题于东冈之艺葵草堂。

识略题词

丁丑仲夏，小憩东皋客舍，雨窗快读榕城先生《识略》，未终卷而击节久之，因叹史馆中二十年来，不知撰述若何，头白有期，汗青无日，安得大手笔为之裁定，垂千秋信史耶？草野遗民，拭目俟之矣。为拈二韵志感云：“《辍耕录》自南村叟，《桎史》传于岳倦翁。身阅沧桑文献在，《三冈识略》并称雄。”“从他纪事饶银管，自有藏书俪玉杯。谁识江都真史笔，漫夸梁苑有邹枚。”梅花源沈白拜手题。

凡例

一、是书始于甲申，终于癸酉，共五十年。

一、事具国史并涉忌讳者，概不敢载。

一、其间钦仰高贤、乐为称道者，不必识面。

一、偶有褒贬，俱出至公，不敢任私意为去取。

一、凡称官位，止据目前，如吴三桂初称吴王，叛后称吴逆之类。

一、事虽细微，各有依据，不敢妄为称述。

一、凡系风闻、未经目见者，必书某人说。

一、是编积五十年，今始告成，不敢期其必传，聊识以为小说家稽考。

赘客含识

三冈识略卷一

【甲申至戊子】华亭董含著

星变

甲申正月朔，大风霾发。癸丑，夜星入月中。

陵哭

三月，钦天监奏帝星下移，又守陵官奏孝陵夜哭。

召将

怀宗尝于宫中符召天将。一召即至，叩以将来事，无弗应者。癸未秋，雷击奉天殿。惧甚，复焚符召之，久不至。良久，元帝下临，乩批云：“天将皆已降生人间，无可应召。”上再拜，问：“降生意欲何为？尚有未降者否？”乩答云：“惟汉寿亭侯，受明厚恩，不肯降生，馀无在者。”批毕寂然，再叩不应矣。

物异

临淮民家贮豆数斛，悉变人首状，有老者，少者，或类哭泣，或如妇人者。数日，仍复豆形。尝考汉中平元年，东都等处，草作人状，是岁黄巾起，王家板荡。时蛾贼鸱张，比之猷贼尤炽。未几，宫阙不守，乃知为陷覆之兆云。

逆臣草檄

闯贼限三月十八日抵燕都，既而如期破京师。先是，移檄远近，中有云：“主非甚暗，孤立而炀蔽恒多；臣尽行私，比党而公忠绝少。”逆臣周钟笔也，闻者扼腕。钟复献下江南之策，贼败，潜归南都，戮于市。

刘诚意秘记

大内一密室，相传刘诚意基留秘记，□键甚严，非大变不得开。贼围城急，思陵亲启之，中惟一柜，得图三轴。第一图绘文武官数十，被发乱行。问内臣，答曰：“岂官多法乱乎？”第二图绘兵将倒戈弃甲，百姓襁负奔走状，曰：“得非军民皆叛乎？”再展第三图，画像与御容酷肖，穿白半臂，右足跣，左系袜履，散发悬树下。览毕勃然变色。竟符其状。

崇祯亡国

怀宗入继大统，太阿独操，忧勤惕励，日昃不暇，声色嗜好，一无所留意。末年寇盗蜂起，灾变迭见，喋血宫庙，自唐宋以来，未有若斯之酷者。愚尝论之，明兴，昏庸之君二：武宗、熹宗是也，二君宜亡国者也；雄略之君二：英宗、怀宗是也，二君不宜亡国者也。乃事有相反者。盖明不亡于怀宗，犹汉不亡于献而亡于桓、灵也。

宜兴祸始

阳羡周延儒之初相也，案诸人皆厚赂之，欲令转移上意。阮大铖亦馈二万金。延儒畏上英断，不敢发，性贪鄙，又不能还金。诸人惆怅而已，独大铖怨詈之。大铖既负逆名，众皆不齿。马士英黜官居金陵，好声色，与大铖为狎邪交，相得甚欢，士大夫因并薄士英，二人之交愈固。延儒再相，大铖候之京口，曰：“公起，天下拭目望太平矣。某愿为太平之民，一身功名，非所冀也。”延儒始虑其责报，闻之大喜，犹计大铖之为人终不可负，欲有以取偿，曰：“公知人才谁可用者？愿得致力。”大铖举士英，遂从废起擢凤督。及弘光立，士英相，大铖用，而国由以亡。嗟乎，以三百年之宗社，东南十万里之江山，一旦举而捐之，捐之者仅此二万金也。

树泣

淮安东岳庙殿前大树，无故水点辄落如雨，三日乃止。或云，此名“树泣”。

李督师

李督师建泰素负重望，自言西人，知贼中事，请身往御寇，以家财佐军需。思陵壮之，告庙授钺。忽殿梁响声大作，如崩裂然；甫出宣武门，輿扛忽折；至暮，其印绶上火光如斗。或谗为指日成功、金印如斗兆。未几，贼陷。

贼墓

李自成，陕之米脂县双泉人。祖海，父守忠，葬三峰子乱山中，山势险恶，林木丛杂，气概雄伟。幕府檄米脂令边大绶掘之，以泄杀气。先破海冢，骨黑如墨，头额生白毛五六寸长。次至守忠冢，中蟠白蛇一，长一尺二寸，头角崭然，见人昂首张口无所畏，众击杀之。守忠骨节间色如铜绿，生黄毛五六寸长。其余数冢，骨皆血润，亦有生毛者。大绶有记，名《虎口余生》，载之甚详。

闯贼官制

闯贼入都五日，建设伪官。改印曰符券契章，凡四等。更定官名，六部曰六政府，内阁曰天祐殿，翰林院曰弘文院，文选司曰文询院，巡抚曰节度使，兵备曰防御使，六科曰谏议，御史曰直指使，太仆曰验马寺，尚宝曰尚玺，通政司曰知政司，布政曰统会，主事曰从事，知府曰尹，中书曰书写房，知州曰牧，知县曰令，正总兵曰权，副总兵曰制，五军府曰五军部，守备曰守旅，把总曰守旗，馀皆如故。官服以云为级，一品一云，至九云为九品。伪相牛金星所定，真槐国衣冠也。

张献忠惨杀

献贼穷凶极恶，千古无两。入蜀后僭号“大西”，改元“大顺”。首杀成都百姓，三日三夜始毕。次杀绅士数十万，次杀川兵二十三万、家口三十二万。次屠成都府属三十六州县百姓，每城户口多至千百万，不能计数。次屠村庄百姓，老少无遗。次杀官兵十二万馀，次杀将官五千七百馀、各官家属一万三千二百馀。次杀兵妻五百有馀。次杀随征兵共男妇五十万。诸将报功疏又称：平东一路，杀百姓男人五千九百八十八万，女人九千五百万；抚南一路，杀男人九千九百六十馀万，女人八千六百六十馀万；安西一路，杀男人七千九百馀万，女人八千六百馀万；定北一路，杀男人七千六百馀万，女人九千四百馀万，幼小俱不在其数也。呜呼，何其惨也夫！上帝好生，乃生此贼，以应劫数，不然，彼苍苍者，岂真如醉如梦耶？纵彼凶暴，荼毒生灵，天心亦不仁甚矣。

弘光改元

五月，福王即位南都，改元弘光。王名由松，质性暗弱，有蜀后主、晋惠帝之风，而荒淫过之。大臣素有声望者，外虽崇礼，内实疏之。简凤督马士英为相，惟以挟私树党、贿官鬻爵为事。首举故光禄阮大铖为大司马，阅江防。旋起其党张孙振、卫胤文等，环布中外，以图报复。辅臣姜曰广特疏纠之，有曰：“梓宫未冷，增龙驭之凄凉；制墨未干，骇四方之观听。”马、阮忌其言切直，谋中伤之，未及行而败。

瑞麦

是月，江南怀远县产瑞麦，一茎双穗。

星异

六月，长庚见东方，光芒闪烁，或四角，或五角，中有刀剑兵马之形。

江左称号

江左称号，不过一载，而诸臣奏牍所慷慨论列者，惟申明三案始末，及广织造、选采女，并鬻官援例等事。富家子弟，皆辇金而入。于是民间有“都督满街走，职方贱如狗”之谣。逮沿江失守，或洶恣偷生，或望风惊窜，惟史公可法战死淮南，以身殉国。馀自尽者，止张捷、杨维垣而已。二人向摈清议，而死颇烈，信乎盖棺论定也。

给谏改节

相传惠给谏世扬为闯贼所得，慕其名，甚尊礼之。世扬有“天遗一老，以佐陛下”之语。给谏先朝直臣，三秦士民不敢呼姓名，称“延安夫子”，乃胁于凶威，匍匐受伪官。嗟乎，世扬末路，乃至于此，使蚤死一二年，宁有此耶？

筑城预兆

崇祯初年，于芦沟桥建一城，镌四字于扉石，右曰“永昌”，左曰“顺治”。不数年，闯贼伪号永昌，而我朝长驱破贼，改元顺治。此城之建，若预为兆云。

长平公主

长平公主名徽姬，周皇后出也。甲申岁，年甫十一，下妙选良家议，降太仆公子都尉周君世显，将筑平阳以馆之。无何，寇至，公主时在侧，御剑亲挥，伤颊断腕。贼以贵主，授尸国戚。越五日，复苏。至是上书，欲归空门。不许。诏求元配完婚，金田邸第，赐赉有加。仅一载，公主上仙，葬彰义门赐庄。公主虽遭丧乱，远胜乐昌，而上之优礼稠叠，始终勿替，盛德真千古无两。吴祭酒作诗以纪之。

宸翰

思陵聪明天纵，万几之暇，尤工翰墨。先大父邃初公以天官左侍郎兼摄铨、宪二篆，蒙眷最深。一日，对毕，面书十大字以赐，曰“珠藏泽自媚，玉蕴山含辉”，中作一“帝”字，上用玉玺，篆曰“崇祯建极之宝”。笔势飞舞，每一展阅，奎光烂然。予摹四字，额之书斋，以便朝夕为之瞻仰云。

福王淫昏

时大兵南下，势如破竹。王除夕恍然不乐，亟传各官入见。诸臣以兵败地蹙，俱顿首谢罪。良久，曰：“朕未暇虑此，所忧者后宫寥落，意欲广选民家，以充掖廷，惟诸卿早计之。”或对曰：“臣以陛下忧敌兵，或思先帝耳。”遂散出。又内殿悬一对，曰“万事不如杯在手，百年几见月当头”，傍注“东阁大学士臣王铎奉敕书”，亦可笑也。

义马

流寇破河内，县尹丁君运泰，骂贼被磔。所乘马甚骏，贼骑以入县。至堂下，大嘶人立，狂逸不可制，竟触墙死。

马生卵

松江南桥地方，马生卵，大如鹅子。

旱魃

七月，我乡大旱，禾苗皆枯。西余浮屠绝顶，旱魃见形，土人亲见之。

产怪

苏州府崇明县，有孕妇，腹奇大。既产，儿仅五六寸长。连产不止，皆宛转能啼。至第五儿，忽作细语曰：“勿惊也，予兄弟共十三人，偶来相托，将福汝家。乳不继，可饲以饼饵。”产毕，数果十三，怪而投之海，后亦无恙。

日食星流

乙酉正月朔，日有食之。初八日立春，流星入紫微宫。又二月至五月，日月光芒俱赤。

空中城郭

十一日午刻，河南荥泽县东南三十里郭村，现大城一座，楼台墙堞，无不备具，观者云集，自午至申始灭。按嘉靖二十九年，东安何家庄忽现城郭楼台，又北隐村亦然。

思陵太子

二月，献县人高梦箕，其仆穆虎，遇一北来幼童，自称思陵太子。同过江，往绍兴。梦箕密以闻。追入都，令诸臣识认。太监卢九德、讲官方拱乾、伴读邱致中，太子一见即识之。百姓踊跃。既而一审再审，以为系东宫侍卫王之明假冒，将置之死。宁南侯左良玉、江督袁继咸、楚抚何腾蛟等，俱抗疏请保全东宫。不听，竟下狱。未几，福王出奔，士民就狱中拥之出，俾坐武英殿。越两日城破，不知所终，而至今相传，以为确系太子云。

福王妃

河南有妇人童氏，自称福王元配，巡抚越其杰驿送至京。王震怒，目为妖妇，令严鞫之。童氏叙述侃侃，细书入宫月日、相离情事甚悉。跣足受酷刑，卒无易辞。后旬馀，王出奔，童氏不知所终。说者曰，人非颠狂，谁敢与王冒认敌体？举朝纷纷，无敢言者。士英具疏不可，乃刊刻附邸报中，题曰“密奏”，尤可骇笑也。

甌生花

丙戌三月，民间鸡生三足。又甌底生花，痕如刻划，或为折枝及菡萏状。江浙之间，十室而九，余亲见之。

白燕

松郡东关谯楼下，有燕来巢，育双雏，色白如雪，未几毙。相传白燕为瑞，识者谓，燕处堂之鸟，而白者丧象也，实为羽孽。至秋，果有屠城之祸。

詹有道

四月初一日，有一男子闯入宫门，大呼曰：“太祖高皇帝、神宗显皇帝令我谕汝：汝荒淫酒色，将有覆国之祸！”更有秽语，所不堪述。言讫，昏仆于地。久之苏，鞫其名，为詹有道。从前呓语，叩之不知矣。

绝命词

左公懋第奉使议和，不屈死。临刑题绝命词曰：“漠漠黄沙少雁过，片云南下竟如何。丹衷碧血消难尽，荡作寒烟总不磨。”被难时，忽风沙四起，卷市棚于云际，一时为之罢市。

奇药

王师下维扬，有纪生者，遁出城，为乱兵所刃，闷绝仆地。昏黑中，忽闻鬼语曰：“是人有后禄，宜救之。”取青泥涂其肘。少顷苏，视创处已合，旁有泥斗许，因取怀之。以治金疮，无不立愈。不一年，遂致富。

几生芝

先少宰公求是堂中，设一横几，以铁梨木为之，垂三十馀年，漆纹剥落。夏五月初，忽砉然有声，其下倒生一芝。渐长至尺许，颜色鲜好，香气馥郁，观者接踵，阅

数日始萎。前史所载，有绕殿生芝，及兵杖生花，吉凶不一。柳河东谓，朽株败腐，皆能蒸出菌芝。然其理实不可解也。

产子三目

府治东大吴桥，有杨冠者，以肩輿为业。其妻端午日产一子，三目，额有两角，中一目尚未开，如道家所塑王灵官状。冠惊骇，杀而瘞之。是夕，梦一金甲人诉之曰：“予以微罪，偶谪凡间，托生汝家，何忍见杀？今秋必有报汝。”未几，夫妇俱为乱兵所害。冠系第五叔父士馀輿夫，云目击之。

松城屠

八月初三日，王师抵松城。时百姓已归顺。乡官沈公犹龙，前总制两粤，有威望，倡义守城，募乡兵为拒敌计。而孤城无援，所募皆市井白徒，金鼓一震，鸟散鼠窜，杀戮最惨。先是，鸛集于谯楼，每夜闻数万鬼哭，又百鸟哀鸣。至是，果罹屠城之祸。沈公及进士李君待问、孝廉章君简，皆死之。

薙发文

松民归正后，下薙发之令。李舍人雯有《薙发文》，曰：“维某年某月某日，李子将薙发。先夕，梦有物苍苍，蒙茸其形，怒而呼曰：‘予发之神也，从子而生，三十八年。今闻弃予，来责尔言：自子之少，我居尔颠。纤齐圆直，既泽且玄。可以弄姿于帟房，可以耀影于华簪，可以晞阳于扶桑，可以濯流于清泉。顾乃苦思研精，劳干震形，役及于我，失其华英。血早衰而种种，年未至而星星。至于出蓬蒿，登场屋，头如飞葆，匪膏匪沐，人一为之，子屡焉而未足。犹愿没齿而相忘，何期中道而见逐也。且予闻之，绝交不出声，弃妇不堕井。予为亡国之遗族，子为新朝之膻仕。念往者之绸缪，莫深文以相刺。然畴昔之日，以我御穷，一朝见弃，竟如飘风，岂曼纓之可美，曾毛里之莫恫。苟无言以自释，行诉之于苍穹。’李子闻之，涕泣掩面。已而凝思展意，释然而对曰：‘子既责予，予亦有言：自我与子，体附肌连。使予累子，子不得独鲜；使子去予，予不得独妍。故人之有发，犹草木之有枝叶也，春生而秋谢，春非恩而秋非怨也。犹鸟兽之有羽毛也，夏希而冬毳，冬非厚而夏非薄也。无可奈何而安之若命，是故无不祥之鸣焉。今天子圣德日新，富有万方，一旦稽古礼乐，创制显荣。予犬马齿长，不及于盛时矣，而为子之族类支党者，尚得照耀星弁之下，巍峨黼黻之上。予幸以戴白之老，乞灵于鹿皮竹冠，以庇子焉。所谓鄙人不敏，以晚盖者也，我子其亦有意乎？’于是诸发无语，洒然而退，又明日而李子髡焉。”

学仙无成

颜进士茂猷，闽之漳州人。尝游名山，遇异人，曰：“子骨气非常，当列名真诰，人间富贵，不足辱子也。”因授以秘术。鼎革后，遂弃官学道，携黄冠三四人，登南山绝顶，采药炼丹。三载丹成，于是择日启炉，以为白日冲举，可计日得。至期，飞符禹步，呼召神将，云旂雾旆，仿佛如有所见。薄暮，雷震一声，炉坏，颜与黄冠，俱成灰烬矣。漳浦赵生为述其事，因记之。

不义妇

阆门一妇，微有姿色。城破，为一总旗所掳，情好甚洽。其夫不忍弃，罄家资沿途缉访。及于淮安逆旅，痛哭祈之，并献所有。其人恻然，令妇随归。妇坚不肯去，且曰：“此身已属将军矣。”因唾夫面。其人勃然曰：“尔夫千里相寻，何负于汝？我岂可复为尔夫之续乎！”遂拔剑刺杀之，见者大快。

题壁诗

乱离以来，东南闺阁，间关戎马，情殊可怜。金陵宋氏蕙湘题卫州旅店云：“盈盈十五破瓜初，已学明妃别故庐。谁散千金同孟德，镶黄旗下赎文姝。”香粉流离，红颜薄命，读之怆然酸鼻。

乔将军【字百圭，川沙堡人。】

乔将军一琦，上海人，家世业儒。琦厌薄经生业，遂以武节著，有神力，能拓数石弓。尝戏驰马从屋梁下过，以两股夹马，四蹄悬空而起。明季，为刘大将军先锋，兵败，投崖死。后大兵南下，琦子兰，渡江迎降，意甚得。易衣帽谒琦墓，忽见琦从冢中出，怒气勃勃，口中咄咄作声，叱兰跪，以铁椎击之，仆地立死。忠义之气，久而不衰如此。

绍兴溃

丁亥二月，杭城既溃，方将军国安拥众十馀万，有磨盘营数千人，皆所选精锐，摧锋陷阵者。阮大铖逃至国安军中，告之曰：“北兵甚锐，旦夕渡江，此番须用磨盘营。公更严谕之，必以死斗，不然败矣。”国安如其言。大铖又造磨盘营，呼曰：“若见将军令乎？”曰：“然。”大铖曰：“将军有后令，欲若曹尽杀妻子，以死决之。”众惊恐，于是磨盘营先溃，诸营相次土崩，而大兵渡江矣。大铖、士英至绍兴，密通款迎降，欣然自得。然见七闽无恙，为后日计，乃潜通奏疏。有得其奏，马、阮俱被磔。

兽知忠义

南都既覆，隆武称号闽中。福州破，桂藩子永明王复拥立于肇庆，改号永历，后遁入缅甸，为平西王吴三桂檄取遇害。永历称帝后，流离西粤，受制于孙可望，一时忠烈之士，大半殉难。辅臣严公起恒、杨公畏知，俱负声望。可望要封秦王，严固拒不许。遣贼遮杀之，推入水中。尸流三十余里，忽有虎负之登岸，守视不去。贼愕然，因收葬之。杨公愤激，徒手击贼，亦被杀。献忠诸养子，除伪晋王李定国反正外，余刘文秀、艾能奇等，皆好酒嗜杀，毒如猘狗，乃此虎犹知忠义。彼逆贼者，真禽兽之不若也哉。

野史氏曰：李定国、孙可望、刘文秀、艾能奇，皆献忠义子，伪称四将军；而白文选、王双礼，则伪都督也。献忠死，各率残寇入滇，推可望为主。及可望定滇、黔，遂肆毒虐。于是诛宗室，杀大臣，帝制自为，又一献忠也。定国独拔身群贼之中，秉忠反正，尽瘁事国，乃至崎岖九死，呼天以明其心。呜呼，古烈丈夫哉！方其破百粤，下衡阳，义声先路，所在引领，使可望等同心齐力，虽汾阳、临淮，至今存可也。何乃形势逼而猜忌成，嫌疑积而戕贼并，分疆熟视，共穴疾斗，坐视菁英凋丧，不可收拾。天纵穷凶，祸人家国，虽麾鲁阳之戈，莫填精卫之海。斯时北望燕云，真人继起，薄海归心。嗟呼李王，天之所坏，又何可支哉。至于白文选间关异域，可泣风雨，而扼于部将，不能引决则有之，非其志也。冀后之言者，或见原焉。

郡三变

鼎革以来，吾郡凡三变：其始顽民团结，号为土兵，大军一临，屠戮殆尽，一变也；既而武弁吴志葵杀逐官吏，劫掠桑梓，未几就缚，而合郡俱被其祸，二变也；继又遭辽人吴圣兆以总兵官镇松，约降海岛，为麾下所执，士大夫平生偶有一面，按籍而求，无得免者，三变也。今伤痍满目，枳棘载道，是所望于长养休息之者。

殷公尽节

中翰殷公，讳之辂，性忠烈，慷慨好施，养士尝数百人，与夏考功允彝、陈黄门子龙深相结，期死国难，而中翰一门兄弟殉节，被祸尤惨。考功先期著《幸存录》一卷，从容赴水死。子完淳，年十七，有隼才，坐为圣兆画策，亦被诛。

阳阵阴阵

先是，流寇围汴梁，城中固守，力攻三次，俱不能克。贼计穷，搜妇人数百，悉露下体，倒植于地，向城嫚骂，号曰“阴门阵”，城上炮皆不能发。陈将军永福急取僧人，数略相当，令赤身立垛口对之，谓之“阳门阵”，贼炮亦退后不发。详见李光壁《汴围日录》，后群盗屡用之，往往有验。尝考黄帝风后以来，从无此法，惟孙子“八阵”中有“牝牡”之说，此岂其遗意与？

假弘光

三月，贵州思州府有僧自称弘光，远近喧传。独米寿图知其诈，叱左右擒之。其人供称，本名查显仁，杭州人。戮于市。

死后魂著灵异

当乙酉四月大兵之下维扬也，总兵张鹏翼，与右都督徐洪合兵入援，未至而江宁失守，遂从海道投监国鲁王。丙戌三月，移屯太末。鹏翼弟继荣，勇冠诸军，及兵至，疾斗力竭而死。有老僧舁其尸归，将近衢里许，道旁有旅店，忽见继荣披甲跃马，从数人，至店下马，令具酒食。店民飞报入城，军中皆惊喜，急出迎之，则继荣尸适至，始知向入旅店者乃其魂也。后城陷，洪□、鹏翼俱不屈死。

伪撰国史

伪秦王孙可望，虽阳奉永历，而诛杀任意，一时廷臣，皆收为腹心。有礼部主事方于宣者，擢编修，谄事尤甚，为可望撰《国史》一书，称张献忠为太祖，作“太祖本纪”；比崇祯为桀、纣，又为制天子卤簿，定朝仪，言帝星明于井度，上书劝进。后可望为李定国所败，投归本朝。于宣自知祸及。时有钱中丞邦芑者，守死抗节，为人心所归。方驰书于钱，云欲纠集义旅，截擒可望以报国。邦芑得书大笑，答以一绝云：“修史当年笔削馀，帝星井度竟成虚。秦宫火后收图籍，犹见君家劝进书。”未几，缚至滇，竟得逃死。

拒女获报

钱江陆君元龙，褊躬甚谨。尝独处馆舍，有邻女慕之，艳妆而至，语笑不止。陆坚拒之，女惭怒去。是夜，梦二龙绕柱，红光满室。秋闱遂登贤书，丁亥成进士。

三冈识略卷一补遗

女子题壁

予友琅玕氏计偕北上，于涿鹿旅邸见一女子题壁，附录于此，以貽好事者：“妾雪英，朱氏，古吴人也。先君起家墨绶，进秩黄门，误事权奸，骤登清要。不谓冰山难恃，春雪易消，志虽切于缙紫，法难宽于正卯。其时旅櫟南归，茕茕母女，堂虚栖燕，庭可张罗。又以伯氏梟獍，横加惨毒。始则假当道之虎威，貽讥里；继乃效中山之狼狈，造祸萧墙。遂致六旬孀母，抱恨黄泉；及字孤儿，失身翠馆。嗟呼！白杨衰草，难呼怙恃于九泉；路柳墙花，空伴王孙于锦帐。此情此境，苦矣惨矣。而鸩母奸贪，取偿无厌，逼嫁武弁之手，时遭妒妇之拳。我生不辰，一至于此！兹

者奉诏南征，途经涿鹿，中军起塞外之声，闰谱曲中之调，少舒幽恨，薄赋短章。此闺人诉怨之词，非骚客文之咏也：‘吴地红颜旧世家，自怜薄命滞天涯。含羞懒唱青楼曲，拭泪悲听紫塞笳。不及曹碑传古石，漫同章柳集寒鸦。当年妆阁今何在，万种伤心付落花。’时丙戌季冬五日。”

水厄

丁亥第三岁日，予往丙舍贺大父节，借邻马乘之而行。归至车墩镇，有石梁甚狭，扬鞭而过，马后足先陷，悬空而下。幸两足离镫，又适遇潮至，马浮水去。予不谙水性，自奋者三，不能起，沉入水底，饮水数口，分必死矣。忽若有人将予两股极力推送，身忽抵岸，家人急救得免。此水虽细，岁有被溺者，且堕水宜死，足镫宜死，潮未至，为马所压宜死，予幸无恙，岂一介书生而亦为天之所耶？

鱼上

八月，黄歇浦群鱼大上，皆长尺许，网之日得五六万头，凡四、五日止。

雷杀逆子

戊子七月，泖滨有村民张某，母年六十馀，溺妻言，屡肆狂逆。一日晓起，送母往婿家，至半途，挤母水中，疾趋归，与妻阖户寝。时久旱，忽大风雨，电光环绕其室。张反接，出跪庭中，震雷一声，击杀之。天黯，半空中如怒号。须臾雨止，已失其首。众相与踪迹之，行六七里，抵大泽，见一尸横卧，张首方哺其乳，牢不可脱，视之，即其母也。妻惊，始吐实。嗟乎，鸱枭破镜，果有之耶？

移冢

江右李剑墟，精青囊术，言星子县有夏宪副应台者，以所居地隘，屋后有古墓，欲徙之。夜梦一贵人登堂揖曰：“予宋之丁谓也，公宅后墓乃我莹，祈勿毁，当有以报。”宪副惊寤，语其子曰：“丁乃臣奸，令其人在，尚当殛之，况冢乎？”遂徙之。冢有三穴，左右俱空，其中穴一如新，欲毁之，其子力谏，移之高原。不逾旬，夏病卒。按，谓江南人，入仕家于洛阳，后贬崖州，致仕，居光州卒，何缘葬此？剑墟之言，未足信也。

黄雾

腊月八日，黄雾四塞。

盘龙塘

我乡东关外十里，有盘龙塘，两涯冢墓密布。相传旧有仙翁过此，题桥柱曰：“不在盘龙南，不在盘龙北，有人葬此地，黄金满万屋。”于是松之人竞买以营窀穸，然究无吉壤。予自幼及壮，往来于兹不下数十次，但见有被掘者，有塌入水中者，有倒挂涯岸、摧朽暴露者，骸骨纵横，蛇虺杂乱，可伤也。夫青鸟之说，我不谓无，必其人有善缘，为天所佑，或无心而遇之。今本欲邀福，乃反罹祸，竟何益之有哉？昔有凶人营一墓，兆甚佳，考亭先生题二语于壁曰：“此地不发，是无地理；此地若发，是无天理。”后竟为震雷击毁，诚哉是言也。

鼠怪

广西柳州分司署，有大鼠为怪，啮坏附近居民衣物，不可胜纪。募猫捕之，反为所毙。半年之内，连杀五猫。便捷如猱，白日游行，人不能禁。适郡绅龙某从平越携一猫归，小而健，云能辟鼠。既至，伏梁栋间，扼而擒之。鼠能杀猫，亦异事也。

三冈识略卷二

【己丑至癸巳】华亭董含著

夫妇巧合

己丑三月，海盐坏海塘百馀丈，傍海居民，有漂入海者。一夫妇他出，子尚乳，寝一木床，周围皆板。鲸涛如山，波浪汹涌，妇攀床出没，久而不覆。顺流数百里，冲入上海县一团地方。有冯姓者鰥居，救之获免，母子俱无恙，遂为夫妇。后其夫访知，移文来索。众议泛海不死，其事甚奇，虽为野合，实有天意。乃留其妻而还其子，夫悲恻而去。

大士显应

吾乡樱桃湖，东接海上，有古刹曰白衣庵，大士供养处也。地最僻，寺僧多不法。偶有商人遇暴雨托宿，见铜像剥落，捐白金数笏为助。僧窥其橐重，遂醉以酒，缚之榻，解佛幡缢焉。时已更馀，月光黯然，适捕盗舟至，遥见一缟衣女子，徘徊寺侧，疑僧为奸，入寺穷索，寂无所见，惟所缢之人宛转垂绝，救之复苏，自道其故，乃讶向所见者，即大士显应也。于是将僧系送有司，杖杀之。

夜叉岛

吴门有吴氏子，与一仆附贾人舟，往日本国，同行约百馀众。未到三四百里，忽遇暴风，飘泊一岛。二十余人挟弓矢刀枪，登岸觅鸟兽。猝逢一夜叉，长二丈许，朱发蓝面，自岩间出，攫一人，持其足，剖而啖之。余人反走，夜叉缓步而来，连攫二人。及舟，以两手首尾拆之，舟断为二。倏水中复有夜叉出，始争攫人，既而相斗，海水沸腾，岛屿震动。久之解去，人半堕水，半为所食，惟存二人在橦下夹板内。明午樵者至，见有衣货，取之，乃于夹板得二人，携去。后得归，其一人即吴仆，而吴氏子被食矣。樵者云，此名夜叉岛，惟正午可出樵苏，忌言语，诸人不知，故遭此祸也。吴仆今尚在。

白蝙蝠

嘉定县南翔白鹤寺，梁太清中所建也，其刹最古。栋间为蝙蝠所窟，寺僧往往取夜明砂以射利。予偶过其地，借宿禅榻，漏将半，有物屡来触帟。披衣索之，获蝙蝠一，其白如雪。取归置笼中，三日后竟逸去。古书言，蝙蝠一千年化为白，名“仙鼠”，食之可以轻举。惜乎未之试也。

按《续博物志》载，宋刘亮合丹药，用白蝙蝠，服之立死。又陈子真获大蝙蝠，食

之大溲而死。则轻举之说，似未足据。

虎异

湖广永州熊黑岭，有虎数百共斗。其一最巨者，色赤如火，咆哮搏击，山石俱裂，万雉皆雒。

关公默佑

济宁南关有文昌阁，阁圯，改为关公庙，址稍缩。后有清真寺，乃回子所创者。诸生王道新、王宏等，以庙貌卑隘，议扩之，而回子杨生花者素暴，欲侵庙址，纠党诬讼。有陈君益修争于官，得如旧。杨大恨，歆众截陈于道，残其肢体，剜双目，摔之以灭。举城如沸，益修垂绝，家人舁至榻，张皇守视，莫知所出。陈夜半忽如梦中，见绿绣丈夫，执卮酒劝之曰：“强饮此，可活。”少顷，喉间喀喀有声，随溺血盈盎，胸腹稍宽。次日，复见一人，形貌如仙，排闥直入，曰：“我能疗子。”以手指抉起双目孔，喷血如注。又见一老姥，以果啖之，捧接之次，二睛欻然堕地，姥趣吸之，目渐有光。不数日，睛如故。陈乙酉登贤书，丙戌捷南宫，历官监司。二王亦俱登科，济宁杨生苏霖记其事。

东山行

伪肃鲁伯黄斌卿，闽之兴化人。少有胆略。屯兵舟山，后颇骄恣，失将士心，为麾下缚以巨石，沉之于海。或又云，卒于昌国城南之东山。黄之客作《东山行》以诔之曰：“东山风悲吹日黄，千樯万轴戈如霜。东山风怒吹月黑，天裂星飞芒赤色。星飞却入蛟人宫，侯兮侯兮归其中。天吴哀啸鼉鼉战，老蛟腾出为长虹。城中老翁拭血视，愿侯同生侯同死。侯无在舟侯在舟，高牙大纛沉于此。百川东流沧海波，山高水深当奈何。”二说不同，今并记之。

箭簇

灵壁县西五里，农人锄地遇一穴，以瓦盖之。发视，得箭簇一斛，莫辨其故。

舟吼

《南史·王琳传》，记琳将战，舟鸣如野猪。尝读其书而疑之。沈高士浩然浮海，舟忽鸣，音如巨牛，自旦至日中不止，众惧不能食。舟人请曰：“当祭而祈之。”浩然不应，作诗而自歌之曰：“石凭而言，惟德之衰。剑悲而啸，其将诉谁？刳木为舟，鸣孰使之？物有变化，吉凶安施？冥冥沧海，吾道在兹。受命于天，舟汝何为？”歌数阕，而舟之鸣亦止。

律毕香

婺州一怪，有声无形，能与人应答，善盗财物，妇女微有姿色，皆被淫。当其来，如梦魇然。或询其名，曰：“我律毕香也。”郡守患之，遣使乞张真人符，不能禁。时有林生者，善治鬼，结坛行法。三日后，闻空中汹汹如战斗声，妖遂绝，竟不知何物。予姊丈张孝廉士绅，随父宦其地，亲见之。

定水带

京师穷市，有古铁条，垂三尺许，阔二寸有奇，中虚而外锈涩，两面鼓钉隐起，不甚可辨。欲易钱几十文，无顾问者。有高丽使，旁睨良久，问价几何？鬻者诡对五十金。如数畀之，先令一人负之，疾驰去。时观者渐众，问此何名？使曰：“此名定水带，昔神禹治水，得此带九，以定九区，此特其一。我国航海，每苦水咸，一投水带，立化甘泉，可无病汲，此至宝也。”好事者随至高丽使馆试之。命贮苦水数斛，搅之以盐，投以带，水沸作鱼眼，少顷甘冽无比，遂各惊叹。鬻者言，闯贼陷京师，得自老中贵家，盖内府物也。然历览记载，从未闻此，高丽使何由知之？予未敢信也。有范生者，道之甚详，周亮工《书影》中亦载之。

奇门术

京师有李翁者，自号生生子，卖数于市。人往叩，但默书所祷事于小铜盒，翁即言某事若何，并道其人姓名甚悉。士大夫惊异，车马填塞。然大约验于前，不验于后，逾年，门遂寂然。予偶造其肆，见手持一册，迫视之，上列杂字千馀，或五六字，或数字，则以朱圈间之，绝无意义。弁邵康节先生一序，云是《奇门术》。《易》曰：“神而明之，存乎其人。”想翁之为数，仅得其形似而已。

本朝立法宽大

《遁园赘语》云：洪武二十二年三月二十五日榜文云：在京军民人等，但有学唱的，割了舌头；娼优演剧，除神仙、义夫、节妇、孝子、顺孙，劝人为善，及欢乐、太平不禁外，如有亵渎帝王圣贤，法司拿究；下棋、打双陆的，断手；蹴圆的，卸脚。千户虞让之子虞端吹箫唱曲，将上唇连鼻尖割去；指挥伏与姚晏保蹴球，卸去右足，全家戍滇。明初立法之酷，何以至此？几于桀、纣矣。今本朝虽当改革，禁网疏阔，真生民之大幸也。

旧臣姓名录

东海逸民者，不知何许人，不著姓名，不记乡贯，著《旧臣姓名录》一卷，皆明季荐绅入仕国朝者，其言曰：“沧桑以来，莖化为茅，雀飞成蛤。初疑巽权而待变，

久之革面而易心。既乖誓墓之风，孰显捐躯之节？虽有丝麻，愿无忘于菅蒯；眷言禾黍，岂遂弃其釜。然而年将六稔，事系千秋，歧路堪悲，河清难俟，姑存姓氏，以垂来叶云。”予谓逸民记载，不无微意，但义难一例，势有差等。即如癸未科诸公，或初登仕版，或未沾一命，遭逢鼎革，君子有恕辞焉。倘以为予一人之私，则我岂敢。

人腊

先少宰公致政归，有一边弁，赠人腊二枚，长四五寸，俱系男体，耳目手足悉具，贮以紫檀匣，云孕妇怀妊五月，设法取下，制入丸散，补益倍常。公为之惨然，却不受。吁，始作俑者，亦不仁甚矣。《尚书故实》亦载人腊，长尺许，云取僬僇人为之，大属无据。

狼入境

凤阳颍上县，群狼入境食人，行旅皆结队而过。

关中碑刻

客有饷予李北海《云麾将军》碑刻者，缺下半截。询之关中一友，云碑在蒲城县，日有摹拓者，土人厌其扰，盗琢下载之半，故碑本不全。又言，古今碑刻，莫盛于关中，然细加搜访，西安府学，自《十三经》外，则有二十八种；其在属县者，有一百七十一一种；在外府各县者，有九种，而宋、元诸拓亦在内矣。盖因宋向拱镇长安，拓三千馀本，民苦之，削其字；韩缜修灞桥，督工急，即磨碑石供之。罹此二厄，得全者几何？银钩铁画，多湮没而不传，是谁之咎欤？

宝炉

吾郡东关外有土阜，相传为王坟，莫知所自。明季有猎徒纵犬逐兔，见旁有孔穴，乘夜潜入。初觉冷气彻骨，乃投以火。良久复入，内有石床、石几，珍宝充斥。最后获一炉，翠色斑斓，形势殊古。其炉为豪家所得，置桌上，香烟自发，结成五色云，云中见白鹤飞翔，昼夜数起，真奇宝也。既而近墓居人入穴纵观，旁列短碑，云吴诸葛瑾墓。郡吏以擅毁古冢，物迫入官，惟炉不知所终。

黑虹

庚寅六月，黑虹夹日，首尾垂地。失记某日。

雨麦

凤阳府太和县，天雨荞麦。

缚笔作书

《传信录》曰：巡江都司朱士鼎，胆气绝伦。张献忠攻武昌，被获。戟手骂贼，贼断其右手，以左手染血洒贼。复去左手，弃之江滨。而士鼎不死，尚能缚笔于臂作楷书，亦一异也。

托生

山东前进士王晋，登州人，观察越中。家甚裕，栋宇巍焕，服用侈丽。年老病卒，魂投莱州潍县生员刘曰瑚家为子，才堕地，四顾久之，抚膺大哭。曰瑚举家惊怪，止一子，不忍杀，因叩其故。曰：“我本王某，托生汝家，今贫若此，奈何？”随话前生事甚悉，令召其二子、一婿。曰瑚如其言，潍去登二百馀里，不三日即到。语家事，纤悉不遗，其子伏地大哭。又命召妾李氏至，问：“床下埋金五百，得无为人所窃乎？”妾言：“公亡后，即取助丧事矣。”语毕，悲不自胜。于是二子分产之半授曰瑚，两家往来如至戚。宋莱阳琬亲见其事，为予述。

春草堂诗

寄笠道人者，姓盛氏，名蕴真。幼为给谏纳言侯公第三子所聘，未及于归，纳言父子殉节，遂誓不嫁，薙发入空门。道人读书能吟咏，曾题纳言《春草堂诗》云：“谢公游眺地，春草已无根。夕巷牛羊下，空檐鸟雀喧。可怜吁眵尽，徒有简编存。泪洒西州路，何人酬一樽。”“十载重游地，孤城带落晖。西园迷旧迹，北渚长新矶。玉树人俱尽，金庭事已非。何须问短笛，独立泪沾衣。”亦可感也。

虎横

蜀保、顺二府多山，遭献贼乱后，烟火萧条。自春徂夏，忽群虎自山中出，约以千计，相率至郭。居人逃避，被噬者甚众。县治、学宫，俱为虎窟，数百里无人迹，南充县尤甚。

城壕

九月，武陵候潮门，每夜闻墙垣有哭声，其音甚哀。识者曰，此城壕也。

日食

十月朔，日食。既，白光黯黯，小星皆见。

女化男

粤东新宁县文村，有妇人，其夫出外经商。数月归，妇已化为男子。因别居，后竟娶妻生子。忆前朝吾郡有莫儼臣者，娶武弁李玉孺女，定情之夕，抚摩不能入。久之，阴hu忽长一肉，渐如男人。莫大惊。别居三年，因遣还母家。盖李氏具二形，初犹如处子，情兴既发，遂露男形。李翁无子，一旦，为更丈夫服，出见宾客。复纳室，生一孙。莫生有妻而无妻，李翁无子而有子。李氏始以人为夫，继又夫于人，真天地间一怪事也。

奇疾

小校毕联元，偃师人，得奇疾，左股痛不可忍，呻吟累月。有僧谒门丐食，问其所苦，曰：“此肉鳗也，早治可活，今病深矣。”因刺其膝，出小蛇十馀条，如指大，僧持之去。逾数日，蛇复涌出，竟死焉。

麒麟生

辛卯三月，陕西平定州麒麟生。是日，有五色祥光绕牛身，遂产道旁，遍体生鳞，四足有甲。地方官护送至京师，观者云集。未几死。

天陨石

五月初一日，东长安门外，辰刻陨青石一块，大如斗。

烈妇殉义

七月。大兵破两粤，武进士熊朝佐者，坚守博白县不下，为土寇所害。夫人张氏收葬毕，谓部将曰：“我夫死忠，我可不死节乎？汝等为我办后事，更筑一台生祭我，我当死节自尽。”众初以为未然，见其辞气严决，不敢违，果为筑台。张氏沐浴登其上，南面坐。诸将再拜，具豆觞，为一再举卮。复谕曰：“死是我分，不足为异，惟冀诸君子尽忠报国，勿负我夫。”语毕，遂从容自缢。

吴中墨令

吴中一令，逸其名，性贪而淫。县治前民家妇，号“花冠菩萨”，色颇艳。令见而悦之，遣役通意，民不敢违，往来久，人无觉者。适诸生数人知其事，匿户外，毁门直入，灭烛乱殴。既而呼火，佯惊曰：“我师也，死罪死罪！”因请曰：“生等寒士，幸遇我师，望稍济其乏。”令曰：“此地无物，奈何？”曰：“库中物皆师物，但批数字，千金可立致也。”令窘绝，书片纸付吏。顷刻金至，剖之。不退，

复请曰：“须立誓，某等方散。不然，恐有后患也。”令益窘，执笔写数字。诸生裂之，曰：“必直叙始末乃可。”时天将曙，不得已，如其言，众始散。令后竟以墨败而去。

神索仆马

湖广田家镇，有吴甘兴霸庙，甚灵异。武进庄君罔生，典试楚省，夜泊庙侧，梦甘来访，延坐。临别，向庄索一仆一马，皆平日所爱者，梦中不得已，诺之。诘朝，仆、马俱死。

异蛇

江宁溧阳县产异蛇，长四五尺，名曰“蚩甲”，能隐形，尝出入人户内，不可禁。逐之者必遭眚，或善事之，贫者往往得富。予乡举房师江右邱公讳贡瀛，任濠水令，亲见之。实方书所未载。

沈翁鸩子

南浔沈翁者，性诚朴，家贫，生四子，俱有强力，衣食不给，日求自振之策而无由。一日，长子语诸弟曰：“我侪终年为佣，所得不过数金，不若去而为盗，富可立致也。”议既定，同告翁。翁力阻之，四子意坚。乃谬为好语曰：“不为盗饥死，为盗法死，等死耳，我不可禁，但今夕须尽醉，后死无悔也。”遂出钱令市酒肉，止一孙在侧，遣往探戚，约以翌午归。夜半，翁与诸子痛饮，户至晓不启，邻人窃窥之，则五人皆七窍流血死。盖翁惧子为盗，密买砒置酒中，又虑绝嗣，因遣孙出。若翁者，可谓勇且智矣。士大夫哀翁之死，而服翁之决也，竟为诗歌以美之。

自知宿世

封邱李公嵩阳，起家乙榜，视学江南，翕然有公明之目。自知其宿世之事，才能言，便能道其前生姓刘，居邑之东关，苦心诵读，年逾壮，犹为诸生。一日偶病，行药城隅，遇旧交李某，邀之同行，随至其家。忽将刘推倒，以红纱罩之。初觉闷极，须臾而出，已不能语矣。及长，尚能记忆。与明季彭城万年少寿祺之事，颇相类焉。

萧匠能诗

华亭萧中素者，字芷崖，幼业匠，喜为诗，运斤之暇，吟咏不辍。其《建业怀古》云：“千门柳色近萧条，白下楼台矗绛霄。江口舳舻连铁瓮，月中弦管乱铜刁。高牙大纛将军幕，碧草黄云帝子朝。欲向雨花参半偈，片帆无计渡金焦。”虽仅能近

体，且他作不甚工，然视张打油、胡钉铰，则少有间矣。

白龙吐珠

壬辰五月二十六日亭午，有五龙见浦南叶谢。其一龙飞至张泽镇，风雨晦冥，摧屋拔木，桥梁皆掀舞空中。龙长数十丈，白色，鳞爪俱见，口吐一大珠，晶莹澄澈，盘旋烟雾中，火光烛天，河水腾上。一人迫视之，为风所卷，行半里始坠。移时，龙向西南而去。按崇祯三年五月二十三日，宝坻县午后有五龙斗于空中，上下数十丈，先小后大，揭去民房二十馀间、驴二头，庄民华秋被卷去，过河掷下身死。未几，兵起。龙斗之下，杀戮最惨。见先少宰公所著《择言小草》中。

均田均役

吾乡财赋之区，困于徭役。前明编审大役，有细布北运南运种种名色，赔累者不少。然大率官吏廉谨，户口丰足，虽横索，无苛派，故民犹乐于趋事。今朝大役，止有收兑，而破家亡身者十之九，盖因充役一名，计费银一千二百两，稍朴诚者其费益繁，民生惴惴，朝不保夕。当其始议，以为主户充，客户贴；大户充，小户贴。语非不善，乃富民必诡寄，而充者必穷民矣。客户或殷实而免脱，主户反赤贫而承值矣。时无召、杜，往往厉民，可为叹息。后娄县尹东郡李复兴者，采纳舆论，力倡均田、均役之法，上司特为入告，得允所请。于是百年之弊，一朝而革。迄今乡城殷户、故宦子孙，得以各保其产、各安其生者，皆李令之力也。

种痘

安庆张氏传种痘法，云已三世。其法，先收稀痘浆，贮小磁瓶，遇欲种者，录小儿生辰，焚香置几上，随将黄豆一粒，傅以药，按方位埋土中，取所贮浆染衣，衣小儿。黄豆三日萌芽，小儿头痛发热。五日豆长，儿痘亦发。十日而萎，儿痘随愈。自言必验。夫痘疹事关先天，生死预定，乃欲以人工夺之，亦巧矣哉。

橘异

粤西太平府，距城十馀里，有大橘树，荫一二亩，蛇虺蛰其下。每霜后红实垂垂，多至数十石，人相戒不食。缙云一明经，宦游过其地，摘啖之。既而就邸，邸主人见其目赤，大骇曰：“君得无啖橘耶？勿累我！”急驱之出。少顷，遍体发肿，仆地自跃，跃不已，先脱两臂，又脱两股，化为巨蛇，入橘林而去。

栎园笔记

周栎园《笔记》曰：六安生员朱鹏死，无子，妻有遗腹，过期不产。鹏弟利兄所有

，以为诈，诉之官。鹏母上言。妇实孕。久之不育，以为蛊疾也。共历五十六月，同姑视获，产田中。人见其久而生，谓此必昌朱氏，名之曰“应昌”，编入州志。年四十，迄无就，为齐民。

议裁提督

吾松旧制，吴淞设总兵一员驻防，其余沿海如金山卫、川沙等处，各设参戎，形势联络，海滨有警，一呼俱应，最为得策。自国朝，虑海氛飘忽，专设提督，坐镇府城。去海百馀里，分防诸弁，往来请命，缓急不能即赴。贼往往乘隙扬帆突入，屡遭劫掠。逮遣兵至，而已无及矣。况提镇衔尊势重，坐享荣华，糜兵耗饷，有害无益。兼之兵民杂处，尤属不安，百姓房屋，半成营伍。洪内院承畴议撤提督，以总兵驻吴淞，科臣亦有筹及者。何时得复旧制，使郡中士庶复睹升平之象耶？

虎邱修禊

吴阊宋既庭实、章素文在兹，上巳日飞笺订客，大会于虎邱阜。江浙二省及自远赴者凡二千人，吾乡与会者二十馀人。先一日，布席山顶。次夕，联巨舰数十，飞觴赋诗，歌舞达曙。翌日，各挟一小册，汇书籍贯姓名而散。真修禊以来一盛事也。吴祭酒以诗记之，云：“杨柳丝丝逼禁烟，笔床书卷五湖船。青溪胜集仍遗老，白谿高谈尽少年。笋屐莺花看士女，羽觞冠盖会神仙。茂先往事风流在，重过兰亭意惘然。”

秦省雨雹

五月初六日及二十一日，陕西省城大风霾，雨雹复作，雹大如鸡卵，鸦鹊纷纷堕地，顷刻堆积。

蚩尤旗

六月晦，漏二下，东西各有白气，光芒相射，长丈许，数刻而灭。曰此蚩尤旗也。

巨鲇

闰六月，上海人饮牛春申浦，忽见浦中两鬣，高三四丈，乘潮而至，啮牛足入水。众力救，牛得无恙，股间啮痕大三寸许。访之鱼人，曰此巨鲇也。

犬奸

关东一妇，性淫荡，夫往戍所，经年不归。家畜一犬，黠甚，妇每置于怀，因与之

接。犬与人道无异，而健捷善鬬戏，能昼夜不息，绝爱之。未几遂孕，弥月一产三犬。地方以为妖，闻于官，细鞫，始得其实。

三冈识略卷二补遗

狐怪

崔御史某，北直长垣人。尝差往某处，日将暮，仆从前觅馆舍，独骑一马行。忽睹一妇人步马前，缟衣绣裳。崔心动，妇忽回顾，姿态妖艳，目挑心许，以行人踵至，不及款语，遂策骑赴驿。竟夕不寐。事毕复命，一夕独坐，闻叩户声，启视，则前所见妇人也。讯其何来，曰：“知君见思，特来相就耳。”心颇疑惧，而悦其色，因留与狎。妇肌理莹滑，言词慧利，笑语横陈，曲尽衽席之妙。叩以姓氏，曰：“久当自知，今幸邂逅，永侍箕箒可耳。”居数月，颜色顿减，家人劝令速遣。崔亦疑踪迹莫考，乃缓辞之。妇怒，变作夜叉状，朱发靛面。惊仆，逾时始苏，则妇在侧，宛然如旧。因好语曰：“与君恩义甚深，无听人言，顿生异念。倘复见拒，恐身命亦难保也。”骇极，不敢复言。未几，巡两越，舟次广陵，妇坚不肯渡江。力挽之，复现前形，乃告病回籍。久之，视鹺淮上，妇亦从赴任。妻妾既不敢同寝处，凡事受制，郁郁不得志卒，妇遂隐不见。识者谓，江南无野狐，此妇盖狐精也。夫妖由人兴，苟秉正直，即处微贱，邪岂能干？乃俨列绣衣，顾终其身为淫兽所侮，赍恨而没，此其人亦大概可见矣。

玉蟹

洞庭之阳，一民家门枕巨石，相传已数世。忽有望气者谓曰：“是中有物，愿以三十金易之。”民以为奇货，姑索三百金。其人慨然曰：“诺，我归取金，必留以待我！”民大喜过望，恐为人所窃，率妻子掘置密室中。至期，其人果至，抚膺叹息。惊问故，曰：“此石中有玉蟹，殆千岁物，乃日月之精、雨露之气相结而成，饵以水穀可活，实希世之宝。今置室中久，形具而神已槁，无所用之矣。”剖之，果得一石，宛然蟹也，但勿能动耳，货之犹获数十缗。

妖术

京师有妖人，群行于市，呼人姓名，有误应及回顾者，即觉昏迷，随之去。引至僻处，搜剔囊橐，甚或挤之于水，罹害者众。事发被获，悉寘之法，乃止。

蜈蚣

南塘张氏墓，林木蓊郁，有蜈蚣二，长丈馀，足皆数寸，夏月悬树间，若曳正练。夏公允彝尝言，宦闽时，被檄至海滨，见一物形如车轮，螯若巨斧，当道而立。众

聚击之，熟视乃蟹也，烹之，得数十人饌。乃知海鱼吞舟，巴蛇食象，无足怪者。《海内经》云：海中有千里蟹。《玄中记》云：北海之中，蟹之大，举螯如山，身故在水。然则此蟹又不足言矣。

牡丹

牡丹种类繁多，《洛阳》、《陈州》、《天彭》诸谱，载之甚详。近有予族人某，颇好事，以重价买得一本，如世之所谓“玉楼春”者，微带紫色，上缀碧瓣，高出半寸许，迎风款款，宛如飞蝶，名曰“蝶穿牡丹”，盖异种也。初植时作花八九朵，次年减其半，又次年并其本不存矣。天下之物，贱者易茂，贵者难成，大抵如此矣。

河决

河决金龙口，役夫数千，糜费以万计，编柳为牛，大数十围，实以土石，沉于河，阅岁功始就。尝考汉建始中，河决馆陶，犍为王延世取竹落，长四丈，大九围，盛以石，两船夹而下之，三十六日河堤成。其难易固有悬绝者。

鱗怪

润州一渔人，夜泊江渚，见一黄衣女子，年可十三四，头绾双髻，从芦苇中出，就人乞食。食已即去，每夕如此。怪而迹之，见一鱗长五尺许，金色，目如丹砂，首有肉角，见人跃入江而没。

毗陵女子

毗陵吴氏，名家女，十七通诗书，姿态艳丽，约婚某氏。闻其夫不慧，常私恨之。一日出游，邂逅娄江王生，一见相悦，遣婢通意，婉娈尼寺中。往来半载，渐有觉者，于是挂帆而遁。夫家鸣于官，迹之，获于旅邸。氏不愿别适，愁容瘁服，亲自供状。郡守览而异之，断还聘金，听归王生。其供词一日传遍人口，今录于此：“贱妾生从桂苑，长自兰闺。罗敷总发之年，弄玉初笄之岁。无情无意，何怨何伤。祸因踏春南陌，随喜东禅。有太仓王生者，援琴而挑，心漫传于流水；投梭难拒，佩乍解于江皋。始托红叶以通词，终藉绿衣而申约。迎风和韵，竟成鄂渚之媒；对月调弦，遂荐巫山之梦。抱锦衾于萧寺，绾翠带于西厢。园中栀子，未喻同心；池上鸳鸯，羞夸比翼。于是贱妾踵西施之约，王生驾范蠡之舟。何图风波顿起，云雨惊飞。王子义造成口剑腹刀，杨介仁织就罗钳吉网。白面书生，指为吒利；红颜女子，认作梁清。命之不犹，夫复何恨！昔卓氏缙素而赴相如，汉皇勿罪；红拂紫衣而奔李靖，杨帅勿追。伏祈将奴断配王生，了却三生业债，完此一段良缘。勿令重瞳之配，伏剑军前；应怜季伦之姬，捐躯楼下。”两家父母深耻之，而吴下相传，

诧为奇事。

木龙

鄱阳湖有大木，乘风鼓浪，昂首掀舞，远望如龙，一月数见，土人呼为“木龙”，犯之者能覆舟，有祷辄应。粮艘骈集，皆虔祀之。中有十馀艘笑其妄，扬帆先行，至中流，忽遇木龙撞击，一时俱沉，救援不及。洞庭有楠木大王，想即此类。

先府君轶事

北关民昌留者，负人钱，岁暮逼迫，无可为计，卖妻五十金以偿。临别，道经予舍，携手痛哭。先君仲隆府君，适送客见之，叩其故，以实告。呼之入，即如数与之，曰：“以此偿逋。”复赠五金，曰：“汝夫妇可将此度岁，无生他意。”留与妻泣谢而去。至是，忽有衣绣衣、乘四人舆者，求见府君，叩头伏地，大哭，扶之不肯起，熟视乃留也。数年前入海岛为寇，来降，授总兵职衔矣。馈送颇如礼，府君笑而却之。

巨蛛

九月，泖滨人樵于野，见一古冢颓坏，俯窥，内伏巨蛛，形如箕，因举梃奋击，腹破，获一珠，大类龙眼，夜置暗室，光明达曙。一富翁以穀数斛易去，后不知所之。

地理不足据

越中一绅，隐其名。宦归，家钜富，颇恃势横行，择地葬亲，久而始得。不数年身死，子弟俱不肖，家中落，地竟无验。尝记吾吴昔有萧生者，精青囊术，为富家择地，足迹几遍山谷，竟无吉壤，因题一诗于斋壁曰：“行尽前山与后山，寻龙不见又空还。想因此去无多路，只在灵台方寸间。”今人动称难于觅地，读此可以醒矣。

冒族

吴俗最喜联谱，如张姓极繁，必合为一族，不问良贱。此风今盛行，不独江南矣。然有大可笑者：吴门某，耻厥祖寒微，冒一远年词林为高祖。词林向绝嗣，并族中无一人，以为此独得之秘，遂自高祖以下皆私名号，刻单传观，以示可信。将本生一笔抹去，世禄自命，居之不疑。或诮之曰：“先人白屋，一旦化为朱门，荣则荣矣，然置祖宗于何地乎？”可发一噱。

谭谿语

张氏凤翼《谭谿》曰：“凡人兄弟叔侄间有登科甲者，亦足为家庆。乃有生忌心者，宁冒认同姓贵人为宗，攀援异姓贵人为戚。”斯言也，其殆有所感而发乎？然以予所见，不独忌也，而且加谤焉；不独谤也，而且欲下石焉。百计诋诬，惟恐其胜己，而于受者初无所损也。谁无同气？而忍至此，可为三叹也。

佣工奉道

洞庭席氏张巨肆于松闵镇，一佣性谨，虔事三元，日夕靡间。一日，索佣值，欲弃家焚修，因具舟送归。渡渚，舟子利其所有，缚手足，繫以铁猫，沉之于水。日暮，忽大雷电，席氏中庭堕一布囊，上□铁猫，启囊则佣工也，见者大骇。久之，佣苏，具道其故。阅数日，舟子来索值，佣携饮食出劳之。叩头请死，金尚宛然。众欲闻于官，佣力止乃已。

天门开

癸巳二月，襄阳人见天门开，光明洞照，有黄旗二，长各数丈，自上属下，从空飘，隐隐有二十馀字，至暮始灭。

慎刑

时海内初安，边疆底定，上留心刑狱，谕刑官曰：“国家不得已用刑，必情罪允当，斯受者无怨，不可任喜怒为轻重也。今问刑衙门，恐以情面生疑，护庇为咎，往往故入，作自全之计。朕一日万几，虑不及致详，死者不能复生，咎将谁归？夫为盗之民，犹许自首，叛逆之众，广示招徕，而况有职朝臣、无知赤子，即或罹罪，尚不忍杀，岂得陷以刻深，致滋冤滥？自后务详审真情，引用本律，一切钩索罗织，俱宜痛革。与尔诸臣，共期刑措。”大哉王言，好生之德，真可媲美尧舜矣。

燕麦

时淮南北旱荒，禾稼悉枯，三时已过，惟荞麦尚可莳，人争市其种。泰州一富家积麦甚多，市于邵伯镇，获利颇厚。复载以来，增价发卖。忽阴云四合，雷电震击，其人立毙，所载之麦，飘播四野。仆震死复苏，询其由，云主家积此麦二百馀石，虑不得善价，从而蒸之，一以期数增而利厚，一以期其不出，更载馀者以市，皆熟麦也。故有此报。

棺有定数

越东昌化县周生，性旷达，母丧治櫓，并自治其一，置室中。一夕，梦其祖坐堂上，召语之曰：“此棺已付汝子矣。”未几，酷暑中子暴死，仓猝移用。周后赴岭峤作幕，卒于道，竟不获敛。《耳谭》记鄂城一叟，壮岁制棺，常梦绯衣少年卧其内。后高苏门先生宦楚，暴卒，诸司强以百金购之。叟曰：“民不敢辞，但愿一观高公耳。”及入，俨然梦中所见，乃知一棺亦有定数。与此事颇类，陈进士秉谦为余道。

三冈识略卷二再补遗

神灯

越州余姚县有神灯，春夏之交始见，东郊岳庙为最盛，游人凭高俯眺，初见一二点，冉冉从庙出，已而渐稠密，百千成群，熠熠往来。或见灯聚处，使人趋视，则无有，其人回视故处，或反有之。出没变化，不可纪极，自初更，至钟鸣则灭。俞进士璘约予往游，竟未果也。《草木子》曰，神灯，名山大者，往往而有。如峨眉县峨眉山、成都圣灯山、简州天光观、衡山圣灯岩、匡庐神灯岩、明州天童山、高丽太白山，皆有之。

分县

知府李正华，议分华亭之半为娄县。正华患逋赋山积，委罪无从，谋立官以分咎，于是力请抚军，分华之半为娄。至顺治十二年，始得请。自分县之后，凡学宫衙署、官吏廩饩，势不得不增，而游手无赖，投充胥役，弊端愈繁，民生骚然，而积逋如故，其贻害有不可胜言者。正华初未审究利弊，博采舆论，徒恃臆妄行，而上官误信，我郡诸君子，又不起而力争之。吁，可慨也！后言路屡陈应照旧制合并为一，竟不可得。正华之罪，可胜擢发哉。

海寇深入

九月初六日，海寇深入春申浦，围闵行镇，抢劫一空。郡城及各村落，皆纷纷惊窜。既而乘潮挂帆而去，出入自如。官兵数十，仅骑马遥望，侦其已去，弯弓鼓噪而已。

塔影

我郡西关外有曹姓者，工医术。晓起开户，见大门有塔影倒挂其上，盖西塔影也，莫解其故。如是十馀年，积费至数千金，后忽不见，家遂中落。尝见《猗园记》，海虞城东塔，落十五里外水中，天晴，倒影九层，历历可数。又一僧房内小屋，窗中隙光射壁，宛然见小塔。天下事，有不可以理测者。《辍耕录》亦载此异。

兵变

十月，山东胶州兵变，总兵海时行自称新兴王，破数县，四出劫掠，官军讨擒之。

神索书

沈学士荃，字绎堂，壬辰殿试第三人，清修好士，尤工书法。西关戚家巷，有五通庙最灵。一夕，庙左一士，梦神来谒曰：“某欲得沈公一扁额，烦君为我致之。”士素不识沈，沈之客计生南阳，居相近，往告之，为代书，悬祠中。夜半，复见梦曰：“某自求沈公真迹耳，计生贻笔，何足贵乎？可为我易之。”士惊寤，投刺谒沈，具语其故。异而与之。是夕，复梦神来谢。学士名位显赫，神盖预知之矣。

昌国县

舟山，宋元旧设昌国县，四面环海，属定海，城止四五里。有十八大畝，山田水田，计四万馀亩，人民朴略，畜养繁茂，地擅鱼盐竹木之利。明初，汤国公巡视沿海，创建城堡。崇明特设县，昌国正宜设县，以资防守，乃独废之，致贼屯聚，不知何故？海寇方殷，当事者所宜熟筹也。

寒穴泉

《墨庄漫录》载，华亭县有寒穴泉，与惠山泉味同，邑人鲜知者。王荆公有诗云：“神震冽冰霜，高穴雪与平。空山渟千秋，不出呜咽声。山风吹重寒，山月相与清。北客不到此，如何洗烦醒。”宋华亭属秀州，不知此泉在何山中，惜不可考。

贪横之报

缙绅之裔，流为奴隶，虽曰子孙不肖，然似属冥报。华亭有聂某者，鬻身于朱会元锦。朱夫人晓妆，聂妻陆氏持镜旁侍，泫然出涕，镜堕地而碎。朱叱曰：“我登巍科，汝得为奴，幸矣，有何不足，而若有不豫色耶？”陆泣谢曰：“非敢然也，氏父与翁，俱叨甲榜，曾祖亦会元，以此伤心，不觉泪下耳。”细叩，始知为陆文定公之孙、进士庆衍女，而聂吏部慎行之媳也。大惊，亟遣归。吏部贪狠，为害乡里，以恶疾死，未二十年，诸子非死亡则沦落不偶，天之报施，益信不爽。

鬼诗

黄生雪芳，老儒也，家贫，寓横云之萧寺。一日薄暮，独步林麓间，见一客幅巾袍，揖生坐石上，相与议论古今，吐词清雅。谓曰：“闻君善诗，仆偶得一绝，愿奉闻，可乎？”遂朗吟曰：“山花不复春，涧雾滴如雨。寂寞青松根，鸟啼墓门树。

”生惊起曰：“何乃似鬼语耶？”回顾忽不见，怅然而返。

王襄敏

明王襄敏公以旂，家旧京聚宝门外，屋宇朴陋。及官都宪，有劝其买徐氏大宅者。公往看，随报罢。或问其故，公曰：“此府第也，门堂广大，必常得青衣数人守之。我一老书生，安用此为？况儿辈乎？”竟老旧宅中。呜呼，公之识见过人远矣。士大夫苟读书守礼，当以王公为法。

阴丹

阴丹之说，最为误人，王长生《真人口诀》曰：“不敢为主而为客，慎莫从高自投掷。侧身内想闭诸隙，正展重壶兼偃脊。四合五合道乃融，翕精吐炁微将通。嫋嫋灵柯不复空，徐徐玉垒补前功。沂流百脉填血脑，夫妇俱仙得此道。”其解详《云笈七签》六十四卷中。又经曰：“欲求此生寿无极，阴hu初开别消息。”然知者以之续命，不知者以之丧生。今之术士，借此欺世，还精补脑，百无一人，殒身绝嗣，后悔莫及，可不戒哉！余曾有诗云：“素女纤腰托紫晨，纷纷吐翕恐难真。灵柯玉垒传遗诀，莫把阴丹误后人。”读之可以悚然悟矣。

续香草

延陵吴氏名湘，字漱玉，年十六七，姿态艳丽。蚤有风流放诞之目，为某妾，佣奴其夫，邂逅唐生，遂越礼焉。某讼之郡守，守命赋“枷词”，有“最新闻，风流刺史，独桌宴红裙”之句。守大称善，判归唐。未几，唐死于兵，湘被掳，后宛转归清河氏。时逾四旬，艳如旧，宠之专房，竟至丧生。所著有《续香草》，大抵皆绮丽之语。其悼亡云：“一自修文赴玉楼，苦无青鸟渡瀛洲。看花曾恋千金黛，倚槛曾添半臂鞦。醉掩绮疏魂梦断，吟残幽阁粉香愁。怜君不及多情月，伴我盈盈到白头。”临风怀旧，情绪堪怜，但不知所悼者为何人耳。

传经

我家世习《尚书》，宗人之举于乡者，皆壁经也。再传而后，族姓益繁，亦有分授各经者，然三百年来，科第不绝，竟无一人以他经获售，亦一异也。

削须偿米

我郡顾正心者，字青宇，父官少宰。正心善心计，多智数，家业日大。捐银十万四千馀两，置义田四万八百馀亩，合郡皆食其德，前朝义之，命永复其家。再传以后，家渐落，至曾孙名威明者，已粥不给矣。时朝廷忽下所司，尽还其产。顾以寡人

，骤拥富厚，豪兴顿发，广交匪类。性喜博，又酷好梨园，聘四方轻薄子，演临川《牡丹亭记》。有一年少，应剃髭髯，装杜丽娘，进曰：“俗语去须一茎，偿米七石。倘勿吝，乃可从命。”顾拊掌笑曰：“此细事耳。”即令一青衣从旁细数，计削须四十三茎，立取白粳三百石送其家。诸人互相怂恿，益为豪举，所费不貲。不四五年，以逋赋为县官所拘，缢死于狱，而所谓五万亩者，亦竟不可考矣。

不喜见俗人

予性迂拙，颇不喜见俗人，偶遇，便褰裳去之，以此每与世迁。然如阮宣子辈，古亦往往有之，不独余也。昔人云：“无求莫问朝廷事，有耻难交市井人。”斯言也，殆余之知己乎？

鹤冢

庭前有虬松一株，乃先君子手植也。枝干扶疏，亭亭如盖，予每趺坐其下，盘桓不能去。忽有双鹤，结巢其巅。数日后，雄被弹死，其雌孑然独处，予朝夕遣人护视之。一日，向余踯躅哀鸣，似将言别者。明晨起视之，已死矣。因瘞之松下，积土为坟，人皆呼为“义鹤冢”云。

白席

今人燕客，一人傍立，高唱举杯、举箸，及茶点之类，甚觉聒耳。然赵宋之时即有之，谓之“白席”，见《老学庵笔记》。

乳田

予偶客濂水，买市间乳饼供早膳。方食顷，适同年黄君至，谓曰：“此不可食，宜急覆于地！”叩其故，曰：“土人取朽草布阴湿处，日以秽物渍之，久之生虫，蠕蠕然渐大如蛹，形状可畏，压其汁以充乳，售与过客，非真牛乳也。”予闻不觉呕哕，几至委顿。后阅张氏《白獭髓》，载广中韶阳，有种乳田者，先掘地窖，以粉铺于内，取草盖之，壅以粪壤，俟粉化成蛹，作汁，汁蒸成乳食之。此系恶俗，不知江左何以传此法也。客游者不可以不知。

方氏杂戒

侯城方氏曰：人宁可以不食，而不可以不学。不食则死，死则已；不学而生，则入于禽兽。古人所谓皋夔稷契，何书可读？彼愚忠愚孝，独何人欤？况学而入于禽兽者，又不少也。

五湖

洞庭两山之胜，余神往已久。适于孟冬，有山中友人见招，欣然鼓枻。抵湖口，忽风浪大作，三昼夜不息，于是辍棹而返。洞庭古名震泽，又曰具区，曰笠泽。其谓之五湖者，按志，因东通松江，南通霅溪，西通荆溪，北通太湖，东又连韭溪，故名。又云，中为菱湖，北为莫湖，东逼胥湖，长山之东曰游湖，通晋陵境者曰贡湖。其名不同，然总一太湖，即范蠡泛舟处也。予初拟登缥缈之峰，憩林屋之馆，探洞天之轶事，访角里之故居，而兹又不可得矣。因口占一绝云：“白雁横空木叶飞，峭帆西去访灵威。那知咫尺三山路，万顷风涛辍棹归。”《荆州记》言，君山上有道，通吴之包山，故太湖亦有洞庭，下潜通君山。吴楚相去颇远，不知其果否也。

姓名杂考

仓颉姓侯，名刚，见古文。许由字武仲，见《庄子释文》。伯夷名允，字公信。叔齐名智，字公达，见《论语疏》。仲雍字熙哉，见《史记注》。老子初生名玄禄，见《玄妙内篇》。孟子父名激公宜，母仇氏，见《瓦釜漫记》。介子推姓王，名光，见方氏《通雅》。孙叔敖名饶，百里奚字百井，鬼谷子姓王，名□，文翁名党，杂见诸书。汉太公名熒，字执嘉，见《帝王世本》。易牙名亚，见孔颖达疏。伯乐姓孙，名阳，见《庄子疏》。陈仲子字子终，见《高士传》。伏生名胜，见西汉碑。壶关三老姓令狐，名茂，见荀悦《汉纪》。李筌字达观，见《神仙感遇传》。关云长本字长生，见《三国志》。失马塞翁姓李，见高允诗序。武陵渔人姓黄，名道真，见《三洞群仙录》。赤壁吹洞箫客，乃绵竹道士杨世昌，见吴匏庵诗。

三冈识略卷三

【甲午至戊戌】华亭董含著

冰雹

甲午五月，陕西平凉、陇西二县冰雹大如斗，伤禾稼。

柘泽神显灵

青溪柘泽桥杨侯庙最灵。有进士韩君理者，济南人，为松郡司理。七月初二日，经庙侧，遇巨舫，中一人乌纱绛袍，侍卫严肃，举手相揖。少顷，见一青衣吏，率蓬首妇人直入案前，语久之。左右皆不见。盖司理家居时，曾屈死一孀妇，奉彼处城隍神关文，迤邐至松也。须臾疾作，不数日卒。书役朱千之，向助为虐，与妻同寝，忽蹶然起曰：“本官与杨侯将到，当往迎之。”因疾趋出门，跃入水中而死。

紫冈著述

余宗紫冈先生，名宜阳，字子元，博学善诗古文，与徐长谷忠献、张王屋之象、何元朗良俊，号“四贤”，著述甚富。有《金兰集》一卷，皆一时名贤赠答之作，惧简编遗落，今备载其目于左：

《紫冈草堂记》，徐忠献撰。

《遗安堂记》，孙承恩撰。

《曲水园记》，黄佐撰。

《陇西别业记》，张之象撰。

《城南草堂记》，张世美撰。

《西斋藏书记》，皇甫汈撰。

《旧林赋》，徐忠献撰。

《咏风堂赋》，袁尊尼撰。

《紫冈赋》，卢柟撰。

《□园歌》，沈明臣撰。

《檐□斋铭》，方道成撰。

《寒绿亭赋》，盛时泰撰。

《漫园记》，张世美撰。

《董氏元卜筑疏》，莫如忠撰。

《西霞山房铭》，董氏宜阳自撰。

瑞应

浙郡一士，将赴省闱，忽盆池长并头莲一，又每夕盆内闻丝竹声，士大喜，殊自负。客有以语先曾叔祖文敏公者，公曰：“此行必捷，然功名其止于此乎？”至秋，果中式。后屡被斥。客复叩故，公曰：“此细事耳。三年一举，何止数百人，乃独示瑞，故知非远到之器也。”近有一生，略负文望，试后将文录出，手加圈评，遍夸同辈，竟亦无成而卒。三复公言，益信不谬。

违式被黜

嘉禾张明经自幼习《五经》，文思甚敏，乡闱作通场题，如期而毕。以违式贴出，愤甚，伏阙上书，言：“臣家贫力学，值秋试，构成二十三篇，乃与不完者同列通衢，乞吊卷呈览。如果差谬，自甘沦落；倘有一得，亦望收录。”不报。昔崇祯甲戌，漳浦颜君茂猷作《五经》艺，考官以闻，钦命列正榜前。可谓有幸有不幸矣。按颜君特赐二甲第二名，本朝丙戌科法若真、丁卯科查嗣韩俱以《五经》中式。

祖墓先兆

我家自南渡以来，始祖讳官一公墓，形家谓之“金钩钓月”，相传江西赖布衣大有所作，内有漆柿一株，长二丈许，皮中空，大仅一握，每乡举年结实，则宗子必发一人，历试不爽，载入郡志。明季枯死，垂二十馀稔，至顺治辛卯，忽复生，枝干渐茂。甲午始结实，而余侥幸中式。后庚子又结实，族人有应试者，偷折归，供胆瓶中，朝夕焚香顶礼，乃竟被斥，而余弟俞复得隽。但馀岁亦或结子，且不止一实，大约遇试期所结不过二三，又以经霜不落为度，过多反不验。然其间亦有定数，数既定而后物之气应之。凡我子孙，仰承祖泽，宜积学励行，以期显扬，无徒委诸草木可也。

鸦非凶兆

先府君宅与大父少宰公大宅前后相望，分授长房。余乡试后，有群鸦数千飞绕祖居，晓夜屯宿，驱之不去，人皆以为不祥，共四五日。余侥幸获隼，报至，鸦始散。尝见玉峰归奉世纪长洲章生家，亦有此异。

鸟语词

冬十二月，余计偕北行，驱车大梁，疲甚，憩一古刹，见壁间有《鸟语词》数首，后书“广川子题”。偶录于此，

其一曰：“不如归去，血染沙场无宿处。野阔天低塞草枯，一身飘荡随飞絮。腰间宝刀光吐花，月明夜夜闻吹笛。楼头少妇掩镜泣，征夫何不思还家。”

其二曰：“泥滑滑，铁骑奔腾山欲拔。寒鸡三号夜未央，角声又向江楼轧。朝驱马尾暮挽船，手提浑脱安能前。家乡回首千万里，谁知死在桑乾边。”

其三曰：“行不得也哥哥，河南河北皆干戈。前逢官兵后逢盗，飘零十口将如何。拂面西风鹿扑漉，荒崖白骨狐狸啄。谁家双鬓行得迟，横拖上马闻啼哭。”

其四曰：“交交桑扈，日色昏黄桑柘苦。官军尽数砍作薪，前往求他拔刀怒。柳绿拂地榆荚长，哀哀寡妇空提筐。野蚕作茧大如瓮，秋风那得成衣裳。”

其五曰：“鹁鸪鸪，雨多水涨生蘼芜。鱼飞稻田蛙产灶，可怜有地无人租。兔葵□得连根煮，露笠烟蓑愁不语。闻说明朝要打粮，相将又向他方去。”

其六曰：“脱却布□，水冷天寒那得渡。田园荒尽无人耕，闻道官司又增赋。经旬乏食常苦饥，朝来两度遭鞭答。县官掉头不肯顾，无数烦冤当诉谁。”

其七曰：“提壶卢，前村有酒君莫沽。千钱不买一斗米，枯肠沃水如醍醐。书生本是雕龙手，憔悴功名惊老丑。拟向阳昌醉几场，却少金龟来换酒。”

其八曰：“得过且过，衔泥无力巢难作。翠翰剥落寒侵肤，况遇今霄风雪大。百丈虬枝嗟只立，微躯敢羨蛟龙蛰。深山日暮行人稀，夜雨荒郊鬼灯泣。”

陆逊女墓

华亭南桥北二里许有刘叟，晨往田间，遥睹一红裳女子，徘徊岸侧，久而不去。迫视，无所见，如是累日。疑土中有异，呼儿之□。不数尺，获一砖，砖式甚古，下

遇巨塚如数间屋，旁有穴，窥之，内有石板，板上卧髑髅一具，前植短碑，镌字十有二，曰“吴陆公逊第三女王夫人之墓”，左列石几，供瓦盆一，色如玉。其人取盆归，忽见红裳女子先在其室，或隐或见，随感疾卒。盆为好事者取去，云无他异，惟盛水一泓澈澈，经岁不竭而已。

阴镜

南塘李氏家传一石，名曰“阴镜”，其形类镜，而黑色无光。至暮，白气黯黯，更馀光始发，皎洁若月，洞照一室。黑夜愈明，天将曙，光乃灭，真希世之宝。后遇乱，不知所之。

地震山合

乙未二月初五日午刻，江南地震。六月初八日，又震。又三辅地震，坏民居千馀间，既而两山相去百里，一夕忽合。

假目

吾乡章进士霖，登第时年垂耳顺。眇一目，厥状颇丑。及引见，希木天之选，惟恐不得当也，于是盛服饰，冠佩甚都，并剪纸为睛，粘于目内，远望双眸炯然。既至上前，不觉脱落，见者皆匿笑。偶见一小说，载唐施肩吾与赵嘏同年不睦，嘏失一目，以假珠代，肩吾嘲之曰：“二十九个人及第，五十七只眼看花。”盖古亦有此事矣。

私女失元

闽王给事命岳，甲午公车至畿南，遇雨不能进，投避村舍。其主人前晚梦神告曰：“来日王状元至，善待之。”醒而大诧，垂暮给谏至，仆马瘡痍，问之乃闽中王孝廉也，大喜延入，礼以上宾。诘朝，雨益甚，主人固留。给谏少年颀秀，主人有女及笄，以梦故，欲归孝廉，意未泄而彼此目成，已私谐缱绻。主人觉，请以为侧室，且告以梦，订登第日相迎。亡何榜发，及殿对，进呈第一。中官送阅，忽卷从中析而为二，遂落二甲。当中式后，给谏亦感梦，以是女故，若有所谴责，寻与同馆话及此事。叹曰：“为一女子，失我大魁！”甚恨之，欲渝约。其同年力劝成之。夫主人之女既心许于前，又复议聘于后，止多一私遇，遂遭峻罚，可不戒哉！盱江徐君芳《悬榻编》载甚详。

禁蛇

江宁一术士，自云能制毒蛇猛兽。偶至吾邑，幕府欲试之，舁至大教场，先令其禁

蛇。士禹步握诀，蛇绎络奔赴，四百盘绕。复咒之，乃各散去。

日中黑子

三月二十四日申刻，日中有黑子，久之乃散。

科名定数

延陵巢君震林，壬辰礼闈中式一百六十二名，以他事被革，落魄归，不复以进取为意。友人力劝，不得已再上公车。及榜发，则仍一百六十二名也。夫名次前后，尚一定如此，人岂可徼幸非分耶？

填榜失判

《云间杂志》曰：万历癸丑会试，填榜至一百十六名刘芳节，草稿失判一条，仓猝补入副卷第一名，乃上海董少宰公邃初也。此先祖遗事，附记于此。

墨汁污卷

越西一孝廉，负美才，兼有所请托，会闈自谓必捷。七艺既毕，展卷朗诵，意甚得，以手拍案，砚忽自举，墨汁淋漓卷面，遂不终场而归。

妒妇伏法

上海杨狮桥有少妇，与翁姑同居，姑妒甚，屡以新台疑翁，思有以试之。一日薄暮，妇织窗下，姑窃翁衣巾服之，俨然翁矣，突至后，偃妇面。妇大怒，啮落一耳。姑负痛掩面走，佯称病，匿床间。其妇信以为翁也，持耳奔诉兄。兄以翁为人素端谨，未信。至晚，妇怨恨雉经。兄乃伪访翁，欲与坐执之。翁出迎，则双耳宛然，而衣有血痕。告以故，曰：“此必我妒妇所为。”遂偕入室，登榻去被，耳亡其一矣。闻于官，官曰：“蔑翁之行不义，疑妇之奸不慈，致媳之死不仁。”竟拟辟。

玄霜

五月望，白虹二，其长竟天，至暮始灭。又关中玄霜盈尺。按晋时墨雾，着人如墨。或曰此兵象也。

雷震浮屠

七月，雷震景州浮屠，火逾三刻乃灭。忆先宗伯忠谏公幼海，直言遣戍，过曹溪，

登塔，从四僧四仆。忽雷震塔中，烟焰环绕，目不能视。良久得出，则僧与仆俱毙，惟公获全。公首击巨奸，名重海内，然性暴急，卒受苍头之祸，天或以此示儆与？

贵妃托梦

马嵬坡距兴平县二十馀里，贵妃墓在焉。墓前地近为土人侵占。邑中某绅，一夕梦妃诉曰：“仗君之力，还妾侵地，当图厚报。”绅奇其梦，亟为经理，顿复旧观，勒石以纪其事。夫太真缢死佛堂，以紫罗囊裹之而葬，千古伤心，于斯为极。钿盒钗股，七夕牵牛，惓惓记忆，总由情缘未断，岂千百载下，魂魄犹恋此耶？噫，异矣！

玄猿

蜀中产玄猿，性最黠，能解人意。楚帅进于上林，其使者归，猿长号而绝。宋宗卿徵舆作诗吊之曰：“潇湘寒月九疑风，尽日哀吟云水中。借得上林无限树，却教归梦入巴东。”

祭墨会

周侍郎亮工有墨癖，尝蓄万种，盛以小锦囊，悬之梁间，岁除作祭墨会，以酒浇之。吴祭酒伟业赋诗曰：“山斋清玩富琳琅，似璧如珪万墨庄。口啜饮同高士癖，头濡书类酒人狂。但逢知己随浓淡，若论交情耐久长。不用黄金费装裹，伴他铜雀近周郎。”侍郎慷慨好士，著书甚富，尝托白下张僧持□贻余札，备获奖借，惜未获一御李君也。

江左风俗

江左风俗，凡奴婢子采芹者皆从主姓，无少长悉以叔祖称之，即位望通显，不敢抗行。余族叔襟海公有仆曰张福，幼有断袖之爱，及长，遂冒主姓，配宠婢，以当炉为业。生子云孙，举甲午乡荐，联捷南宫，虑不齿于众，屡经主人门不入谒。襟海诸子象祖、象功辈，俱名士也，扼腕不平，率弟子毁其舆盖，始释之。云孙含恨刺骨，计图抗主，其父坚执不从，乃止。后复欲与主人为难，父方卧病，呼云孙谕之曰：“我受董氏恩不浅，今不能图报，而屡思反噬，我死不瞑目矣。”云孙咆哮骂曰：“老贼作如此事，至今被恶名，乃不蚤自为计，反欲污我耶？”方啜茗，以瓠掷父面。血流至踵，哽咽不能出一语，少顷气塞而绝。夫人苟能树立，即微贱何害？云孙盖愆无术，欲覆弥彰，而况忘主之恩不忠，逆父之命不孝。自是四方皆知此事，无与往还者。后宦粤西，迎降吴三桂。贼败，潜逃归，忧惧得心疾死。识者以为悖逆之报云。

月食既

丙申五月望，月食既。

马镇图逆

马逢知，初名进宝，起家群盗。由浙移镇云间。性贪横，自奉僭侈。百姓殷实者，械至倒悬之，以醋灌其鼻，人不能堪，无不倾其所有，死者无算。复广占民庐，纵兵四出劫掠，官府不敢问。时海寇未靖，逢知密使往来，江上之变，先期约降，要封王爵，反形大露。事定，科臣成公肇毅特疏纠之。朝廷恐生他变，下温旨徵入，系若卢，妻女发配象奴。未几，与二子伏东市。当逢知之入覲也，珍宝二十馀舫，金银数百万，他物不可胜计，绵亘百里。至是无一存者，人皆快之。

讹传点选

八月，哗传点选彩女，人情惶骇。大河南北，以迄两越，无论妍丑，俱于数日中匹偶，鼓乐花灯，喧阗道路。有一婿数家争之，男子往往中道被迫成婚。又有守节颇久，不得已复嫁，亦或借此再适者。按元顺帝时曾有此事，又晋泰始中博采后宫，先禁天下嫁娶，皆败衣瘁貌以避之。又隆庆二年讹传点选，并采寡妇，千里鼎沸，官司不能禁，与此绝类。

谣讖

吾松旧有谣云：“秀野原来不入城，凤凰飞不到华亭。明星出在东关外，月到云间便不明。”故吏兹土者，往往不能廉洁。有李正华者，小有才，矫廉饰诈，下车之日，行李萧然，及其归也，方舟不能载。有轻薄子投以一绝云：“吴地由来异郁林，归舟压浪影沉沉。不须更载华亭鹤，江上青山识此心。”近有刘君洪宗，洁己爱民，不一年被黜矣。尝忆前明有张守者，莅任时欲应明星之语，由东关入，过一桥，疑其是也，问隶何名？答曰“张塌桥”。大不怪，甫三日，疽发背卒。谣讖之验如此。

庸医杀人

里医徐元植，术甚低，过自夸诩。余内子蒋感寒热，渐有起色，徐忽突至，曰：“我与君有戚谊，曷不我属而邀他人乎？”遂探囊出参桂等药曰：“一剂可立愈也。”余素不谙方术，药才下，气结塞不通，喉中作曳锯声，不半日卒。徐遁去。吾郡旧有医沈虚明，负神术而谨厚不伐，贫家延之亦往，每日徒步，病者立起，未尝自矜。今此辈本无所解，乘轿出入，遇疑疾先议贿，谬种流传，不特无效，屡至杀人，即律以故杀之罪亦宜。

石坠

十二月二十二日，河南归德府宁陵县东北，空中黑气如斗，响声不绝。忽有物坠城内马道街郭伏家，光芒如火，似石非石，重四斤十四两。地方官贮库以闻。

败笔头

《本草纲目》曰：“男子初婚之夕，痿弱不起，取败笔头兔豪者烧灰，酒服二钱，阳道立兴。”不意管城子于八法之外，复具此能事，亦一异闻也。

积书

涑水氏曰：“积书以贻子孙，子孙未必能读。”赵文敏曰：“聚书藏书，良非易事。”鼎革后，藏书家散失殆尽，如曹氏石仓、钱氏绛云楼，俱付一炬。迺来真定梁公清标广搜博访，闻牙签玉躔，充塞栋宇，恨未之见也。顷曾以数集见委，遍觅不可得，止以家忠谏幼海公《紫冈》、《处士》二集奉寄，并呈一诗，云：“只爱缥緗不爱官，邺侯书架拥琅玕。他年致主功成后，留向林泉次第看。”

避债台

丁酉人日，阖户宴客，分韵赋诗。忽闻叩门声，启视乃酒家索逋也。戏咏一绝云：“窗拥红兰径未开，叩门蹑屐有谁来。酒瓶药裹赊偏惯，欲上周王避债台。”见《汉书》注。

诗讖

季黄门开生，以直言遭戍。匹马出关，虽远徙穷边，声望益著。所为诗多悲歌慷慨，尝送友人入土云：“重关不禁旅魂过，梦里看君渡塞河。白日总悲生事少，黄泉翻羡故人多。荒坟怪鸟啼松柏，废苑寒云锁薜萝。未遂首丘须浅葬，好留枯骨待恩波。”末二语竟成诗讖云。

柳寇

柳寇钱魁者，饶膂力，善舞双刀。聚众剽劫，出入飘忽，横行湖柳间。所掠财派为三股：一献当路，一赂捕人，其一均分之，以故久而不败，所到之处，迎者获重赏，相拒者悉屠之。自云钱王之后，以此惑众。二省合兵捕之，围之泗泾，魁与妻各持刀格斗，冲突如神，力竭就缚，械至江宁，梟于市。夫魁不过一卖菜佣耳，当事养成其患，遂至猖狂无忌，虽旋就诛戮，而糜费国帑已不可胜计矣。

何首乌

宁国府太平县，有翁姬居深山中，樵采为业，年各七十馀。一日晨兴，见东壁下土忽坟起二尺许，墙为之倾，掘之得何首乌一枚，大如瓮，香气扑鼻，因生啖之。不逾年，堕齿复生，颜色鲜好，如四十许人。复产一男，至今尚在。第三叔父士开秉铎其地，亲见之。

收香鸟

交趾国进贡中有收香鸟，其鸟羽毛之内，能收诸香烟，收毕别置一处，将翅展开，各种香气，氤氲四达。

李公托生

高阳李公爵，前生系老儒，博通经史，屡试不售。偶过邻李氏，所居巍焕壮丽，私心羨之。一日微疾，倏觉躯体轻快，纵步入李室，见群婢方拥一妇，似欲产者，因登屋梁窥之，忽被推下坠怀中。昏愤逾时，及醒，身小仅尺许，束缚卧床上。时天寒下雪，产母问窗外何声，公应曰：“是雪。”怪欲溺之，父不许。后遂不复言。至七岁，有戚指之曰“此哑儿，留之何益？”公忽笑语，众惊异。随入小学，颖慧异凡儿。十六举乡荐，明春联捷，致位宰辅。公尝亲述其事。

林史

何柘湖曰：“士君子读书出身，虽位至卿相，当存一分秀才气，方是名士。今人几席间往往宝玩充斥，黄白灿陈，若非贾竖，则一富家翁耳。”旨哉斯言！余偶著《林史》，中一则云：士大夫陈设，贵古而忌今，贵雅而忌俗。若乃排列精严，拟于官署；几案纵横，近于客馆；典籍堆砌，同于书肆；古玩纷，疑于宝坊，均大雅之所切戒也。元朗之言，正与余合。

拆人夫妇报

越中一孝廉，向以才学自诩。有同窗友窥邻人妻色艳，思欲夺之，孝廉为画策。先密语其夫，诬妻有所私邻。因欲出妻，孝廉复力主之为作离书。既脱稿誊讫，适笔贾至，购选毫，漫以稿塞管中。及戊戌礼闱，携笔入试，搜者得前纸。时功令甚严，荷枷杖责，革去举人。夫此等事，岂读书明理之人所宜为？孝廉止于革黜，亦幸焉耳。

产子两首

七宝镇民家，生男两首。按汉灵帝时，洛阳女子生儿，两首四臂。《京房易传》云：二首下不一也，厥妖人生两头。

乡闱异变

江南乡试前数日，严霜厚三寸。既锁闱，鬼嚎不止。放榜后，弊发，主考方猷、钱开宗，房考李上林、商显仁、叶楚槐、钱文灿、周霖、张晋、朱、李祥光、田俊民、李大升、龚勋、郝维训、朱建寅、王国桢、卢铸鼎、雷震生，俱骈戮于市。前此，江陵书肆刻传奇，名《万金记》，不知何人所作，以“方”字去一点为“万”、“钱”字去边傍为“金”，指二主考姓，备极行贿通贿状，流布禁中，上震怒，遂有是狱。北闱李振邳、张我朴有“张千李万”之谣，事发，被诛者亦数十人。

徙巢

陆文定公孙庆曾，素负才名，居丙舍，颇擅园亭之胜。以序贡入都中式，事发，遣戍辽左。先是，陆氏墓木悉枯，栖鸟数日内皆徙巢他往。曾见《涌幢小品》载，李景隆未停爵前，冢树皆枯，不久幽废。又庆曾至杭，祈梦于忠肃公祠，梦公授纸一幅，展视乃沈阳图也。至是果验。

宁古塔

时上严于试官，而宽于举子，南闱覆考，一无黜落；北场情弊显然者，轻者迁尚阳，重者流宁古塔。近鱼皮岛，无庐舍，掘地为屋以居。地极寒，四月尽，布火烧之冻始解。五月可锄，急种蔬菜。六七月便采食，一交白露即枯，至寒露则根亦烂腐矣。或曰，此即昔之五国城也。桐城方孝廉膏茂曾戍其地，为予道其详如此。

赏菊

九月，东篱生并头菊一，馀亦灿然可观。订诸同人置酒赏之。客曰：“花虽烂熳，惜非佳种。”余笑赋一律云：“北郭先生老更饕，秋来逸兴满林皋。山翁远馈披绵雀，溪妇初分斫雪螯。翠壳脱时菱胜粉，玉缸开处酒如膏。绕篱也种无名菊，莫怪樽前啸咏高。”

研山

米元章有研山，乃南唐宝石，上有华盖峰、月岩、翠峦、龙池、上洞、方坛、玉笋诸胜。每天欲雨，则龙池津润，真神物也。未几，以研易园，米绘图以记，复作诗曰：“研山不复见，哦诗徒太息。唯有玉蟾蜍，向余频泪滴。”后入吴兴，毁于兵。《辍耕录》图其形，并详载之。近樵李朱公子子褒携至松，长尺许，峰岩玲珑，

靡巧不备，盖实未尝毁也。或云此系贗作，恐未必然。

金山虎见

戊戌四月，金山卫有白虎从城外突入城，负一老嫗去。守陴官兵格斗，虎咆哮，复啣死四人。翌日忽不见。旧时传鲨鱼化虎，想即此类。

天雨砂

六月，遂安县天雨砂，如虫矢，又如芥子。七月复雨。占云：角虫为灾。是秋，四乡牛疫，死者数千头。白秋海棠秋海棠白者，我郡绝少。客有以二本见贻，植之阶前。开时更觉妩媚，然不能耐久，不两年而其种绝矣。余有诗咏之曰：“明艳偏教玉女嗔，倚风无力自横陈。不施脂粉天斜甚，虢国端应胜太真。”

彭禹峰

彭公而述，字禹峰，喜谈兵，意气慷慨，远宦岭表，往往驰逐戎马间。善饮啖，酒一吸数十杯，醉后纵谈时事。此古所谓豪杰之士也。尝过伏波庙，题诗曰：“铁桥黑水旧知名，天险还胜百万兵。试问临邛持节客，当时何路入昆明。”其叱驭之气，老而不衰有如此。

陈孝廉

闽人陈君肇曾，弱冠举于乡，负才名，所与游多四方知名之士，然厄于公车，逾五十馀载。戊戌、己亥，两与计偕，年垂八秩，须鬓皓白而此兴不衰。余微规之曰：“先生少负才华，长通声气，今耄矣，使杜门著述，以垂不朽，亦士君子不得志于时者之所为也。栖栖道途，毋乃劳乎？”君慨然曰：“仆岂不知此？顾一生碌碌，本期有成，圣人所谓朝闻道，夕死可矣。既此志不遂，誓尽我之馀年然后已，要当酬知来生耳。”因江上兵阻，遂辍棹归，题诗邮壁曰：“绕江烽火倚楼看，拂面秋风怯暮寒。岭外音书乡信杳，城头□策漏声残。岩关羽檄驰铜柱，荒寺藤花落瓦棺。咫尺桑乾天堑隔，月明何处望长安。”

萧孝子

广陵有萧孝子者，母卧病久而未痊，闻古有刲股救亲事，遂持刀跪神像前，剖腹截肝以啖母，母疾愈而孝子竟卒。远近诧叹，称为“萧孝子”，遍徵诗歌以记之。夫残形以救母，不可谓非愚孝，然发肤尚不可毁，乃白屠割，无异犬豕，岂父母之心哉？万一覆宗绝嗣，为祸滋大，直谓之不孝可也。韩学博日起目击其事。

火烧旗竿

淮安府大教场中，旗竿高数丈，从上而下，自发火，烈焰甚炽。将至根，忽大声如雷，根突出，烧尽乃止。

负心获报

武林张士进者，丁酉乡荐，年少美丰姿，同兄士弘赴礼闱。寓与女僧邻，中一尼明艳，且多藏金，士进与之往来甚密，订作继室。尼极欢，先以厚贄赠之，令办聘。士进获贄而背盟，及下第，不辞而归。尼闻之，愧且愤，大哭投缯死，遂为厉鬼，追及士进于中途。随仆地发狂，口作妇人声，宛然尼也。群仆哀恳曰：“愿释我主，当延名僧诵经修荐，以解冤愆，何如？”尼复叹息良久，作声曰：“此讎甚深，特来索命，他非所愿也。”抵家三日，竟不起。其仆有知之者，云是尼系富室，十三岁以家难归空门，洁修十四载，既被污，复为所卖，故恨之刺骨。至今西陵人皆知此事。

少参风流

林少参嗣环，字铁崖，闽人，顺治乙丑进士，守琼州。时有马伽沙国贾舶抵朱崖界上者，主帅利其重货，将执而戮之。少参执不可。贾人归国，国王德公甚，以其国中所画“渔牧图”二纸，附贾舶贻之。后竟以前隙劾罢官，遇乱徙越，卜居明圣湖。少参喜功名，好结纳，善古文辞，一跌不复振，其牢落不平之气，一遇之于文。尝扁舟往来广陵、建业间，偕骚人墨客，徵歌命酒。与余握手论心，交最晚而最相得。一日，乘醉登妙高峰，抚膺长恸，声振林木，君子闻而悲之。后竟抑郁而卒。

孪生女

广陵有老儒，孪生二女，有姿色，俱好文墨，并处不能辨，幼时以香炙面为识。是秋，讹传掖廷之选，仓卒归二少年。嫁同日，娠同时，死同病，亦一异也。有赋《渔家傲》吊之者曰：“昼锁纱窗紫碧雾，琼花自是无双树。并蒂娇姿怜解语，经行处，花钿暗识修眉妩。画阁肩随朝复暮，闲情时咏游仙句。奔月化烟留不住，天风度，飞琼自挽双成去。”

托生为猪

华亭富人庄某者，善居积，性极纤啬，挟金钱权子母之利。死后数月，见梦于其妻曰：“我以宿孽，托生某家为猪，明将就屠，可遣儿持银二两八钱，速往赎归，少缓则不及矣。但圈豕甚多，儿至，衔衣垂泪者即我也。”妻惊寤，语二子急持银往。见一大猪突出，衔子衣伏地而泣。子不告以故，取银买归，适符其数。乃于父旧

卧处设一榻，具帟褥，置猪其内，日以铜盆盛米粥饲之。岁余，猪被病死。

男人女名

冯妇

的娘【苗酋，《元泰定记》。】

徐夫人【《史记?荆轲传》。】

尚婢婢【《通鉴》。】

丁夫人【《史记?封禅书》。】

念姐【《北史》，羌名。】

杨奴奴【忠小名，《后周书》。】

马仙婢【《南史》，后改。】

李安人【《北史》。】

司空命妇【《仓公传》。】

五娘【唐李君羨。】

释氏命名

黄罗汉【《通鉴》，梁时人。】

卫菩萨【《北史》，北齐人。】

柳达摩【《通鉴》，北齐人。】

姚沙弥【姚秦尚书。】

萧□黎【齐江夏王小名。】

郭药师【《唐书》。】

韩文殊【《北史》魏人。】

陈和尚【《金史》。】

崔迦叶【《北史?崔亮传》。】

尔朱菩提【《魏书》。】

康维摩【《北史?源贺传》】

尔朱文殊【二人荣子。】

崔目连【《北史?崔道固传》】

尉迟菩萨【丑奴部将。】

席毗罗【《北史》，周人。】

慕容三藏【绍宗子。】

周罗□【见《通鉴》。】

斛律沙门【《贺拔岳传》。】

鲁悉达【《陈书》。】

莫折菩贤【《肃宝寅传》。】

萧摩诃【《陈书》。】

赫连僧迦【《于仲文传》。】

元佛□【《周书》。】

宇文禅师【《北史》。】

张须陀【《隋书》。】

司马弥陀【《北史》。】

宋金刚【《隋书》。】

贺拔难陀【《北史》。】

人身诸神名

《灵枢素问》载，人一身有九窍、十二官、三百六十五节，一昼夜一万三千五百息，脉行八百一十丈。又按道书，身中有万二千神，三万六千尸虫族焉。暇日撮录其名，以资博览。《黄庭内景经》曰：发神苍华，字太元。脑神精根，字泥丸。眼神明上，字英玄。鼻神玉垄，字灵坚。耳神空闲，字幽田。舌神通命，字正伦。齿神愕锋，字罗千。心神丹元，字守灵。肺神皓华，字虚成。肝神龙烟，字舍明。肾神玄冥，字育婴。脾神常在，字魂停。胆神龙曜，字威明。腹神灵元，字混康。脐神桃孩，字合延。《仙诀》云：明堂神，左明童，右明女，中明镜。洞房神，左无英，右白元，中黄老。上丹田神，赤子，帝卿，元先。中丹田神，真人，子丹，光坚。下丹田神，婴儿，元阳，谷元。丹田上，中黄真君，流珠宫流珠真人，玉帝宫玉清神母。明堂上，上清真女。洞房上，太极帝妃。左目陵阳，字英明。右目太阴，字元光。左乳名君阿。右乳名翁仲。《中经》云：鼻神太乙，字通卢。口神，字丹朱。两手神，字魄阴。项神，字上间。肩背神，字女爵。两神，字阴隐。胫神，字随孔。足神，字柱天力士。耳神，字娇女。发神，字禄之。上元神，字威成。中元神，字中黄。下元神，字明光。阴神，男字穷英，女字丹成。两膝神，字枢公。《太上胎精记》云：脑神觉元，字道都。发神玄文华，字道衡。皮肤神通众仲，字道连。目神虚监，字道童。髓神始谟盖，字道周。臂神益历辅，字道柱。鼻神冲龙玉，字道微。舌神始梁峙，字道岐。喉神百流放，字道通。肺神素灵生，字道平。心神焕阳昌，字道名。肝神开君童，字道清。胆神龙德拘，字道放。左肾神春元真，字道卿。右肾神象地无，字道玉。脾神宝元全，字道骞。胃神同来育，字道展穷。肠神兆胜康，字道还。大小肠神蓬送留，字道厨。胴中神受亨勃，字道虚。胸膈神广英宅，字道中。两胁神辟假马，字道成。阴左卵神扶流起，字道圭。右卵神苞表明，字道生。气海神逮无马，字道极。《大洞法》云：舌本下神于景清，字会元。玉枕神务犹收，字归会昌。眉神延陵梵，字履昌灵。左腋神玄元叔，字合符。右腋神郁灵标，字玄夷绝。心宫神理明初，字玄度卿。脐神桃孩，字道康。泥丸神玄凝天，字三元先。顶骨神神运珠，字子南丹。腕间神始明精，字元阳昌。口四际神帝昌，字先灵元宗。背骨神舍景，字兆台玄精。颈神素玉，字梁南中。喉根神养光，字太昌。胃腕神明君，字明轮。鼻孔神元生，字黄宁。肠口神坚玉，字凝羽珠。胸中神天精液，字飞生。左耳下神拘制，字三阳。右耳下神上归，字帝子。头面神翳郁无刃，字安来。上胸腹神圆华黄刃，字太张。上小腹至脚底神启明箫刃，字金门。上左手神名接生。右手神名方盈。左足神名飙精。右足神名歛亨。左目童子名飞灵。右目童子名晨婴。五脏二神，名务玄，字育尚生；又玄归，字盛昌。藏下胃上二神，名案延昌，字合和婴；又保谷童，字明天。肠口二神，名斌来生，字精上门；又幽台，字灌上。小腹二神，名祖明车，字无极；又理维藏，字法珠。百关节节

二神，名混离，字叔父坚；又发纽子，字庆玄。命根胞胎，共七神：高同生，字左回明；又叔火王，字右回光；又重冥空，字幽寥；又日明真，字众帝生；又杨堂王，字八灵；又录回，字绝冥；又照无阿，字广神。人中神光坚，字灵和。阴jing神林灵天。膀胱神保成曷。阴囊神彰安幸。口舌神长来觉。五脏外神凋梁际。又梦神名宜。《真人制魂魄说》云：三魂，名胎虫，爽灵，幽精。七魄，名尸狗，伏矢，雀阴，吞贼，非毒，除秽，臭肺。三尸光，上尸青姑，中尸白姑，下尸血姑。虫，一彭琚，二彭盾，三彭矫。《酉阳杂俎》云：人有九影，神亦有九：一右皇，二魍魉，三泄节枢，四尺鳧，五索关，六魄奴，七灶□，八亥灵，九不可考。

物名类人名

岁暮，同人相聚，或分题赋诗，或徵事饮酒。一夕，陶子欲举鸟兽草木似人名者。余归，于灯下取腹笥所偶忆者，疏之别幅，附识于后：鸟如人名者，天山曰帝江。函山曰王母使者。瀛洲曰信天翁。蜀鸟曰探花使。岭表曰秦吉了。《柳归舜记》有武仙郎，阿苏儿，自在光生。孔雀曰孔都护。鹤曰蓬莱羽士。神禽曰飞廉。鹰曰凌霄君。鹊曰神女。黄莺曰金衣公子。子规曰杜宇，又谢豹。鸚鵡曰雪衣娘。燕曰天女。吐绶曰锦带功曹。鹄曰八哥。鹓鸪曰内史。鸥曰碧海舍人。鹭曰碧继翁。鸿雁曰殊翁。曰雪姑。鸕鶿曰巧妇。鸠曰郭公。黄鸟曰黄公。雀曰喜宾。姑获曰天帝少女。鹅曰兀地奴。鸽曰飞奴。兽如人名者，虎曰李耳。熊曰子路。马曰山子。《王会图》有獾人俞儿，《南丹》有野婆。猿曰山公，又野宾，又孙供奉。狐曰阿紫。象曰大客。牛曰瞿摩帝，又曰周留。猪曰参军，又大阑王。驴曰卫子。羊曰髯主簿。狒狒曰野人。山都曰木客。狗曰飞燕，又逍遥郡君。猫曰白老。犬曰守门使。鳞介诸虫如人名者，龟曰玄夫，又曰玄衣督邮，又东海波臣。绿毛龟曰绿衣使者。鼃曰河伯使者。鳖曰河伯从事。水尸曰鱼伯。鱼曰孩儿，又土父。乌贼曰河伯小吏。蟹曰彭越，又内黄侯，又横行介士，又无肠公子。书蠹曰脉望，瑟中。蛙曰鞠通。海牝曰东海夫人。鼠曰仲能。蝉曰齐女。蜥蜴曰蛇医。螟蛉曰戎女。蜘蛛曰络丝娘。蜻蜓曰赤弁丈人。寄生曰宛童。蜂曰笛师。蟋蟀曰王孙。促织曰懒妇。蚯蚓曰歌女。蚊曰黍民。结草虫曰蓑衣丈人。螂蛆曰吴公。青蚨曰鱼父。蝼蛄曰仙姑。葛花上蛇曰亭长。蜣螂曰推车客。蚤曰杜伯。虾蟆曰田父。蛾曰射工。蜉蝣曰慈母。蝎曰主簿虫。樗鸡曰红娘子。芫花上虫曰青娘子。山虫曰山和尚。水虫曰水秀才。草木如人名者，木之精曰彭侯。松曰苍髯叟。林擒曰文林郎。少室山木曰帝休。古赋木曰平仲，曰长卿。枣曰君迁。藤曰简子，又丁公。竹曰越王。枣曰仲思。茶曰孩儿。松曰罗汉。果曰菩提。冬青曰女贞。木兰曰女郎。海棠曰妃子。芙蓉曰文官。荔枝曰十八娘。杨梅曰圣僧。蔓生曰史君子。菊曰傅延年。蕉曰美人。莎曰寡妇。赤豆花曰腐婢。大黄曰将军。甘草曰国老。地丁曰蒲公英。石斛曰杜兰。淫羊藿曰黄德祖。茄曰离娄。岭表有素馨。又药草有刘寄奴、甘遂、杜仲、苏子等名，不可胜举。

鹤湖谣

阳羨莫进士大勋，筮仕为嘉善令，多善政，厘奸剔弊，群然有卓鲁之目。后以治行擢给谏，未几天歿。与余称莫逆交，偶过魏塘，见輿颂载道，百姓思慕不已，因作《鹤湖谣》以悼之云：“湛若寒冰，使君之清。燠如春日，使君之泽。东流之水空潺潺，使君一去不复还。”

商谜

商谜之说，儿童妇女皆喜为之，然亦见正史。《南北史》载“箸谜”曰：“眠则同眠，起则同起。贪如豺狼，赃不入己。”“屐谜”曰：“刺鼻不知嚏，蹋面不知嗔。啮齿作步数，持此得胜人。”“鼓谜”曰：“徒有八尺围，腹无一寸肠。面皮如许厚，受打未渠央。”此谜之始也。至字谜，鲍昭诸集已有之。

灯谜诗

遂安毛进士际可作灯谜诗十二首，每句寓一人姓名，皆经生所共习者，偶出示，余思之一夕，悉得之，附录于后：“美玉无瑕辑瑞同，岐丰佳气庆云中。从天产下鳞虫长，两道祥光一色红。”右圣瑞。“虎旅归来已罢兵，关梁无禁任遥征。九重天子称仁圣，雅颂原非郑卫声。”右太平乐。“蝶舞莺啼草色萋，郊门回首日初低。延来师席多怡怿，蠹简芸编满架齐。”右闲适。“满苑棋声暑气收，乃翁败局少机谋。君家季父还犹豫，为语儿童且自休。”右嘲低棋。“绿柳阴中点绛红，华堂广厦贵游风。无心邂逅皆年少，一诺何妨缟通。”右赠友。“垂杨枝上漏春光，归去来词独擅长。从此尘劳还久歇，止将田事祀勾芒。”右田家。“将逢弥月祝无灾，绣褙啼声出户来。诸子儿郎皆长大，含饴最喜是初孩。”右汤饼会。“春日问花花解语，绿杨树底午风和。东邻相对怜娇小，争似椒房绝艳多。”右春游。“衰年负荷苦难禁，路远空怀顾仆心。少弟仔肩能代力，馀闲试鼓爨桐音。”右村居。“身长七尺皓须眉，俯首长如持满时。村塾全然无约束，任儿携幼浴清池。”右村学究。“夜永鸡鸣漏未收，官家沉酒百无忧。蛾眉一色谁相让，南院花辉对院幽。”右宫怨。“中男驱犊向前村，鹤发山翁暮倚门。更与诸儿相共语，年来齿落复生根。”右老农。白圭、周霄、龙子、丹朱、毕战、许行、王良。乐正子、景春、东郭氏、傅说、万章、奕秋、公输子、子叔疑、子莫、杨朱、屋庐子、逢蒙、然友、泄柳、颜回、长息、神农、浩生不害、子产、公孙衍、季孙、桃应、柳下惠、西子、宫子奇、戴不胜、百里奚、季任、琴张、高叟、戴盈之、师旷、子濯孺子、景丑、王□、颜般、北宫黝、牧仲、太公望、告子、易牙也。毛君善古文辞，所著有《松皋集》。

花名诗谜

严进士允肇，吴兴人，所刻有《石樵稿》。尝为花名诗谜数十首示余，择其佳者记之于后：“青蛱百万散无踪，二姓飘零共一宗。渊客泪凝芳草露，樗村却冒管城封

。”金钱兰、杨柳、珍珠兰、木笔。九苞天上羽仪新，列宿光芒动紫宸。绛帟一声宫漏尽，西风别院正愁人。凤仙、满天星、鸡冠、汉宫秋。烛龙光射羽人衣，溽暑凉生六出飞。天挺孤标云路近，四时台榭总芳菲。向日葵、六月雪、凌霄、长春。束素凌波潋滟浮，绿云斜戴碧搔头。并刀细断流黄锦，狼籍春风晒未休。水仙、玉簪花、剪秋罗、含笑花。

旅庵

旅庵大师名本月，曾受知于世祖皇帝，特书“天上无双月，人间祇一僧”十大字以赐之。与余为方外友，备极款曲，时或相聚。吾辈酌酒呼卢，嘲谑杂出，师坐其傍，欢笑无间，故皆爱而近之。既而募资欲种松万树于昆峰之麓，以为十年之后，可与苏台之灵岩、吴兴之白雀齐驱鼎峙，诚胜事也，惜愿未果。求之缙流，殆亭亭乎鹤在鸡群者与？

伤友

王贡生宗蔚，字嵎文，自少喜谈诗，所著有《蓉楼稿》。为人敦尚气谊，与人交款曲真挚，久而不渝，破产结客，未尝有倦色。年逾壮，无子，又多病。一日，在故人坐，方与客揖，仆地卒。吾闻作善降祥，作不善降殃，徵应不爽，乃既夺其年，复斩其祀，天之报施，果有不足据者与？抑恶者未必祸而善者未必福与？不然，何其酷也！曾有诗赠余云：“十载金门客，翻来狎隐沦。花迎绿水动，雨积翠微新。身世凭双剑，江湖岸角巾。故人海内尽，藉尔慰松筠。”

著书诞妄

《拾遗记》曰：“始皇时，宛渠之民乘船而至，名曰螺舟，沉行海底，而水不浸入。”不审何以不行海面，且乘舟者何得无恙？又见一书云：“流波山下有燃海，舟人不知水性，以烛跋投之，火大发，遍海延烧，无人还者。”既无人还，又孰从而知之，孰从而道之乎？诞妄至此，可发一笑也。

老子有妹

《佣吹集》曰：“孔子有兄，老子有妹。”按《史记》注曰：叔梁纥妾生子孟皮，病足，乃求婚颜氏，生仲尼。老子妹，当再考之。

人变犬

上海县新场镇有瞿某者，字宾卿，惯作硬证害人。忽一日得病，匍匐于桥所，作犬声，以吠往来行人，伊子进以米谷，不食，竟自寻秽物食之。如是数日而死。噫，

天之报施，果不诬也。

三冈识略卷四

【己亥至癸卯】华亭董含著

鹊巢

己亥二月，沪渎真如地方，有群鹊共作一巢于麦陇，大如车轮。乡人愤其伤麦，纵火焚之，诘旦复成。

天狗堕

三月二十六日未刻，有星堕地，色白，其声如雷。按天文志，天狗状如流星，望之若火光，坠地有声，千里之内，破军杀将。是秋，果有江上之变。

海寇入犯

郑成功原名森，芝龙孽子也。初入南安县学，为学使者置劣等，因入赘为太学生。先是，芝龙与弟鸿逵等于乙酉六月拥立唐藩于福州，以成功为养子，赐国姓及今名。王郊天日，大风扬沙，玉玺堕地，缺一角，识者以为不祥。顺治初年，遣御史黄熙胤招降七闽，芝龙潜纳款，求总制两粤。许之。因弃隆武去，隆武旋就擒。芝龙谒贝勒，与饮三日，挟之北行，后被戮。成功转入海岛，招纳亡命，其部曰南郎、北郎。南郎者，闽广人，多芝龙旧部曲；北郎者，乃江浙人及北方剧盗、旗下逃兵。众至数十万，于六月初犯京口，即以十六日破瓜州，连破润州。提督管效忠、江抚蒋国柱俱失利。七月，成功兵至江宁，势张甚。沿江士民奔而南，维扬百姓奔而北，山东、河南俱震动。既而攻江宁，久不下。崇明守将梁化凤引骑兵三千入援，乘其不备，率兵突入。贼裸体赤足，不能当，争解维逃。获其将甘辉辉，骁将也。成功遇飓风，死亡十七八，愤恚死。其子锦，窜入台湾。时方议亲征，而露布已至，诸将叙功有差，而梁公遂移镇云间。

谯楼

吾郡问禅古院，中峰道场也。中峰与松雪系宗党，乃赵氏故院，有子昂《滚马图》、《历代祖师图》。子昂以中峰故，往来甚数。松江府“谯楼”二字，真迹也。后毁于兵燹，祖郡守承勋卜日改建，逾月而成，虽巍焕壮丽视昔日有加，而遗迹已不可复睹矣。

火烛会

庚子。松郡普照寺，古刹也。华亭旧志云：每年正月十七日，普照寺作火烛会，士

女闾塞，七日乃止。寺僧乘此，多为不法。今久不复见矣。

柏大士

嘉善县刘生者，世业医，祖墓有古柏，为暴风所摧，命伐去之。柏中空，脂膏凝结成普门大士像，妙相端严，纤悉毕具，因送招提寺供养。盖西方圣人愿力浩大，稗官所载，有煮狗烹鳖而得大士像者，殆未易以恒理测也。尝见《南唐书》，溧水县大兴寺桑生木人，长六寸，如僧状，右袒而左跪，谓之须菩提。

庙神示兆

鹤湖陈孝廉增新，将谒选。海宁硖石镇有神庙，祈梦最灵，孝廉往祷，求示来兆。夜将半，忽梦神召。命之坐，令左右取白纸一幅，操笔书十馀字。展视，惟诗二句：“凭将刺股悬梁志，散作河阳满县花。”览毕，警然而觉，吟咏再三，莫解所谓，因识简末。未几，授江西一令。莅任才三日，神气骚扰，匆匆作家报，阖户自缢。家人急救。得免。后数日，竟投缢死。于袖中获书，封识甚密，启视，笔墨安详，情辞酸楚，皆决绝语。岂此地有宿冤，数已前定，有不可得而避者耶？

县衙女妖

海宁县相传，有一女妖在衙内，艳冶动人，其去来出自古井。时秦君嘉系为令，女尝游戏左右，或夜坐批阅文卷，辄为磨墨，亦不以为意。一夕，语令曰：“公将升任，不能久侍矣。”未几，迁职去。与门役辈调笑甚狎，间以手抚摩，平滑无罅。至今尚存。

董公泉

我家忠谏幼海公，讳传策，以直言遣戍粤西。从学者负笈而至，户外履不能容，土人结屋以居之。地苦无水，众为凿井，筑亭覆其上，至今犹呼为董公泉、董公亭云。

浮萍兔丝篇

有李参将者，言其部下卒尝掠人妻，既数年，携之南征。途遇故夫，一见恸绝。询其夫，亦别纳一妇，则兵之故妻也。四人相见大哭，各反其妻而去。施宛陵闰章作《浮萍兔丝篇》以记之。

玉印

富阳典史孙某，解饷北上，泊舟秦邮。有光夜烛于湖，促榜人迹之，于沙际得玉印一方，阔四寸六分，双盘龙纽，其文乃汉高帝《大风歌》也。献于朝，获重赏。

崇奉释教

辛丑正月初七日，世祖章皇帝聪明天纵，登极十八年，恩威并用，身致太平，至是上宾。予时待诏公车，不胜槁山弓剑之感。上崇信竺乾，每于西苑接诸鹏耆，登座说法，一时缁流云集。迎武康玉林通琇禅师入都供养，复召天童道忞。上从玉林乞名，因以“慧橐”为名，“山臆”为字，“幻庵”为号，刻玉章，凡书画皆用之。

五宗异同

道忞字木陈，曾主天童法席。出院后，费隐通公刻书声其罪。三峰汉月禅师，木陈之兄也，刻《汉五宗原》一书，木陈随著《五宗辟》，词极呵詈。汉月门人复作《五宗教》以正之。膺宠眷，目无流辈。后于道场山葺大殿，供世祖章皇帝神主，遣待本月入京，请勅赐寺额。朝议以荒山非立庙之所，命地方官焚之，忞大沮丧。

诗谑

上尝与木陈言及一新进士，毗陵人，削去髭髯，希庶常之选，不数日，面如涂墨。因改《西湖》诗嘲之曰：“删即删兮留不留，胡须抱怨几时休。冷风吹得通身战，却把常州作满州。”言罢抚掌大笑。

朱衣见梦

国初贤相，以溧阳陈公名夏为第一。公幼时聪敏过人，未入泮，梦二朱衣人来贺，遂采芹。乡举亦然。至癸未大魁，及迁转以迄大拜前，二人俱于梦中预报，故公皆先知之。未被祸前一日，二人者复来告别，公惊寤，叹息曰：“余死矣。”翌日竟赐死。公登揆席，毅然以澄清流品、奠安黎元为己任，即当生日，门庭寂然，有客献诗云：“诞日常时一样闲，放衙兀坐比深山。百僚怀刺逡巡去，惟有新诗手自删。”亦足以见公之一斑矣。

孙公知遇

予三上公车，辛丑始受知于泽州说岩陈公。殿对后，益都太宰亭孙公、恒山大司马玉立梁公，俱推拙卷为首。进呈三日矣，或以予策中引用《汉书·五行志》数语为不典，二公力争不得，遂抑置二甲第二，拔马君世俊为第一。马亦予同门生也。功名分定，前后亦乌足较，而知己之感，何敢一日忘也。孙公复以诗见慰云：“圣主乘乾日，鸿仪渐陆年。衣冠江左盛，词赋郢中传。剑气星文起，珠光璧月联。天人资

庙略，舟楫济洪川。奇对终生少，新书贾傅贤。惊鸣难众和，抗浪得先鞭。金马青霄上，铜龙晓仗前。未沾仙掌露，归惹御炉烟。命达才偏胜，时清道易全。老夫覩壮业，多在五云边。”

废登科录

廷试刻登科录，自霍端友榜始，此后累朝不易，至明祖，复勒名于碑。辛丑殿试毕，仪部照例题举，朝议以为前朝陋规，不必更袭，遂废不行。

不认本房

苏郡徐君斌，老儒也，不晓世故，中会榜后，以师生投揭，新奉明禁，不诣本房胡给事悉宁。胡大愠，遍告吴人，欲声其罪。徐之迂拙，诚为可笑，然尝考霍文敏韬会试，不认本房为座师；又按宋艺祖殿试，凡称门生于私门者有禁，盖自古有之矣。

文星堕

先是，正月初十日，百僚早朝，见有白光堕地。钦天监奏，文星堕江南分野，主文人有厄。至是果有欠粮奏销一案。

江南奏销之祸

江南赋役，百倍他省，而苏松尤重。迩来役外之徵，有兑役、里役、该年、催办、捆头等名，杂派有钻夫、水夫、牛税、马豆、马草、大树、钉麻、油铁、箭竹、铅弹、火药、造仓等项，又有黄册、人丁、三捆、军田、壮丁、逃兵等册。大约旧赋未清，新饷已迫，积逋常数十万。时司农告匮，始十年并徵，民力已竭，而逋欠如故。巡抚朱国治强愎自用，造欠册达部，悉列江南绅衿一万三千余人，号曰“抗粮”。既而尽行褫革，发本处枷责，鞭扑纷纷，衣冠埽地。如某探花欠一钱，亦被黜，民间有“探花不值一文钱”之谣。夫士大夫自宜急公，乃轩冕与杂犯同科，千金与一毫同罪，仕籍学校，为之一空。至贪吏蠹胥，侵役多至千万，反置不问。吁，过矣！后大司马龚公特疏请宽奏销，有“事出创行，过在初犯”等语，天下诵之。

地龙散

金贞祐中，术虎高祺当国，士大夫每遭鞭扑，医家以酒下地龙散，投以蜡丸服之，北方大行。苑极之中有诗云：“嚼蜡谁知味最长，一杯卯酒地龙香。年来纸价长安贵，不重新诗重异方。”《辍耕录》载，元初轻儒，与齐民等，翰林高公智耀上书力争，始免徭役，崇学校，正户籍。呜呼，今安得高公其人者哉。

淫像

辽阳城中一古刹，巍焕壮丽，守卫严肃，百姓瞻礼者，俱于门外焚香叩头而去。有范生者，游其地，欲入不可得，请一显者，乃入。见内塑巨人二，长各数丈，一男子向北立，一女南面抱其颈，赤体交接，极备淫褻状。土人呼为公佛、母佛，崇奉甚谨。尝阅《留青日札》，载嘉靖十五年，大善殿有铸像，极其淫秽，钜细不下千百。夏文愍公言建论焚之，以清宫禁，尽付诸火。其像号“欢喜佛”，乃元之遗制。又郑所南《心史》载，元人于幽州建佛母殿，制佛裸形，与妖女合，淫状种种，纤毫毕具。即此是也。

当湖为神

马进士嘉植，当湖人，清介有守。弘光时督饷江右，曾以公事误杀二人。易代后，薤发杜门，不入城市。岁朝谒祖墓，见青衣二人从墓间出，自通姓名，曰：“某因无罪，居枉死城已十八年，但乞公批照，云前误断，呈之冥官，某可托生矣。”公曰：“我自信为官未尝枉一事，昔既误断，今便相偿，批照何为？”曰：“公正人也，阴司甚重之。况此意初非有意，今公将歿，且当为神。不然，某亦未敢请也。”遂取笔判数字，二人忽不见。归家语人曰：“予将逝矣。”于是沐浴焚香，至晚，偃卧而卒。

袁将军冢

晋左将军袁崧，筑沪渎垒御冠，为孙恩所害，麾下士李祥收骸骨，葬北桥之南，今四围皆植木棉，惟存一土坯而已。时有江右人诡言知医，结草轩止于其旁，夜凿地道，潜通墓穴，半月后不告而去。居人毁其屋，见深入数丈，俯瞰黝黑，探之得磁碗二、古镜一。镜大五寸许，背有小钮，图五岳真形，翠纹剥落，能照数百步外。众争之，互相诟讼，遂追入官。但不知盗取者为何物，岂宝光陆离，果可望而知者耶？

松顶兰

粤西全州，有岭甚高，上挺虬松数百株，长十馀丈。松颠遍生兰，开时花极烂熳，馥郁数里，人不能采。

梵修寺黄杨

华亭千步泾梵修寺，有黄杨一株，相传已千馀岁，高出殿脊。闻前朝有外国人徘徊寺侧，言下有奇宝，欲捐贖买寺，别构一寺偿之。僧执不可，乃止。是冬，有十余人，称上司承差来借寓，僧不敢拒。居数日，乘夜逸去，殊出意外，视黄杨被掘，

深入三丈。急追之，及于浒关。其人哀祈，酬僧二百金。叩以下有何物，终不肯言。

祭厉

明初，松民钱鹤皋感梦兆起兵，反叛，官军讨之。胁从皆农夫，闻炮声俱惊窜。鹤皋就擒，俘至京。临刑，白血喷注。太祖异之，以为厉鬼首，命天下祭厉，称无祀鬼魂钱鹤皋等。本朝遵之，至今不废。

天鼓鸣

癸卯二月十九日，京师天鼓鸣，随陨星十一，城外七，城内四。次朝拾视，热如炽炭，大者十馀觔，小者不下六七觔。一星碎为三块，外青内白，一星缺一角。

黑风

四月二十二日未刻，辽阳杀布台陡起黑风，一股从南来东，吹倒民房四百三十间，压死男妇五百口，其余伤者不计其数。

改试士法

八月，改试士法，八股制艺，永行停止，乡会试用策论表判，减三场为二场。至戊申七月，诏复旧制。

莲笠

《六砚斋笔记》：莲初透水，为骤雨所淋，辄中夭。因出新意，剪荷叶，线缝之，作兜鍪状，名莲笠，雨则遍覆之。并戏咏曰：“欲展凌波步，先为行雨装。擘罗深覆额，拥髻暗藏香。莫倚倾珠盖，应同裹玉囊。自怜娇小甚，脉脉待恩光。”此事甚韵而制亦佳，当效而行之。

居宅有定数

海邑沈布政恩，致政归，创大第，颇极巍焕。将落成，择日上匾，夜梦数人鼓吹迎匾入，悬之中堂，仰视则名之上易一“潘”字。亦不以为意。诘朝送客，遥见一小儿，才数岁，眉目秀异，挟册往村塾。呼问曰：“几何姓？”曰姓潘。因忆昨梦，取册阅之，则名恩也。瞿然自失，叹曰：“堂未成而居者已有人矣，我何营建为哉！”命止工作。潘后果登进士，累官大司寇，沈氏子孙中落，遂买其宅，改为乐寿堂。二子连举甲榜，拓地为园，壮丽甲于一邑，今亦付之荒烟蔓草矣。癸卯冬偶过

其处，徘徊凭吊，周太守茂源为余道其详如此。

李笠翁

李生渔者，自号笠翁，居西子湖。性龌龊，善逢迎，遨游缙绅间，喜作词曲及小说，备极淫褻。常挟小妓三四人，遇贵游子弟，便令隔帘度曲，或使之捧觞行酒，并纵谈房中术，诱赚重价。其行甚秽，真士林中所不齿者。予曾一遇，后遂避之。夫古人绮语犹以为戒，今观《笠翁一家言》，大约皆坏人伦、伤风化之语，当堕拔舌地狱无疑也。

萨真人

我郡有史道人者，自言传萨真人法，能置狱劾鬼。每登坛作法，刺舌血，书黑檄，向空焚之，并呼灵官王善名，骂詈不绝口。予初见殊骇，不知神将何故受此辈驱遣？然道人性贪行污，术亦不验。后偶见《江湖纪闻》一书，载真人名守坚，蜀西河人，少有济物志，尝学医，误杀人，因弃业远游，访异人，获传张虚靖天师法，后法大显。曾经潭州，州人闻神语曰：“萨提刑来日至。”次日，萨携笠过市，有“提点刑狱”之牌，人皆异之。至湘阴县浮梁，见土人用童男女生祀本处庙神，萨曰：“此等邪神，速焚其庙。”言讫，雷火飞空，庙立毁，但闻空中云：“愿法官常如今日，自后庙不复兴。”后萨至龙兴府江边濯足，见水有神影，方面，黄巾金甲，左手曳袖，右手执鞭。问曰：“尔何神也？”答曰：“我乃湘阴县庙神王善，被真人焚我庙，相随一十二载，只候有过，欲复前仇。今功行已高，职隶天枢，望保奏以为部将。”萨曰：“汝凶恶之神，在我法中，必损我法。”神立誓不敢背盟。遂奏天帝，收为将。一日，诸将现形环侍曰：“天诏临矣。”真人即起身立化，后举棺甚轻，剖视已空矣。真人颠末如此，乃庸俗黄冠，动加呵叱，何也？

平牙露布

予偶病龋，三日夜不痊，饮食都废。适有媼过门，云“内簇细虫，取出立愈。”因戏作露布曰：“上党牙车，蠕蠕肆虐。右厢颊辅，唯唯受攻。拟借箸以难施，欲运粮而莫进。握椒一粒，丸封未能炙。炙艾三年，火攻不效。眉嚼齿，疑穿义士之龈；俯首支颐，何关致母之脚。有娘子军者，针持寸许，夫人匕不足比其；穴入片时，蠹兹虫早已夷其族。蛰触之种，今安在哉？唇齿之交，依然无恙。是用金钱颁赏，铁券旌功。防其将来，勿进易牙之甘味；固兹封守，毋亡凿齿之奇勋。得牙帐之风，凯歌雷动；磨鼻端之墨，露版星驰。”

董仲舒有三

董仲舒有三人：一汉江都相；一北齐值阁将军董蛮，改名仲舒，见《通鉴》；一蜀

青城山隐士董仲舒，见《蜀记》。

捕鱼翁说

江边有水鸟，曰“捕鱼翁”，喜食鱼，故以命名。吴越人捕而畜之，每舟行，列之两舷，至溪流深处，没而入，得鱼始出，有大二三尺者。渔人先以绳束缚其颈，使不能吞吐，薄暮满载，乃解其系，以微肉哺之。夫奋身于惊涛逆浪之中，可谓勤矣，乃终日竟不获一饱，何工于为人，拙于为己欤？将贪者常劳，而廉者自逸欤？岂多取者必厚亡，造物果有一定之数欤？吾于是乎有感。

射工说

溪涧之中，族细虫焉，曰蜮，一名短狐，一名射工，角横，口如弓弩，常含沙射人影，中者辄病。夫虫之与人，初无怨也，乃乘人之隙，祸端潜发，何性之毒欤？且夫猎者、渔者、弋者，皆有求于物，而物莫或伤之，射工则无是也。卑微齷齪，与人各不相知，何其阴谋巧伺，罔所顾忌哉？彼虎狼啖人，人能避之；蜂蛰螫人，人能杀之。今机触于甚疏，而害生于意外，谁得而防之也？吾于是乎有感。

穷奇说

海外有兽曰穷奇，性异他兽，遇善人则搏而食之，逢恶人则捕禽兽以饷之。夫侮善而畏恶，举世皆然，此兽殆得性情之中者欤？虽然，兽本无知，不知其人之善而恶之，不知其人之恶而好之，好恶皆出于无心，与知之而相反者异矣。呜呼，善恶之不分也久矣！善者不自鸣其善，恶者不自言其恶，乃能断然直行其胸臆，则此兽犹为有知也。吾于是乎有感。

三冈识略卷四补遗华亭董含著

上元老人

八月，以云贵荡平，再举会试。余与二三子下第南归，维舟金山，登妙高峰，见壁间一诗，字大半尺许，龙蛇飞动，诗亦豪隽，自称“上元老人题”，不知何人也，漫识于此：“孤舟此夜金山住，与客重登最上头。半抹远烟生隔岸，一轮凉月照高秋。星星渔火明还灭，寂寂江声淡不流。更莫酒阑吹铁笛，老龙时出洞前游。”

城隍神著灵

松郡城隍神最灵，有一营丁，素悍，率妻孥寝处殿侧，系马神座下，有献新制袍服被神像者，脱取自衣。一日，忽反接，自掷于庭，向空叩首，历数罪恶，号呼半日

而死。主将闻之，躬自祷谢，并施财修葺。数日之内，焕然一新。

鸟报冤

西余有潘姓者，以捕鸟为业，日杀数十命。一日卧病，见怪鸟无数，飞集帐中，啄其心胸，痛不可忍，遂死。将付火，忽大雷雨，众走避。雨止视之，两目已为饥鸟所食矣。

出神

凡人形大苦者，神先去之，不特修炼家有出神之说也。余内弟蒋生雯曷染弱症，日夜咯血，备极恶趣。一日，潦倒中转侧四顾，忽见己身坐别榻上，相对凝视，俄顷而灭，大惊，自知不起。不逾旬遂卒。生年少喜炫才，颇有费心事，致享年不永，惜哉。

神诛逆子

毗陵民某，生一男，岁才周，民母年迈目昏，误蹴儿死。咆哮取刃刺母，母逃入三义庙。民追及，忽见周将军厉声叱之，须眉毕张，举刀砍其颈。急呼“将军赦我！”随仆地。一黄冠扶之起，自言所见，连呼颈痛而死。

出母嫁母义不可绝

我邑有徐生者，生母死，以既被出，虽未改适，于义已绝，不为服。余甚讶之。偶见《客座赘语》曰：“出母嫁母，均称义绝而实不同。有出当其罪者，有出不当其罪者；有出而改适，有终不改适者。嫁母有父卒改嫁者，有为舅姑所迫不得自由者，有饥寒无依而后去者。古人制律，不立服满改嫁之条，盖圣人曲体人情，难尽以共姜柏舟之事望之也。人子不幸遇此，等于涂人，掉臂不顾，岂复有人心哉？况父固可以夫而绝妻，子不可以子而绝母。又或为嫡母所子而不认生母者，有为异姓人后而不为本生服者，亦可以为知大义哉？仁人孝子，处人伦之变，惟酌情礼之中，各尽其道，庶可不悖于义而无憾于心矣。”此论极当，故特识之。

僧诗

楚僧行达，字大衢。好酒喜吟诗，颇有岛可之风，迺来诗僧，罕见其比。五言如《憩甘露亭》云：“饭香能款客，僧懒不翻经。”《秋村》云：“牛羊喧日暮，鳬雁杂人行。”《赠上人》云：“经翻残月色，定出晓钟声。”《山居》云：“风清当户竹，水满傍谿田。”《除夕》云：“宿火留残腊，春风理旧枝。”《早春》云：“古径云生屣，春游客满山。”七言如《石迳》云：“云堆白石看无尽，路傍青山

步欲高。”《山寺》云：“松顶梦回千岁鹤，岭头风落五更钟。”《洞口》云：“洞门碧挺千寻石，仙树晴飞古道云。”《丹井》云：“午后金波腾瑞霭，千年瑶草护灵源。”皆佳句也。后卒于娄江，吴梅村先生选其遗稿百首而为之叙。

闽省城隍神啼哭

福建省城隍神啼哭三日，忽于七月朔旦鼓楼火起，延烧至运司及大小公署、寺院民房，又焚双门一带约八千馀间。先是，鼓楼扁额有“海天鳌柱”四字，土人有“双门堪走马，鳌柱变成灰”之谣，至是果验。

潮异

七月二十七日，松江一日三潮。

石猴

滇中产石猴，大如小儿拳，性甚慧，锁置砚侧，可教令磨墨，惟食果实，饮水即死。土人亦不能多得。同郡张司理宦其地，携一归，中道死。惜余未之见。

史公宿因

甬东艾老为余言，史状元大成未生时，其乡有老僧名大成者，戒行精严，为一时冠。示寂日，见梦于其徒曰：“我将远行，明日于某地史家访我，当以一笑为期。”次日往侦，夜果举一子，遂以梦告，其家梦亦同，因仍旧名。公擢巍科，侍禁近，襟怀冲淡，不为富贵所役，雅志林泉，长斋绣佛，一家仆婢往往化而疏食。阍君选，其本房所取士也，道公行谊甚详，且曰：士大夫淡于世故，仁慈恺惻者，大约从苦行中来，亦不止史公一人而已。

掘藏获殃

松郡东二十里名红桥，有王斗儒者，性愚蠢，以耕织为业。一日方炊，觉灶下有物蠕蠕然，掘之遇一瓮，中贮白金数百锭，大喜过望，与妇贯酒相庆。夜半将寝，忽地中作声，细察之，闻呼斗儒名，曰：“我藏神也，天将富汝，特来相就，伴侣甚众，当络绎至矣。”移灯视之，遍地皆金，无下足处。自是扫地薙草，往往得之。久之，心颇厌。一夕，闻撞门声，曰：“此必藏神也。”祝令他往。忽一巨缸排闥直入，黄白烂然。乃拓所居为大厦，广置南亩，结婚贵族，趋利者踵相接。于是忘其本来，不复似窈人子矣。未几，县官编役，斗儒田多役重，五六年间，产遂破。追呼迫切，父子俱死囹圄，并绝其嗣。夫斗儒不过一村氓耳，乃忽畀以数万金，究至身命不保，天何始待之厚而终夺之速欤？岂造物之玩弄，有莫能测者与？抑《鸿

烈》所云“掘藏之家必有殃”，其说果不诬与？然而不可解矣。

雷诛讼师

□城一奸民，略识字，喜弄刀笔。一日，与邻人偕往田间，风雨骤至。家人遥见皂旗一、红旗一，摇其傍，迅雷一声，奸民踣于地，旗隐不见。急趋视，两足已陷泥淖中，土埋至膝。其子负至岸侧，少顷，雷复震，仍埋旧处。观者悚惕。

溺女鬼救

山阴一小姓，家甚贫，生女欲溺之。忽闻空中鬼语曰：“莫溺杀，莫溺杀，他的丈夫是滕达。”一家惊异，遂留之，遍访邑中，果有书生滕达者，然已娶矣。后此女及笄，滕续聘为室。中甲榜，携之赴官，竟终老焉。

侍御赠行诗

余淹留京邸，侘傺无聊，将归兰陵，董侍御文骥贻诗赠别曰：“秋气正萧索，怜君马首东。一名先甲外，三策五行中。国失巍科重，家绳祖武雄。故乡归路近，嘱我灌园童。”

禄命有验

九流之中，惟禄命、堪舆二家，渺茫无据，然间有可信者。江右康君范生，精星卜家言，己亥过松，同社数人，各取星书示之。于余独批四大字“辛丑必发”，众皆嗤其妄。后同赴南宫，闱事毕，偶集七闽张孝廉汝瑚寓斋，顾余曰：“我前已许子，万万不爽，速归置酒酌我，当往子寓待报耳。”坐未定而捷音至。

梦棺

华亭陶孝廉，字冰修，有文名。六上公车，自以怀才被抑，感愤不平。京城有文昌祠，祈梦最灵，一夕，斋沐往祷，仰见天上悬一棺，欲堕未堕。惊寤，不乐者久之，复自解曰：“梦棺得官，余庶几入彀乎？”及发榜，仍下第，谒选得天台广文。不半年，卒于任，乃悟天为天台，棺为盖棺之兆。梦之巧验，有如此者。

韦公祠

吴阊韦公祠，乃唐诗人应物也，祈梦最验。孙君承恩未第时往祷，夜将半，忽见一神人手悬金甲于壁，光彩耀日，并授箭四十枝，谓曰：“子试射之。”至三十九箭，遂破的，箠中止馀一矢耳。后戊戌中鼎元，年正三十九。又一年卒。

镜铭

余从燕市买一镜，大仅五寸，制极古雅，光彩焕发，背有铭曰：“如玉配洁，似潭比清。孕金之秀，含月之精。我见汝之形，而不能见汝之心。”后为一友携去不还，至今惜之。

盐官贻诗

盐官彭公孙通，负才名，风流儒雅，为一时之秀，与余结契甚深，亦为奏销诖误。以札寓余，颇极感愤，兼寄一律云：“秋林落叶点风埃，寒雨空江日夜哀。难后弟兄多病老，霜前鸿雁尺书来。壮年俱抱怀沙痛，盛世仍虚入洛才。好赋东巡献行在，圣明早晚祀之莱。”后应博学宏词，入翰苑。

风电

壬寅五月初四日，河间县任丘地方雨冰雹，大如人首，击死二百余人，牛羊不计其数，田禾尽坏。又大风将制府旗竿二根刮去，城内石牌坊俱带落城外。

申江杂识

余族曾叔祖广文容大，字申江，著《杂识》一卷，偶于藏书家见之，初不著名氏，取家谱按之，知为公作。又有《丛言》六卷，俱系抄本，其间载《均赋》一则，曰：吾乡粮赋分三等，而上、中、下三乡，未为至当。西乡称上，有一亩仅租五六斗或七八斗者；南乡称下，乃有十一、十二保一亩收租二三石，水旱无虞者；东北称中，有仅种花豆青秧，亢旱无收者。近浦称中，亦有荡田收止数斗者；东乡称下，间有所收逾中、上者。愚谓三乡田，每乡分三等，以九等定赋，方愜輿情，低薄更须核实，列为下等，斯善矣。

读书种子不可绝

申江又曰：吾郡缙绅家居，务美宫室，广田地，蓄金银，盛仆从，受投谒，结官长，勤宴馈而已，未闻有延师训子，崇俭寡欲，多积书，绝狎客者。子孙习于见闻，不务勤学，交游匪类。自己使势，不能禁奴仆之使势；自己作孽，不能禁子弟之作孽。身歿之后，田宅婢仆，俱归他人，亦何益之有？诚能使读书种子不致断绝，且一亲学问，便知自重，即贫困奚害哉？善哉斯言，令人矍然悟、惕然悔矣。

贱名入梦

乔进士梦蛟，自言十四五时，将应童子试，夜梦一人，如俗所画张仙者，谓曰：“

汝欲登第，须与董某同榜，宜切记之。”惊寤，随识简端。乔长余一纪，余虽生，尚未命名也。自后每遇试，必遍觅贱名，不可得。岁庚辰，余补博士弟子员。喜曰：“果有是名，有是人矣。”至本朝辛卯，乔中式；戊戌，捷南宫。余于甲午乡荐，拟此梦不足据。及辛丑侥幸，遂为殿试同榜，竟符所梦云。乔君朴实人，近偶谈及，余不甚信，因出所识，岁月虽久，墨迹宛然。乃知穷通得失，信有定数，天下事又何足预计耶！

青蛙使者

抚州金谿县，近郭有一蛙，状貌绝大，狰狞可畏。据土人云，自东晋时即见之，渐著灵异，商贾祭祷，获利必倍，病者祀之立差。迨来仕宦此地，亦必虔谒，因共号为“青蛙使者”。其隐见无常，有终身不得一见，亦有一人屡遇者。夫蛙之为物，最冥顽不灵，乃能历千馀年，诞著诡异，至士大夫亦从而拜之，可怪也已。

孝妇却鬼

无锡县民顾成，娶钱氏女为媳。女暂归宁，时疫疠盛，转辗缠染，成一家咸伏枕。女闻欲归，父母力阻之。女曰：“夫之娶妻，原为翁姑，今疾笃，何忍不往？即死无恨也。”只身就道。成昏愤中，见鬼物相语曰：“孝妇至矣，我辈当速避，不然且获谴。”于是一家数口俱得无恙。

富人不可作缘

古语云：“富人不可与作缘。”四友斋云：明初陶宅有陶与权，吕巷有吕璜谿，小贞有曹云西，下沙有瞿霆发，类能创建园亭，招致文士，风流好事，倾动一时，要皆贤而能文，视阿堵如粪土，至今犹令人艳称之。本朝以来，富者亦复不少，大约斗筲齷齪，目不识丁，收息细民，献勤当事，一二荐绅与之缔姻娅，通寒暄，益傲然自得。使吾郡狂澜一变而不可挽回，谁任其咎哉？

龙过

癸卯正月十三日，青天无云，忽睹一龙自北而南，爪尾鳞甲俱现，光彩照耀。后随一鲤鱼，大三四丈，去地颇近。余家人辈悉见之。

误传病死

余伏枕自春徂夏，客有传余为已死者。武林一故交疑之，特走一介见访。发函得书，辄然自笑，因报以一绝曰：“蝶粘花片翻棋罫，燕蹴泥香湿画叉。病起已无裙屐兴，葛巾端坐诵南华。”

鬼报冤

上海章生□高，名士也。薄游山左。寿张县有嫠妇薛氏者，富而守节，族人利其家赀，强之再醮，妇坚不从，乃诬以奸，讼之县。县令章君贞，与□高向联宗谊，族人以六十金馈之，嘱令断改嫁。令如命，妇忿极，投缯死。及归舟，神气骚扰，随感疾，才抵家，遍室中鬼声不绝，忽口中作山左妇人声曰：“我在上海县学觅汝不得，今得之矣。恶党俱齐，可同往面质也！”于是哀号半日而卒。

还魂

夏秋之交，三吴大疫。莘庄镇春申桥有赵二，妻顾氏，死五日，浮厝岸侧。适邻人叶乙过其傍，闻呼唤声，奔告其家。不信，同往侦之，呼救不已，乃启土出棺，则此妇已再生矣。自言初死时，二青衣人拘至土地庙，乃翁为隶，立堂上，见之惊曰：“汝未合来，何为至此？”恳于神，言妇平昔有孝行，愿乞其命。遂放归。且言买棺时，某人匿银一两，过桥遇雨，复跌损一角，我时在傍，特不能言耳。询之果然。此妇今尚无恙。

竹生花

友人张宪细林别业，竹生花，未几枯死。

头陀托胎

闽僧古木言，昔在会稽，一头陀颇朴诚，无他过。郡绅祁氏，豪富甲于一邑，每过其家，归必欣羨不已，诧叹累日。俄，病卒，其魂冉冉，直至祁室。夫人方坐蓐，见一僧突入，遂产一子。父母极怜爱。儿生而不慧，善饮啖，食兼数人。至十五六，长大肥白，而茫无所解。后方饱餐，遇乱不能行，为盗所杀。因言人生积修，尤急于临歿之一念。念纷华则入于纷华，念清静则入于清静。若头陀者，即释氏所谓不知常住心，用诸妄想，故有转轮，亦可悯也。

五眼鱼

渔人捕鱼长泖，获一巨鱼，重三十五斤，状如鲛头，有五眼。

神召

济南吴太守南岱，父尝官山左，衰年未有嗣，祷于东岳，逾岁而太守生，因以岱名。太守再官此地，一日坐署中，若有所睹，向空肃拜，且唯唯曰：“驾望先发，臣随至矣。”如是者再，家人惊叩之。曰：“我本岳帝从臣，偶降尘世，今严旨见召。”

，殆不可留。”遂嘱其子曰：“必奉吾主山中，吾将栖神于此。”家人如命。及卒，导主入山，乃归櫟焉，时癸卯十月也。余尝见成和子答陈希夷曰：“凡人形貌清古，气清性善，言根至理，有山林之趣，此自修行中来。形貌古怪，举止阴毒，言涉淫邪，有杀伐之心，此自精灵中来。形貌潇洒，举动风雅，性慧气和，有修炼之心，此自神仙中来。形貌秀丽，举动严肃，心性灵明，有虹霓之志，此自星辰中来。形貌奇异，举动急速，性慧气刚，言涉威福，有祭祀之心，此自神祇中来。”吾于太守益信。

同辈序齿

古语“乡党序齿”，亦为同类者言之耳。顷有一友举尚齿会，贵贱混淆，俦类错杂，非特不雅观，殊失古人礼意。都少卿穆曰：考之礼，一命齿于乡，再命齿于族。故同辈序齿可也。苟非其人而亦以齿尊之，不几于失礼乎？《蓝田吕氏乡约》曰：“非士类者，不以齿。”斯言为得之矣。

赵瘸子

天津卫首赵瘸子者，应武举。夏日纳凉庭中，见一物侧卧石上，鼻息轰然，酒气四射。迫视之，乃一醉狐也，急取索繫其足。狐醒，自语曰：“今晚多酌几卮，为人所算矣。”见赵拔刀而前，怒曰：“汝乃赵瘸子乎？速放我，不然当祸汝！”赵曰：“汝命在我手，乌能祸我？我知若辈善运财物，我困甚，能有以济我，当释汝。”狐曰：“汝欲几何？”赵索千金。曰：“我辈不作诳语，汝命中无此。”既减至百金，狐曰：“汝终不应有此，若骤得之，必有殃。然释我，必有以报君。”赵曰：“于何处觅汝耶？”曰：“某日于天坛某树下候汝。”因舍之。届期，至其地呼之，闻树上应曰：“已运在汝家水缸下矣。”急归，去土尺许，有银一镗，计仅五两，因自叹其命之穷也。赵前堕驴伤足，人皆呼为“赵瘸子”云。

天榜

建德马生某，应癸卯试。已锁闱提场，抚军朱公倚几假寐，梦神告曰：“天榜有马天选尚未到。”朱曰：“门已封矣，奈何？”及天明，有马生者因卷损求易，朱忽忆前梦，急以卷与之，嘱令改名天选，并亲加封印。榜发，果中式。藩司及学使者皆莫知其人，公具述所自，咸叹异之。见《祝氏卮言》。

骄凤篇

同籍有宦于闽者，好声气，性颇慷慨，凡属谱谊，纷纷而往。客有以余不去见讶，不知余从不作此想也。因赋《骄凤篇》自解云：“朱凤憩高冈，夜栖梧桐枝。回翔吸溼露，性洁姿陆离。俯视有大鸟，得毋鸢乌族。饮啄嘴距强，狡狴厌梁肉。欲为

凤凰，奈常苦饥。欲为鸢乌，义不忍为。鸢若有词，凤不如我。从我而嬉，奚为不可。偃息岩穴，汝计已左。卑栖来群，慎莫懒惰。凤凰含笑如不闻，翩然踏破丹山云。”

屠报

《灵应录》曰：“凡屠者眼，多似其类。”初不甚信。近北关外有李二者，屠豕为业，岁杀以千计。适三伏中，一门数口俱染恶疾，李屠遍体溃烂，疮口生黑毛，长半寸许，与豕无异。叫两月，口作豕声，竟不能出一言而死。

独行君子

阚进士选，字瞿亭，玉峰人。幼孤，有至性，与人交，洞见肺腑，人皆推为长者。以细故被黜，遂绝宦情，敝衣疏食，晏如也。性喜山水，每遇良辰美景，辄携屐登临，随双童，挟一棋枰，或荫长松，或趺坐古石，与客相对手谈，竟日忘倦。又能规过勉善，久而勿渝。古人之所称独行君子，殆其人与？

博徒

彭生者，名父之子，善博，所与游皆博徒。曾徵诗于余，戏赠云：“虞氏高栖接路傍，相逢频解橐中装。袁耽怀帽空投马，刘毅褰衣正绕床。坐对井公聊共戏，时无剧孟漫登场。塞翁本是忘机客，得失何曾有异方。”生尽夜呼卢，有败无胜，竟破其产云。后冒暑干谒，道经邯郸，堕驴而死。余吊以诗云：“朴漉惊沙谒子公，青驴驼得白髯翁。短衣烈日邯郸道，不及卢生一梦中。”

顾先生

顾先生开雍，字伟南，少好学，秀羸多才，俯仰顾盼，绰有雅致。与陈、夏诸公并起，名满海内。晚筑室数椽，在跨塘桥外。暇日往访，见竹木森秀，琴书潇洒，独坐一室，凝尘寂然，前辈风流，犹可想见也，因题其壁云：“彦先表表，风流吞吐。才藻卓犖，蚤工词赋。鹏翮未奋，蛾眉被妒。年华冉冉，依然徒步。修名既立，美人迟暮。”

三冈识略卷五

【甲辰至戊申】华亭董含著

龙睡

甲辰六月六日，满洲军驻闽者，入山乘凉。山中有一渊，水色澄澈，因解衣入浴。忽见土穴中卧一物，牛首蛇尾，首有角，若酣寝者。集众持巨索系双股，挽登岸，将屠之。一樵叟见之，惊曰：“此龙也，杀之，一方皆为鱼矣！”军人惧，急解索推入渊。少顷，雷电大作，见一龙鳞甲闪烁，腾空而去。范彤弛说。

林氏世家

闽中林氏，始祖名某，尚书公某之父也。家故小康，其后日就寒薄，家无长物，计惟一桶，负以易酒。尽醉，急趋海滨僵卧，以待潮至。适徽人有商于闽者见之，曰：“潮至矣。”令长年扶起，问故。曰：“我贫不能活，欲以身付海若尔。”徽人曰：“君毋求死，一人之食，吾力能办，盍偕往典中，择一执事，可乎？”于是携归，令司赈粥。久之，徽人为父母营葬地，延地师。地师至，未及度地而染时疫，人莫敢近，置之别业，属林侍汤药。病愈，谓林曰：“我远客，遭危疾，赖君周旋，今获再生，殆将有以报子！他日与主人相地时，当痛哭不已。问故，则以父母久亡，尚无尺土埋骨对。但得主人许君，我当为择一抔之土，饥寒不足虑也。”林谨受教。既而主人遴地，林如所教，丐地于主人。许之。既葬，谓曰：“我六年后来索酬，当以三千金为赠。”林曰：“地苟有效，岂敢逾盟！”遂别去。林佣工既久，徽人悯其劳，许为娶妻。适海中有俘妇，贱价买之。婚半载，妇曰：“我尚埋金三十两在某处，盍不辞佣而张酒肆乎？”从之。居未久，林忽骤富，乃俘妇藏金甚多，展转贸迁，再易其居矣。届期，地师果至，林请践诺。地师曰：“前言聊试子耳，我何藉此哉？虽然，阴地则佳矣，阳基则未也。某山某庙址，可构营屋，今风雨颓坏，能舍三千金另造神祠于高原，而以废址卜宅，簪纓不可量也。”林乃绘图，拟易移庙址，谋之土人。择日起建，栋宇巍焕，金碧灿然，皆大悦。落成后，乃卜居于其处。复戒曰：“宅虽成，无遽迁也，待汝妇娠则可矣。”三年妇孕，移居焉。先是，邻里左右每夜闻鞭击声，一夕闻鬼语曰：“有二品官来住此，盍去诸！”从此寂然。林果生子，仕至八座，科甲世世不绝。闽人至今有“无林不开榜”之谣云。

天主教

天主之学，被诱者众。近阅《职方外纪》，西士艾儒略所著。据称，自西海间关九万里入中国，仰观赤道、南北二极之躔度，以定万国之分域，而其间国土，无一非天主所化导者。其言曰：天主化生天地，肇育人类，欲身自降生，启万世升天之路

。后果降于如德亚白秋梭之地，名曰耶苏，译言救世主也。在世三十三年，有宗徒十二人，皆耶苏纵天之能，不假学力，通各国语言文字。耶苏肉身升天，诸弟子分散万国，宣扬教化，能令瞽者明、聋者聪、哑者言、跛者行、病者即愈、死者复生，又能驱妖邪、逐魔鬼。盖至尊至大、为物真生大父者，止有天主上帝而已，故从之可升天堂，永脱地狱。一切大小过恶，惟天主能赦宥之，非诵经施舍所能赎。故初入教，必先悔罪，次解罪。妇女入会者，另居一处，惟父母得暂往见，男子例更多端。凡学者，手持十字，或尊敬十字圣架，或悬挂胸前，必获福报。又云：西国有大臣名阁龙者，恐海中尚应有地。一日，嗅海中气味，自此以西，必有国土。因其舟航，率众出海，飘泊数月，从人俱怨，忽远望有地，亟取道前行，始知海外复有人物。又有一人名哥尔德斯，泛海至北亚墨利加，其地无马。适舟人乘马登岸，见之大惊，以为人马合为一体，疑兽非兽，疑人非人，后知是人，渐相近接。随遣掌教，往彼劝善。又命墨瓦兰，自西达东，纡回数千里，绕地一周，四过赤道之下，历三十馀万里，俱奉天主教，还报本国。其立说大略如此，诞妄汗漫，茫无可据。夫使海外小夷，挟其邪说，闯入中国，复筑宫以居之，厚禄以参之，蛊惑人心，背弃正道，是谁之咎哉？

彗见

十一月朔，彗见翼轸分野，尾向西北。数日后，复移向东北，长三丈馀，白光黯黯，历五十馀日，至娄而减。

日变

十二月，自己未至晦，日初出及晡，日下复有一小日。久之，化为百千，摩荡满天。按嘉靖三十四年十二月十九日，亦有此异。

青霜

乙巳五月初一日，山西省城雨霜三日，其色正青，所及之处，草木尽枯。

地陷

七月十二日，京师西城门地陷，广十八丈，深十六丈。俯视城堞宛然，下有水声。

高邮水怪

八月，河决归德，冲没夏邑、永城二县。又高邮河水发，一水怪状类妇人，两角，腋有双翅，乘潮往来，所到之处，水即泛滥，淹没者甚众。

地裂

八月初十日，陕西西安府蒲城县蔡邓堡，离县七十馀里，堡东南一角地裂，阔四十馀丈，陷伤户口五十馀家，压死男妇九十馀人。

火焚奸僧

赵公廷臣秉节两越时，有部民营逋被逼，卖妻以偿，哭别于路。一皮工偶见，大为不忍，呼至家，取平日所积二十馀金，悉付之，遂得完聚。其人感激，因具酌，属妻留款，而已避去。皮工念其贫，不赴。夜半夫归，见妇已勒死在榻，疑皮工所为，讼于官。公深以为疑，展转详究。数日前，有游方僧门首募化，是夕忽不见。公曰：“此必僧所为也。”时具德禅师负高名，释徒云集。公托言设斋，令夫密覘擒僧，一讯具服。云是夜冒皮工，推户而入，灭烛淫媾。欢洽之际，抚其顶，大呼求救。僧急，以带勒杀之。公送师处置，于是积薪于庭，纵火焚之。远近称快。如更旌皮工，方为大快。

谣谚

吾郡邇来赋役繁重，灾眚迭见，兼之官吏贪污，民不堪命，于是通郡皇皇，有“六未见”之谣，皆一时实事，附记以博一笑：“一未见，华亭县丞打知县。华令郑之翰，与县丞韩廷遇争火耗，为韩所殴，几毙。”“二未见，焚城杀人官勿断。东关营兵杀黄氏兄弟，告官，逐出免究。”“三未见，扯住乡人作谋叛。张知府羽明指乡人为谋叛，忽起大狱，株连者甚众。”“四未见，诏赦钱粮官弗算。奉旨蠲本年地丁三分，郡县匿蠲，严刑追比。”“五未见，一两耗银四钱半。时加耗甚重，上、青两县尤甚，正银一两，加耗至有四五钱者。”“六未见，百物俱贵米独贱。米价每石四钱。”其言虽俚，而一时风俗民情，亦大概可见矣。

秋江图

先文敏公书画，海内争购之。近有客以《秋江风雨图》见示者，真至宝也。以索价太昂，不能留，因题其末云：“杳杳烟波深处，垂竿独坐渔矶。却棹扁舟归去，滩前白鹭惊飞。缈缈云横远岫，朦胧雨暗前汀。一派江南好景，何人移入丹青。”

伪印

丙午正月十一日，溧水人顾起龙浚河，获玉印一，上有篆文十六字，曰“人心惟危，道心惟微，惟精惟一，允执厥中。”献于朝，获重赏。或云，系弘光时所造，一内臣怀之而逸，瘞于此地，非三代以前物。

冒认崇祯

河间府有妖人作乱，自称崇祯皇帝。被获，犹大言曰：“前雉经煤山者，其人姓岳，实代朕死。朕即日微服逸出，往来南北二十年矣。”指其妻曰：“是即皇后。”指其女曰：“是即长公主也。”竟不肯吐姓名，谓监刑者曰：“国亡与亡，朕惟有一死耳。”按，慕容德时，妖王始自称太平皇帝，临刑尚呼父为太上皇，兄为征东、征西，妻为皇后。绝与此类。

猴奸

娄县城壕中弃一小儿，手足俱人，猫首猴身，遍体生毛，耳出额上。或谓，猴性淫，此必弄猴妇与猴奸，故有此异，殆人妖也。

松郡大狱

四月，江南巡抚韩世琦奏为明遗孽朱光辅与朱拱□，潜住松江泗泾龙珠庵，结党谋叛。知府张羽明发觉，获得周王伪宝、伪札、号旗，并同谋各犯姓名。其拱□知事露，将伪太子光辅托僧六如拥护，挺身而逃。于是伪总兵金仲美、宗翰、伪游击陈山、伪粮道邵台臣、伪练兵官陈爵、伪书记胡文□、伪仪宾赵文良等，共八十余人，皆凌迟，余株连者不计其数。其实所谓将军等，悉市井卖菜佣，而光辅、拱□果否有无未可知，严缉竟未获。羽明欲图超迁，力兴大狱，哀哉！未几革职去。

蚌与龙斗

八月十四日，大风拔木。宝山居人，见海中一蚌，大二丈许，中衔一珠，如小儿拳，时时吐弄，白光亘天。俄，有五龙盘旋其上，风雨晦黑。一白龙奋爪攫珠，为蚌所啮。良久，力争得脱，沉入海底，若负重伤者。余四龙各散去，天气亦顿霁。蚌浮波面，竟夕不没，珠光照耀如昼。夫以龙之变化，而屈于冥顽不灵之物，亦可为贪得者之一戒也。

熟荒

秋大熟，斛米二钱。时湖广、江右价尤贱，田之所出，不足供税。富人菽粟盈仓，委之而逃。百货充斥，无顾问者。百姓号为“熟荒”。犹忆顺治丙戌、辛卯两年，米价至每石四两馀，而民反无流亡者。古人云“谷贱伤农”，信然。薛宗伯所蕴有《丰逃行》，慨乎其言之也。

临安火

十二月，临安大火。十三日起，至十八日始灭，延烧民房二万馀间，城为之空。有妇女数十口，避入一古刹，火四面至，顷刻俱成灰烬。

大雪

十八日午后，大雪达曙，厚二尺馀，往来路绝。淀湖有十余人操舟而前，至中流，河水遂合，篙橹忽胶，去岸又远，一夕俱死。又有人亲迎，冻死于道。

李举人自屠

永年县举人李司鉴，性狠戾，连杀死妻王氏、妾张氏、季氏。事发，下狱。一日，听讞过市，忽夺屠肆刀，奔入城隍庙，高声历数平生过恶，先自割两耳，又截两指，随剔去肾囊，当即昏倒。家人扶回，宛转数日而死。

海烈妇

丁未。海氏者，徐州人，有姿色。夫陈有量，素孱弱，仅知书。岁饥，转徙毗陵。偶为恶少杨二所窥。二故酒家佣，素结漕艘卒，以为此奇货也，诱以酒食，复与结兄弟欢，始得以叔嫂礼相见。侦有量他出，微语挑之。氏怒，厉色疾叱，二仓皇走。既知不可犯，独计：与若夫交，何为者？会运艘骈集，中有卒魁林显瑞者，与二狎。一日酒酣，二因设谋，使附舟还徐，复令林捐金，聘为会计客。陈喜得归，以告氏。氏疑之，曰：“二非良人，宜亟反其金。”方逡巡间，林怂卫弁诬陈受雇不赴，胁氏登舟。再出甘金，俾往苏，置缆诸具。氏持不可，奋袂去。时祭金龙大王，垂帘舱门，请氏观剧。氏阁扉不出。林方刑牲，长年蓝九捧盘，倏蹶，覆血淋漓。林怒，殴之，九饮恨而已。林百计诱，氏终不顾。是夕，欲掩其睡，乃穴艚板入。氏方危坐，大呼“杀人！”持之亟，呼愈厉，邻舟俱惊起。林大沮丧。微闻哀泣声，久乃闻声，视之已投缳矣，时正月二十七日也，年仅二十有三。遂匿尸米中，谋渡江抛之。念陈且还，林之弟四建议，悬金募人能死陈者。蓝九欣然应募，怀金密首于监兑朱理问士达。传经历缪国瑞，受以牒，戒必得贼。缪查兑籍，见卫弁雷某旗丁有林名，曰：“得之矣。”即启钥，谒弁于梦寐，给之曰：“适奉严檄，某艘藏匿逃人。”弁惶悚偕行，呼舟人点名，至林，曰：“此逃人也。”命锁之。林方肆辨，而烛光影中，蓝九跃出，语塞就缚。次晨验尸，舁出米中，颜色如生，其衣上下连缀，乃夫去后自刎，以备仓卒者也。狱既具，上之司理，论如法。林遣弟四走维扬，嘱兄三具告总漕，言氏死于反目，而司理申详先达，得允。三呕血数升，暴卒。林愧悔自怨，述氏前后坚贞状，更恨误听杨二，誓不令独生。会陈归，二亦捕获，因赴讯，市人丛殴，遂先死于狱。士民赴奠，议范像构祠。启其棺，已七十馀日，色不萎腐。进士赵止安、诗人王君麟等投挽歌，多至数百首。毗陵令黄光业为之记。

祠在常州府城外，额曰“香阁铁汉”。陈有量守祠，后卒。

银瓶祠

浙江臬署，宋岳忠武故宅也。岳被祸时，有女名银瓶，赴井死，屡著灵异，因立庙祀之。明季，东郡宋君者，负气不信鬼神，既入署，吏以旧例请祀，叱曰：“予受命天子，小女子何能为？”后方听事，忽睹一女子弯弓射之，正中其肩。未几，疽发背死。今宋君弟复官此地，事之甚谨。

烈士殉节

绍兴张君煌言，举壬午乡荐，仕鲁藩，周旋海岛二十馀年。后知事无成，散遣部曲，入普陀为僧。及就擒，赋诗见志曰：“海甸纵横二十年，孤臣心事竟茫然。桐江空系严光钓，震泽难回范蠡船。生比鸿毛犹负国，死留碧血欲支天。鲁戈莫挽将颓日，犹望千秋青史传。”诸将重其义，欲降之。不可，且曰：“予穷海孤臣，岂至今日而复改节耶？”辞气慷慨，至死不屈。识与不识，莫不流涕。

启祯诗选

吴门陈济生，陈仁锡之子也，怀宗末年，曾刊《启祯诗选》，序系吴相国牲所作，中有“二祖列宗”语。奸人沈天甫、吕中、夏麟奇以为奇货，挟诗索多金。不遂，令仆叶大出首造刻逆书，诋诬本朝，诗册列名七百余人，宜遣官提讯。旋奉上传：天甫等所指事，茫无凭据；编诗之陈济生，久经物故；带诗之施明，又经遁逃。显系奸徒，扛扶挟诈。俱斩东市。是举也，一则解文字之祸，一以杜告讐之门，众共快之。麟奇我郡明经，不知何苦而为此也。

义虎

山西孝义县，山多虎。一樵者失足堕虎穴，两虎子卧穴内，樵者傍徨不得出，泣以待死而已。未几，有虎逾壁入，口衔生鹿，分饷小虎。见樵，怒甚。俄巡视，若有所思，反以残肉食樵，抱小虎卧。昧爽，跃去。少顷，复衔一鹿饷其子，仍投与樵。如是一月，浸与虎狎。小虎壮，虎负之出，樵急呼曰：“大王救我！”须臾复入，以肩就樵，腾出石壁。虎置樵欲去，樵跪告曰：“蒙大王活我，今不识旧路，幸导我归，不敢忘报！”虎颌之，遂前至中衢。樵告曰：“某西关穷民，归当畜一豚一羊，候大王邮亭之下，某日过飧，无忘我言！”虎点首。迨归家，人惊询。至期，典衣具畜。虎先期至，不见樵，竟入西关，民惊哗，呼猎者擒献邑宰。樵奔救，击鼓大呼。官怒诘，樵具告前事。不信。樵曰：“请验之。”遂至虎所，抱虎哭曰：“大王以赴约入关耶？”虎点头，堕泪如雨。观者数千人，莫不叱叹。官骇异，趋释之。樵以豚投之，未尽，恋恋顾樵而去。土人异之，建亭其地，名曰“义虎亭”。

”。

一产四子

歙民吴士全妻吕氏，一产四子。

牛眚

戊申正月初十日，西关外民家产一犊，二首，八足，二尾，自腹以下，皮肉粘连，合而为一。予目击之。按晋大兴元年，武昌太守王谅家牛生子，两头，八足，两尾，共一腹，三年后死。又咸和七年，九德人袁荣家牛产犊，两头，八足，二尾，共身。占曰：上下无别之象。

天枪见

二十七日酉刻，天枪出西南，指东北，上下皆锐。初长二丈许，既而长至五六丈，瞥而灭。《观象玩占》曰：“天枪云状，左右锐，岁星缩西南，不出三月主水。”又云：“天枪见则有兵丧。或云主大水。”至夏，果有地震、水发之变。

叫魂

妖僧雪浪，与黄冠朱凤仙习邪法，江南人章天首、张钱德从之学叫魂术，叫死程氏、程五福二魂，后复叫活。事发被擒，二人供有符咒，书符诵咒，其人之魂即随去，受害者不止一人。总制郎公廷佐请诛之，即俱伏法。

太白昼见

五月初六日，太白昼见。六月初九日，太白经天，经二十馀日而灭。钦天监上言：金星四月二十五日起，至五月十三日灭，星体微暗，不足为异。然六月所见者，又属何星？按唐懿宗时，彗星出，司天奏是名含誉，瑞星也，请宣示中外，编诸史册。总之，盛明之时，妖不为害，不足讳也。

江浙地震

六月十七日戌时，江南地震。自西北起，至东南，屋宇摇撼，河水尽沸，约一刻止。翌日，遍地生白毛。两越亦于是日地震。既而北直、山东、河南，皆以地震告。五省同日同刻，真古今异变。

淮凤地震

淮安同日地震，声若雷吼，行人如立洪涛中。安东县城垣、官署、民房，一时俱倒。地裂水泛，一望成巨浸。巢县、和州、泗水、徐州，庐舍尽塌。桃源、宿迁，震死五六百人。清河、邳州，全没。白祥河地陷一孔，涌出黑沙。赣榆县民，竟无噍类。

河堤崩坏

先是六月十四日，淮水暴涨。宝应、高邮，石塘俱坏。黑夜遇变，淹死者无数。翌日，浮尸蔽河而下，柳榆高者，仅露其杪。至十七日地震，河堤崩坏，水势益汹涌。济河而上，伊、洛之间，蛟龙突起。黄河董口，水涸沙生，将来运道大为可忧，此谋国者所当蚤计也。

山东地震

山东自六月十七日戌时起，连地震数次，自北而南，其声若雷，城墙颠仆，文庙亦毁。其被灾地方，济南、兖州、东昌等五十九处。沂州、郯城，死伤尤众。利津、沾化，钟鼓自鸣。莒州马山崩，沿河地中作声，或井中涌出黄沙。又蛟龙群飞，爪破山石，往来路绝，怪异不可名状。

北直同日地震

北直同日地震二次。又七月初二日暴雨，至初八日乃止。西山复发水，冲断芦沟桥两洞。长新店、良乡、涿州、商家林、单家桥、雄县、献县、任邱以上，俱被漂没，二十余日水始退。至如唐山、曲周、鸡泽、平乡、钜鹿，地势洼下，九月尽积水尚在，汪洋无际。

碑出

庐州府庐江县，山裂七十余丈，现出石碑一座，上四字：“□□臙污。”

侏儒

大名府滑县有赵人鉴者，顺治戊戌进士，出为邑令，罢归。其人长仅三尺，头面四肢，俱极短小，声音亦微细。县堂别设矮桌，从下望之，如十三四岁童子。亦一异也。山阴傅孝廉德孚为余说。

托梦赠赙

陆生希倬，华亭人。北游，没于旅邸，家贫不能归。时蔡公士英家居，慷慨好施。

一夕，漏将卒，忽梦一人，儒衣冠，进谒曰：“仆云间陆生希倕也，觅食长安，不幸客死萧寺，怅怅无可告语，知公义侠，望垂怜悯。倘骸骨获反首邱，九泉之下，感且不朽。”公惊悟，适同里林子乡馆于蔡，以梦中所见质之，姓名状貌，无一不肖。为之咨嗟累日，厚有所贖，旅棹始得归。

叶贡生冤报

吴门叶贡生，名襄，社中名宿也。家贫，谒一故交，待之厚。地方有人为仇家诬讼，故人縶之狱。叶札入，乃释之，获数十金以归。后其人实冤，忿恨自系死。叶才下舟，其鬼号冤声不绝，白昼现形，沿途索命。抵家卒。楚人杜濬为文记之曰：“予与姜绮季偶饮友斋，客有述叶生果报事，座客怖失色。绮季独仰天大笑曰：‘此鬼何足道哉！’客问故，姜曰：‘尝见世间贪官污吏，受赃枉法，每断一狱，冤杀数人；每下一令，累死者数十人。积而计之，杀人如麻，必当鬼哭神号，塞彼屋子矣。顾乃满载而归，求田问舍，畜姬妾，广屋宇，曾不闻有某某冤鬼登门索命者。乃独于一穷书生饥驱干谒，偶然误犯，而鬼已随其后，甚矣其不平也。可见贫贱有怨鬼，富贵无冤孽。此等鬼物，不过如阳世之茹柔吐刚、势利小人耳，何足道哉！’一座抵掌称快。予独曰：‘不然，大抵人生世间，不造恶业，上也。苟不幸失足而有冤鬼，则反宜多，不宜少。何则？鬼多则一鬼行而群鬼从，甲乙相问，俱寻某氏，必有爽然自失，无异辽东之豕者。又必有以为我众彼寡，以百千人搏一人，虽胜不武者。又必有以为其多如此，事亦平常，不足深恨者。又必有以为鬼多事多，贵人善忘，辨质烦难，不若舍之者。又必有以为彼既治之，我可坐享，相持不发者。又多鬼之中，必有善鬼从中劝解者。多鬼之中，又有懒鬼，但求省事，参差不齐，致群鬼减兴者。凡此皆救也。若彼踽踽凉凉，仅有一鬼，势不两立，则事可知矣。由是言之，贫贱之受报自苦冤鬼之少，富贵之无报正赖冤鬼之多，况彼冤鬼不恃众而恃独，正有豪杰之概，奈何反比之小人乎？’于是座客更大笑，几脱颐。”予喜其反覆诙谐，故录之。

集句

集句，唐人亦有作者，然不过偶一为之。明季有泗上施匪莪端教者，名场耆宿，平生不自作诗，一取之唐宋诸家，每一挥毫，络绎奔赴。如《吴门怀古》云：“上方金殿郁岿，却忆吴王古帝朝。小院回廊春寂寂，深帘飞絮昼寥寥。千年城郭名空在，百战山河血未消。衲子不关尘世事，月明夜夜自吹箫。”《赠人》云：“送人卮酒不成欢，竹里行厨洗玉盘。十载乱离知己泪，百年粗粝腐儒餐。风尘荏苒音书绝，桑梓凋零故旧残。客里聊为河朔饮，暂须宾从驻征鞍。”浑成无迹，殊为可喜。《啸阁集》所载，多至万首，亦可谓仅事矣。

晚而举子

予年四十三，始举一子，逾年殄殤。已绝梦熊之望，猝闻伤心之言，勉置婢妾，十年之间，连获男女数人。夫富贵或可幸邀，所难必者子与寿耳。仆虽功名偃蹇，从无怨尤，念天之待我者，未尝不厚也。古人云：“德业观前面人，名位观后面人。观前面人，每见我不如人，而日励思齐之念。观后面人，亦见人不如我，而日消蹭蹬之忧。”是非通人不足与语此。

三冈识略卷五补遗华亭董含著

雉

淮安府盐城县，野雉遍雉。

石卵

乙巳三月，获鹿县山石裂，中有一卵，大如五斗瓮，重六十斤，按之微软，中有声。遍询人无识者。

石陨

四月十七日，武林富阳县太平村风日晴朗，忽于巳刻天气晦黑，有大石堕地，声如雷，折而为二，重数百斤。

宋莱阳

宋观察琬，字荔裳，丁亥进士。其于诗文不多作，然皆有崎历落之致。性倜傥，阔略细故，尤好结纳，相识遍海内，坐客恒满，徵歌命酒，欢笑谐谑，绝去崖岸。即有未经识面者，阑入坐便共对酌，去来不问，亦不复询其姓氏。尝被诬，陷身请室中，几致不测。久之得释，客游吴越，系艇于六桥烟树之间，偕诸名流分韵唱酬，留连觴咏，动经岁月，意气豪迈，十年不归。求诸古人，元龙豪气，庶几近之。所著有《安雅堂集》。

梅生葵

张孝廉士绅，庭有古梅，三年不花。一日，老干忽放一萼，状似葵而绝大。识者以为不祥。又有野雉飞入中堂，逐之不知所之。俄而孝廉被病卒。

先慈吉祥善逝

先慈殷太孺人，性端肃，不妄言笑，虽生长富贵，自处泊然，四十后即多疏食。每

晨起，讽《金刚经》三遍，长绣佛，一灯荧然，念诵之声，不辍于口。含若进肉味，先慈呼含而谕之曰：“尔小子母以三乘为妄，我老必归西方，但愿我佛化身时无疾而终，此其验也。”果于是年六月十八，偶患霍乱，亦无痛苦，翌午，于普门大士成道日，沐浴端坐而逝。逝半日，顶门犹热如火。适有苾刍在坐，闻之大惊，以为彼教所仅见云。华原沈白有《吉祥善逝颂》以记之。

众星陨

十月十一日四更，有大星见东南，众小星随之，或上或下，倏左倏右。大星陨，小亦随之陨。

徐杭赠诗

徐杭董孝廉宗城，性磊落，眉目耸秀，每捧手雄谈，四座倾听。曾下第南归，虽当失意，辞气豪上。方自谓拾青紫，绾印绶，驱驰金马之场，腾踏云龙之会，要当前鸣歌钟，后拥郑女，穷奢极欲，以展平生未足之志，故览黄河之簸荡，历大江之逶迤，未尝不击楫高歌也。此志未遂，筮仕得甘泉令，便道过余言别，留诗见赠曰：“昔年文价重燕京，金榜初标第五名。花竹绕庐书满架，对君惭我宦游情。”后竟歿于任。

火光亘天

丁未正月二十日，昏时，东北有火光。焰焰如焚，旋满西北。居人疑失火，互相奔视，或登高望之，见赤气亘天，逾一刻而灭。

黄风黑虫

四月初七日，陕西邠州等处黄风竟日，地生黑虫。十七日，陨黑霜。

蝗灾

五月，淮安各属蝗虫为灾，禾仅存十之四。兴化、海州、赣榆尤甚，飞则蔽天，堕地堆积数尺。至月尽，一半往西北，一半往东南。按盐官董君穀曰：江南素无蝗，昉于嘉靖八年。至崇祯十四年季夏二日，从西南蔽天而至。七月初，其族益繁，大为苗害。不知何据？容考之。

云间唱和诗叙

楚蕲顾赤方景星，游云间，与余辈数人唱和酬答，得诗百首。楚人卢大参为之序曰

：“人生之乐，莫如友朋。友朋之乐，莫如唱和。古之唱和，虽君臣亦有焉，不独朋友矣。《鹿鸣》、《彤弓》，君臣相答，亦曰“嘉宾”，盖略君臣之分，洵乎乐至忘形，同声相应，有莫知其所由然者。丁未秋季，吾友顾黄公扁舟为云间游，诸名下递相赠酬。黄公简余曰：旬日来诸子闻楚人至，磨厉以须，分队迭进，皆劲敌也。某亦时出奇兵以应之，诚不减钜鹿之战，惜吾子未得从壁上观也。余甚壮之，正仆仆行役间，适汇帙寄余，读之深叹，一时盛事，洵在于兹。惟是吴楚相距千里，流共一江，风声意气，自相契符。昔骚赋创作，屈、宋开先，而吴中才士继起。汉有严、朱，晋有顾、陆，江左风流，遂不减菊芳兰秀矣。今乃聚美同时，诚不可无一言以纪。余不憚极力铺扬，于楚人、吴人，终不敢轻分左、右袒也。并题一诗于后云：

楚江一水东连吴，才人两地遥相呼。

扁舟乘兴适来过，千里访吾循海隅。

词坛久许推作伯，染翰落纸风雷驱。

此地名材似竹箭，抒华掞藻随雕镂。

方欺楚风久不竞，攘臂索战出分途。

期会相约猎城内，胜拥九峰及泖湖。

美钟诸子并韶秀，吐词多丽咀其腴。

决意专伺三鼓懈，捣虚欲夺大将符。

故将尊酒时作饵，香莼肥蟹充庖厨。

讵知醉后胆愈壮，神为督阵鬼执枹。

一任群雄列队进，奋笔洒墨终不枯。

咄嗟乎，咄嗟乎，此战甚酣今古无。

歌骚千载谁得继，赖君郢词幸未孤。

壁上观者谁氏子，范阳之裔大夫卢。

叙诗并佳，故录之。赤方又赠余诗云：“历落尚书后，人间说长公。策收身见放，遇啬道尤丰。侪辈行多贵，文章老自工。吟君咏史作，浩气吐长虹。”

飓风

六月十八至二十日，漳州府飓风大作，暴雨不止，海潮忽涨，漂没者数千人。

东村

予年来避迹东村，不入城市。岁暮，雪花满野，独坐无聊，适沈生麟携酒至，相与纵谈时事，畅饮极欢。沈即席口占，予和云：“黄云霭□风怒颠，一声孤雁冲寒烟。浊醪不醉絮被薄，正是江村欲雪天。”“雪压茅茨昼未开，一樽相对兴悠哉。肩披短蓑挂双鲫，溪叟叩门何处来。”

三冈识略卷六

【己酉至癸丑】 华亭董含著

改历

己酉二月，钦天监奏：南怀仁推八年历日，开载闰十二月。夫雨水为正月之中气，既有中气，则此月即为九年之正月，应闰九年二月。通行天下，将现颁历所载闰，不必看。

议蠲

吴给事国龙疏称：欲救民疾苦，莫若蠲免积逋。盖民力止有此数，经徵完则带徵欠，带徵完则经徵欠，今年所欠之经徵，又为次年之带徵矣。积欠相仍，桁杨载道，亦复何益？请自八年以前，悉行蠲除，则穷黎得生，而皇恩远沛矣。黄门此疏，真救时急务也。

白垚

吴门朱翰林典，家钜富，其园居产白垚，每季取一次，岁可得百馀石，旋掘旋生，冶坊争鬻之，积资无算。钱氏松枢十九载：山左王冢宰国光，有山地一区，其土结为铁沙，世擅其利。想即此类。

产异类

海虞孙状元承恩女，嫁戴氏，一产三子，俱非人类：一额有角，一遍体生毛，一兽头四足。才出腹，便大笑不止，母惊死，家人立毙之。

无臂道人

粤西全州有无臂道人者，少为将，砍去二手，病废，隐居方外。喜学书，以肘夹笔，挥洒不倦，士大夫甚重之。每书款，自称“无臂道人”，卒不言其姓氏。

先圣遗像

距松郡四十里，曰陈陀桥，积雨基陷，居民运土筑之。不数尺，见一巨碑。众挽之出，石纹驳犂，拭视，乃先圣遗像也，傍列大字五，曰“唐吴道子作”，衣冠带佩，极为古雅。按隋大业中，夫子三十二代孙祜宦于吴，遂家焉，因葬衣冠，并立庙此地。宋淳熙中，有僧掘得宝玉六事，三璧、二环、一簪，皆古物。今复得碑像，

士大夫相与迎入青浦学宫。

长年

赵□谦，闽人，善容成御女之术。年一百六岁，畜数姬，举子女十余人。京华贵人，争相延致，竞作诗歌以赠之。闻今尚无恙。

鬼门关

天下山水之奇，莫过于粤西，然地极险僻，兼多瘴厉，故宦游者往往不能穷其胜概。菰城吴太守先，奉使安南，随地有纪。其过鬼门关，题壁曰：“路入鬼门隘，崎岖拥汉旌。翠山蛮雾合，白屋野烟平。树蝮阴天见，林鼯白昼行。词人迁谪地，万古一含情。”太史语予云：安南冠服，颇类中华，束带垂绅，绛袍乌帽，与明无异，但其君臣两足俱赤，则殊不雅观耳。

太湖水溢

太湖跨三州，纳徽、浙诸山之水，周围八百里。吴江县去湖较近，于六月十二日辰刻，西南风起，水一拥而至，平地高丈许，漂没庐舍，溺者数百人。县令大惊，一耆老白压水故事，取县榜从墙上投水，拜呼曰：“吴江没矣。”水遂退。

古钱

陕西广阳府东山，有不窟坟。相去数丈，一古墓忽崩裂，中有石室、石床，堆古钱数处，散布四角，总计九百九十九枚，形方，长几二寸，狭上阔下，上有眼，下有方空，刻古篆二，曰“货布”，其式甚古。考太公九府钱，有刀、布诸名，制像立名，俱相吻合，岂即此钱耶？土人云，以之辟邪，最效。

负托遇鬼

越西王君益朋，由词林转吏垣。江臬卢慎言贪秽狼籍，被劾，行三千金托益朋，求居间。益朋受金而不为之地，竟伏法。是秋，晋秩冏卿。始入署，忽见慎言从内出，责以负托，揪发乱殴，随仆地。呼家人，具述颠末，呕血数升而卒。益朋有弟家居，创园亭，责一匠役，匠愤甚，奋斧劈之，立毙。计其时，即益朋死日也，闻者叹诧。

魏柏乡

前明进士曹胤昌，楚人，于辛亥季夏往滇迎赠公柩回籍。过楚雄府一村，有农家童

子，年十五，卧病在床，闻门外车马声，大呼曰：“此曹石霞也！何故过门不入？”促父往邀。父愚人也，怪其妄，叱之。久之，闻于府正。府正适与曹晤，偶述此事。曹甚讶，竟枉道复至村中觅之。此童大喜，留坐，与叙契阔，并诵曹会卷，深加叹赏。述都中晤语之地，一一不爽。曹惊曰：“得非内阁魏柏乡老师乎？”曰：“然。”问：“何以托生于此？”屡叩不答，良久曰：“我病已剧，今将往粤中某县，兄当偕往。虽然，恐兄少迟赶不上矣。”曹骇别。未几，此子卒。曹扶柩至昆明，寓西寺，亦卒。许观察纘曾亲过其村，闻之甚确。

祷雨自沉

六月、七月，亢阳为灾，路绝行旅。细林山道士曹耕云，向以术自诩，筑台高数丈，步罡画诀，每日上奏三次。又用黑犬磔血，杂降檀焚之。扰扰半月，日色愈炽。时有僧明愿者，东昌人，俗姓田，披剃马□寺，合掌跪赤日中，不饮不食，望空拜恳，誓愿以身殉。至期，跃入跨塘桥河，自沉死。

墨竹

墨竹一派，自梅道人后，宣、正间则推夏□，论者谓可比肩元镇，徐渭、王问不及也。邇来画者虽多，鹿城归太仆孙庄，气韵萧疏，颇多古人遗意。庄别号鳌钜山人，性好奇，喜醉后挥洒。尝画巨幅，题一绝贻予曰：“劲节寒姿自性生，飒然笔底作秋声。吴儿只解称朱鹭，柳叶芦苗浪得名。”

兵变

九月，总戎梁公化凤病故，兵四出为盗，署印侯将军不能制。于十八日，群聚府门索饷。郡守耿继训，少年不知事，以漫语应之。兵遂大哗，擒守毆骂，衣冠毁裂，拥至小教场，两日一夜，不与饮食，备受窘辱。时府藏告竭，计无所出，向典铺贷发，始得释。兵气既骄，肆行剽掠，百姓为之罢市。

射虎

上巡幸上都，驻蹕山海关，分骑大猎，一日获虎二十。上复亲射虎，虎咆哮而前，一近侍奋身当之，虎衔去数武外，置地，坐其上。众共格杀虎，近侍竟无恙。

女怪

东洞庭有贾人吴继进者，家巨富，继进尤善居积，百货充斥。一日，与客谈，忽空中闻应答声，谓吴曰：“我侪八人，适来托迹，但日办素斋，并呼梨园一部，此外勿烦主人也。”吴唯唯，翌午设席，布灰于地以验之，足迹皆妇人，因呼为女仙。

如是累日，吴愤甚，赴张真人府诉之。寂然数日，复至，设席如初。伶人私相语：“我辈真白日见鬼矣！”猝有批其颊者，昏仆于地。群优叩头乞哀，久之作声曰：“姑恕汝。”自是或抛瓦砾，或几案无故自举，或登树颠，或骑屋梁，变幻百出。吴有侄，仅知书，性夸诞，自负大贵，盛衣冠入，厉声叱之，语未绝而头上冠从空中掣去，左臂中一砖，踉跄走。怪鼓掌大笑。内帑悉为徙去，合家苦之而不能禁。予谓吴聚敛无厌，故有此怪，财尽则祟止矣。周孝廉官与吴密，述之甚详。

北人不知南味

庆历中，学士会于玉堂，偶置生蛤蜊，令饕人烹之。久而不至，检视，则曰：“煎已焦黑，而尚未烂。”坐客大笑。顷莱阳宋琬饮予斋，有海蜊，宋极力啗之，忽攒眉曰：“此物不甚佳，半日止碎一枚耳。”坐客大笑。

猛虎行

孟道脉者，武昌人，为娄令，性贪而昏，破家者不一而足。又酷嗜龙阳，衙役年四旬以内，及无髭髯者，往往不免。岁馀，耗正供五六万。抚军列状上闻。适于春首获一牡虎，娄民益奇之，以为令岂其牝耶？不然，吾邑素无虎也。楚人杜濬作《猛虎行》以纪之。道脉后拟辟。

神火

壬子二月二十三日，贵州镇远府，神火自石屏坠下，状如星陨，怪风四起，火飞渡河，官署民居，尽成灰烬。百姓奔避山中，火复炽，虎豹咆哮，尘雾四塞，日暮火始熄。

伪碑

四川成都府武侯庙，年久倾颓，有宋观察可发者，喜功好事，取一旧碑，伪镌十六字，先一年埋庙下，后托言重修，掘得之，报幕府，拟缮疏上达。适有发其事者，遂中止。碑首列一“亮”字；下有“千一出”三字，言岁在壬也；中有“水月主”，乃国号；“庚不大”，乃纪年；“盖十八”，则自寓其姓；“龙复卧”，窃比于诸葛也。嘻，亦愚矣。

凿吴淞江

浙江范承谟、江抚马□合疏请开吴淞江。辛亥冬起工，至壬子孟夏告竣，复作闸以备冲击。但沙松水急，随筑随崩，势恐难久耳。时畚鍤如云，皆朝廷出钱雇夫，而有司仍照田分派。或业多者贿脱，而穷民反承役，百姓苦之。计费金钱三十馀万。

自海公瑞凿后，至是已一百二十年。海公调停允当，不烦国课，不费民财，计日奏功，士民皆追思之。

拂水山庄

柳是，字如是，吴人，初名杨影怜，流落北里，姿韵绝人。钱牧斋一见惑之，买为妾，号曰“河东君”。为人风流放诞，先生爱之深，不为管束也。捐馆后，族人群起攻之，柳自缢死。予偶游拂水山庄，赋诗吊之曰：“山顶流泉入屋中，回廊曲曲闭春风。邨侯书去空存架，惟见江梅绕砌红。满壁丹青写旧词，朱栏碧树尚参差。燕楼寂寞佳人死，不枉当年赋柳枝。”

果报

福善祸淫之说，虽不可尽信，然不于身，必于子孙，报应之理，实有不爽者。吾乡李学道慤、徐县尹鼎、陶孝廉、周郡守茂源为孝廉时，郡中一孀妇，无子，挟厚货，族人欲攘之，讼于官，四君为助。适当计偕，当事委曲从命。妇自缢，临死曰：“生既不能自直，死必有以报诸公！”岁辛丑，李官楚，疽发背死。庚戌仲夏，徐游秣陵，泊舟散步，俄踉跄回，谓偕行友曰：“顷见皂衣人手持勾帖，云为孀妇所讼，视之，我四人名皆在焉，惟李有朱点，云已摄到，殆不免矣！”叩其故，述前事甚悉。急归，腰生一痛，渐大如盂，逾两月卒。辛亥，陶君脑后发一疽，自夏徂秋，旋绕满颈，稍动摇，头似欲坠地者，家人互相捧持，不卧不食者，三阅月而卒。壬子夏，周君亦患腰疽卒。徐恂恂长者，平生无大过；周守括苍，讨论风雅，与骚人墨士日夕唱酬，乃年仅一周，俱罹恶疾。诸君之过，皆出无心，可惜亦可畏也。

瑞虫

七月，时飞蝗从西北蔽天而来，草根木叶，靡不立尽，独不食稻。半月后，悉向南去，不知所之。农人欢呼罗拜，目为瑞虫。

暴风摄寺

闰七月，淮安南门外乌沙河西嘴，有祖堂寺，于初四日二更，忽风雨暴作，将寺摄去府西数里外，砖瓦木石，皆从空坠下。

陆园胜概

当湖有冯孝廉者，家甚富，于郊外营一园亭，竭尽心力，五十余年始落成，广袤几百亩。孝廉歿，无子，陆侍御光旭以善价得之。予偶游其地，侍御觞予于园中，

曲栏窈窕，修池逶迤，古木苍藤，翳天蔽日。其最胜者曰“桂径”，老桂数千株，夹覆其上，行其中者，巾袖皆染浓香。池中制一舫，客至先命酌，令二童子鼓枻而行，但见小桥断岸，曲折回旋，涧花乍舒，白鹤徐步。又一小阁，供花神十二，于春秋二分设祭，祭毕，邀好事共醉。盖园林之胜，甲于东南矣。

二首人

八月。华亭砖桥北里许，予家别业在焉。邻人乔兰妻李氏，产一子，头上复生一头，上头差小，止具二目，厥状如葫芦。其父惊骇，以足踢之，声啾啾，杀而瘞诸野。予目击之。

兰亭真本

世传《兰亭帖》，唐太宗殉葬。后遇温韬之乱，发掘诸陵，复出人间，流传无定。至明，此帖入会稽张氏。其裔孙名陞者，与予世讲，幸获一见，真昭陵真迹也。后携往都门，辇上诸公，争欲得之，以索价太高，未有售者，复归山阴。今张君已歿，不知此帖又落谁手矣。

啸雪庵

吴绡，字冰仙，姑苏人，许参政之室也。幼负才藻，善诗画，所著有《啸雪庵诗集》，记其《咏相思鸟》云：“南粤春深花木残，羽衣身暖锦成团。佳名莫与离人说，彩色惟教绣女看。丹实啄来妃子笑，素枝衔去楚臣叹。霜缣拟写相思态，应为伤心下笔难。”《咏双蝶》云：“韩凭夫妇两魂狂，来往栏前亦自忙。晴日试调妆后粉，春风新检舞时裳。飧多芳芷须犹酿，睡稳花枝梦亦香。欲与何人透消息，等闲飞过宋家墙。”见此二诗，其才调风情，不言可知矣。

蒋公坐化

癸丑正月。金坛蒋公超，字虎臣，顺治丁亥殿试第三人。公性恬静，薄于嗜好，官居清要，邈焉物外，布衣蔬食，有如儒生。时以公事往五台，由武当入川，谒峨嵋山，入伏虎殿，沐浴趺坐，诵佛号数声，留偈一首，掷笔而逝。夫人一生，鹿鹿利名，急流勇退者，已不可得，乃能深究性理，超脱形骸，不意我儒中乃有此人也。偈附于后：“翛然猿鹤自来亲，老衲无端堕孽尘。妄向镬汤求避热，那从大海去翻身。功名傀儡场中物，妻子骷髅队里人。只有君亲难报答，生生常愿祝宏仁。”

总河为神

朱尚书之锡，治河有功，并有惠政，歿于任，颇著灵显。地方官请肇封，朝议以无

所凭据，难加封号。总河王光裕请敕为河神，百姓立庙以祀，至今血食，遂与金龙神并盛云。

国祚之久

三月。土鲁番国入贡，疏言“臣国蹇遭变乱，不能进献。今地方稍平，时遣兀鲁和际于一千八百三十三年二月二十八日，远贡方物。”夫国祚之久，周家八百尚矣。自汉以下，多不过三、四百年耳。乃远方小夷，不立年号，止记岁月，一姓相袭，至千有馀年。后黎西国贡狮子，亦称天主降生一千六百七十四年。俱见邸报。

知贡举

唐宋科制以来，最重文衡，凡知贡举者，必循官序，采文望素优者充之。如唐人诗曰：“三主礼闈年八十，门生门下见门生。”得见本门孙，便侈为仅事。本朝则不然，大约一登翰苑，即可与斯选，往往有门孙之门孙相聚一时者。然或终身不识一面，或相遇如路人。世谊既疏，情分益薄，事虽盛而实则衰，不足荣也。

蠲租

上以江南苏、松、常、镇、淮、扬六府连岁灾荒，民生困苦，十三年地丁正项钱粮，特蠲其半，计蠲银一百三十四万七千八百馀两，米豆三万七千八百馀石。

灵棋经

《灵棋经》，不知造于何人，列唐人一序云：汉留侯受之黄石公，用梓木制棋十二枚，刻上、中、下字各四，掷而成卦。每岁人日，以酒果祭之。考书推辞，吉凶得失，无不奇应。予虔奉二十馀年，即以事叩之，十验八九，胜于向市廛日者问卜多多矣。

贪报

海昌沈令式为广东学政，颇纳贿。其前任某，亦以贪褫职，诸生环署大哗，某恐甚，念积镗不能尽出，乃贮诸井，覆以巨石，人无知者。及沈莅任，前任公子携两仆来谒，礼币极厚，密告曰：“先君宦赀若干，藏于斯，今来叩取。倘蒙相许，愿分其半。”沈及子建岭欢然迎款，询知金所，毒杀其子与仆，掩尸于井而攫其金，自为得计。及罢归，将抵家，建岭忽见其子突至前，呼号索命。一夕，无故于舟中仓皇自缢。令式惊骇，心复慚恚，不两月相继死。虽有遗金，岂能享哉？海宁耆儒朱襄述之甚详。

县令为丐

粤东陈鉴，明季贡生。国初选华亭尹，略知书，而险僻无所顾忌，又性喜讪人。以侵粮下狱，僦居松郡，士大夫无与往还者。每至旧役家索饮食，稍不如意，或讪其阴私，或讼之官，人皆畏而避之。或遇于路，以为不祥。至老耄，不能糊口，夫妇相携，行乞于道，年八十，竟以馁死。夫以本邑之官，而即为此土之丐，亦目中所仅见者。

亲丧不守制

三年之丧，古今共行，一闻讣音，未有不匍匐奔赴者。时江苏藩台某，丁内艰，恋恋不能去，再三恳抚军题留。上谓冢臣曰：“亲丧守制，一定之例。慕天颜独无父母乎？速令难任。”后竟在任守制。又里魏学渠视楚学，首春闻母丧，匿不报，至十月终，犹吉服莅事，被参而归。二人一甲榜、一名孝廉，乃贪位忘亲，一至于此。魏君家世忠义，尤为可惜也。

藏镪

武林公署前，有颓垣隆起，相传已数百载，不可动，动必有殃。是秋，总戎金固山砺驻节于此，薄暮独坐庭际，见二人，衣一黄、一白，徘徊往来。就视之，心颇异之，命破其垣。凿地丈许，获石函二，重不可举。启视之，一黄金，一白镪也。每笏镌“韩蕲王”三字，金岂韩之后身耶？

普陀藏经

普陀有《藏经》，赐自内府，牙签锦□，备极华整。伪荡湖伯阮进，欲乞师日本，遣使赍往舟中。有僧湛微者，前自日本来，因与同载。行数日，忽风涛怒号，潮水如墨，有两红鱼长数丈，横墨浪中，鳞鬣俱见，其余众鱼，出没前后，舟不能进。群拜且祝，急出两国界龙王敕书二道焚之。行向晨，风渐缓。一昼夜漂泊，南去殆数千里，急转帆而行。既抵日本，随行一舟亦到，云并无风浪。乃知此船以《藏经》故也。始，其国闻有《藏经》，甚喜，及闻湛微名，大惊曰：“此僧复来，是速死耳。”因不受，敕护经而归。叩其故，则以湛微曾入天主教也。先是，西洋人为天主教者至其国，国人信之，各授以秘术，自国王及民间闺阃，悉为所乱，一皈其教，死生不易，主者遂肆奸术，纠众作乱，其国大发兵扑灭之。自是痛绝西洋人，设法严禁，于通衢置一铜板，镂天主形于上，凡各国人往来者，必使践踏而过。或衣囊携一西洋物，或带西洋书一册，搜得者，满船人悉诛死。事见张遴白《奉使日本纪略》。

诗讽

海虞钱宗伯谦益，一代伟人，操宇内文章之柄，一时名流，奔走翕集。晚自号蒙叟，宾朋谐谑，觞咏风流，跻贵仕，享高年，迩来文人，罕见其比。然其大节，或多可议。本朝罢官南归，有无名氏题诗虎邱以诮之曰：“入洛纷纭兴太浓，莼鲈此日又相逢。黑头已是羞江总，青史何曾用蔡邕。昔去幸宽沈白马，今归应悔卖卢龙。最怜攀折章台柳，撩乱秋风问阿侬。”又尝作诗赠歌童入燕，缠绵哀艳。熊侍郎文举和韵以讽之曰：“金台玉峡总沧桑，细雨梨花枉断肠。惆怅虞山老宗伯，浪垂清泪送王郎。”钱见之，不怪者数日。

义鹤

里中许氏园，有二鹤，其雄毙焉。岁馀，复有以二鹤赠者。孤鹤踽踽避之，不同饮啄。雄者窥其无匹，意挟两雌。孤鹤引吭长鸣，相搏击。夕，双鹤宿于池，则孤鹤栖于庭；其在庭，亦然。每月明风和，双鹤翩翩起舞，嘹唳和鸣，孤鹤寂处不应。或风雨晦冥，寒湍激石，霜叶辞柯，哀音忽发，有类清角，闻者莫不悲之。主人因长其羽翮，纵之去。夫鸢□之操，锋刃不能变；□卵之性，寒暑不能夺，可以戒天下之为妇而不知义者。事见陈黄门子龙《杂识》中。

金蛇

细林山彭宏文，号素云，法名通微，河南汝阳人。母梦一黄冠，食以大桃而有身。及长，传太和真人炼气栖神之旨趣，遍游中原，至云间，择居此山。明太祖遣中使宣召，值其羽化。命启竊视之，正坐不倚，长爪绕身，特赐号明真子。今山顶有仙冢及丹井。相传其爪甲随风而化，变为金蛇，长三四寸，儿童捕置器中，以供戏玩，亦有封识宛然，倏去不见者。止此山有之，他处无也。

麻衣僧

明季有麻衣僧，不知何许人，冬夏常被麻衣，人故以此呼之。形状颇异，语默不常，偶发一言，往往有奇验。性嗜酒，每出，路人竞沽以饮之，自朝至暮，未尝见其醉。与名医吴端所者最契，吴密叩其休咎，曰：“汝享年甚永，然终当以兵死。”至本朝，年逾八旬，为乱兵所刃。郡吏闻其异，欲试之，黑夜遣一妓直造其榻，百方抚摩，寂然不动，笑曰：“别人跳不得，贫僧跳得过，速去，毋久混我也！”一旦，谓人曰：“此地不出数年，当罹杀戮之惨，我归矣。”询其所向，竟不答。未几，醉倚西林寺桥而化。众人置龕以焚之。适有人从北来，遇于京口，相与握手慰劳。计其时，即蜕去之日也。盖神圣幻化，混迹流俗。予数岁时，曾蒙其一盼，惜幼稚无知，不能一叩宗旨，至今悔之。

异笠

陆尚书文宣公有一笠，相传出自外国，非藤非草木，质轻而韧，传五世不坏，竟莫辨为何物。曾孙庆裕，至今宝藏之。

三冈识略卷六补遗华亭董含著

雨沙

庚戌正月二十一日，天雨黄沙。

陶广文

陶广文，少有大志，负才名，屡上公车，报罢。秉铎天台，非其志也。自以才大被屈，愤懑不平，日招门下士，相与悲歌慷慨，共浮大白。尝携酒游石梁，访金庭之古洞，眺赤城之朝霞，触境自伤，不觉抚膺长恸。恸毕，复咄咄自问曰：“陶生陶生，尔乃遂至此乎！”竟以郁结，疽发于背而卒。以孝廉之才器，自宜立致青云，顾乃屈于卑位，生无万钟之享，死有伯道之痛，岂平生所为，间有不可告人者乎？不然，我不得而解矣。

龙斗

辛亥五月十八日，镇江月河镇，有龙列阵而斗，暴风骤雨，天气晦冥，沿河民房，倾倒者无数。

月下白气

十五日二更后，月色如昼，月下白气纷纷，仰望如密霰。

乡饮酒

古礼有宜举行、有不必举行者。行而不善，不如其已也。即如近日所行乡饮酒礼，古先王敬老尊贤，本朝垂世立训，煌煌钜典，诚不可废。奈当事不推其本，以为此不过奉行故事。有厚货者，即得与斯典；而德行文章可范后学者，概置勿问也。东村有一土豪陈姓，西郊有一市侩黄姓，二人最微贱，胥以贿得之，虽不敢赴饮，而俨然以大宾自居。地方纵无老成耆旧，亦何至玷辱如此！夫子曰：观于乡而知王道之易。乃对此辈而执觶趋迎，升歌合乐，毋乃轻朝廷而羞乡党耶？可为浩叹也。

僧诗无蔬笋气

杼山释肇帽，字雪坡，能为诗，娄江吴祭酒亟称之。尝以四韵见投云：“十载名山

见下帷，曾携彩笔上彤墀。灵和柳树垂条日，句曲松风入梦时。著就玉杯追汉相，歌成香草怨湘累。自怜马癖清狂甚，何处林泉寄一枝。”亦喜无蔬笋气也。

宅怪

余庐北郭三十余年，室非高明，从无鬼瞰。首春探梅邓尉，半月归家，人诉有鬼患，不信。既而怪异迭见，大约有声无形，傍晚即歇，垂晓复作。颇惮余，偶一他适，即出为患。至孟夏，怪始绝。未几，丧一子二女。侄孙治家亦然，随丧二女。闻青溪诸进士嗣郢家其祟更甚，失一长子。总之不祥之徵也。然禁城内外，青天白日，鬼魅横行，岂正气伏藏，而阴邪遂肆狂逞耶？

相地

凡风水之说，莫盛于江西，然读《青囊》、《海角》、《狐首》诸经，其言曰：“行因势起，聚因势止。起为来龙，止为坐穴。”又曰：“鼻颡吉昌，角目灭亡，耳致侯王，唇被兵伤。葬龙之腹，必后世福。伤其胸胁，朝穴暮哭。”考经按词，寻龙察脉，其理茫昧，盖有不尽然者。迺来谷阳范氏贯玉，世承家学，且居心纯正，人不敢干以私。有某公子售地，一富商欲得之，公子以百金私嘱。贯玉曰：“地果吉，何用酬？否则百金无庸也。”亟反其金。其以诚行术有如此者。今其子钻、汧俱有文，能继其业，抑亦为善之报也。

郡中艺事

本朝来我郡以艺著者，书学则有曹思邈、钱穀、沈楫。钱、曹皆名宿，而结构精劲，当推钱第一，晚年名益重，求书者户常满。丹青则有韩旷之山水，丁汉公之传神。韩落笔苍老，饶萧散之姿。丁年甚少，每遇得意，辄复神似。医术则有金时榆、章旭，幼科则王西月、王霁云、曹叔明。金擅时名，章遇奇疾，往往见效。刘叟自迹善风鉴，亦十得六七。手谈推张生吕陈，大江以南，擅国手之目。琴师则有金生德宏，然其人伧父，不堪相对。后起纷纷，俱不足道也。

自题行乐图

“噫嘻董生，曷为而髡？不缙不黄，不贾不耕。泛泛中流，若梗与萍。口无戈矛，胸无荆棘。一丘一壑，载浮载沉。知我者谁？图中之人。每相对而如语，庶与余兮结邻。尔嘲我为芦中之穷士，我亦笑尔为纸上之白民。”

吕道士

吕道士者，关外人，传五雷法，能劾鬼怪，凡病家延之，其病立起。兼多艺，以伎

游人间。余赠以诗云：“瓢绾青螺髻，绦悬碧玉环。近从关外路，来往浙西山。橘实垂秋井，松花落钓湾。降真焚鹊尾，礼斗夜方还。”

三冈识略卷七

【甲寅至戊午】华亭董含著

龙阵

甲寅三月十四日，长淮卫运船三十四只，泊京口。傍晚，大风起，雷雨交作。至十五辰刻，始息，仅存八艘，十四艘被风浪打碎，人米悉漂没，其十二艘寂无下落。又润州木排一带，失去无踪。据焦山僧云，俱被阵龙摄入海中矣。

众谋筑舍

自癸丑滇黔兵起，处处告变，兵食两绌。举朝急欲谋足食足兵之策，奸人窥伺意旨，竞为诬妄。于是有以开矿之说进者，如河南民张吉庚等是也。有以窖藏之说进者，如河南民傅兴隆等是也。有以地不爱宝之说进者，如山左民称银矿累累，可取以助军饷是也。有言以诡言奇计可以攻敌者，如江宁妄人献兵策阵图是也。有欲设计诱敌者，如旗下知县刘国翰是也。有进足兵之策者，如给事黄运启欲将商贾、农民尽编为兵是也。有以丈量之说进者，如御史刘安国是也。究之呖语纷纷，有同儿戏，幸庙算优长，出奇制胜，不然，天下从此多事矣。可叹也。

绘图御史

蒋御史伊，慷慨负直节，假满还朝，以民生当恤、士气当伸，绘十二图以献：一为难民妻女图，二刑狱图，三寒窗读书图，四春耕夏耘图，五催科图，六鬻儿图，七水灾图，八旱荒图，九观榜图，十废书图，十一暴关图，十二疲驿图。皆切中时事，真今日之朝阳鸣凤也。

哭友

沈浩然，字雪峰，少号高才生，后薙发从浮屠氏。性情恬淡，工书善诗文，风流儒雅，古道照人。以久历险阻，故年未艾而衰病侵寻，寓郡北之善应庵，未几卒。良友云亡，知音邈绝，口占二诗以哭之云：“廿载江湖欲避名，破巢遗卵可怜生。闲来重觅高人迹，惟见群乌绕寺鸣。”“多病怜君带孔移，麦光新寄药奩诗。钟期死后琴声绝，白首交情更属谁。”庶几歌以当哭矣。

口舌报

吴中袁于令，字箴庵，以音律自负，遨游公卿间。所著《西楼记传奇》，优伶盛传之，然词品卑下，殊乏雅驯，与康、王诸公作舆儻，犹未首肯。其为人贪污无耻，

年逾七旬，强作少年态，喜纵谈闺阁事，每对客淫词秽语，冲口而发，令人掩耳。予屡谓人曰：“此君必当受口舌之报。”未几，寓会稽，冒暑干谒，忽染异疾，觉口中奇痒，因自嚼其舌，片片而堕。不食二十馀日，竟不能出一语，舌根俱尽而死。

松酿

尝见宋人小说，载云间酒最淡，有小词云：“浙右华亭，物价廉平，十文钱买得三升。打开瓶后，滑辣光馨，教君霎时饮，霎时醉，霎时醒。听得渊明，说与刘伶：这一瓶约迭三斤，君还不信，把秤来称，有一斤酒，一斤水，一斤瓶。”彼时华亭尚属里，想宋时如此。迩来居民取泖水为之，清冽无比。又有名“刘酒”者，凡燕会及享上官皆用之，不减惠泉醇醪、虎邱三白，可以一刷此消矣。

死作阎罗

钱氏《猗园杂说》：万历丙午三月十六日，陈中丞用宾开府黔中，时因夫人病剧，医祷罔效，设坛召乩仙。仙自称金碧山神。问：“病可愈乎？”答曰：“本欲为夫人请命，奈冥王新即位，法甚严峻，无路可救矣。”问新王为谁？曰：“江南常熟人，即春官侍郎赵公用贤也，今为第五殿阎王，十五日莅任，按察人间善恶，公尚未之知耶？”书毕寂然。中丞惊愕，心念侍郎系同年，请告归里，闻尚强壮，安得有此事？俄而夫人卒。越三月，阅邸报，知侍郎果以三月十五日捐馆，始信山神之言非诬矣。谢氏《杂记》，亦载此事。侍郎立朝，矫矫风节，死为地下主者，固宜尔也。公为予妻曾祖，彼族虽共传此说，而实未详颠末，故识之。

弑逆

乙卯。马公绍曾，平湖人，官少司空。子肯堂，幼不率教，及长，贪横无忌。邑令倪君，适为予言：除夜，有良家女经其门，色颇艳，逼入行淫。不从，以刀划其乳，立死。又奸一仆妇，微不顺，即执两足倒掷下楼，颅骨俱折。每岁数人，吏不敢问。其祖封翁曾卧病肯堂斋，遣两奴挟之出，曰：“毋死我室也。”翁愤恚，一恸而卒。公因此宦兴索然，告假归。肯堂悖逆弥甚，田产宦橐，悉为所夺，郁郁不得志。一日他适，以白金数十两授爱妾王氏曰：“我有急需，汝可藏以待用。”肯堂侦知往索，不与，怒詈曰：“吾父尚不敢违我命，汝何为者？”呼仆去袒服，痛捶之，攫金去。王氏自缢，未死，适公归，愤甚，独步书斋，踟蹰半日，饮卤汁半升，肠裂而卒。县令陝人陈孚宸者，欲寢其事，公之弟及妾鸣鼓讼冤，合邑哗然不平，欲截去鼓楼一角。上司闻之大骇，提至省城，论如律。肯堂于狱自杀。窃怪弑逆大变，代不恒有，乃出自世禄之家，殊不可解。相传公贫时，与一尼结欢，于神前密誓，苟富贵，以侧室处之。后惧物议，竟负前约。尼畜恨服卤而死。逾年，公生一子，即肯堂也。时薄暮，见一少尼踉跄向内，随觅无所睹，而婢报已举子。公忧

疑不决，欲溺之，夫人力争之而止。及长，事母少尽子道，而独逞逆于父，实冤报也。

炎雪

六月十三日，海宁县下微雪，色赤。朱司礼嘉徵作《炎雪篇》以记之。

画虎

吴孝廉康侯，字铁庵，城人，善古文词。性任侠，负气节，里中有不平事，不惜奋身以直之。尝闭户学画龙虎，遂臻其妙，四方争求之。后为武康令，山中多虎，欲审其形状，亲自往射，几为所伤。曾写扇面贻余，并题曰：“咄乎白头何雄视，写出霜毫掣电紫。双瞳夹镜光透纸，寒木叶下纷纷。醉中惊起李将军，一矢射落西山云。”笔墨晦暖，辞句历落，余至今珍藏之。

胥主政

建业有胥主政庭清者，好为大言，作诗每自诩曰：“吾落笔烟云，堪与少陵媲美千古，馀子辈安足数哉！”因名其诗曰《胥工部集》，欲与杜为敌，镂版赠人。阅未终篇，不觉失笑，乃知“李赤杜荀鸭”，古今未尝无对也。四方士大夫争取其集，藏贮篋笥，以为笑资。

绣江集

范树□，名彤弧，上海人。为诸生，以博雅自负，喜游贵人之门。沈阳有同姓为显官者，致政归，策蹇从之，每对人称家衮不绝口。尝著《绣江集》一卷，网罗见闻，纂集轶事，秘甚不轻示人。然中所载多有未确，顾乃诬证旧事，诋毁昔贤，求其立心，大伤楔薄。即如王新建之道学、徐文定之相业、顾正心之义侠，皆不能免，然则善真不可为乎？斯直《碧云》之流亚也。又曾记先祖少宰公力致高道素之死，此时思陵甚怒，高自取死法，与他人何与？且先人天性不饮酒，官京邸二十馀年，寓中惟携一婢及仆从数人，歌舞之说，毫无影响，即此一事，已足见此集不足据矣。余不可以不辨。

神女辨

明张应登《巫山神女庙碑》曰：巫山神女，宋玉为襄王赋之，谓其能入怀王之梦。盖玉以王溺于细腰，神其说以中之，无是事也。然则山果无神女乎？于传有之。禹继父治水，东造绝迹，西延积石，南逾赤崖，北过寒谷。有所滞，必召神问之。凿岷江，立瞿峡，千岩万壑，联络千里，乃仰天啸叹，俄见神人，状肖美女，自空而

下，授玉篆灵符，且命其臣任章、童律等六人，为禹翼助。及奠分山川，告厥成功，还至巫峡，思神女助力，询于童律。律对曰：神乃帝女瑶姬，云华夫人也，瑶姬，西王母之女。云华夫人，助禹治水者，见范成大《吴船录》。封于巫山之麓，或为轻云，或为霏雨，或为游龙，或为翔鹤，既化为石，复化为人，千变万化，不可殚述。庙在县东三十里许，十二峰南、飞凤峰之麓。阶下断碑，有“地平天成，权舆于此，功被我民”之句，旧字如南岳禹碑，汉晋人以今文书之者。是禹以成功而始祀神女，其来已远。宋治平中，诏葺庙宇。元丰中，敕号游真。土人疾病则祷，天旱则祷，祷则应。嘉靖十九年，中丞李公毁之，毁玉言之神女也。后制宪王公乔龄复之，复禹祀之神女也。一神女耳，知玉不知禹则毁，信禹不信玉则复。嗟乎，宋玉则说怀王之梦，襄王则想宋玉所说之梦，吾侪可复说宋玉所说之梦乎？

附十二峰：

一望霞，二翠屏，三朝云，四松峦，五集仙，六聚鹤，七净日，八上升，九疑云，十栖凤，十一登龙，十二聚泉。

异形

平生所见异形：山左一贩枣客，长丈馀，首几及屋梁，每出，儿童噪而随之。吾郡一僧，年可四十许，身不满二尺，一人承之以盘，沿街乞食。燕市一叟，眼毛长数寸，蓬松围绕，掩覆其目。江宁见一人，足背反，向后而行，步如常人。乃知古所称“三耳秀才”，抑或有之。

钟自鸣

宁波府新建庆云楼，中悬巨钟。五月初四夜，不叩自鸣。百姓哗言寇至，郡守设醮以禳之。按，明隆庆时，燕河营真武庙钟自鸣。又平阴县门内有钟，不叩自鸣。后亦无他异。

梅菊夏开

仲夏积雨天气，乍寒乍暖。我乡黄菊遍开，又予老苍头家腊梅亦放数朵。里人卢元昌以诗记之曰：“灼灼榴花赛火垂，绿荷如盖挺新池。那知群卉趋炎日，冷眼偷看各一枝。”

甘露

予书斋前芭蕉，五月结蕊，大如升，花开类荷，瓣作黄白色，茎长二尺，上缀青子百枝。每放一簇，瓣中花心二十馀囊，未贮清露，其甘如饴。开至八月，每旦采数

十囊。所结子不及成实，旋就萎落。蕉生甘露，处处有之，而江南绝少，予十许岁曾子旧宅见之，今复再睹焉。

鳖中儿

总戎梁公进鳖羹，庖人剖之，中有一小儿，长三寸，肢体俱全，亟弃去。松人闻之，竞绝此味。或云，鳖中往往有之。又言，鳖交水面，窥见过往舟中人形，感而肖其像。恐亦未确。

止谿

朱推官嘉徵，字岷左，海宁人，授蜀中理官，罢归，筑圃止溪，人称为止谿先生，夙负才名。予偶赴湖山之约，得交于先生。时年老矣，谈吐如涌泉，性傲兀，目中无当意者，独倾倒于予，若以为可与言者。吾何以得此于先生哉！其平昔所结撰，皆艰深幽峭，古致佶屈。尝汇晚年著述，问序于予，予踟蹰良久，而先生已歿。吾负诺矣。一门父子姑媳皆能文，俱有诗集行世，亦一奇也。

神医

予年甫十一，患腹痛，百药罔效，四十馀日粒米不能进。适秦景明昌运自远归，惊曰：“若迟半日，则不可为矣。”一剂立愈。其方用人参一钱，石菖蒲二钱，煨姜二片。诸医力争痛无补法，乃药甫脱口而痛止。

濂中集

毛大可甞，负奇才，避仇走四方，自言当以客游老。所著《濂中集》，词采艳发，一时纸贵。尝缄诗寄予云：“自别云间去，三年渡汝溪。蒋亭方二月，吾忆董胶西。蕙草春前寄，风醉后题。双缄思不尽，长使角巾低。”后改名奇龄，举博学宏词，入翰林。

鬼谴

海盐张维志，居言路时，军饷告匮，上言地丁一两加徵三钱，可多增饷数百万。其客武林陈生具草，由是漕米白粮，一例加徵。张积金如山，自顾无大损，而清修自好者皆仓皇无措，于是怨声载道，即辇下诸公，多有以此咎之者，心颇惭悔。一日晨起，忽发狂披发，以首击柱，血肉狼籍，家人竞持不能止。良久呼曰：“鬼卒至矣！”匍匐入床下，扶起，已呕出心肺而死。陈生年老，止一子，亦同日暴死。识者以为有天道。

宅崇

张孝廉诰宅，一日晨起，觅履不得。既而家人履俱失去。启户索之，庭有银杏一株，高数丈，履悉倒悬其上。张惧，亟徙去。

鹧鸪天

孝廉张砭铭渊懿，性不与物竞，工填词，所居近西郭，一水环绕，种花养鱼，萧然世外。善饮酒，能终夕不醉。予时常过从，恍如桃源中人。生日，作《鹧鸪天》云：“负郭田园五亩馀，数株高柳映清渠。腰镰薙草鱼支俸，手锸栽花鸟僦居。斋字拙，谷名愚，尽教魂梦到华胥。日长自有消闲诀，三尺纶竿一卷书。”其旷达之致如此。

长夏十友

节届三伏，溽暑特盛，苦无避炎之地，幸有十友为伴，稍破寂寞，因各赋一绝：

“巧匠琢青玉，瘦骨涵冰霜。客来聊坐隐，双臂生秋凉。”【石几】

“此君绿玉姿，潇洒抱劲节。高枕北窗风，梦踏峨眉雪。”【竹榻】

“斗室谢尘鞅，卖身充佛奴。妙香裊石鼎，日夕盘双趺。”【蒲团】

“玉槃供怪石，搜奇剔秽滓。照影光参差，恍映潇湘水。”【怪石】

“玲珑戛寒玉，长夜共反侧。藉汝伴孤眠，肥婢无颜色。”【竹奴】

“薙叶纹如水，欹斜面面寒。将身化蝴蝶，无梦到邯郸。”【方枕】

“无钱买纓笠，笋箨裁作帽。茫茫细雨中，尽日持竿钓。”【箬笠】

“山翁赠新□，蟹眼翻幽泉。久抱卢仝癖，支垆手自煎。”【瓷瓿】

“芭蕉剪作扇，弄影何团团。那许纤尘染，虚窗六月寒。”【蕉扇】

“孤根托岩岫，携手度炎夏。萧散宜幽人，无劳比王谢。”【棕拂】。

鸟船

八月。敕下江南造鸟船一百号赴洞庭，状如飞鸟，长十一丈五尺，阔二丈四尺，深一丈七尺，桅高九丈五尺。宜兴山中九真庙，祀女仙九人，傍有古树，其叶每年一易，大数十围。方巡道国栋议取之，夜梦九女入室，素衣冶容，若有所诉。方不为止，督工往伐。忽一白虎突出，欲攫方，方惊仆。一典史跪曰：“大王为山君，必有灵爽。方公奉朝命而来，事非不得已。幸勿加害。”虎徘徊回顾，咆哮而去。方归即病，日遣人诣山致祷，竟不起。又虞山妙清寺有古榆，枝干凌云，夜有光怪，县官遣丞往砍。斧始下，喷血如注。众牵置舟内，树忽自动，俄跃入水，舟遂覆，匠役同日死者数人。众以钜索挽之，转入泥底，重不可出。楚中诸帅，托言进剿，欲以此支吾岁月，徒费金钱，可惜也。

再举乡试

九月，再举乡试。时秦、闽诸例纳贄者，许列名太学，及补入各省红案，特行乡试以酬之。五十二年癸巳岁，恭遇皇上六十万寿，特旨开科。是年二月乡试，以五十一年岁者作科举入场，会闱殿对，皆在秋。又五十三年正科，上又谕，武生能文者，一体入文场考试，文生有武事者，亦应武闱。此皆皇上优士之特典也。

除妖

十一月二十七日，有妖人于海子口建土城一座，分八门，上列旗号。十二月初四，攻破之，获草人五十馀，皆持弓挟矢，又得活马数匹，不见一人。见邸报。

魏公直节

魏公象枢，山西蔚州人，立朝抗节，守正不阿，慷慨敢言，不避嫌怨。官都宪时，极言天下事。时有廉令陆陇其，任嘉定县，洁己爱民，为巡抚参革去，贪吏刘某、曾某，反入荐剡。公大不平，上章争之，言“朝廷鼓励人才，澄清吏治，惟恃赏罚耳。乃廉官贪官，参处同例；尽职溺职，保荐无分，何以昭劝惩、示儆戒乎？若下官可以欺上官，则上官可以欺君主，上下相蒙，使廉吏灰心，贪风日炽，臣不得不鳃鳃然虑之也。”又言：“考校一官，风教攸系。天下最为不平者，孤寒无进步之路；天下牢不可破者，科场多昧心之人。乞严加申饬，大破积习，于以肃官方而励人心，士风民命，庶其有瘳乎？”抚今之事，读公之文，可为叹息流涕者也。

丑令

华亭尹南公梦斑，松民俱称“南驼子”。长不满四尺，胸高一尺，背突肩耸，见者无不匿笑，而为人廉明正直，所谓圣贤聪明之心者耶？

吴太守

吴太守绮，字园次，广陵人。出守吴兴，性潇洒，喜交游，酷嗜诗酒，不善居官，亦不善治生产。被放归，家贫，颇事干谒。夏日，偕诸名流过予小集，分韵赋诗，成一律云：“黄雀风清夏屋渠，董帟初启劝投壶。主人自为开三径，词客从来在五湖。银管分题传野鹤，玉盘行饌斫江鲈。披襟此日如秋爽，不信招凉别有珠。”坐客为之搁笔。

气感

娄县民何璧，女许朱氏子为室，年俱十九，虽两相慕，尚未配偶。一日，朱子来候，适值女以手抚其腹，遂有娠。二家俱小姓，不以为意。及产，有声蓬蓬，自腹中出。少顷腹平，惟虚气而已，盖气感也。尝阅《耳谈》载，吴聘君母居江右，父官京邸，同夜梦相姤而孕，聘君相传以神交而生。不觉发笑。后与弟争产，指为非兄，交讼于官。按《洗冤录》，亦有气感，无神交之说。古人云，思女不夫而孕。然乎否乎？

彭祖横死

上海张主政宸，年垂耳顺，自矜工容成之术。有仆妇美而荡，闻之不信，于是刻期相觊。一接未久，张精溢而卒。昔彭祖七百七十九岁，犹惧不寿，日讲秘方，晚娶郑氏，以妖淫败道而卒。彭尚横死，何况馀子？记之以博一笑。

势利

海昌杨中丞雍建，初权亚相，邑令某趋谒，屏舆从步行至门，礼数极恭。未几，转黔抚，令复往贺，鸣锣清道以过之。有为诗粘于县壁以诮之云：“势利官情势利交，掂斤簸两也徒劳。内台外抚俱天眷，一样铜锣两样敲。”令见之，愧汗而已。

葬友

诗人殳丹生，字山夫，垂老落魄，往来吴越间。晚寓枫桥，受知于锡山令吴公兴祚。后以贫死，公时开府七闽，闻之惻然，遣人葬之寒山寺侧。予偶过其居，题诗壁间云：“老死寒山古寺东，诗人飘泊叹途穷。故交万里收遗骨，薄俗犹存挂剑风。”

以数为名

近阅邸报，见有均房总兵四十六者，以数命名，莫解其意。及览元、明诸史，有元将军五十八、六十八，监察御史五十九，参政七十九，尚令卿七十六，与此事同。

古书难据

《空同子·化理篇》曰：“松桧不栖蝉，江南不产荆棘。”我乡荆棘，随处皆是；余庭前有古松一株，亭亭独峙，已五十余年，每至秋初，蝉声聒耳。不知李梦阳何以有此说。

长短大小不侔

春秋长狄侨如，身横九亩，断其首而载，眉见于轼。以九亩之身而首不及数尺，何身之大、头之小乎？卫灵公臣公孙伋，面长三尺，广仅三寸，何其长而狭乎？秦襄王时，宕渠郡献长人二十五丈六尺，得毋太长？汉武帝时东郡送一短人，止七尺，无乃太短？此皆形容之过，理所必无，不足信也。

三冈识略卷七补遗华亭董含著

泽州寄诗

余蒙泽州夫子总宪陈公赏拔，自伤赋命穷薄，睽违以来，久未获亲承绛帐。曾以小诗上献，有“蛇雀尚知酬主德，国恩师谊两茫茫”之句，公为之怆然，随有诗题便面见怀云：“九峰问讯近何如？数子飘零十载馀。万事黄金输负贩，几人白首老樵渔。君今海上求仙药，我欲山中葺敝庐。何限塞鸿凄断处，江流西上忆双鱼。”每临风展读，殆不禁泪下沾襟矣。

暴雨

八月初四日，暴雨自午至酉，沟渠皆溢。时适县试士，俄顷衢巷堂皇，俱成巨浸，生童泅水出，有几至溺死者。民家或坐几上，或伏屋角，竟夕一炊。翌日水方退。

怪鸟

乙卯三月，郡城每夕闻鬼哭声，甚凄切。或云此名城嚎。或又云仿佛见怪鸟，遇夜即啼。于是西关居民竞鸣锣炮竹以逐之。

瓜异

闰五月，东关民家李生黄瓜，三十保黄瓜生茄。

石碑

十五日，衢州鸡鸣山忽暴风骤雨，雷电交作，山□然劈作一穴，现石碑一座，上有五字，曰“□□□□□”，人莫能辨。

山矾生菌

陈仁玉《菌谱》，遍录松菌、竹菌诸名。厥产不一，余庭前山矾一株，枯半载矣，根间忽藰生菌，旋摘旋生，烹之香甘松软，美不胜数。

乖龙

丙辰元旦，有龙见于东南，黑云，逾时而没。余记以诗云：“丙辰春王之一日，有物蠕蠕霾雾圻。赤光块圪鳞爪张，倒吸江湖几千尺。儿童奔叫瞪半空，一龙夭矫随群龙。此时阴寒蛰海底，蚤出毋乃欺天公。扬髯簸□驱列缺，水怪魍牌纷布列。马衔腾踏天吴惊，忍使穷黎尽鱼鳖。春来雨脚历乱吹，入夏不止愁疮痍。豢龙自是吾家事，便欲乘云一问之。”

京师异风

五月朔，钦天监争日食未决，登观象台看验。忽天气晦黑，有大风从西山来，势极猛烈，飞沙拔木，震动天地。前门、厚载门一带，房屋六畜，俱被掇去，居人死伤无数。有男妇数人，卷入半空，掀翻撞击。□极巨者，从空移去数丈。芦沟桥民，吸堕前门内。远近奔骇，日食竟未及验而罢，自来风变所希有也。或谓龙斗而然。又云，隐隐见天半有金甲神二，手执红旗，摇空中，风随之而起。好事者因刊图以纪其异。

星陨为石

初九日，青浦县瓢湖地方，大星陨，堕地有声。居人争掘之，见一石色黑，手按尚热，秤之重十九斤。击碎以刀摩之，火光四射。

沈阳水发

六月二十九日，辽阳、沈阳河水发，沿河一带，悉被冲没，居民有淹死者。

儒释合旨

《楞严》七处徵心，谓身内，身外，潜根见，内外随合，中间无着，此七者，世尊与阿难反覆指示。求诸真际，旨极微妙，然不过欲破其妄心，妄除而真者自见。《中庸》“诚则明矣”四字，足以尽之。何者？诚则尘缘不杂，明则返清净体，而光

明洞照，一切皆空矣。至下文云，凡因果世界，微尘因心成体，以及五阴、六入、七大诸说，种种开示，又即“不诚无物”之义，与吾儒未尝不合也。

沁园春

余年五十，始见白髭，偶阅宋玉叔琬《沁园春》，似谐似讪，不觉抚掌。其词曰：“叹息吾衰，两两三三，霜雪盈颔。怪素丝若练，偷描病态。银茎如戟，硬作愁媒。面目生疏，主人讶客，何所闻而不速来。还防汝，入宫见嫉，朋辈嫌猜。况逢贝锦蚊雷，更颠倒雌黄蛇与虺。叹黑云突起，九阍难叫；青蝇欲吊，只影堪哀。不自我先，不自我后，汝乃乘危利我灾。炎凉态，笑星星髯也，果小人哉。”语气似辛稼轩，而滑稽过之。

长爪

松陵董翰林□，字方南，姿度恬雅，品质清粹，少年登科，谦下如寒士，对之鄙吝俱消。其两手指爪，俱长数寸，计偕时往反驱蹇卫，从无损折，饮食起居，较他人更便。涵养之醇，不言可知。昔人称李昌谷长爪通眉，方南气识，殆过之远矣。

元旦雷

丁巳元旦，四鼓震雷，达旦方止。既而雨雪大作，路绝行人。

星陨有文

十月初七日，更馀，京师人见大星自东南流入西北，大如斗，白气环绕，从上属下，堕顺天府怀柔县内，状类人首，上有星斗篆籀之文，人莫能辨。

地震

戊午四月初五日，未刻地震，窗户动摇，头目俱眩。

狮子

五月，西洋国贡狮子，厚赐其使本多白拉等，遣归。

刑戒书

我郡一宦家子，杖杀一婢，二婢惧而自缢。身受奇辱，其鬼现形，昼夜号冤，敲窗捶壁，变怪百出。止一子，数岁，白日为鬼所杀。因思吕叔简有《刑戒书》数则，

真千古格言，为人上者不可不录一通于座右。特识于此：

五不打：老不打，幼不打，病不打，衣食不继不打，人打我不打。

五勿就打：人急勿就打，人忿勿就打，人醉勿就打，人随行远路勿就打，人奔走喘息勿就打。

五且缓打：我怒且缓打，我醉且缓打，我病且缓打，我见不真且缓打，我不能处分且缓打。

三莫轻打：生员莫轻打，上司差人莫轻打，妇人莫轻打。

三莫又打：已拶莫又打，已夹莫又打，要枷莫又打。

三怜不打：盛寒酷暑怜不打，佳辰令节怜不打，人方伤心怜不打。

三应打不打：尊长应打，为与卑幼讼不打；百姓应打，为与衙役讼不打；工役铺行应打，为修私衙，或买办自用物不打。

三禁打：禁重杖打，禁从下打，禁佐贰捕快非刑打。

吕君此书，真仁人之言，可补律法所不逮也。

夏雪

七月初四日，汭渚地方，忽下微雪，行人以簔承之，颇有积者。

天鸣

八月初八日，东南天有声如汤沸，或云如海啸声，自戌初至亥末始息。《五行传》曰：“天鸣有声，百姓劳形。”《观象玩占》记晋大兴二年、陈大建十三年、隋开皇二十年，俱有此异。

禾变葱

福州府闽清县田中禾稻，间变为葱，见邸报。时吾乡亦霖雨伤稼，予作《秋雨谣》曰：“夏旱何久，有禾不得出。秋雨何多，有谷不得入。瓶欹仄甑已空，哀吟无计笺天公。望庚聊慰愁，看丙莫浪喜。阴风来从东，复见日北珥。西城豪客金满床，东村富翁粟满仓，祝天愿天雨不止，一石幸增十石价，便可拖金纡紫扬辉光。有客

对我笑，劝我勿怨天。有田尚无米，何况君无田。吾闻岭峤之间方格战，百姓无多戎马遍。悲哉一死终难逃，种稻成葱事尤变。君不见，福州府，闽清县。”

河豚宜戒食

汨渚包明经尔昌，将赴廷试，亲党相聚饯送，因设席以款之。日午客未至，尔昌馁甚，适厨间烹河豚，先进一脔，随具衣冠出揖客。初觉一手麻木，既而遍体皆麻，急入内，脱一靴未竟，腹胀肠裂而卒。河豚遇毒，往往闻之，若包氏则目击者。宛邱张耒云：“橄榄至宝丹，俱解河豚毒。吴人悉不论，直云用不洁。”今吴人未有不用橄榄者，张不知妄说，可发一笑。

麒麟

江西袁州府，山村牛产麒麟，有红雾覆罩，遍体生鳞。村民不识，锄杀之。

食犬报

吴门定光寺僧某，性淫毒，不修戒行，靡恶不作。平生喜食犬，所杀无算。一日，忽得疾，口作犬吠声不绝，数日死。尝读《楞严经》，言菩萨元制食三净肉，谓不见为我杀，不闻为我杀，不疑为我杀。今复益之以二：自死、鸟残，令比丘得食五净肉，此肉神力化生，本无命根。又曰：净肉除人、蛇、象、马、驴、狗、狮子、狐、猪、猕猴十种，馀俱可食。然则于世间味，竟无所不食矣。使后之缁流得以藉口，皆菩萨为之作俑也。

粘诗相诮

海昌杨中丞雍建初擢亚相，邑令某趋谒，屏舆从步行至门，礼数极恭。未几，转黔抚，令复往贺，鸣锣清道以过之。有为诗粘于县壁以诮之云：“势利官情势利交，掂斤簸两也徒劳。内台外抚俱天眷，一样铜锣两样敲。”令见之，愧汗而已。陆翼王元辅说。

古语

古语云：奔竞者不愿黜而黜至，赌博者不愿贫而贫至，庸医治疾不愿死而死至，醉饱房劳不愿病而病至。余以为，贵者不愿危而危至，富者不愿辱而辱至，高亢者不愿谤而谤至，筹算者不愿愁而愁至，有子不教不愿覆亡而覆亡至，多畜俊仆不愿淫乱而淫乱至，此又事势之必然者也。

昼夜变易

《南唐书》曰：“卢文进陷契丹，出猎，当午，晦如夜，星皆见。土人曰，此名笪日，不足异。”是昼变为夜也。《齐地记》曰：“东莱有日夜出，因名不夜城。”是夜变为昼也。日行有度，恐无夜出之理，若非齐谐，则亦齐东野人之语耳。

三冈识略卷八

【己未至癸亥】华亭董含著

地震

己未七月二十八日巳刻，京师地震，自西北起，飞沙扬尘，黑气障空，不见天日，人如坐波浪中，莫不倾跌。未几，四野声如霹雳，鸟兽惊窜。是夜，连震三次，平地坼开数丈。得胜门下裂一沟，水如泉涌。官民震伤，不可胜计，至有全家覆没者。二十九日午刻，又大震。八月初一日子时，复震如前。自后时时簸荡，十三日，震二次。十九至二十一日，大雨三日，衢巷积水成河，民房尽行冲倒。二十五日晚，又大震二次。内外官民，日则暴处，夜则露处，不敢入室，昼夜不分，状如混沌。朝士压死者，则有学士王敷治、员外王开运、总河王光裕、通冀道郝炳等。积尸如山，莫可辨识。通州城房坍者更甚，空中有火光，四面焚烧，哭声震天。又李总兵者，携眷八十七口进都，宿馆驿，俱陷没，止存三口。涿州、良乡等处，街道震裂，黑水涌出，高三四尺。山海关、三河地方平沉，为河环绕。帝都连震一月，亘古未有之变，举朝震惊，因下诏求直言。既而群寇以次扫除，海宇□安，竟为荡平之兆云。

鬼城

将军额楚进征粤寇，距籐县二百馀里，过鬼城一座，旗帜森列，四门昼闭，疑中有埋伏，发兵攻之。城破，黑气障天，倏见毒蛇、蜈蚣及蛛蝎等物从空飞出，恶气喷薄，士卒触之，皆体胀腹疼，踣地欲绝。急撤兵而退。

雪庵道人

客从新安来，携字一卷，云系一巨室家藏物，遇乱散佚，重价购归。展阅乃草书《前出师表》，字大二寸许，笔力遒健，纵横变化，殆入神品。后题：“至元辛巳夏四月二十有三日雪庵道人书于崇教院。”按题，乃元世祖十八年。《辍耕录》载，李雪庵与赵子昂同时，凡禁扁皆其所书，想即其人也。

四谏

卢文子元昌，性高雅，不喜与俗人交，少年操衡文之柄，名噪海内，四方尺素，邮寄不绝。久厕诸生，不乐，遂弃去，杜门著述。尝作《文房四谏》，远近传之。一谏云：“不律不律嗟已老，鳞角兔毛何潦倒。无缘簪汝侍承明，当年投汝苦不早。祖龙祖龙计何疏，蒙恬不杀空焚书。今朝送汝瘞退冢，中山从此休遗种。”二谏云：“帝鸿多事凿墨海，万古白石丧真宰。我今与汝愁结邻，琉璃黯淡销精采。翔凤

生芝那可期，送君且葬王公池。素旌上写陶弘字，弘农主人已辞世。”三谏云：“书契以来有蔡侯，千林秃尽桑根愁。凌云不给汉殿札，凝光侧理笺空投。我今誓与赫蹏别，桃花斑文且尽裂。埋君谏君无一词，君不见，堂堂无字碑。”四谏云：“男儿七尺当负戈，有墨须向盾鼻磨。不然亦自尚书赐，隃麋两挺作大字。若教长与仲将俱，如漆之点不如无。元卿元卿尔休矣，从来曳白腰缠紫。”

前辈先见

明杨公廷和柄国时，弟为卿者一，任方面者二，子姓恂等通显者数人。既而长公子慎复抡鼎元，贺客填门，公颦蹙不欢。或问其故，公曰：“君知傀儡乎？当席将散，则傀儡尽出。天道恶盈，我恐曲终席散时也。”未几罢相，升庵遣戍，恂杀人拟辟，其余死亡略尽。人服公先见。夫以公之德业，升庵之才名，尚不能保，而况不如公者乎？唐嘉贞张丞相曰：“近世士大夫务广田宅，为不肖子酒食费，我无是也。”吾于二公之言有感。

发掘祖墓

何元朗良俊世居柘林，因号柘湖，负才名，自奉奢侈。歿后胤嗣孱弱，家业益落，至第六传，止存裔孙何安一人而已。安无赖，以肩挑为业，久而不能自给，复鬻身为奴。一日，谋诸妻曰：“闻祖翁厚葬三世，中多金宝，若发取，可毕生享用矣。且子孙独我在，谁为禁之者乎？”于是投牒县官，托言迁葬，遂纠博徒数人，荷锄往。先发中二冢，棺骸朽坏，空无所有。次至元朗夫妇，剖之，衣冠宛然，从风而化。于元朗便房得金带一束，于夫人得金凤冠、玉如意各一，金钿二，银镯一，镜数枚。二棺俱杪枋，坚固如新，念货之可得数百缗，因覆尸于地。三冢遗骸，共十一具，悉弃岸侧，头颅纵横，男妇合并。安欣然满载归，见者愤恨，亟报官。安以金带赂之。官笑曰：“渠之子孙，与他人何与？”置不问。或谓安必前生冤对，故托生其家，以快报复，斩尸扬灰，未逾斯惨。夫盖棺事定，乃祸发后人，戮及数世，天为之乎？抑彼祖宗者自为之乎？呜呼，亦可悲已！

孝子复仇

上海县吴某，授秦中一令。偶富民犯法，令故入其罪。其人百计祈哀，初亦佯许，卒杀之。止一子，十馀岁，并没为奴。后吴年老罢归，有戚开府东都，时吴已巨富，且年逾古稀矣，辇金诣戚，为起官计。亲友互谏止之，不听。富民之子，已伟然一丈夫，投吴为奴，性恭谨，指使无不当意，极爱之，忽不辞而去，众疑为逃也。一夕，解鞍甫息，其人率壮士三十馀辈，皆以绛帕抹额，斩关入，吴与眷属环跪号泣，愿以所辇之金进。奴叱令跪，面数杀父之罪。叩头乞哀，奴不顾，挥刃断其领，以首挂鞍，并截四肢，呼啸上马而去。馀仆载尸踉跄归，家人结草为首以殓之。此庚申仲秋事也。夫《春秋》大复仇，韬晦二十馀年，屈身忍辱，获雪大耻，非智

勇兼济，能如是乎？虽诗书所称，何以加焉？惜未详其姓名耳。

私增田额

从来田亩有一定之额，时巡抚某，忽创为丈量之说，檄废令刘从谏，先丈青浦县。刘与图蠹共为奸利，田之增减，视贿之重轻，计起科田一万三千馀亩，百姓哗然不平。此项初无补于朝廷，徒饱贪吏奸民之腹，貽地方无穷之害，良可叹也。尝忆元时，有奸人诣中书，诈讼松富民包隐田亩，为粮一百七十馀万石，沙荡为钞五百馀万缗，宜立官纠察追取。中书移文验视，时王艮为江浙行省检校官，条陈曲折，言其不过耸朝廷之听而报宿怨，且冀创立衙门，为微名爵计耳。万一民心动摇，患生不测，非培养根本之策。事遂寝。艮字止善，绍兴人。今安得有止善其人，为民请命哉？

沈存中《笔谈》云：两浙田税，每亩三斗。钱氏国除，朝廷遣转运使王方贇均税。方贇悉令亩出一斗。或奏其擅减税额。方贇谓：亩税一斗者，天下之通法。两浙既为王民，岂当异视？上从其说，至今不改。方贇生五子，多显者，孙珪为宰相，岂惠民之报与？然则病民之报，不言可知也。

左道伏法

楚人朱方旦，以左道惑众，自号“二眉道人”，美田宅，广仆从，拥妻妾子女，如富家翁。诡言有奇术，妄谈休咎。前楚抚参处下狱，幸脱，愈肆行无忌。其党推为圣人复出，督抚藩臬及士大夫无识者，皆投贇执弟子礼。王侍读鸿绪特疏参之曰：“妖人朱方旦，阳托修炼之名，阴挟欺世之术，广招朋党，私刻秘书。其书有曰：‘古号为圣贤者，安知中道？中道在我山根之上、两眉之间。’其徒互相标榜，有顾齐宏者，则曰‘古之尼山、今之眉山也’，陆光旭则曰‘孔子后二千二百馀年，而有我师眉山夫子。朱、程精理而不知数，大儒之用小；老庄言道而不言功，神仙之术虚’等语，皆刊书流布，蛊惑庸靡，侮慢先圣。乞正典刑，以维世道。”上震怒，方旦立斩，顾齐宏等秋后处决。光旭后放归。陆君登两榜，有名，惟喜术数，故与斯祸。厥后又有钦天监南怀仁者，上所著《穷理学》一书，其言以灵魂为性，谓一切知识记忆，不在于心而在头脑之内。语既不经，旨极刺谬，命立焚之。

平西逆报【辛酉】

十月二十九日，王师平云南，伪洪周化吴世，及三桂婿郭庄图俱自杀，逆党方光泽、李本深、胡国柱、夏国相、巴养元、赵国佐等以次伏诛。当三桂之穷追永历也，永历已深入缅甸，三桂率兵进至阿瓦，檄取之。缅人惧，送永历及太后、中宫、太子赴三桂营，未几俱遇害，此壬寅四月事也。是日，天地昏黑，风雨雷电交作，滇人皆为之出涕。及世败，亦投缅甸，缅人以其不义，拒不纳，于是吴氏无少长俱骈

戮。论者谓，三桂世受明恩，乃于其子孙不遗余力，卒之白首称兵，妄觊非分，荼毒生灵，此诚覆载所不容也，故不及数年，遂至举家被戮，骸骨不保。呜呼，孰谓无天道哉！

削平诸逆

三桂以移藩，据滇反叛，僭号大周，于甲寅正日称帝于衡州，建起宫殿，改元昭武，铸钱曰“利用通宝”。四方起兵从逆者，则有靖南王耿精忠，平南王尚之孝，广西将军孙延龄，陕西提督王辅臣，潮州总兵刘进忠，四川提督郑蛟麟，云南总兵马宝，四川总兵谭弘，襄阳总兵杨来嘉等。群众蜂起，望风归附，大者拥众数十万，小者亦不下数万，羽檄交驰，区分割裂。乃八年之内，睿谋独运，以次削平，信乎神器不可以力争也。

贵郎古今不同

今人仕宦，文章德业，远不逮古人，惟治生产为胜之。即如陶朱公，十九年中，三致千金，便称富人，令田舍翁见之，将笑破口矣。贵郎见于西汉者，惟张释之，司马相如二人。以二人之才，释之有久宦减仲产之叹，相如谢病归，家徒壁立，盖为世所迫，仕亦不达，苟非异日他有以自见，必为贵郎所累，坎□终身矣。邇来一登仕途，便可取偿十倍。本朝立法之宽，非前代所能及也。一客曰：古之贵郎，亦只因多识几个字耳。予为之一笑。

认后辈为同年

唐兴公先生昌世，家世阀阅，盛德古道，为吾郡冠。天启辛酉登贤书，乙丑成进士。时年八十有六，复届辛酉宾兴，先生尚善饭，筋力强健，饮酒剧谈，能竟夕不倦。邀新孝廉讲年谊，投揭者称“年晚生”，先生悉以年弟刺答之。昔徐文贞公，嘉靖癸未探花，年八十一，及见后癸未进士；陆文定公，嘉靖辛丑会元，年九十七，及见后辛丑进士；袁公福徵，嘉靖癸卯举人、甲辰进士，年八十一，及见后癸卯举人；姚方伯永济，万历戊戌进士，年九十八，及见顺治戊戌进士。此外不多见。屈指先生寿开九秩，又为登第之期，天之厚先生，宁有涯涘哉！先生以余与次公进士子锵有姻谊，属为韵语以记之曰：“绕城丛桂又飘香，风景推移岁月长。昔日青云初得路，此时白发更逢场。乡间旧德追徐陆，江左高门数谢王。屈指两朝能有几，漫随年少共翱翔。”予倡之，同郡诸君子从而和之，得诗数百首，亦足徵一时盛事矣。

居乡不操乡音

吴阊蒋进士植，不操乡音，与予辈相聚，竟日剧谈，无一土语。闺房燕私，如对北

客。殊属无谓。偶见一书，记陆文裕公深喜作官话，与妻子童仆言亦然。陆公名人，此却大可怪。

升平宴

壬戌正月十四日，上以海宇荡平，兵革偃息，大宴百僚于乾清宫。仿柏梁体，以次联句，上自为序，题曰“升平嘉宴”，赋诗者凡九十三人。

前辈风流

张带山先生讳君义，性高洁，隐居菜花泾，不入城市，缁衣禅笠，萧然世外。喜饮酒，每从相知浮白纵谈，意气甚壮。然外虽颓唐，而内实沉默，隐约玩世，人莫能窥其际也。予上巳以新篘贻之，先生答以一绝云：“臆闻犹记老狂生，翠酿春澄眼倍明。世事悠悠交态变，绿杨深处尽埋名。”

由贴

旧制，黄册十年一造，初无税银。因倭乱饷缺，收田每一两纳税二分，永不为例。当时议之者犹纷纷。今县令欲济其私，忽造“由贴”之说。奸胥图蠹，婪诈数倍。夫人之产业，非系祖遗，即属价买，虽无由贴，谁能夺之？况此外私派，种种不一，公然刻单传比，毫无顾忌，士绅亦钳口结舌。倘复按差，当不至此。时言路竞言吏治日非，民生日困。察吏安民，非复巡方不可，乃谋国者力持不可，何也？

华苹山人

吴懋谦，字六益，别号华苹山人，喜吟咏，遨游缙绅间，诗名甚著。年届古稀，才丧妾，复买一姬，膏面染髭，以博如皋一笑。予戏贻一诗云：“骚人春晚爱幽居，老去风情尚未除。旧赋白头怜薄幸，新题红叶怕生疏。炉薰翠被迎欢夜，髻拥寒镫见面初。莫倚巫山行雨惯，襄王今是病相如。”山人久病，故结语稍规之云。

洗县

大兴人蔺友芳者，父为长班，入赘授青浦令。友芳目不识书，坐衙判事，悉听左右指挥，但张目四顾而已。于是胥役横行，婪赃以万计。上司廉知百姓怨恨刺骨，追印入告。凡平民受害者，环署大哭。友芳惊惧，遗矢满地。围绕十昼夜不散，竟担水荷帚灌濯，县堂屋梁庭柱，俱以布拂拭之，名为“洗县”，盖百馀年来所未闻也。

纸皂行

衙役之横，莫甚于吴下。设计肆毒，酷于虎狼。时制府于公知其弊，一应催徵，檄用纸皂，不应则木皂至。虽省需索，而两皂一到，则举家不能安寝。卢君元昌戏作《纸皂行》曰：“有皂有皂携纸皂，画成三寸么麽小。此皂捉人咄怪哉，皂捉皂兮尤绝倒。狗亦不吠鸡不鸣，二皂到家家不宁。五月苦无新穀卖，饿隶索酒嗤空饼。刻木为吏事有无，刀镌墨泼先追呼。监门鹄面今休绘，怕煞沿家虎皂图。”

冥报

虞山有某者，善治生，积镪至数十万，台榭歌舞，穷极侈丽。性淫纵，多侍姬，日夜饵丹药以济其欲。忽背发一疮，初犹小，渐大至二寸许，如负重石，诸医束手无策。或谓宜先泄其毒，遂用利刃碎割，复以竹筒实药，煮极热，当项插入，以吸毒气。相传地狱变相，刀林沸镬，阴惨不过如是而已。既诸法罔效，自知不治，于是呼童婢扶入库室。阿堵绕地，以手抚摩，凝泪浩叹。时新建洞房，回环窈窕，俾宠妾居之，几案陈设，莫非珍宝，四顾歔，悲不自胜。先是，有膳夫病热昏愤死，一夕复苏，语妻曰：“我未应死，然不过延半月耳，第见我主人先在地府，以铁叉钩背，悬于殿柱，旁有蓝面鬼卒，执椎捶之，痛苦叫噪，莫可名状。”妻急掩其口。已而果以背疽潦倒，一月而卒。尝忆倪文节公曰：“贫贱之人，一无所有，临终脱一‘厌’字。富贵之人，无所不有，临终带一‘恋’字。脱一‘厌’字，如释重负。带一‘恋’字，如担枷锁。”诚哉是言！人苟能超然俗外，富贵贫贱，亦安往而有不自得者乎？

平岛寇群盗俱平，惟郑逆负固海岛。诸将憚波涛之险，未有胜算。适荷兰国进贡使臣马珍西留闽省，总制姚启圣耻久无功，请令赍敕书速回本国，谕荷兰王会师共剿。予阅邸抄，不觉失笑。忆明万历时，倭寇朝鲜，议赴援，恐路远。听一妄男子上言，欲发暹罗国兵，由海道捣其巢穴。庙堂以为奇策。乃知古今事未始无对也。幸国家全盛，鲸鲵降服，不然，毋乃为小丑所窃笑乎？后施将军琅进兵，克澎湖，直抵台湾，郑克塽全军归附。上嘉其功，封琅为靖海侯。

大酺

癸亥正月，上以海宇荡平，宜与臣民共为宴乐，特发帑金一千两，在厚载门架高台，命梨园演目连传奇，用活虎、活象、真马。先是，江宁、苏、浙三处织造，各制献蟒袍玉带、珠凤冠、鱼鳞甲，俱以黄金白玉为之。上登台抛钱，施五城穷民。彩镫花爆，昼夜不绝。古所称大酺，想即此也。予留滞周南，不获一睹盛事，为长歌记之曰：“皇帝御极廿二年，削平群盗收滇黔。赓歌已继柏梁盛，大酺直驾炎刘前。五城结台高百尺，凌虚缥缈疑飞仙。梨园十部供奉久，教坊杂剧相后先。妙舞清歌出天半，搥金击鼓声渊渊。六龙遥临百辟侍，恍听仙乐娱钧天。珠旗飘扬曳明月，宝马草款挥金鞭。野狐横吹笙簧管，段师巧拨鸳鸯弦。鱼鳞甲遣黄金铸，雁翅盔教白汞镌。长枪大剑尽犀利，生虎活象材官牵。兰陵假面唱入阵，秦人鱼龙戏曼延。

。郭郎郎当拖舞袖，□妓倒挂身盘旋。罗刹食人肆惨毒，高僧救母情堪怜。牛鬼蛇神无不有，九幽百怪纷变迁。观者如云马匝匝，千门万户俱喧阗。穷黎匍匐帝念，楼上往往抛金钱。江左有司竞希宠，优伶买得歌喉妍。沐猴衣冠堪斗狗，抵掌伏孟殊翩翩。高车大马多意气，俄从粪土到日边。天子圣明大臣直，尔曹切莫恣狂颠。

日本刀

茸城去海不百里，寇盗出没，海禁甚严。迩来鲸浪已息，往来贸易者，概弛其禁。于是商贾及豪富之家竞装巨舰，东至日本，遇便风，不数日可到。彼王殷富，闽粤流寓者多。颇知上国物价，汉人不能欺，往者亦无大利。客有携日本刀见赠者，制甚工巧，色烂烂若霜雪，能吹发陷坚，锋极锐利，索予作歌记之曰：“南船远涉虬龙穴，挟得东溟三尺铁。金丝缠靶玉鹿卢，斑斑翠滴蛟螭血。电光斜拖老蛟尾，锋割芙蓉淬秋水。摩挲黑夜鬼怪愁，脊上犹凝青兕髓。感君持赠光拂面，月蚀良工亲锻炼。纯钩巨阙何足珍，雪点霜花团一片。藏之宝匣蜀锦兜，白气烂烂晨方收。莫向床头乱腾跃，平生不辨作恩仇。”

宋朝御像

仲秋，送长儿蓉江应试。赵进士天澜叔侄，以予有戚谊，置酒招饮。赵氏，宋王孙也，南渡后移家暨阳，藏宣祖、杜太后以下御像十六。予恭请一见。盥手展阅，见太祖、太宗，龙姿凤章，英气赫奕，真开代之辟。自真宗逮哲宗，或神气端严，或仪貌威武，或眉目耸异，望之知为守成令主。若道君丰颐广额，亦似有福泽者；惟钦宗状孱削，绝无帝王之度，乃同受拘辱，蒙尘沙漠，殊不可解。及建炎中兴，秀伟天挺。孝、光诸帝，丰采大略相似。若恭、端少主，形貌逼仄，竟类凡品矣。今其子孙居澄江及海虞者犹数千人，号称巨族，历朝以来，屡有显者，非五代短祚之主所可比也。

曲阜赠言

曲阜颜吏部光敏，性磊落，工诗文，兼留心八法。长身玉立，音吐如钟。偕番禺诗人屈大均遇寒斋，议论卓犖，有不可一世之概。别后以古诗见投云：“董侯早通籍，华颠犹秉耒。芝草冠群芳，令名人不逮。君看鹤盖阴，俯仰难为态。市儿艳粉奢，达人悯荒秽。何如守残编，肤寸起烟霭。峨峨九□楼，矗起拟东岱。选声□醇和，挹藻绝疵类。甘遂作息伦，狂歌托圣代。密雨连朝昏，大海同□□。翘首眺苍旻，为君发遥慨。”

轩室名

欧阳文忠公游颖阳，仿佛见山顶石壁中有宫馆，上题“神清洞”三字，佘山陈仲醇徵君室名本此。《南史·隐逸传》：“碧涧青潭，翻成丽瞩。”宋人因以“丽瞩”名亭，细林张王屋先生轩名本此。

传奇假托

《后汉书》注曰：蔡邕父名棖，字伯直。周氏《书影》云：邕蚤丧二亲，年逾三十，叔父抚之，犹若童稚。此邕丧父母久矣。高氏传奇，何不杜撰姓名，乃一无影响，厚诬古人，殆不可解。按周达观《杂说》云：唐牛相国僧孺，有子名繁，与乡人蔡生同举进士，蔡生，即欲以女弟适之。蔡已有妾赵氏，力辞不得，遂成婚，氏与赵相得甚欢。蔡后至节度使。盖借用此事，乃必欲以邕之名实之，可怪也。唐《玉泉子》载邓事，又与此略同。

神化虎

三滩人宁某，方锄田，有虎从后搏之。田倚山，崖岸绝高，虎势猛，跃出其前。急举锄击之，中虎颊。负痛不能转，委脱去。众视虎迹所在，蹑之，乃入一古庙。座上神像，颊间锄痕宛然，因击碎之，视其腹，得人骨节极多，始知前虎即此神也。遂焚其庙，虎亦绝。

纸狐

江南竞传有狐怪，夜半入人家，潜匿作声，善惊小儿，抓面挾肤，不可禁止。众蓄火鸣锣逐之，或见一狐逾垣而出。有擒得者，视之，乃缚箴为者也。

异形

柏总兵永馥，宁远人，有膂力。左股黑肉坌起，如人骑马状，左手持枪，右挟弓矢。酒酣，每解衣示人，无不叹异。

卑官能诗

昌平杨自牧，任子也，家贫力学，意气傲兀，闻有异书，口诵手抄，至老不倦。喜吟咏，有《潜籟轩稿》行世。为我邑二尹，诸公皆折节下之，安得谓卑吏中无人哉？曾有《秋日感怀》云：“且将生事付沉冥，领略秋光到草亭。阮籍酒能浇块垒，陶潜菊可度颓龄。步来野鹤形同瘦，看到孤松眼倍青。采药赁舂千古上，何人浪说少微星。”

三冈识略卷八补遗华亭董含著

黑气

十八年己未元旦日，申刻，有黑气自西南属东北，其长竟天。

天雨穀

十八年己未二月，江南天长县，天雨穀。

山左饥荒

自春届夏，东郡大荒，人相食，草根木叶，一时俱尽。行旅皆结队而过，如单行或三四人作伴，甫出门即被啖。

星变江鸣

八月，火星侵位。又江南江鸣三昼夜，如万牛齐吼，居人骇避。

道书

《云笈七签》载道书备矣，乃读《开天》《灵宝》诸经，其悖理不经，较释典更甚。尝谓，上古有盘古真人，从天尊授内经，得以飞升。厥后神人世出，状貌神异，类盘古。世人相聚，但知此盘古，岂知元始之初复有盘古哉？又曰，过去省劫，名曰龙汉，爰生圣人，号曰梵气天尊，以《灵宝》教化度人。龙汉一运，历九万九千九百九十九劫，乾坤破坏。嗣后屡开屡坏，至帝尝时，太王遣三天尊皇赍《灵宝》五篇以授尝。尝将上仙，乃封之钟山。夏禹巡名山，得尝所封真文，于是奉持出世，依法自修，故禹得仗神力，能凿龙门，通四渎，天下安。托于尸化，其实非死也。禹复封之北岳及包山洞庭，吴王阖闾出游仙人山，隐居取以授王。其文篆书不可识，使人问孔子。孔子曰：“此是《灵宝》五符，王尊事之。然不能遵奉，科条真文，乃飞上天，不知所在。”又《老子中经》曰：“丹田名藏精宫，中有神，姓孔名丘，字仲尼。”读之不觉失笑。荒唐谬妄，敢于诬圣，昌黎所云“焚其书，火其居”，岂止浮屠氏哉。

积财贻害

新安有富人二，一程，一汪，以贾起家，积财巨万。性鄙啬，虽产日广而自奉弥俭，以重利权子母，持筹握算，锱铢必较。汪无子，病将革，族人争立，抢夺一空，奴辈各攫货散去。汪卧床不得食，引首四顾，饮恨而卒。程三子，长子获与乡荐，贪济以横，田宅益广，遇乱，怨家群起劫之，被杀。馀二子、五孙，皆死于兵。余尝读《五代史》，载董温积资巨万，秘琼灭其族，瘞之一穴，尽取所有。琼后橐其

资装，道出魏。范延光伏兵境上，杀而夺之，挈归河阳，輜重盈路。杨承勋遣壮士驱之堕水，悉攘其资。夫诸公功名富贵，震撼一时，乃因一人之财，而坑数家之命。盖盈满者造物所忌，况取不以道，又积而不散，身不及害，必祸子孙。此理与势，万万不爽者，人奈何不鉴于古，独不虑蹈秘、范诸公之覆辙耶！

日食

庚申元旦，日有食之。

贵贱有定分

《燕翼录》曰：宋天禧初，富人郑巽出粟五千六百石赈饥，求补官。不许。晁迥上言，乞特从之，以劝来者，农稔即止。诏补三班借职。自后皆得援巽例以请，然州县官不许接坐，令庭参而已。又《云间琐录》载，吾家朗洲公子仪登第，有司赠旗扁，父南田翁欲往报谢，乞宗达以书先容。具揭入，行参礼，郡守立待一茶。后司李及县令俱朗洲同年，南田以庶人自居，绝不往谒观。此二事见古之上官慎重名器，下亦各安其分，罔敢僭越，风俗犹古。今仕路一变。《抱朴子》曰：“人有出身卑碎，徒以因缘际会，低眉屈膝，超越不次，毛成羽长，蝉脱粪壤，便自轩昂，目不顾步，器满意得。”可谓形容殆尽矣。

淫尹

嘉禾有钱柱者，纳资授高密令。性贪淫无检。县傍即典史衙署，两楼相望。史妻有艳色，每晓妆，令必登楼窥探。一日启窗，目挑心许，情不能禁。先遣妾往致殷勤。史妻来答，趋出揖之，然未敢迫也。史忽于中秋夕，设席招令。欣然往。半酣，呼妻捧觞为寿，情愈荡。史佯起更衣。乘间订以明夜来会。翌日，以公事檄史往某处，盛饰赴约。妻含笑出迎，急趋拥之，长跪求欢。忽见史从外率数仆仗剑入，缚令于地，持刃欲下者再。令稽顙祈哀，史索万金。遥呼家人从楼窗掷下，计将三千金。不许，又益其半。并与笔纸，叱之直叙颠末，始释之。未几，合邑遍传，上司遂两斥之。嘉善孙君为余说。

妖星吐光

十一月朔，日初没，有妖星吐白光，自西南起，指东北，围大尺馀，其长竟天，上下锐，厥状劲直，逾时而灭。至十二月初旬，始隐不见。或云天枪，或云疑是长星，余作《妖星行》以记之。

产蛇

北俞塘沈进士士英，侄女嫁庄氏子，怀娠三年不产。有医者诊之曰：脉象颇异，疑必异物，当以药下之。服毕，觉腹中奇痛，产一胞，堕地而裂，中有小蛇五，蜿蜒盘屈，以次而出，急扑杀之。沈布衣麟亲见其事。

蜂报冤

敝庐之左，有鸭脚一株，高四五丈，双鹊巢其颠。鹊育二雏。比邻某畜蜂甚夥，鹊乘闲每旦啄食，并哺其子。一日，有数蜂随鹊飞去，回翔树杪，若侦逻者。未几，群蜂以千计，争先出穴，状若列队，齐拥至巢，半绕其外，半冲入，且啗且螫。少顷，鹊雏毛血零落，堕地死，群蜂轰然望北去。二鹊哀鸣，奋爪嘴向空乱啄，竟不能救。夫小虫何知，尚能竭其智力，不顾躯命，以报宿憾。世人肆意妄行，自以为物莫我难，乃祸机潜发，后悔何及！余目击其事，故感而识之。

将军好文

王将军永誉，三韩世家也，荀中郎伏节之年，来镇我松。性恬雅，不尚势焰，喜诗能书，恂恂如儒生，与余辈相对论诗，竟日不倦。每出行，屏驺从，仅一马二卒，遇者不知其为大将军也。古称杜当阳轻裘缓带，周左率执笔赋诗，将军殆近之矣。在郡二年，兵民两安之。惜乎移任粤东而去。

河决

辛酉。淮安府五月二十七日大雨五昼夜，堤倒河决数处，直犯郡城，淹死人畜无数。知府曹君，取府堂镇淮扁投于河，水稍退。

寒食扫墓

寒食扫墓，率诸儿宿僧舍，梦一人衣道士服，手持羽扇，相与接谈良久，语多旨趣。忽惊醒，天已曙矣。口占一绝云：“二十五声莲叶漏，一百六日杏花风。道人晓起唤残梦，溪鸟乱啼窗日红。”

冰雹

六月十八日申刻，杭州省城雨冰雹，大者如桃，小者如豆。

先辈名言

于穀山《笔麈》曰：“许鲁斋退居苏门，与姚枢、窦默同游，慨然以道自任，尝语人曰：“纲常不可一日亡于天下，苟在上者无以任之，则在下之责也。”凡事必徵

于礼，以倡率乡人，一时风俗，为之丕变。昔者臧文仲歿，鲁人哀之；子皮之死，子产叹其无与为善。我于先生见之矣。今风会日浇，士大夫以财势相竞，富人市侩，引与游处。间有一二清节之士，目为迂疏，去之惟恐不速。蚩蚩之民，从风而靡。古今人相去奚啻千万里哉！

鬼胎

八月十九日，马□寺东张千总妻产一子，眼居额上，顶生两肉角，口列巨齿四，自颈以下，悉如人。张怒，扑杀之，掷寺后，聚观者数千人。去敝庐不半里，余目击之。

娄江赠诗

太仓许秀才旭，善诗能书，以重阳日生，因号“九日”，有《秋水堂稿》。尝以诗见贻云：“当年二妙擅英声，五载逢君倍老成。达早岂知淹仕牒，才高翻喜占诗名。行吟方外同司马，依隐江东类步兵。漫托东皇劳九辨，沅兰湘芷不胜情。”余感其意，至今藏之。

松郡虎见

云间素无虎，府志载佘山有大青、小青，相去已久，无足据者。九月初，忽有虎从西来。初十日，伏东郊外华阳桥灌莽中。有顾氏子，年十七，早行被啖。复潜迹至天马山一带，居人多有见者，俱闭户不敢出。总戎遣兵四出搜之，虎往来倏忽，偶一遇，逡巡却避，经月不获。诧为神虎。乃于普照寺建道场，命黄冠咒阴兵驱之，后竟逸去。余作新乐府以记其事云：“虎何来？在四郊，忽东而忽西，往来咆哮。朝食人兮，暮食犊与豚。官吏清廉，尔何为然？居人皇皇，告之幕府。昨檄千兵，今发全伍。迂延却避，恐逢虎怒。沿村捉鸡鸭，膏彼刀与斧。经旬竟不获，屡出亦何补。爰命黄冠诵经，缁衣击鼓。问奚所为，誓将驱虎。虎庶几赴山而蹈海兮，以全我将军之神武。”嘉靖初年，一虎自北从官路来，入市西空房中蹲坐。市有少年勇力五人，持刀枪攻之。虎跃起，五人皆伤，二人死，虎亦不食。次早，忽出门，渡浦至柘林西去，不知所之。见《申江杂识》。

科名不绝

海内世禄，如莆田之林、宜兴之吴，阀阅之盛，不可多得。吾郡科第，惟寒宗稍多，亦最久。自明天顺己卯，迄今康熙辛酉，世传十五，时历两朝，通计二百四十余年，科名继起，皆一祖所生，其间中断者止七年。他族通显或过之，求其联绵不绝，吾族之外，未易多觐也。按谱，御史介轩公讳纶，始中天顺己卯举人，甲申进士，通籍十七年歿。七年，子大理公世良讳恬、太守公世恒讳忱，俱中成化丙午举人

、弘治丙辰进士。又五年，季弟知州公世康讳恽，中辛酉举人。大理公通籍二十六年卒。太守公二十六年，尚宝公朗洲讳子仪，中嘉靖壬午举人、戊戌进士。又十六年，太守公卒。尚宝公中二年，五泉公讳充大、廷评公讳志学，俱中庚子举人。又八年，尚宝公卒。五泉、廷评二公中十年，少宗伯公讳传策中己酉举人、庚戌进士。又三年，望海公讳传教，中壬子举人。又三年，两公卒。宗伯公中十八年，环浦公讳晋，中隆庆丁卯举人。又十二年，宗伯公卒。望海公中二十二年，文敏公讳其昌，中万历戊子举人、己丑进士。又六年，望海公卒。文敏公中十六年，绯百公讳尊闻，中癸卯举人。又四年，先祖少宰邃初公，中丙午举人、癸丑进士。又二十年，文敏公卒。少宰公中十三年，中丞公讳象恒，中戊午举人、己未进士。又三十年，少宰公卒。中丞公中三十七年，而不肖含叨中顺治甲午举人、辛丑进士；弟俞，中庚子举人。又五年，中丞公卒。虽祖宗德泽未艾，而立身扬名，以垂勿替，是所望于后之人耳。

海寇劫粮

三月初五日漏五下，海寇驾二巨舟，由吴淞江直入龙华口，劫去粮艘二。守备司起龙，不及甲，单舸追之，力战杀贼。副将张一奉畏贼，不敢赴救。起龙矢尽，中鸟枪死。贼屡入内地，官兵既不能预防，任其出入。海邑弹丸，莅兹土者，岂可无善后之策哉！

于公清节

于公成龙，山左人，由岁贡至大官，性刚正，以清节自厉，累典大郡，苞苴请托概不行，以是受知于上。晋直隶巡抚，自奉尤俭，妻子不免饥寒。刻苦之操，老而弥笃。至是擢两江总制，单骑就道，仆从不过数人。下车之始，贪吏皆望风敛迹，民气一新。

关公著灵

五月十五日，越东严州府久雨，山水暴发，注流复涨，骇浪滔天。初闭城以拒之，俄顷水高于城，四围皆成巨浸，女墙上可行舟，溺者不计其数。傍郭一古刹，祀关壮武，主僧颇修戒行，夜半梦关公蹴之曰：“起起！我先行，汝可与周将军偕来。”僧惊寤，水已没榻。自分必死，忽见周将军浮水欲出，遂附其背。溯流二百馀里，直抵富阳。时富阳居民远见神像，长三四丈，驾波逆浪，泛泛而至，趋视乃关公也。不数刻，又见巨像背负一僧，急救之。叩其故，大惊。于是募资建寺，奉香火焉。

星变

七月二十七日，有星出于西南，尾指东南，光芒长四五尺，昏后渐低不见，至八月尽始灭。以星变，诏求直言。

旗竿气出

十月二十三日，杨总戎捷辕门有“帅”字旗竿二，辰刻忽于左竿斗内透黑气，一股自下而上，高三四尺，逾数刻始不见。二十四日，黑气从竿杪出，其光渐细而短。二十五日，则左右两竿俱有光。二十六日，左右并演武场内旗竿二处，皆透顶而出，变为青气，直贯半空，又有白气团绕其下，日高三丈始灭，聚观者数千人。至二十七日，气止不出，后亦无他异。

毆父

西郊有陈生章者，年老去为幕客，糊口四方。阅数年，挟三百金以归。二子俱不肖，窥橐装重，聚而索之，诱说累日，生坚不与。二子大哗，诟詈交作。夜半，穴垣以入，一子曳足，一子踞父腹，以绳贯两手，拳挺交下，体无完肤。哀呼求救，尽出金付之，始得释。一女未嫁，复疑父与有私，共逼之赴井死。生愤极，竟不能惩，郁郁抱病卒。偶见宋人李夏卿有诗云：“东金西木两睽违，由此生儿不足依。一把残骸无处着，不归沟壑欲归谁？”注云：“《珞瑜子》云，东金西木，必生悖逆之儿。”盖此类自古有之矣。

咏灯

军旅初息，人有升平之庆。我郡元夕，灯市颇盛，儿童皆劈竹剪纸为之。醉后戏拈三律，聊识以博一笑。“老人灯”云：“连宵相对口如瘡，束缚形骸耄渐侵。瘦骨祇馀垂尽气，热中犹剩未灰心。长衫潦倒知难脱，短鬓蓬松不受簪。抛掷便应同木偶，早随儿辈共招寻。”“走马灯”云：“羨君谈笑拥青油，片纸功名第一筹。营壑两重屯卫霍，山河半尺斗曹刘。甘泉夜见烽烟起，赤壁朝看甲马收。莫道火攻原下策，敕书先拜九光侯。”“宝盖灯”云：“万点星球簇锦鞞，阿谁捧出一轮圆。黄□拂地人初骇，蓝顶摩空影乍鲜。遮掩沐猴嬉夜月，驱驰竹马上凌烟。儿童夹道争喧拥，此物多应不值钱。”

变畜偿债

漕泾镇有李俊卿者，家畜一牛。一夕，忽作人言曰：“我止少你米一石五斗，填了三年，无一顿饱食，今偿债已毕，我将去矣。”合家共闻，急起视之，闻其喉间作声，似有物堕地，而牛已死矣。

赵公清慎

莱阳赵公仑，字阆仙，戊戌进士，性高洁，清修乐善，奖进人才，孜孜不倦。督学南省，指天誓日，过江击楫曰：“某若一毫自私，决不能生渡江北矣。”于是干谒不行，孤寒吐气，簞簞之风，为之一变。绅士竞为诗章以歌咏之。

卑官能诗

昌平杨自牧，任子也，家贫力学，意气傲兀，闻有异书，口诵手抄，至老不倦。喜吟咏，有《潜籁轩稿》行世。为我邑二尹，诸公皆折节下之，安得谓卑吏中遂无其人哉？曾有《秋日感怀》云：“且将生事付沉冥，领略秋光到草亭。阮籍酒能浇垒块，陶潜菊可度颓龄。步来野鹤形同瘦，看到孤松眼倍青。采药赁舂千古上，何人浪许少微星。”

腊月雷电

十一月初十日，夕微雪，明晨奇寒，滴水成坚冰，舟楫不通，冻死者颇众。至廿三日，冻始开。十二月朔，寒复如前。至初九日，腊才半，天气忽蒸热类四五月，昏后雷电大作，暴雨如注。

肠覃

余有妾，右腹内生一痞，始如弹丸，五六年后大类鹅卵，中似有一窟，往来动移，或痛或止，百药罔效。久之，遍体发肿，内作水声，日夕呻吟，死而复苏者再。诸医束手无策，皆云此名“水鼓病”，已成不可复痊矣。章文学旭，字东生，名医也，善治奇疾，往邀之。曰：“此非水症，乃积聚所致，不半日可愈。但所用药性猛利，转斗而下，驱水甚捷，试问病人，愿服与否？”病者曰：“我已垂殆，苟一线可救，死无憾也。”于是取红丸十粒，如绿豆大，以槟榔、枳实等五六味，煎汤下之。初觉喉中响闻可畏，势将不支。顷之，胸膈间如刀刃乱刺，哀号转掷，痛不可状。又顷之，下水斗许，头面肿退。不逾时，又下数升，腹背肿退。病人曰：“我今觉胸顿宽。”遂熟睡片刻。时章君犹在坐也，曰：“此番不独水去，痞亦当渐散矣。”留补剂二，曰：“明、后日可连服之。”遂辞去。至晚，又下水四五升，手足肿全退。不三日，病全愈。既而忽痞势动摇，下红黑痢三昼夜，痞亦不见。众医惊服，往叩其故。章笑曰：“此名肠覃，在《内经·水胀论》中，君辈自坐不读书耳。”皆惭而退。按岐伯曰：“寒气客于肠外，与胃气相搏，癖而内着，息肉乃生。始如鸡卵，至其成若怀子状，按之则坚，推之则移，月事以时下。又有一种名石瘕，病状相同，月事不以时下，皆妇人之疾。因有积聚，可导而下，似水胀而非水胀也。”此疾若非章君，久矣作泉下之鬼矣。

古谚不足据

《田家杂占》、《纪历撮要》诸书，载古今谚详矣，以近事考之，往往无验。如云：“两春夹一冬，无被暖烘烘。”是岁两春，而冬间奇寒，为迩来仅见。又云：“重阳无雨一冬晴。”又云：“九月十三晴，钉靴挂断绳。”是秋两日俱有雨，而一冬竟晴。又云：“云掩中秋月，雨打上元灯。”癸亥中秋月色如昼，甲子上元阴雨竟日夕。又云：“腊报春多雪。”是腊雷电大作，至春雪殊少。又云：“冬无雪，麦不结。”是冬无雪，至夏麦大熟。古谚之不足据如此。

三冈识略卷九

【甲子至戊辰】华亭董含著

上元甲子

甲子元旦丁卯，逆计岁一百八十，三元周而复始，为上元甲子。有上书者，以为重起上元，累朝难遭，请循古帝王改元、封禅、巡狩诸大典，以答天庥。

请减浮粮

任黄门辰旦，性爽，敢直言，曾尹上海，稔知松郡利弊，上章请减浮粮，以均国课。其言曰：“苏、松赋额独重，乃故明之弊政。各直省全徵者多，而苏、松两郡则数百年来必不能无欠者，此非尽有司之拙、百姓之顽，盖力不逮也。其风俗喜炫繁华，然仅在城市十馀里之间，此外啼饥号寒，与饶瘠之区实无以异，故屡加重创，积逋如故，竟何补于国哉？今幸逢圣世，千载一时，请查嘉、湖、常、镇四府之额，按其最重者，为苏、松之赋；即不然，亦请从稍减。减一分，则民免一分之困矣。”黄门后复恳切面陈，上为霁颜。惜乎竟未之行也。

于公遗爱

四月十八日，两江总制于公成龙，先一夕觉体中微有不适，晨兴，坐内堂判决数事。少顷，瞑目不语，额有紫光，遂端坐而逝，年六十有八。两司以公独身在任，共入内寝，检遗囊为棺殓计，见一榻萧然，衾帟俱极敝陋，笥中存白金三两、旧衣数件，余仅青蚨二千、粟米五六斗而已，叹息堕泪而出，百姓为之罢市。公性廉洁，刚直不阿，居官孜孜以爱民为念。其所施设有不便于民者，随即改去。俭于自奉，不为妻子计，恶衣粗食，安之若素。其刻苦自励，真有极贫人所不能忍者。及捐馆，远近奔赴，哭声如雷，昼夜不绝。虽屡遭诬讟，上信之弥笃，以为廉吏第一，故谗谤不入。歿后，思之不置，赐祭葬，谥“清端”。士民复立祠于清凉山，岁时祭之。今人生前豪横，惟恐不及，盖棺论定，为世诟詈。若公者，真旷世一见也哉。

杨董冤报

闽人杨富，旧从海中投诚，授南瑞总兵。当靖藩之变乱也，富麾下将卒，调拨略尽，颇有怨言，然反形未露也。制府董公卫国言其必反，遂乘其不备，遣兵攻之。富率家丁三百余人溃围走，追灭之。至是改楚督，初莅任，忽见富由中门而入，仆从拥卫甚众，横戈跃马，直前刺之。惊起，问左右，悉无所睹。急返内，见富随入，挥拳怒骂，索命甚迫。即日延黄冠，结坛析解。俄闻空中呼号声，如被搏击者，则气绝矣。夫富谋叛本朝，诚为可诛，然尚在疑似之间，乃死后率能报复，富亦厉鬼

也哉。杜茶村为予说。

张真人

张真人继宗，天师立十四代孙也。自苏至松，骆从赫奕，愚民聚观，填塞衢巷。绅士寡识者，亦趋迎陪侍。其人年甫弱冠，茫无知识。每准一词，纳银十二两；书一符，偿三金。其徒皆市井无赖，共相附和，肆为奸诈，获金数千。远近被鬼祟者，闻其来，皆斋沐三日，激切祈请，叩头待命。但批发文书房登号，谩云归府行文，仰城隍神查报而已。毫无一验，识者笑之。临行，诸受给者簇绕骂詈，欲索还原金，乘夜兼程而去。真人自宋徽宗时，虚靖先生道法大行，后其术渐衰，饮食男女，与平民无异。乃历代以来，靡所变革，至与衍圣并崇。即英君察相，从无议及此者，殊不可晓也。按隆庆改元，有言路请削其爵，降为提点，至万历初年，夤缘复续旧封。惜忘言者姓名。

东巡

九月二十八日辛卯，上东巡。十月初八日庚子，驾幸岱宗，不拜，随下山。十六日戊申，渡河。二十一日癸丑，过高邮。二十二日甲寅，至广陵，游琼花馆。二十三日乙卯，驾八桨船，幸金山。二十四日丙辰，至铁瓮城，幸竹林寺。二十六日戊午，抵吴阊，游瑞光寺，登虎邱。是日，太皇太后遣官促驾归，即日回銮。二十八日庚申，乘马看惠山。二十九日辛酉，抵长巷，宿村舍。十一月朔壬戌，午刻驻江宁府，幸雨花台，登报国寺塔顶，垂长索量塔，高三十三丈。初二日癸亥，谕太常寺备祭礼，谒明太祖陵。上亲奠，三跪三叩首，诸臣三跪九叩首。谕地方官，俾守陵人役用心防护，春秋二祭，须极严洁。礼毕，往忠臣庙、国子监一带，登观象台。初五日丙寅，幸燕子矶，登舟出大江。北行，看黄河决口。经过地方，应徵丁银，悉行蠲免。予有纪事诗云：“遥望銮舆警九衢，徂徕岳岱路盘纡。龙旂十丈穿林度，虎旅千群夹道趋。河伯猖獗随后队，山神负弩效前驱。侍臣莫献东巡颂，玉牒金绳事有无。”

姓姓

《前汉书》载，以“姓”为姓者，有姓伟；以“姓”为名者，有射姓。

读书帐

闽人张远，字超然，能诗古文，有《读书帐记》，曰：“去岁武陵回，制罗帐一，轻薄如蝉翼，自外视内，发须可鉴。每当夏夜秋宵，置烛于外，手持一卷，卧而阅之，蚊蚋钻窥，终莫能入。烛尽火灭，清风徐来，则颓然而寐。中宵梦醒，明月透光，纤毫毕呈。虽欲自憎其形骸，不可得也。”

禽耻他子

长乐谢某，为井陉令。有鹤巢其树颠，育二卵，为童子所窃，鹤飞鸣不已。谢知之，饬还。卵已破，因取二鹅卵代焉。久之，伏得雏，乃鹅也。雄啄其雌，雌伏不敢动，雄怒扬去。须臾，偕群鹤来，向雌哢哢，若声其罪者。雌引颈悬树死。夫鹤微物，犹耻抱他人子，今人动取他人之子以乱其宗，真此禽之不若也。

太极丸

世称缅甸铃，为妇人所御。据彼处土人云，缅甸觅鹏精，裹以小金，丸如绿豆大。男子微割其势，纳铃于中，旋复长合，终其身弗复出矣。一名太极丸。鹏性最淫，遇牝即合，遗精于地，收之为铃，得暖则跳跃不止，盖气所感也。土人求之，亦不易得。今世所传，大如龙眼，俱系贗作，聊以欺人耳。见《日南杂记》。

雅谑

毗陵董侍御文骥，性疏脱，论文作字，终日相对，无一俗语。年尚壮，即弃官归。遇事冲口即发，里人多憎之。一日，久旱祈雨，群僚及乡绅毕集，侍御大言曰：“今日必无雨。明日乡绅不出来，雨当立至矣。”众叩其故，答曰：“天旱求雨，乡绅求晴（假作情）故也。”众座大噱。

革淫祠

十月，江抚汤公斌，拘苏州上方山僧人，责问何故诱妇女入寺烧香。即锁僧前去，将五通神像抛入太湖中。随具疏，以为“吴郡风俗淫靡，男子唱曲赌牌，妇人靓妆艳服，或聚会赛神，或联袂僧院。越礼诲淫，莫此为甚。而淫祠一事，尤为可恨。有所谓五通、五显、刘猛将、五方贤圣等名号，皆荒诞不经。愚夫愚妇，为其所惑，牢不可破，笙歌酒醴，昼夜不绝，男女杂处，奔走如鹜。妇女如有姿色者，偶犯寒热之症，恍惚梦与神通，往往羸瘵而死。圣明在上，岂容此淫昏之鬼肆行无忌乎？臣已收取妖像，土偶者投之深湖，木偶者付之烈炬。檄行有司，凡如此类，尽数查毁。其房屋木料，拆备修学宫、城垣之用。民始而骇，继而疑，皆为臣危之。数月以来，绝无他异，始悟往日之非。然妖邪巫覡，臣去之后，必造怪诞之说，更议兴复。请敕严禁，庶人心正而风俗淳矣。”奉旨：“各直省淫祠滥祀，惑众诬民，有关风化，着勒碑永禁。”数百年恶俗，一朝而革，汤公此一举，直不愧狄公矣。公起家进士，端方恺悌，律己甚严，故受知于上，擢抚我吴。入为卿长，百姓阴被其德。但过于仁慈，访获衙蠹，不甚创惩，旋即释归，归而诈害良善，其横愈甚，殆廉静有馀，而明断不足者欤？

鬼居腹中

《东村记事》曰：青浦人苏甲，居金家桥，宅邻古墓，偶去之，筑室其上。落成之日，觉腹中胀闷，忽闻人声，或大或小，如数人聚语。甲大惊，问之旁人，不闻也。徐听之，声益大，谓：“吾辈宅已坏，苦无居，居若腹中耳。”遂闻其家长指挥家人，安顿甚悉。复闻众请于家长曰：“我曹出入，由前门抑后门耶？”家长曰：“昼则前，夜则后。”前谓口，后谓馀窍也。已而有一人出，口忽自张，其由后也亦然。少顷，闻腹中曰：“某归矣。”夜或为男女事，无异人间，昼夜喧聒甚至。一日，觉鬼都出，遂闭口不言，亦不食。鬼不得入，则啮其耳，痛彻心骨，不得已，张口延之。俄闻腹中大笑曰：“主人耳中有异味，不可不尝也。”如是形益槁，家亦日贫。或教之诵经及佛号，腹中相应亦然，莫可如何。如是四年，仅存皮骨，居亦别售。鬼因曰：“汝困矣，我辈将谋他往。然须一醉始去。”甲大喜，急具酒食。祭毕，遂寂然，病良已，数年后方死。土人无不知者。

打鬼法

康熙二十五年丙寅正月十七日，驾幸佛王寺，看喇嘛僧演打鬼法。

一宅两文恪

余祖居之西有大宅，系唐文恪文献公之旧居。唐裔式微，辗转他售，易数主，往往以不吉徙去。至本朝，沈绎堂学士筌买居之。学士歿后，亦谥文恪。一宅前后数十年有两文恪公，亦异事也。

资治通鉴补

明末□城严衍，好古之士也，著《资治通鉴补》四百馀卷，门人谈允厚助成之。自言积三十年苦心，夏以油纸藉臂而书，汗流自顶至踵，不暇息肩；冬则砚冰未融，必火烘日暴而书之，未尝暂辍也。又云：“此书未就，忧在难成；此书既成，忧在难守。子孙贤不肖未可知，一难；兵戈水火之未易防，二难；有力者借观，以致残缺，三难。”近朝廷购求异书，辇上一钜公欲得之，其子遍谒士大夫，祈录一副本，浼予为序，因得纵观，信为有功于涑水氏者，但卷帙浩大，倘有好事君子共襄美事，真艺林一佳话也。

白衣送婚

秦人衣冠，喜用缟素，首戴麻巾，足穿红履，疑吉疑凶，士大夫家居，往往如此。尤可讶者，闺女出阁，绣舆前行，送者或全身缟素，以白布系首，毫不为怪。亦风俗之一异也。

小牯牛

暹罗国遣使纳贡，泊舟于金陵之水西门。中有小牯牛一，重二斤六两，毛角光润，行步便捷，以小金练穿其鼻端，系于几上。遭舟中火发，诸贡物及金叶表文悉毁。有周生渭者，游白门，云目击之，独深惜此牛，为赋一绝曰：“大物暹罗缩一拳，水牛忽作火牛燃。若教书案轻蹄走，助我躬耕熟砚田。”

生魂

武弁荥阳氏，自京口徙松，觅居间。有女名红瓶者，年才及笄，色甚艳，女工之外，兼通文墨，已许配某氏。其夫不彗，女颇以为恨。一日，窥见邻人冯生颜色姣好，举动风雅，相与目成，遂私谐缱绻。将半载矣，父母知之，严为之禁。红瓶因感疾，终日卧床，不饮不食者垂两月。其魂每夜直造冯榻，绸缪欢好，与生人无异，但不能语耳，临晓则卧病如故，百药罔效。适有道士携瓢过门，延入室，备告以故。道士纵目细观，曰：“此女之生魂结想而致，故为此怪，我能活之。”因出药数丸，并书符烧入汤中，令女饮之，病良已。闻此女今尚无恙。

种子方

人生功名嗣续，迟速有无，俱有一定之数，无者不可强而为有，迟者不可强而为速也。今见有无子者，不能修德行善，以挽回天意，往往以药石助之。聚诸热毒之品，毫无补救，反致伤生。予于士大夫中，目击数人，酿为痼疽，莫不溃肠穴肋，惨不忍言，而世犹不之悟，亦足悲矣。先文敏公曾获异方，不特奇验，且药皆有益无损，并其与友人书，附识于此：“海上瞿公，有药酒秘方。瞿为海澄令，曾拔敝同年温用庭于童子科。温视嵯浙省，念未有以报知己。时有歙商，拟重辟，托瞿居间，数敦促之入会城。瞿足痹，不能行。商以药酒饮之，四日辄不假筇竹，步履如旧。神其方，愿报予千金之酬。获之，大有验。翁今九十二，神气勃勃，视听饮啖如壮夫。有陈太仆者，以二百金为寿，请其方，瞿弗许，语陈云：‘公若得此方，便不死矣。’盖陈曾与瞿有睚眦故也，人传以为笑。”先文敏遍求长生久视之术，至老不倦，乃其言如此。予四十无子，觅此方，数年始得之，连养数子。以之赠人，无不效者。特录于左，以公诸天下。慎毋信庸医之说，徒自戕其生为也。

牛羊肾一具。沙苑蒺藜四两，隔纸微炒。淫羊藿四两，用铜刀去边毛。桂圆肉四两。仙茅四两，要真者。薏苡仁四两。用滴花烧酒二十斤，浸至七日，随量饮之。种子延龄，更兼乌须发，其效甚速。

劫妻得僧

吴下劫婚之说，乃风俗之最恶者。凡已通媒妁，而女家或有他意，故为迟留，则乘夜劫去。浦东一小姓，结婚已久，兄嫂多方需索，姑甚恨之，遂与夫家通谋，订期内应。夫偶以他故爽约，其兄亦他适。一夕，嫂坚欲与姑易榻，姑不能违，盖因姑

卧室稍近外，嫂向与某僧奸，密约赴会故也。僧至，解衣登床，嫂入盥洗，而劫亲者亦以是刻至，排闥直入。僧窘迫不知所为，取被自覆其体。众呼噪劫之去。将渡浦，其夫出酒食，欲与压惊，去被，乃一少年僧也。遽起，跃入浦而死。

捐纳岁贡

王掌科绅上言：“教职一途，皆由岁贡选择。其廪生出身者无论矣，乃有以白丁而捐生员，旋复援例者，行谊未为端谨，诗书未必通晓，而俨然师席，顾使黄发老儒，拜跪执弟子之礼。秉铎明伦之地，岂容此等滥及耶？乞停其以教职录用，庶师儒尊而学校重矣。”掌科之言，可谓切而当矣。

画龙

客有持画龙一帧，长丈馀、阔五六尺，求钱十万缗。张之于壁，远视云雾滃然，爪牙蜿蜒可畏，小儿见之，皆惊啼而走。据称，系崔白真迹。展玩良久，家贫无从得钱，留信宿，卷而还之。按画记载，崔白，宋人。然款识模糊，莫可详考。索予作歌，因细书其旁云：“群龙潜瀛汜，游戏紫霄里。何来金翅鸟，飞入龙宫瞰龙子。惟有雪山顶上阿耨池，神力撑拏蟠不起。欻然跃出千岩外，牙爪蚴蟉吐光怪。尾拖百丈翻寒涛，雾暗风腥雨澎湃。何年写向雪色藤，鳞甲闪烁髯鬚髻。茫茫时代款莫辨，仿佛疑有仙人乘。平生好龙惜未见，对此狰狞汗流面。飞腾变化知几时，夜夜关门锁雷电。”

鸠庵先生

宋家桢，字艾贻，予同籍庆远之父也。生平孝友笃行，尤善属文，所著有《鸠庵》等集。两中副车，不乐仕进，闻有异书，不憚手抄口诵，积书充栋。宋氏三世单传，先生诞生五男，先后殇。晚举一子，名处厚，六岁病瘡危甚，祷于关壮缪。梦神示以“积善馀庆”四字，遂更名庆远，瘡随愈。今子孙绳绳，正未有艾也。乃仅以明经授别驾，士论惜之。

华氏祖

《南史》曰：晋陵华宝，父戍长安，年八岁，临别谓宝曰：“须我还，当为汝上头。”后长安陷没。宝后至七十，不婚。或问之，辄号恸。今华氏科第甚盛，宗人齿录，皆载宝为始祖。岂宝虽不婚，而未尝无婢妾也？

武昌兵变【戊辰】

五月二十二日，武昌督标裁兵四千人，因中军侵空饷银四万馀两，屡请不发，势汹

汹，欲为变。新抚柯永升，反以恶语相激。有百户陈龙者，素得士心，众拥以为主，自称天下统兵大元帅镇国大将军，据城为乱。屯兵楚王台，连兵破黄州、汉阳、岳州、德安诸郡，势张甚，百姓纷纷逃窜。时兵奉汰者不止一处，皆徼倖楚事成，欲乘衅而起。我郡裁丁，亦暗相要结，口出不逊语，主将不敢问。未几，徐将军治郡，尽锐与之角，贼退败，郡县以次收复。逆首陈龙，于七月望逃至白云寨，被擒，梟首军前。龙勇而无谋，不过乘一时之忿，故未及两月而败亡也。

少参风雅

丹霞李少参赞元，卜居建业，喜为诗，好结交天下士，赠缟论文，至老不倦。曾冰雪中扁舟见访，适予他出，不及倒屣，时年垂八十矣。予过秣陵，急往报谢，殷勤论文，风流好事，目中仅见，并投予诗云：“一代云间客，相逢建业中。写怀方缱绻，分手忽匆匆。缆湿蘼芜雨，帆开芦荻风。别离无限意，异地两心同。”“相逢诚可喜，分袂反添忧。桂棹飘然去，王孙不可留。秋风牵别恨，落叶怆离愁。何日重携手，狂歌续胜游。”

才子书

吴人金圣叹，著《才子书》，列书肆中，凡《左》、《孟》、《史》、《汉》，下及传奇小说，俱有评语。其言夸诞不经，谐词俚句，连篇累牍，纵其胸臆，以之评经史，恐未必有当也。即以《西厢》言之，谈词者曰，元词家一百八十七人，王实甫如花间美人，自是绝调。其品题不过如此而已，乃圣叹恣一己之私见，本无所解，自谓别出手眼，寻章摘句，琐碎割裂，观其前所列八十馀条，谓自有天地，即有此妙文，上可追配《风》、《雅》，贯串《马》、《庄》。或证之以禅语，或假之于制作，忽作吴歌，忽而经典，杂乱不伦。且曰：“读圣叹所批《西厢记》，是圣叹文字，不是《西厢》文字。”直欲窃为已有。噫，可谓迂而愚矣。其终以笔舌贾祸也，宜哉。

索债

超果寺之左，有姚翁者，家贫，一子痘殇，櫟寄寺中。寺僧不许，翁以情告曰：某住房止一间，而幼儿复发疹，恐致两伤。倘蒙见许，不过一月，便举而畀诸火，仍以僦值奉缴。僧悯之，留置殿侧。三日后，又有右邻援例来恳。不得已，亦留之，两棺相傍。一日，僧起焚香，天尚昏黑，闻壁间应答声，俯听，乃棺中之儿也。曰：“姚翁宿生所负，今已偿清，仅少钱五十八文耳。早间复以铜盆典钱，明日便完，我将往矣。但恐汝未得同行，奈何？”僧大惊詫。少顷，有叩门者，果翁也，緘钱来谢，并言欲举柩。僧曰：“此钱得非铜盆所典乎？”曰，然。“其中计五十八文乎？”曰，然，问：“何以知之？”因细述两儿应对之语，且曰：“我断不敢领，可速买楮帛焚化，以了此一段因果可也。”翁闻，慨然叹息曰：“今乃知人家子

弟未成立而死者，大抵皆索债耳，我可以无戚矣。”记此以告世之不肯偿债者。

宦牛阉豕

人之净身者曰阉宦。《肘后经》曰：“牛曰宦，猪曰阉，马曰骟，羊曰羯，鸡曰缴，狗曰善，猫曰净。”又虎有魄，象有牙，鹿有玉，马有墨，狐有珠，熊有白，牛有黄，麝有香，羊有裘，兔有毫，狗有宝，海狗有膃肭脐，牛肠胃中未化草曰圣蠹，诸兽肝胆之间有□答，皆至宝也。

三冈识略卷九补遗华亭董含著

羊产猴

正月晦，上海马桥居民益亥，畜牧羊，产一羊、一猴。

前生杀人

北桥镇农民张宁，生一子，年已二十，忽发疹，医药罔效，临危呼父，把臂为别，坚持父臂，啮去肉二寸许，睁目大骂曰：“我前生为汝所杀，今始得报，勿望久活也。”未几，宁疮口溃烂，脱落一臂，叫号月馀而死。

黑霜

四月二十一日，陕西隆德、庄浪二县，天降黑霜，麦菜尽枯。

日生珥

五月初十日，日生珥。

龟异

唐进士子锵，背溪而居，其仆蚤起，见一大龟，长尺许，众小龟舁之登岸。仆趋捕之，小龟散走，因携入。幼主俱数龄，以组系其颈，游戏庭中。进士从外归，见之惊詫，以为必神物也，亟释其缚，放溪水中。忽有小龟无数，拥之行水面，后复有数千龟络绎随之，渡南岸去，俄顷不知所之。二子不数日俱暴亡，逾年，进士亦卒。

修志

上谕翰林诸臣修《一统志》，先命各省部院大臣修省志会汇缴。每府聘绅士谙典故者三四人，分任其事。我邑有钱生者，年已耄，夤缘充选，分辑人物志。大纳贿赂，不问何人，悉得幸列，余概削去之。合郡大哗。里人张处士彦之，抗直士也，贻书责之曰：“朝廷修省郡之志，所以纪山川，详城郭，稽人才，核田畴，正赋税，序时代，考废兴，其论断是非，宜与史同，不可苟焉而已。郡志宜详，会志宜简。应详而简，有挂漏之虞；应简而详，有纰谬之患。我郡自古以来人才辈出，或以忠孝，或以节义，或以德业，或以文章，舍此而外，泛而及焉，滥觞及矣。明自高祖以迄嘉、隆二百余年，止于五六十人；神庙以后不及百载，所录百有馀人。济济贤才，何前少而后多与？至兴朝以来，仅录五人，略生平之行谊，视家业之盛衰。其他间收一二封翁，以充人数。若名卿钜儒、孝子义士，概不见录。我郡才藪，止应如是耶？甚至前朝直臣许公誉卿，亦复见删。删许公，是删东林矣；删东林，是删君子矣。虽蜉蝣撼柱，无足重轻，然援笔者自处何地？夫会志一书，与志传墓表，迥乎不同，取人宜高，持论宜公，不然则失之诬。费金钱而糜日月，乃颠倒错乱，一至于此，余窃不取焉。不揣鄙陋，敢附说言以陈之。”后郡守见是文，自悔所举非人，拒不复接。闻者快之。

月食

十一月十六日丁丑寅刻，交冬至，即于是刻月食。

岁朝立春

康熙二十四年乙丑，正月朔辛酉，辰刻立春，予寅降以来第二次也。

水灾

自五月至七月，淮、扬、滁一带，大雨如注，昼夜不息，水势汹涌，四面成巨浸，田禾庐舍俱没。百姓惊窜，有登塔顶馁死者，有浮至芦荡为毒蛇啮死者，有以长绳连系，一家数口同日并命者。惨状种种不一。水退，禾尽稿。地方官缮疏上闻。

不葬亲

宋罗玠游太学，有神祠甚灵，以前程祷之。一夕，梦告曰：“子已得罪于冥，可亟归。”玠言：“某生平无大过，愿闻获罪之由？”神曰：“子无他过，唯父母久不葬。”玠曰：“某尚有兄。”神曰：“子为儒者，明知礼义，子兄碌碌，不足责也。”未几卒。近有一二亲族，累代未葬，余每以此规之，默然不答。未知报应当何如？录之以以为世戒。

白塔看潮

秋仲，送儿辈至鹿城应试。相传八月十八日，白塔看潮。至期，舟者步者，络绎不绝。余随众往观，见游人杂沓，舟子皆白衣荡桨，回旋水面，绝不睹所谓潮也。叩之父老，云：“此地向无潮，土人借此以赛神耳。”因口占二绝云：“八月潮头一丈高，居人结队竞嬉敖。行过白塔重重路，那得江门半点涛。”“白衣黄□闹江津，打鼓鸣锣荡桨频。不向灵胥问消息，却从村社赛邪神。”天下事有名无实，大率类此。

岷山

吴兴山水之胜，闻于远近。九月望，始获裹粮一游。偕二三同志，褰裳扞萝，憩道场之颠，登白雀之麓，搜奇历邃，访古遗迹，泊舟于碧浪湖者几半月。明发，拟解维归，怅然不忍别，因留诗于岷山之壁曰：“白□洲畔蓼花横，小艇烟波任意行。拟向吴兴赋《招隐》，采菱缲茧寄余生。”

五色晕

四月初四日，日生五色晕，自辰至午始灭。

结婚破产

华亭南桥镇有富人邹连城者，农家子，祖父皆巨富，藏镪无数。再传至连城，性尤纤啬，善居积，朝夕皇皇权子母之利，富甲一乡。晚举子女十余人，联姻贵族。适逢纳官之例，纱舆绣补，意气自得。忽一病不起，诸子幼稚无知。于是其姻家周监生纶者，佯倡抚孤之说，纠众统狠仆数十，阑入内寝。伊妻仓皇走匿。贮米万石，并室中所有，俱估价均分，珠宝黄白，尽饱囊橐。且稔知窖藏甚多，相与威逼其妻，又将奴婢锁缚，按籍搜掘，满载而去。势同抄没，虽绿林豪客，不酷于此矣。邹氏宗人有义愤者，才发一语，喝仆丛殴，几丧厥命，远近骇叹。迺来士大夫嫁娶不论门族，沈约所谓王满连姻，实骇物听，蔑祖辱亲，莫甚于是也。乃既订姻娅，复从而劫夺之，真目中所仅见者。纶果于为恶，未几疽发于背，见邹率众鬼挥拳相向，痛苦叫号，五脏溃裂而死。

越东水灾

闰四月二十五日，处州府山水陡发，顷刻高三四丈。又兰谿县起蛟，裂地出水。青田、丽水、龙游、江山、开化、仙居等邑，疾风骤雨，水同日暴涨。城中居人，初阖户以拒之，既启户欲奔趋，而巨浪冲入，水高于雉堞，溺死者不计其数。

牛偿命

六月，东村红八桥有农家畜一牛，壮健异常，主人极爱护，筑牛宫以居之。一夕，闻哀号跳踯，既而喘息不止，吹灯起视，见赤练蛇二，且啗且穴两耳。其后窍一蛇，入已垂尽，尚馀尾在外，急拔之。而腹胀大如鼓，宛转踣地。剖之，腹内先有二蛇，盘屈昂首，因击杀之，并牛弃去。此必宿生冤报，故既罚为畜，而复偿以命。今人恣意作恶，自应堕入畜趣，安可不以此牛为前车之鉴哉。

龙挂

七月初三日，江宁北河口有龙从空挂下，云雾滃郁，河流激荡，吸去大船一、小船二。俄，自天半堕地，断为两截。

私盐宜禁

我乡滨海，擅鱼盐之利，年来武弁衙门差兵巡缉，商人计费，倍增其值。朝廷稔知贫民困苦，特许背负筐提，不在禁例。巡抚赵公，复出示申明其说。于是游手无赖，结队往贩，肩挑者络绎不绝，其价顿减。诸商不平，奔诉鹺使者，随结白捕，沿街缚人。遂撓众怒，一呼而集者数千人，于七月廿九日，拥至富商王、程、张三家，毁门入，室中所有，恣行打坏。营兵复乘机抢掠，合郡大哗。夫重价病民，奸商不能无罪，然私贩律禁甚严，有碍国课，且千百成群，率皆凶悍亡命之徒，若不禁止，势必酿乱。有地方之责者，不可不急为之所也。扰攘月馀，盗贼蜂起，抚军复严禁，悉寘之法，乃止。

豪家犬

云间宋氏，名族也，有一钜公，蚤负文望，致位通显，歿后贤嗣沦丧，二幼子俱不肖，竟破其产，统绪几绝。太夫人病危，至不能具棺殓。仆以年谊往候，见门庭阒寂，豪奴皆散而之他，惟一犬恋恋不忍去，徘徊慨叹。悲夫！人之不如畜也，为乐府以纪之曰：“东家买黄犬，毛毳颇丰殖。晨夕司门户，辛苦勤厥职。偶然惊幼稚，鞭逐久无食。临行掉尾顾，俄顷复在侧。岂敢怀怨猜，依栖但感德。主人堂下罗群奴，出入里仗主势，意气挥霍衣冠都。吁嗟乎！一朝堂空生碧藓，不知谁似阶前犬。”

惧内

我郡一绅，性惧内，旁无姬侍，出入必后，事之如严君。一日，偶集予别业，浮白欢呼，谈论风起。酒未半，忽仆夫趋告曰：“夫人自乡至矣。”悚然变色，手所持杯，不觉堕地，即起登舆去。同坐者皆失笑。《吴越春秋》载，伍胥如吴，遇勇士专诸于途，碓颡而深目，虎膺而熊背，方与人斗，其怒有万人之敌气。其妻一呼即还。怪而问之，对曰：“屈一人之下，必伸万人之上。”彼烈丈夫尚尔，然则惧内

不足讳也。按《太平广记》引天门子云：男命起寅，女命起申，以木投金，无往不伤，故阴能疲阳也。阴人之情急于阳，而外自守抑、不肯请阳者，明金不为木屈也；阳气刚燥，遇阴言气和柔、词语卑下者，明木之畏金也。然则惧内乃造化一定之理，无怪乎今人之比比而然也。

夫妇同被雷击

康熙二十六年丁卯三月十四日，虞山鹿园地方，有钱生者，年弱冠，娶丁孝廉女为室。结缡甫月余，偕妻归宁。妻母家居南城。是日薄暮，忽大雷雨，电光绕钱之室，雷殷殷起几席间，若有所觅，久而不息，将卧榻击碎，家人悉惊仆。既而迅雷闪电，转入其妻母家，女鼻中闻火气，遍体生烟，骇极，匍匐床下。凭空提女及生跪道左，震雷一声，夫妇俱死。雷斧从脑盖透入，衣服钿钏，一物不动。观者四集。二人俱年少无他过，乃遭天刑，岂前生宿孽耶？

郡守风流

国初以来，莅吾郡者往往多俗吏。近会稽鲁公谦庵名超者，守郡九年，创建书院，接引后进，风流文采，士气为之一变。朝廷知其能，一岁再迁而去。继之者为越西朱公雯，字三，雅善诗文，重声气，案牍之暇，不废游览，与予辈选胜载酒，分韵赋诗，苏、白遗风，庶几不坠。予有《游横云山次韵诗》云：“画舫轻桡蹙浪纹，绕堤晴翠水沄沄。丹峰倒障林边日，白鸟斜冲岭上云。古寺泉声双□落，夕阳烟影半帆分。胜游病怯黄桑屐，管领青山属使君。”

吴阊火灾

五月初二日，吴阊布政司前民家失火，延烧官署、民房一千馀间。见空中有红衣人往来指挥，合郡官僚赴救，俱公服向火叩首。毁去文卷十之七。自未至酉始息。

异风

七月初十日，大风雨，雷电交作。至十一日，风雨益甚，破墙拔木，屋瓦从空而飞，民间楼房倒塌，救护不暇。千里内外，同日俱遍，压死及覆舟者，比比而是。

蝗入考场

八月初八日，予偶寓江宁，送儿子威宝赴棘闱。主试者米翰林汉雯，副龚章也。举子才点名，忽闻空中声势汹涌，仰视见飞蝗蔽天，自东北来，日色为其所掩，经过之处，屋瓦层叠数寸。有客从江北至，云初七晚蝗至浦口，是日上午至白下城，旋渡江，两岸芦叶，俱被食尽。逾时，仍回向东而去。时有童谣云：“蝗虫入考场，

有米也要荒。”米君素有才名，竟被黜。

搏鬼

江宁李生者，有胆气，向习武艺。一夕，独坐堂上，见一鬼，长丈馀，双角，靛面，狰狞可畏，俯首瞰生。李徒手搏之，鬼作惧状，逃入竹园内，其声啾啾然，遍觅忽不知所之。张叟□说。

祖宗灵应

吾家遗安公墓，在沙、竹两冈间，垂三百年。前建三凤坊，左右列石梁二，皆祖宗从形家言，拮据而成者。数传后，不肖子孙盗砍宰木，势难禁止，付诸浩叹而已。近有族蠹名奎者，为害尤甚。伐树不已，至于坏垣；坏垣不已，至于拆岸；又乘夜将两桥毁卖。相传三凤坊下埋金带一围，铁数千金，谋结党掘取。族众哗然不平，讼之县，复拥至家庙，声其罪，跪受杖。奎殊不悔过，口肆狂语，排闥而出。行未数武，仿佛有衣冠贵人随其后，回顾则不见。举步，又复如前。始大窘，疾行。将抵家，其子出迓，亦见衣冠人先入，据堂中，状貌甚怒。子惊仆，不省人事。奎夜至冢，叩首曰：“吾贫，故为此，岂祖宗不能援，而反降之祸耶？幸舍之。”祝未毕，闻空中有嗟叹声，既而若呵叱声。不三日，其子死，奎亦暴病垂尽。今复有继奎而起者，未知报应若何耳？吁，亦可畏矣。

藏金托梦

桐乡有张进士超曾，尹华亭，甚有声望。时每年编审，轮大户充役，收兑一名，费逾千金，富民争入金求脱，故宦囊颇厚。罢官归，以万金埋地下。后欲掘取，才举动，主人必头眩体战，或暴疾仆地。嗣后屡发屡病，合家惊詫。复梦白衣老人谓之曰：“藏金本非汝物，可坚守以待，倘擅取，不独无益，更当得祸。”于是相戒不敢发。予闻不信，细访果有此事。今秋张君歿矣，不识此物属之子孙乎？抑他属乎？因叹世之窖藏者，大率皆守钱奴，不若吾辈琴书之外，无他长物，反不为造化之所弄也。

蠲租

康熙二十六年丁卯十一月廿六日，上谕户部：“朕惟自古帝王统御，万方平安，期于膏泽旁流，咸蒙美利。朕御极以来，轸恤民依，力图休养，思理财乃裕国之大纲，蠲贷为爱民之实政，历年敦崇节俭，严核浮冒，盖欲为布德行惠之资。各省钱粮虽已次第蠲免，但江苏所属各郡县，财赋重地，额徵甲于他省，且累岁输将供亿，效力惟勤。兹用大布恩膏，除漕项钱粮外，所有二十七年应徵地丁各项钱粮，及二十六年未完者，亦与俱免。尔部速行地方官，通行晓谕，务使均沾实惠，以副朕爱

育苍生至意。如官吏朦混，从重治罪。即遵谕行，特谕。”我郡兵荒以后，民命维艰，此一诏何异汉之文、景耶！

鸡异

康熙二十七年戊辰元夕，予有戚置酒，召客赏灯。膳夫宰一鸡，头已断，忽引吭长鸣，身亦起行，数步而蹶。主人惧，亟弃去。

阎罗

娄县讼师朱姓者，病热，势极危殆，昼生夜死。自言遍历十殿，与世间所传无异。每殿刀山火狱，受刑最惨，举体杖痕，十指出血，痛苦不可名状。半月后始绝。我闻地下主者曰阎罗，与阳世等。然阳世劝惩，或不尽法，而阴府善恶，略无遁情，似差胜人间耳。但不知其所管领者止中国乎？抑薄海内外无所不辖乎？如其无所不辖，则十王犹患其少也。相传韩擒虎、范仲淹、蔡襄诸公，俱为阎罗，则其位亦若有更番升降者。释典载阎罗王名闪多，荒唐附会，可发一笑也。

京师亢旱

自正月至五月，京师亢旱。大风时作，而雨泽不降。因大赦天下。学士德格勒者，自言明《易》理，令占之，奏曰：“天地不交，阴阳不和，安得有雨？”上怒曰：“岂一年不雨耶！”至二十五日，乃雨。

道臣殉难

武昌兵叛时，变起仓猝，贼势颇猖獗，官吏望风逃匿。吾郡叶粮道映榴，字苍岩，被劫，胁令从逆，不应。归署，封印缮疏，嘱家人间道出走，遂朝服望阙再拜，从容自刎死。上览遗奏，为之恻然，不忍竟阅。特赠工部侍郎，与祭葬，御书“忠节”二字以赐其家。呜呼，公虽死，亦可以不死矣！按本朝以来，我郡一忠一逆：忠为苍岩。逆为张进士云孙，为粤西府佐，降吴逆，上书谤本朝。三桂败，潜逃归。里人鸣鼓以攻之，云孙惊惧而死。

秦望山庄

园林之胜，自明季以来，我郡绝少。近王司农日藻，始于秦望山庄创为之。雕甍杰阁，华堂耸峙，其间古树苍藤，曲池映带，一经点缀，俱有疏野之趣。春三月间，游人如织，时与风雅之客游历其中，亦可以乐而忘老矣。惜乎去城稍远，未获一览胜概耳。

遇考自沉

娄邑诸生顾其旋者，出身甚微，然能文，遇试必列高等。猝抱心疾，将岁试，卜于关公庙，不吉，疾趋至秀野桥，跃入波中自沉死。

语录可厌

西方氏之学，予所究心，然有彼此相袭，极陋而可厌者。如传衣付拂，不知谁何，诗篇语录，不审文义，互相祖述，到处传播。若此辈而图作佛，四禅天且将塞破矣。近有绪芳禅师名真承者，与予为方外友。其为人也，高而不亢，坦而不流，禅定之余，间发为有韵之言，□□多幽趣。以予所睹，殆未有过之者也。近主岳林，屡以诗邮寄，答以一绝云：“亚字城西道壹居，每登高阁听真如。无端锡杖凌空去，好遣青猿数寄书。”

杜生

华亭有杜生者，家甚富，偶以事往京华。归至半途，入一竹林内登厕。回顾地罅有金钗一股，拔之，其声锵然，因拨去瓦砾，见下有大瓮，覆以巨砖，揭视，皆黄白也。杜祝曰：“我单马二童，岂能带去？如此物应为我，俟到家遣人来取。”仍以钗置瓮面，聚乱石识之。后抵家，未能即行。一日，纳凉于庭，顾颓垣下土瓮起，有物灿然，拾视，则前所识之钗也。急掘之，藏金宛然，四角镇黄金四大锭。相去二千馀里，随之而至，岂神输鬼运耶？益信贫富有定分，非人力之所得而争也。

变犬

缙云有李生者，自幼勤诵读，试辄高等。家甚贫，以馆为业。然性疏懒，倦于训迪，又喜交游，不耐静坐，颇废程课，故门下生率多无成，往往不终局而散。一日病热，昏愤中见有皂衣人手执一帖，促之同行。出门行半日，至一处，城堞巍峨，内有大殿，金书“冥府”二大字。生悚然，始知已登鬼录矣。随有鬼卒数人，以银铛系颈，驱之至阶下。殿上坐一人，衣王者服，侍卫环绕，呵生曰：“汝有三罪，曾知之乎？”生拜诉曰：“某系贫士，家无担石，且平生读书，幸无他过，罪实不知？”王者怒叱曰：“汝空受人贍，而毫无报效，一罪也；终日素餐，不自愧耻，二罪也；屡误人家子弟，三罪也。当判往旧主人杨监生家，为犬三年。今且暂释归五日，遍戒亲友，使若辈知警，或可稍薄汝罚。不然，随堕阿鼻中，永无出期矣。”生大哭，警然而觉，汗流浹背，因细话此事。五日后，复瞑。家人亟往杨氏侦之，果产一犬，性颇驯，主人极爱之。逾二载，不吠不食而死。徐君喈凤说。

窖藏无益

江南一贵人，精心计，性爱窖藏，老而弥甚。止一子，不好读书，喜与匪人狎。贵人歿后，不数年，产业俱尽。华屋名园，转售他姓，藏金悉为人取去，人皆怜而笑之。因思古语云：“须知世上金银宝，借汝闲看六十年。”又云：“饶君恁地埋藏着，煞有闲人作主来。”真不刊之论也。尝阅《南史》，张绪谓柳世隆曰：“观君举措，当以清名贻子孙耶？”答曰：“一身之外，亦复何须？子孙不才，将为争府。如其才也，不如一经。”至哉言乎！今之士大夫，解此者寡矣。

疑冢辨

漳河之上，有曹操疑冢七十二，宋俞应符题诗云：“人言疑冢我不疑，我有一法君未知。尽发疑冢七十二，必有一冢藏君尸。”自谓智过孟德矣。我以为老瞒之尸，并不在七十二冢之内，特设此以欺人。俞君之说，正堕其术中，徒为老瞒所笑耳，真书生之见也。

田孝廉

田孝廉茂遇，重声气，好结纳，尤喜与贵人交，偕名公钜卿，互相赠答，挥金不吝，间能急人之难，人亦以此重之。后应宏词科，复遭摈，感愤发病卒。嗟乎！人生遇不遇，盖有数焉。君既抱美才，素有声望，且家亦非壁立者，纵沦落不偶，使能闭户著述，优游林壑，以永天年，不亦可乎？奈何效左徒之嚎呼，同贾生之痛哭，忧思烦惑而自伤其生为？噫，过矣！因谏之曰：“缅风流，念车笠。时荏苒，殊今昔。人皆忌，我独惜。床上琴，邻家笛。”

占验

医、卜二艺，医有据，卜无凭。凡人一念之诚，神明感应，占者往往率己意以断之，安望其洞阴阳之理，尽生克之变乎？近西郊有龚生修者，年甚少，探幽索隐，其于吉凶祸福，可限时日，屡试屡验，可谓神乎伎矣。

三冈识略卷十

【己巳至癸酉】华亭董含著

八月生子

俗传，七月生子生，八月生子死。西邻有朱氏，妻八月产一子，妾七月产一子。产方周岁，妾子殇，妻所生无恙。医书以胎成七月，属太阴脾脉，内属于肺，土能生金，故寿。八月属手阳明脉，内属于大肠，生气交于泄气，故夭。此论似不足据也。

猪蜕皮

庚午正月，南郊超果寺，栏中畜一豕，大数十斤，一日背忽中拆，皮从两旁脱下，渐及于腹，内生毳毛，如未脱者，四蹄亦然。尝闻龙蜕骨，蛇蜕皮，龟脱壳，鹿脱角，今猪乃脱皮，真所未见也。

窃儿

松郡有乞妇，家颇裕，盗取人家小儿，灌以麻药，使冥然无所知，随用利刃，将脸及胸背各剔毁数处，肩臂亦然，令人不复识。其两股及双足，先将筋脉截断，用尖钩挑出膝筋，血注，即以艾灸止之，欲其蹒跚，以便行乞。适东关一寡妇，止生一子，才三岁，为所窃。有发其事者，母急奔救，儿已垂死，抱母颈一恸而绝。惨不忍言，观者无不叹息泪下。其床下又有死儿二，遍体伤痕，凝血满地。行兇之具，尽行搜出。县官穷治馀党，悉缚至庭，未及正法，众怒不可遏，已俱毙挺下矣。

鹿尾

今朝廷御膳，以鹿尾为珍品，常以之赐大臣。按之古书，不甚著，惟梁刘孝仪曰：“邺中鹿尾，乃酒肴之最。”时魏使崔劼在坐，曰：“生鱼熊掌，孟子所称；鸡跖猩唇，吕氏所尚。鹿尾乃有奇味，竟不载书籍，每用为怪。”然则六朝已贵此味矣。

寓斋唱和

岁暮，偶过暨阳，假馆南城，天气沍寒，不敢出户，适与潘次耕耒、徐电发□寓斋相连，日夕过从。大雪中见招，与黄庭表与坚、钱宫声中谐话旧，饮酒极欢。予即席口占四韵曰：“屈指交情各黯然，客中招客共流连。才高何意翻遭妒，道直从来不受怜。摇落江城逢旧雨，萧疏灯火近残年。五湖随处烟波稳，莫遣青霜到鬓边。”

”潘次韵云：“天畔怀人每惘然，可能相见不流连。霜馀葵藿晚多味，雪后江山情可怜。风□差池悲官迹，匏尊牢落感颓年。五湖烟水无争竞，长拟追随箬笠边。”徐云：“忽漫重逢一惘然，招寻还喜寓斋连。算来聚散最无定，话到升沉实可怜。薄俗难醇思故老，虚名忝窃悔丁年。衰颓留得须教醉，莫遣闲愁到酒边。”

科举异变

科臣何楷，题科举生例，每六十卷中式一名，今督学取数太多，宜限数截去。于是生员名列二等者，大半芟除，学校为之失色。夫寒士三年苦心，膏火之费，途路之资，措办不易，今既得复失，殊乖盛朝鼓舞人才之意。且科举多寡，何关大计，国家事岂更无急于此者乎？前明张孚敬当国，有沙汰生员之举，言官上言，谓自昔以来，有增学舍，广生徒者矣。但闻沙汰僧尼，未闻有沙汰生员者。事寝不行。何君此举，可谓不学无术矣。

官绅接见有禁

士大夫居乡，贵乎自重。地方果有利弊，不妨直陈有司，非公事，概行谢绝可也。迩来吴下有一二显者，未免太过，致烦白简。上宽仁，不以为然，然而上司遂有乡绅与现任官不许接见之禁。上自督抚，下逮郡邑，皆不相闻问。所与造膝咨访者，不过奸胥贱隶而已。上下蒙蔽，贵贱不分，于是刁民蠹役，肆行无忌，岂朝廷重士安民之意乎？不独体统荡然，我不能无世道之忧矣。

耄年应试

汧渚潘明经襄，十三入泮，十七食廩饩，年方壮，序贡赴都，两任教职，一署县篆，六十后罢归。久之，家贫落魄，年近古稀，忽易名衫黼，应童子试。复三入棘闱，寿登八十三矣。手钞口诵，锐气不衰。或叩其故，曰：“我闻登科第者，须仗慧根，今生纵无成，冀来生或当蚤达耳。”闻者笑而悯之。昔胁尊者八十方出家，赵州八十犹行脚，然则潘君亦未可怪也。

烧丹无成

猗园曰：万历中，闽有林道人，从吕祖授指石成金法。云间董翰林其昌偶会他所，请于主人曰：“林尊师真有道者，闻其有指石术，可一试乎？”林曰：“此小事耳，当举一物为验。”时盘中有梧子，取一粒授林。方茶次，便投入瓿，随手立变为银。董曰：“可复化梧子乎？”曰：“可。”再纳茶瓿，良久出之，故是梧子。如此者三，林曰：“此真银矣，五百年后不复变也。”后道人从公乞一传，公不与。求其术，亦竟不肯授。先文敏公酷好烧炼，久而无成，然亦年逾八十矣。

乡贤祠滥觞

士大夫有功于国，有德于桑梓，歿而祀诸瞽宗，礼也。迺来乡贤一路，竟为藏垢纳污之地，真有不忍言者。犹忆明罗念庵、郑淡泉两先生望重朝野，父皆耆儒，后见滥觞，不忍父混列其间，各抱其主以归。闻二公之风，可以愧矣。

异鱼

闽福安县傍海，渔人捕一鱼，双尾，背有两翅，状酷似人首，面有笑容。急释之去。《山海经》载，东洋有和尚鱼，想即此类。

辟穀

《玉匱经》曰：求仙之道，绝粒为宗。绝粒之门，服气为本。然其间元妙，必有所授，无本之术，终恐无成。吴闾有史道人者，能辟穀，不食者二十馀稔，独处一室，不设灶厠，几榻萧然。每日咽津纳气，熊蹲鸱息，时饮冷水数口而已。学道者自远裹粮而至。未几，史遭沔疾，潦倒而卒，年甫及壮耳。然则辟穀亦何益哉？

珠瘤

粤东廉州府一村落间，有褚练师者，忽颈生一瘤。经三岁，大如升。一日，中如鸟啄，痛不可言。以刀剖之，内孕一珠，圆明莹彻，迥异凡品。亟贮以石匣，每夜有白光透匣而出，高数尺，因取供三清像前。后为人窃去，不知所之。同年余君说。

盍簪感逝录序予

承四方交游不我遐弃，赠缟论心，尺素往来不绝。四十年来，零落殆尽，曾作《盍簪感逝录》二卷，今聊附记其序云：盖闻旷野萧条，子期发《思旧》之赋；良辰晚晚，士衡题《叹逝》之篇。盖痛莫大于死生，情莫悲于离别。故渡河梁者弥增眷恋，登岷首者不禁欷。时乎难再，序冉冉其若驰；逝者如斯，水滔滔而不返。虽聚散比梦中之蝶，而去来感雪上之鸿。仆青鬓论交，白头怀旧。彼恨相知之晚，此怜倾盖之迟。海内名贤，不遗鄙陋。缅追畴昔，细数平生。或结契于风尘，或缔交于邂逅。或间山川，谊深嵇吕；或忘年位，情协埙篪。或同堂握手，而矢知己之言；或闻声相思，而寄写心之什。或订金兰之谱，或镂玉敦之书。莫不珠联璧合，雾涌云蒸。春兰秋菊，并挹芳姿。北雁南鸿，常怀离恨。诂意知交零落，岁月差池，发齿先颓，功名莫究。□羽□鸾，悼华堂之萧瑟；栖踪泉石，惭旧圃之荒凉。绿尊红袖，便隔壶觞；白水青山，忆陪冠盖。情纷纷其如疾，意戚戚而鲜欢。念百卉之滋荣，慨故人之憔悴。而况顾影长辞，临风永诀，国之殄矣，我劳如何。于是低徊末路，俯仰前徽。登山涉水，藉赫蹏以传情；苦雨凄风，狎隍麋以伸志。或如赞语，或

类挽词，情绪杂陈，歌谣并奏。潘岳之诔夏侯，良有以也；庄生之悲惠子，岂徒然乎？吁嗟乎！梓泽花残，虞渊日暮，漆灯暗淡，银海微茫。空招蒿里之魂，难起岱宗之魄。零陵道中，吊一江之绿水；咸阳原上，抽三丈之白杨。盖听山阳之笛，倍益缠绵；扣西州之门，真堪恸哭矣。

松化石

唐杜光庭《录异记》云：婺州永康县山中有枯树，枝干及皮，与松无异，为人所斫，误堕水中，化为石。因取未化者试之于水，亦化为石。此特一时偶然之事耳，今土人指为物产，顽石略有纹者即托名松化，拾以赠客。不辨真贋，殊堪捧腹。

陆公为神【壬申】

陆公陇其，号稼书，平湖人，庚戌进士，为人刚方有守。筮仕练川令，有惠政，锄强剔弊，大得民心。朝廷知其廉正，擢为台官。直言敢谏，克尽厥职。不久即乞归，讲学于洞庭之东山，从游者日众。腊月二十七日，忽梦嘉定旧役，纷然来迎为城隍神。公早起，谓家人曰：“我往矣。”于是沐浴更衣，处分后事毕，怡然而逝。所居在泖口，是夕泊舟者俱闻舟楫喧阗，鼓乐声不绝，云迎新城隍赴任。公家老苍头王姓者，亦梦送至嘉定城隍庙，见公绣衣幞头，侍从皆鬼判，骇汗而醒。彼处士民闻之，即于庙中为公治丧七日，吊者云集，享祀无虚日。夫聪明正直，生而为人，死而为神，此一定之理，独生前未能尽其蕴为可惜耳。

修史

元癸未至正三年二月，命欧阳元、揭傒斯等，修辽、金、宋三史。甲申四年春告成，仅一年耳。史成，具鼓吹导从，自史馆进至宣文阁。庚申，帝具礼服接之。按《辍耕录》云：至正二年壬午三月，脱脱等奉命修三史。甲申春，进《辽史》；冬，进《金史》；明年乙酉冬，进《宋史》，共四年馀。前明洪武二年二月诏修《元史》，三年七月告成。今修《明史》，已二十馀年矣，未知何时告竣也。

物崇

西郊有陆生者，从市间买坐椅四，制精而价廉，喜甚，列之中堂。日暮，猝病热，势甚危。叩之卜者，曰：“据象，是新置一木器作崇，急焚之，或移赠他人，祸可免也。”陆不信，更稽诸龟，其言略同。于是命仆于门外积薪焚之。适值幼科潘同云者，询其故，大笑入语陆曰：“与其付火，孰若赠人？我不畏崇，以之见赠，何如？”陆首肯。于是遣人持归。椅才入门，即觉头眩。傍晚，遍体发热，翌午暴死。夫使椅为之，物固无知；使天为之，何以听占者之言而遂霍然也？再四思之，不得其解，可怪也已。

待士盛典

康熙三十二年癸酉正月二十五日，学使者许公汝霖驻节暨阳。试毕，会宴诸生于君山之巔。赴者二千余人，席地论文，酬酢竟日，谆谆训诲，至晚始散。此从来未有之盛事也。公试士题用一大一小，其所识拔，至公且明。自是以后，二十年来，视学江南者俱至公至明，江左文人之幸也。

奇旱

江浙二省，自五月至六月终，天气亢旱，河底俱涸，禾稻十分止种四分，田豆俱稿死。节过初伏，尚有乘潮插秧者，亦一异也。然东、北两乡之民，已不可问矣。越东西荒者，亦什之六七。抚军遣官分头开永昌、长兴、猪圈各坝，以救海宁一带。一黄冠自言能祈雨，先受聘仪，登台作法，久而不效，乘夜遁去。予作《感雨诗》云：“三时已过未分秧，泽国尘沙十丈黄。赤帝不传雷雨令，白鸥犹忆水云乡。篱边抱瓮侵朝露，松下披襟纳晚凉。怪杀潭西狂道士，绿章频上信茫茫。”

评文被诉

十一月初一日，华邑诸生黄士英以疾卒，家人绕而哭之。半日後，忽闻喉间作声，云：“我归矣。”叩其所以，曰：“顷见二人持符相招，即乘船往，至一城，殿阁耸峙，绝异人境，署曰‘鸿政司’。二人者，引予入，与王国士对簿。国士生前为府吏，与予比邻，喜为制举义，以所业示予，屡加评驳。国士恨极，郁郁发病死，诉之冥官，随勾往面质鸿政司。国士出，谓予曰：‘汝所犯甚轻，不足为罪。若数之修短，速往洪州自知之。’于是二人复掖而出。闻彼中人云，鸿政司姓罗氏，刚而善断，特信任椽吏张子□、孙惠卿。罪人以苞苴通者，往往得末减，但泉下用钱，以人间所焚楮，一束止作一钱，惟镪之有纹者，每锭直白金半两。予以贫故，不能为力。洪州距此千馀里，今亟往，暂寓周吉甫肆中，若三日夜不返，则便成永别矣。”言讫复瞑。洪洲之说，竟不及详。迨三日后，闻庭中鬼哭声，始加棺殓。呜呼，黄生评驳人文，特细故耳，乃冥司不察，轻准讼辞，不亦冤乎！抑数果止于此乎？至椽吏舞文乱法，贿赂横行，与阳世无异，则尤可怪也。

云间著述

本朝以来，吾郡著书者绝少。以予目之所见，则有顾贡生开雍有《滇南记事》一卷，王贡生沅有《纪游草》四卷，宋副宪徵与有《金刚经注解》三卷、《东村纪事》一卷，卢先生元昌有《分国左传》十六卷、《杜诗阐》三十四卷，诸进士嗣郢有《九峰志》十卷，范文学彤弧有《绣江集》二卷，林贡生子卿有《通鉴本末》一百卷，许观察缙曾有《日南杂记》二卷。予亦有《三冈识略》十卷、《续识略》未定卷、《盍簪感逝录》二卷，未知将来得附于诸君子之末否也。

舍利

湖广汉阳府离城二十里，有古刹，中一游僧，力修善果，能晓夜诵经不辍。叩以乡贯姓名，俱不答。寺僧颇以口目之。及将回首，嘱众僧曰：“死必焚吾。”既焚，身端坐不倾，得舍利数十颗，五色灿然，始知其生平盖默有所得，不以告人，惜莫举其名与字云。余淡心怀说。

冬行春令

自孟冬至腊尽，雨雪俱无，天气暖如仲春。予纪以诗云：“雨雪全无气更温，萧疏三径长苔痕。预支鹤舫寻山寺，蚤放蜂衙上笋门。吏急频年空杼柚，官思留客减豚鸡。朝来银鹿惊相报，溪畔寒梅反旧魂。”

三吴风俗十六则

风俗之日趋于下也，犹江湖之流而不返也，然未有甚于今日者。岁暮多暇，约略数端，以志感慨云。

明初崇尚俭约，内服以松江三梭布为之，不用绫绢。今市井小人，皆不屑以此制褻衣，而富贵子弟无论矣。

苏松习尚奢华，一绅宴马总兵逢知，珍奇罗列，鸡鹅等件，率一对为一盆，水果高六七尺，甘蔗牌坊下可走三四岁儿。视明季，直土礪土簋耳。

前朝缙绅，类能自重，当事亦接之惟谨。迨来士大夫日贱，官长日尊，于是曲意奉承，备极卑污，甚至生子遣女，厚礼献媚，立碑造祠，仆仆跪拜。此辈气焰愈盛，视为当然，彼此效尤，恬不为怪。以父母付畀之身，而屈体辱受，不自爱惜如此。噫，亦丑矣。

各衙门差役，俱有定数，多者不过数十人。晚近事广弊繁，地方奸猾及富人避役者，皆投充其上下衙门，串成一局，把持挟诈，无所不至。荐绅中有一二寡廉耻者，联为宗族，揖为上宾，信乎衣冠扫地矣。

明嘉靖六、七年，诸生与县令，体统悬绝。后闻县官上任，诸生有通贺仪者。未几，具花币贺太守矣。今则白丁铜臭，不惜馈遗，皆得与郡守抗礼主宾，谈宴谐谑，无所不至，区区邑令，又何足数耶。

谚曰：“世治尚文，世乱尚武。”二者缺一不可。前朝重文废武，今朝儒行自为弃物。相传一甲科谒抚军，接之甚倨。续有武弁晋谒，笑语款洽，临别谓曰：“适见

一进士，相貌堂堂，所惜者出自异途耳。”可叹更可笑也。

吴下素称浇薄，然士君子护惜名义，缙绅廉洁者多，营利者少，士子读书者多，干谒者少。今则反是，于是一夫发难，列款揭帖，几遍天下。小人往往挟持君子，体统遂不可问矣。

余为诸生时，见妇人梳发，高三寸许，号为“新样”。年来渐高至六七寸，蓬松光润，谓之“牡丹头”，皆用假发衬垫，其重至不可举首。又仕宦家或辫发螺髻，珠宝错落，乌靴秃口，貂皮抹额，闺阁风流，不堪寓目，而彼自以为逢时之制也。

明季服烟有禁，惟闽人幼而习之，他处百无一二也。近日宾主相见，以此鸣敬，俛仰涕唾，恶态毕具。始则城市服之，已而沿及乡村矣。始犹男子服之，既而遍满闺阁矣。习俗移人，正有不知其然而然者。今不惟遍满闺阁，渐而孩提之童俱服之矣。岂不骇哉！

三吴人文，甲于远近，家弦户诵，不必世家。迩来徵徭之害，遍及横经，郡邑下僚，皆得而辱之，鞭撻縲继，与奴隶无异。诗书礼义之风荡然矣。

“官无大小，皆称曰老；人无老幼，皆称曰翁。”此四语见前朝奏疏中，然犹为士大夫言之。今市魁厮养，互相呼谓，居之不疑。上下不分，而体统莫辨。狐裘虽敝，乃以补黄狗之皮，母乃不可乎？

前朝未尝无差徭之扰，乃据予所目睹，其时贫富熙熙，各安其生。今本朝宽大，近古所无，且蠲诏屡下，而百姓贫者益贫，即富者亦有日蹙之势。细思其故，则牧民者为之也。当预徵之令乍颁，虎差四出，索金钱，婪酒食，咆哮骂詈，各饱所欲，而正供先耗其一矣。百计完官，膏血垂竭，乃忽创为拿亏之说，任意轻重，额外诛求，而正供耗其二矣。钱粮完欠，权在经承，皆系衙门积蠹。厚贿者虽产多额重，亦可经岁悬欠；产薄者力不能分，则签票纷纭，敲扑惨酷，势不得不多方借贷以赂之，而正供耗其三矣。甚至私派不一而足，如海塘、江工之类，何岁无之？郡邑串成一局，愚民含冤，束手待毙，而正供耗其四矣。四耗之外，尚有不能尽悉者，然则国家课税，大率入官吏之橐，无怪乎逋负者之比比也。

古人重墓志，必求名公钜卿以表其墓，犹恐未悉其生平，故以行述先之。迩来为人子者，虑亲之隐德不彰，往往自状其父母，理无不可，然须使亲能受，庶子心亦安。今之人誉言过当，本无一长可见，而以为功德赫奕也；素鲜文望，以为可比踪韩、柳也；才知点画，以为可追配钟、王也；略解韵书，以为可上并杜、李也。连篇累牍，俱属子虚。死而有知，当含愧于地下矣。而人子方装潢成帙，遍处赠人，识者能无掩口乎？

曩昔士大夫以清望为重，乡里富人，羞与为伍，有攀附者，必峻绝之。今人崇尚财货，见有拥厚货者，反屈体降志，或订忘形之交，或结婚姻之雅，而窥其处心积虑，不过利我财耳。遂使此辈忘其本来，趾高气扬，傲然自得。究之贫富一定，彼此两伤，始密终睽，后悔莫及，竟何益之有哉？予行年七十，不名一钱，方以此自幸。乃近有以“清旷”二字相讥笑者，俗人之见也。

春元用布围轿，自嘉靖乙卯张德谕始，此何元朗所志慨也。夫士子既登贤书，肩輿亦不为过，乃昔贤犹或非之。近开捐纳之例，于是纨绔之子，村市之夫，輶辇而往，归以绅自命，张盖乘輿，仆从如云，持大字刺，充斥衢巷，扬扬自得。此又人心之漓者愈漓，而世道之下者愈下也。

莼乡赘客自述

赘客者，江南松江华亭县人也。姓董，名含，字闾石，一字榕城，晚号莼乡赘客。始祖籍河南，元末避乱渡江，卜居五葺。再传而族始大，如幼海忠节公、思白文敏公，名贤辈出。先大父邃初公，万历癸未进士，历任左副都御史，吏部左侍郎。为御史时，剿寇御敌，勋业烂焉。受明怀宗皇帝宠眷，虚冢宰、总宪二篆，命兼摄之。居官厘奸剔弊，进贤退不肖，公忠亢直，不能委蛇，为忌者所中，乞骸骨归。先考仲隆公，性轩爽，不事生产，喜急人之难，为文颖异绝伦，既屡困场屋，遂弃经生业，与母氏殷太孺人隐居东墅，论者谓可追踪鹿门云。予幼苦多疾，七龄入小学，逾年，被病废业。又二年，复病，几不起，幸而获全。十三学作文，十五补博士弟子员。十七八，下帷发愤，覃思腐毫，寝食都废。两亲爱护倍至，扃户禁之。予昼则抉窗潜入，昏时储火瓮中，候人静吹灯起读，丙夜不辍。十九，行冠礼。二十，娶蒋氏，甲戌进士给谏元益公女也。是秋，避兵，转徙浦东。二十三，出应本朝学使者檄。二十四，续娶文学蒋公尔辙女。二十六，始赴棘闱。时社事方兴，与海内名流赠编，订车笠盟，扁舟往来于吴山越水之间，交游日进。二十九，重踏省门，受知于溧阳尹江右邱公。随计吏待诏公车，报罢。三十一，丁先府君艰，读礼之暇，掩关力学，纵览群籍。闻他处有异书，辄躬往借，阅毕郑重归之。或买或手抄，必竭吾之力而止。三十四，以云贵荡平，再举会试，下第归。敝庐数椽，傍水负郭，与二三同志，赋诗浮白，襟期豪上，寄意绵邈，常与世迁。三十六，复与弟俞同过昭王之台，为泽州太宰陈公说岩所赏拔，然数年来蹉跎风尘，车殆马烦，意绪已非昔比矣。殿对进呈，太师益都亭孙公拟予卷第一，或以为不可，公偕大司马真定梁公玉立争之力，不可得，置二甲第二。辇上诸公，俱为惋惜，孙公召予相对泣，慰勉有加。予不肖，赋命穷薄，辜负师恩多矣。是夏办事铨曹，仲秋理归棹。未几，名列奏销钱粮案，被黜者几二百人，予亦屏居田里。回思往事，恍如一梦，然蕉鹿之是非，塞马之得丧，于我何有焉。三十九，再娶海虞赵中允士春公女。四十一，慈亲见背。四十六，始举第一子，自是连举六男、四女。旋遭移藩之变，时事纷扰，遂绝意仕进。经史在左，琴尊在右，松风泠然，杂花绕牖，荣瘁不入于胸，妍媸不挂于口，虽有华袞，弗与易矣。性本孤介，不善治生，尤不喜见俗人，杜门

者十日常八九。每晨兴，抱瓮灌园，事毕课诸儿文义，间出酬酢。午后或泛滥陈编，或采纂轶事，或坐或卧，或信手拈小诗，不拘体裁，不计工拙。长夏则晞发行吟，颓然自放。向多四方之交，客有见诣者，虽不能具宾主礼，必典衣贳酒，相与网罗古今，商榷风雅，握手谈心，款款不忍别。以故予愿交天下士，而天下士亦莫予弃也。夫麋鹿之性，高蹈山林，薄柳之姿，久耽邱壑，从此栖神寂寞，绝迹尘埃矣。岁籥侵寻，懒散弥甚，偃仰吐纳，颇修龙□之术。遇良辰佳景，携双童，蹑短屐，登山临水，不废游览。此外嗜好都尽，床头惟存《汉书》数册、《白傅集》一帙，兴到诵《南华经》一二篇，岂敢鄙夷人世，聊用自安其拙云尔。今年已逾甲子，幸齿未尽脱，须鬓白仅数茎，步履犹健。行将去城市，与野夫牧豎为伍，时而挟册，时而荷锄，时而策杖寻僧，时而围棋赌酒。宠辱俱忘，祸患不及，仆之所得于天者，不既多乎？且予自少寡外慕，好静恶喧，畏近权势。孙公、陈公，屡见招，竟未能赴。见人作富贵态，背辄谔谔然汗下。坐此迂僻，为俗所弃，亦因是颇获间旷。惟积习未除，从朝至暮，手未尝释卷。其所撰述，已刻者有《古乐府》二卷，《闵离草》四卷，《闲居稿》三卷，《北渚草》二卷，《林史》一卷，《山游草》二卷。未刻者有《三冈识略》十卷，《续识略》未定卷，《盍簪感逝录》二卷，《安蔬堂诗稿》十卷为一集，聊藉以耗壮志，遣余年。兹者儿辈渐长成，但能读父书，足矣。吾家坟墓，距东郊十馀里，先大父少宰公拮据成之，林本蓊然，烟水环绕。予不肖，厄于命，弗克显扬，顾一生所为，可对衾影，即归老于先人之傍，复何愧哉！又生平不与人为仇，而人往往嫉予，曲加诋毁，终不与较。乃其人辄自毙，每怵然者久之。又少时病危者二，从石梁堕马一，覆舟者一，为马所践者一，可以死而不死，兹之所得，皆余生也。今与家人约：俟诸儿婚配毕，量析薄产，与各母管领，一切琐事，禁勿入我耳。迩来希风向平、天随子、桑□翁诸人，誓为山泽之游。乘兴便发，任其所之，慎勿阻我。愧乏陆贾橐中装遗汝，慢我者亦勿问。身后之计，达人所羞，悉听汝辈。所恨生子差晚，不能早置身方以外，犹□□人寰耳。息壤在彼，其勿违我言。

今人行述，大率溢美，阅之令人愧汗，死而有知，当掩面于地下矣。予偶拈此，还复自笑。念性既疏慵，命更蹇薄，一生鹿鹿，不过如斯，耻作一逾分语。身后即以此为行状，勿烦他人也。赘客手识。

三冈识略卷十补遗华亭董含著

南巡

康熙二十八年己巳正月初九日，皇上南巡狩，至于会稽，蠲江南赋二百二十馀万。所经之地，结彩悬灯，焚香燃烛，以望临幸。士女皆艳妆拥观，自上元至二月尽乃止。我郡彩棚，亦绵亘二十里，游人喧阗，鼓吹之声，彻夜不绝。予作《南巡歌》八首以纪之曰：“鸾舆端月便南巡，又听蠲租诏语新。卤簿不施仙仗近，安排香案拜皇仁。”“晴雪初消兔影翻，绕城箫鼓夜还喧。那知花市春将半，火树星桥胜上

元。”“铁马朱旗耀日昏，锦帆南下疾如奔。苏台隋苑繁华地，争拥珠帘看至尊。”“绣幔如虹簇彩球，千门灯火待宸游。内官竞说吴阊好，遮莫江南第一州。”“凤舞龙飞五百年，六桥花柳最鲜妍。君恩不禁行人看，放鹤河头泊御船。”“越山晴旭照行宫，树色涛声辇路中。庙闪灵旗临禹殿，千秋疏凿一般功。”“长江一道路逶迤，夹岸青杨未吐丝。翠辇暂应留北固，渔人抛网打银鲈。”“祥云缥缈护金舆，探得灵符禹穴书。欲铲吾山填瓠子，汉家功业定谁如。”

设醮祈释

闰三月十一日，华亭教谕举人尚元调，奉檄修葺文庙，见学宫地为营丁侵踞，谋复之，遂按射圃故址，筑墙为界。有盛重润、杨有功者，久占基地，反以擅夺营房讼之杨将军捷。将军性戇，不知尊师之谊，大加谴责。二竖势益张，拥众至明伦堂，鼓噪辱骂。元调怀愤莫诉，遂自缢。台臣河东道御史阮尔询，特疏参之。奉旨：“这所参事情，着杨捷自行查明回奏。”久之，事得寢。后将军晨兴欲出，忽遇元调于寝门，张目嚼齿，厥状甚怒。大惊失色，急召黄冠，建醮七日，以祈释怨。闻者笑之。

负心报元调之死也，既因争黄宫之地，又以学宫之西，向有鬻圃，变家产三百馀金，规为兴复计。有衙蠹张禹辰者，充元调记室，委以心膂。其人贪而无义，工未毕，窃金去。怨恨无所发泄，适遭营兵所辱，遂投缳。张闻惊怖，阖户不敢出。季夏之八日，漏下三鼓，忽闻叩门声甚厉，禹辰父披衣起，秉烛出视，烛忽灭，仿佛见一人，自外突入，急呼家人遍索，寂无所睹。少顷，禹辰卧室闻钹铛声，启视，已自系死矣。二人之殒，相去不过两月耳。吁，孰谓无天道哉！

端午夏至

五月初五日庚子，卯刻夏至。

西邻鹤

西邻有双鹤，主人韦氏，盖将种也，以凡禽遇之，畜于马厩，侣以鸡鹜。予偶过其傍，引吭哀鸣，若将有所诉者，因悲而为之赋曰：“西邻双白鹤，姿性本孤洁。止必依洲渚，飞必集岩穴。潜德师鸾凤，羽族羞并列。朝餐沆瀣兮夕憩云屏，身翔寥廓兮足踏青冥。和鸣振清角，逸翮骑仙灵。胡为堕尘寰，踟躅牛羊间。尔曷不游峻嶒之宫，巢蓬莱之松。卑栖易受侮，嘹唳难为容。刷汝抟风翎，夺汝凌霄踪。主人不我惜，安能万里常相从。”

松郡大荒

七月二十七至二十九，连日暴风，昼夜不息。风之所向无定，禾尽偃。农人大恐。至季秋三日，时久旱，忽天气郁蒸，不云而雷，苗皆枯，木棉豆花，俱于数日内脱落。于是四邻田有全荒者，有及半者，有每亩收止一二斗者。奸佃藉口岁凶，粒米不偿，甚至结党抗拒，官府不之禁。田主束手无策，相顾浩叹而已。乃巡抚洪之杰不以入告，方取到句容县青苗一束，绘“嘉禾图”上献。可发一笑也。里人卢元昌作诗志慨曰：“固穷甘俭食，垂老遇奇荒。百岁人希遇，三吴事可商。探丸竟白日，舐箠到黄堂。时府公被劫。我粟无升斗，开门亦不妨。”

酷吏

粤东举人张庚，来尹青邑，才器褊浅，遇事竟日不能决，下笔判字，往往多误，为胥吏辈所窃笑。性奇酷，不问曲直，大约以鞭扑从事。一人逋粮不完，杖之四十。一人全完，杖如前。其人不屈，叱曰：“汝何完迟？故应同罚也。”其昏暴如此。不一年，参革去。

惨杀之报

北人张君羽明，前守我郡，有能名，忽构大狱，第五卷中载之详矣。未几黜官，居金陵。性豪侈，既被摈，神气沮丧，郁郁不得志。久之卧病，恍若有睹，日夜呼家人围绕。一日，尽遣出。有老仆怪之，穴墙潜窥。见梁上一鬼，厥状颇狰狞，额有两角，手操铁槌，跃而下，奋槌击其背。随有斩头沥血数十百人，蜂拥而入。家人辈持刀急出救，但见目闭手颤，遍体皆青肿，呼号半日而卒。夫天道神明，张君无端惨杀多命，岂能逃冥诛哉？虽报有迟速，不足怪也。

卢先生

卢先生元昌，晚自号半林居士，湛思经术，昼夜不辍，尤精注疏，所评月旦，倾动海内。素善饮酒，喜长啸，每当高会，浮白拊掌，千人辟易。苟非同志者，白眼睨视，不接一谈，时人往往畏而谤之。晚岁著述益富，虽病不废笔墨。窃怪天下妄庸之流，取科第如拾芥，而独于二三魁奇磊落之士，一若故靳之，俾颠仆偃蹇，终身沦没，不获展一日之志。岂天之忌才，果若此哉？或得者未必是，而失者未必非欤？抑丰于名者，必啬于遇欤？悲夫！

赠女

予上元后二日，忽遍体作痛。春尽夏初，延医诊之，或云痛风，或云湿痰，或谓此痿痹之症，筑舍纷纷，讫无定见，因绝药饵。至深秋，疾势渐减。然经年抱病，憔悴支离，莫可名状。幼女才九龄，聪慧殊常儿，已能奉侍汤药，承欢膝下，稍慰闷怀。作诗赠之曰：“宛转怜娇女，晨昏绕膝多。折花簪小髻，扑蝶捧轻罗。笈篋偷

描字，夜开学画蛾。他年同月上，长伴病维摩。”

蛟起

七月二十三、二十四日，越中馀姚、上虞、慈谿等县起蛟，山水骤发，高丈馀，田禾房屋，淹没者甚众。

虫灾

二十四至二十六，连日大风，既而溽暑郁蒸。禾心旋细虫，啮伤者十之七八。木棉为风簸摇，十不存一。我郡复大荒，较上年尤甚，而郡邑吏方申文，报十分全熟。至苏、浙接壤，虫不为害，何松民之独罹此厄乎！余作《匿荒行》以纪之云：“去年旱灾荒过半，粒食虽艰价差贱。今年虫灾不可说，啮断禾心枯欲遍。磨镰垂割苗已空，遮陌连畦白如霰。一石才砉一斗谷，稻茎狼籍根零乱。奸农恣食复窃藏，升斗肯呈田主面。仆夫到乡传宪檄，择日开仓急流电。发言未毕几被缚，结党持刀如拒战。县官勘灾下村落，初亦攒眉减欢晏。岂料移荒反报熟，剜髓敲筋凭判断。虎差索钱朝打门，使气咆哮声未善。伤哉此冤将安诉，百岁老翁几经见？吴阊李地接壤，独怪吾乡罹此变。卖儿换米偿未足，眼见流离死他县。低昂讵敢尤苍穹，积孽或遭天所谴。嗟予薄田止二顷，一粒何从供午膳？甌窵税迫妻孥愁，为此踟躇疏笔砚。谁将此情达至尊，满目疮痍期顾眷。贱子饥寒何足云，瘦来鹤背乘差便。”

十六月产子

海虞有祝生者，妻严氏，怀妊十五月不产，延医诊之。曰：“中有蓄血，结而成痞。”或又曰：“此系蛊疾，非孕也。”投以药，俱不效。又逾月，产一男。然则十四月生者，未足为异也。

宿生讼师

上海庠生曹汇文，挈伴赴江宁应试。于仲秋之七日，骤感寒疾，遍体发热。至十二日，势甚剧，忽有皂衣人追至一处，仰视见文昌及汉寿亭侯列坐殿上，曹俯伏阶下，讯其宿生杀人事，押付地下主者。曹哀恳：读书半生，从无他愆，且此事茫然不知，况老母在堂，年已垂暮，乞终养就罪。不许。又乞暂释，归理家事。关公忽震怒，即有数隶持杖至，鞭背二十，叱曰：“汝罪颇重，冤对相待已久，可自往辨之。”遂驱之出门，见门外一人，自称麦二，云四十年前，曹曾为讼师，陷其一家性命，仇恨切齿，即以银铛系颈，曳之同行。曹长跪祈缓，麦二曰：“昔汝词状中，肯宽我一命否耶？”因忽悟宿事，瞥然惊醒。神气沮丧，急索纸书家报，叮咛同寓友曰：“我此番光景甚恶，恐不及回家矣。烦致家人。”并嘱料理后事。于是扶病解维，口已不能言。舟至黄渡，距家才七十里，连呼腹痛而死。

奇寒

腊月初四日，薄暮雪。翌日，雪愈甚，牛马缩如蝟毛。旬有五日，寒威不解，滴水成坚冰，往来路绝。二十日，河始开。有夜航从浦东归，至鲁家汇，为冰凌撞破舟平，沉死者三十七人。廿八日，又大雪盈尺。居人手足皲瘃，阖户不敢出，冻死于道者，比比而是。据百岁老人云，有生以来所希觐也。

春雪

康熙三十年辛未元旦，积雪未消。初六日雪，人日又雪，穀日雪尤剧。九日，复大雪。十八日漏二下，忽暴风起，雨雪交作。予闭户塞窦，不禁凜栗，因记之曰：“腊雪连春雪，春寒胜腊寒。冻梅舒萼晚，渴鹭啄冰难。税急衣频典，年荒瓮久干。旧游零落尽，何处觅新欢。”

张将军

张大将军旺，性豪爽，长于将略。其为人谦虚下士，和气近人，与予辈握手论交，款款不倦。每得四方佳果异味，必分贻士大夫。不甚识字，而文书往来，皆卧而听之，以意判决，百不失一。亦一异人也。

雷击蜈蚣

孟夏二十四日，薄暮大雷雨。张堰大石地方，有柳树高数丈，劈为二，中有蜈蚣长八九尺，击死于地，已失其首，其色紺碧。或云顶有珠，为龙取去。或言屡出为害，故被击。按《南越志》载，蜈蚣长百步，头如车箱，剖之得肉一百二十斤。

龟鉴

胡文定公曰：“人家最不要事事足意，得常有些不足处便好。若事事足意，便有些不好事出来。”予观今日宦途通显诸公，或末路不终，或中道蹉跌，文定此言，可谓千古龟鉴。

龙阵

六月初一日，淮安府城午后陡起暴风，天地晦冥。有龙自乔家圈起，至新城下关晏公庙东去，拖倒房屋一千馀间，居民压死者无数。

佘山起蛟

二十四日，余山塔后地中有声如雷，自辰至未，忽大雨倾注，平地水高三尺，有蛟两角，裂地而出。又猛将庙地方，银杏一株，大数围，龙过其上，连根拔去，根大如屋，有卵二斗许，形如鹅子，堆积其下，不知何物。

肉身变牛

七月初七日，娄邑秦望山之阳，有居民金禹亭者，性凶恶，喜讼，老而弥甚。是日忽谓其子曰：“我孽报将至。明晨便不食矣。今日佳辰，可速治盛馔以飨吾。”子闻之，骇不敢问，果多置酒肴，以燕其父。饮毕，各归寝。夜将半，大风绕室，良久，闻启户声。急吹火视之，则床已空矣，于是阖家起觅，乃见父在菜园中，额上生二肉角，长二寸许，眼横口哆，宛然一老牯也，但体无毛耳。两手已变牛蹄，后二足尚如故，与之食不食，惟伏地噉草，噉毕，犹能人立。远近观者踵相接，或呼其名，垂泪不止。吾闻作恶之人，有死后堕畜趣者，生前现报，古籍中间载一二，然未敢深信，不意真有其事也。第怪人世巨憨，不一而足，往往席丰享厚，乃一介小人，独受斯报，岂报之于地下者较甚人间欤？抑或借此惩一以警百欤？吁，可畏也已。或云，名史吾白，未知孰是。

海舟覆没

闰七月。粤东洋船至浙江，顺风扬帆，不数日便达，取利甚厚。时有海商，联四十余舟，行至中途，暴风忽发，海天昏黑，怒涛如山，橹悉摧坏，长年力不能支，三十余舟俱覆没，死者几二千人。夫泛海获利虽倍，然乘危冒险，以父母付畀之躯而填蛟龙不测之窟，利于何有乎？顾愚民犹往来如鹜，而富家巨室，亦不免随众为之，我所不解也。

圣谕

今上皇帝豁达大度，王路荡平，而辇上君子，间有怀报复，致互相讦者。于是刁风四起，动以绅宦为辞，揭讼纷纭，冠履倒置，士大夫皆重足而立。上知之，遂传谕云：“从来致治之道，在正人心。人心偏私，则诈伪日生，习俗滋敝。朕崇尚德教，期与中外臣民共适于宽大和平，凡大小诸臣素经拔擢，咸思恩礼下逮，曲全始终。即或罹咎罢斥，仍令各安田里，乐业遂生。乃近见内外各官，间有彼此倾轧，党同伐异，私怨相寻，牵连报复。或代人纠参，阴为主使，业已解职，仍复推求不止，株连逮于子弟，颠覆及于身家。甚且市井奸民，亦得借端凌侮，灭纪伤化，不可胜言。朕总揽几务三十年，情态最悉。倘因仍陋习，益致蔓延，殊非朝廷俯体臣工、保全爱惜之意。夫谗媚嫉之害，历代皆有，而明季为甚。公家之事，置若罔闻，树党诬陷，祸延国祚，深切痛恨。自今以往，内外大小诸臣，尽蠲私愤，共矢公忠，岂独国事有裨，亦身名俱泰。倘执迷不悟，复蹈前非，朕将穷极根株，悉坐以交结朋党之罪。”大哉王言，自有此谕，而在朝在籍，庶得安枕而寝矣。

修海

松郡去海不百里，每秋夏之交，颶发海溢，沿海居民，屡遭漂没。旧所筑捍海塘，皆垒土为之，势不能与海争，而碱水冲入，田禾多淹死者。明季谷城方相国岳贡守吾郡，谓必易以石，庶可为久长计，毅然以身任之。浹岁建石塘二百八十九丈有奇。后续建石塘二百六十三丈有奇，官给赍餽，士民乐输，计费料价工食四万馀两。木深工坚，石齿牝合，霖潦无虞，至于今，享其成者已逾一甲子矣。近海潮冲激，石塘渐圯，碱流复侵内地。官府商所以御之者，于是私派康熙二十九年每亩六文，私派三十年每亩二文。有华亭尹某，设柜苛敛，虎差咆哮，坐逼银钱。既集，府县朋分，胥役土蠹，互相侵没，所费不过千馀金，而浮派者已十馀倍矣。予作《筑塘谣》曰：“朝筑塘，暮筑塘。我从塘上行，天水何茫茫。忆昔采石东海东，蜿蜒万丈浮长虹。谷城相君旧作邦，手撑半壁排鸿濛。只今已隔七十载，故垒摧颓迹犹在。如山雪浪恣奔腾，窃恐桑田变成海。县官坐公署，慨然议重修。按亩派金钱，急公谁敢尤。令严敛逾万，所费才及千。其馀势尚缓，剜肉情堪怜。官府歌呼胥隶贺，分得官钱作私课。摩牙吮血意未休，炎荒那管人饥饿。天吴象罔何鸱张，年年估价计亦良。簿书开销报功速，粉饰聊遮众人目。国事全凭肉食谋，主恩民力两难酬。君不见，微禽尚矢填波愿，邑女空怀添室忧。”

元旦日食

康熙三十一年壬申元旦，日有食之。午后雨，黄气四塞。

蠲漕

上谕户部：“朕抚御区宇以来，额徵钱粮，屡次蠲豁。惟岁运粮米，时切轸念。今除河南省明岁免徵外，其湖广、江西、浙江、江苏、安徽、山东，着自三十一年始，以次蠲免一年，以纾民力。”上念切民生，一至于此，真旷代所希覩也。

野史氏曰：今上登极以来，蠲税之诏屡下，甚至额徵地丁、岁运粮米，有全蠲者。呜呼，我皇上之轸息民隐，何其至也！故能膏泽旁流，仁风远播。天变地震，不足为我虞；封豕长蛇，不足为我害。群黎望幸，薄海归心。《书》曰：“元后作民父母。”《易》曰：“含弘光大，品物咸亨。”国家亿兆万年无疆之业，俱肇于此矣。

雄鸡生卵

二月廿九日，提标左营韦元鼎廨中，雄鸡连生二卵。

羊知感恩

四月，金华武康山中，有巨羊与虎斗，一日夜不分胜负。久之，羊力不能支，走避民舍，虎亦舍之去。地方以羊体大过牛，目所不经见，缚送县。县官念其力能抗虎，当有灵异，且颈间悬一铜牌，字模糊不可辨，想已逾千年，特命释之。羊至大门，恋恋不肯行，偃卧阶下，众逐之。次早，又至。又次日，复至。三日后乃长往，盖似感再生之恩，不忍遽去也。今之人往往有受恩反噬者，有愧此羊多矣。

圣教序

前明一边帅，以《圣教序》进之福清叶相君。相君坚却之。时吾郡有司务吕君者，从旁怂恿，以为墨林韵事，非同簋。福清因收之，即移赠司务，吕氏奉为世珍。俞氏以藏本索题，与昔所见无异，不审即是此本否也。

幼慧

越西薛生者，世业儒，生一子，四岁能识字，九龄通《易》、《诗》、《书》三经，间为小诗，托笔即成。其父母疑为鬼物所凭，不甚喜之。未几，殇于痘。昔项橐七龄，为孔子师。《法华经》八岁龙女，南方作佛，便成正觉。盖智慧所禀，初不限老少也。

三秦大荒

秦中自去秋大饥，至是夏，麦复不实，人相食，草根木皮俱尽，石米价腾至数两。西安、凤翔尤甚。上忧之，亟命辇金拯济，并开轸恤事例，省中大兵，发往各边就食。三秦地方广阔，民气劲疾，非袖手待毙者，不可不早为之所也。

鄂王灵应

八月，上海县向有岳忠武祠，不知何年所建。神于地方无专辖，祭飨寥落，栋宇倾圯。邑绅张君锡悻，素好事，屡过祠前，不甚加敬。忽一日，撤去神像，改塑痘神。亲友力谏止之，不听。同邑有滕生世祯，与张狎，夜半梦至一官署，如王侯邸第，旁有人指示之曰：“此岳王庙也。”中门严扃，滕立右角门，遥见张立左角门。见鬼判二，自内出，面一白一黔，相谓曰：“此二人俱获罪，限十日内令颈后各生一疽。”白面者辞气颇和，曰：“尚可解释否？”黔者勃然怒曰：“罪重不可宥也。”乃各押一人去。不数武，遇一白须老翁，语滕生：“汝所犯甚轻。”将手中所执拂拂其颈，曰：“去去！可无患矣。”生惕然而醒，彷徨悚惧。适与张君会饮，以梦告之。大恚曰：“梦寐中事，安足信？尔乃妄言谤吾！”连以大白浮之，且云：“不验，当受重罚！”生不敢复言而退。是夕，张君仿佛见绛袍玉带贵人坐堂上，从者甚众，呼张名而叱之曰：“汝何人斯？而敢擅毁吾像！罪当死。”随有一甲士持刀砍之。叩头乞哀，似梦非梦，惊寤，汗流浹背，披衣起，遍话之于家人，神

色沮丧。日午，即觉颈后微痒。诘朝，似蜂螫者，急延医治之。曰：“此对口疽也，虽初起而毒气蔓延，势已不可遏矣。”久之，疮口渐大，肩背如负重石，痛楚叫号，莫可名状，诸医相顾束手。于是大发金钱，修葺庙宇，迎还神像。家人邀巫师，具盛筵，日夜匍匐叩祷，扰扰者数月。未几，咽喉溃烂，颈项不绝如线，逾年竟死焉。夫自古迄今，忠义如王者，能有几人？上自君相，下至贩夫贩妇，莫不敬而仰之。张君读书仕宦，乃恣行无忌，其受冥责，亦自取之也。偶阅《宋史》，有罗汝楫者，附秦桧，诬陷忠武，罢其枢筦。后其子愿如鄂州，不敢入王庙，然自念此地有治迹，姑往祀之。甫拜，遽卒于像前。其忠烈之气，凛凛可畏如此。

半截人

九月，华亭县西关升平巷民家产一子，上半截具人形，而头稍尖，尻有犬尾，两足如鸡距。

江上老梅

江上有韩氏园者，大数十亩，亭榭幽深，泉石窈窕，颇擅胜概。今虽渐就荒芜，而虬松苍桧，犹有存者。其最异者，则有老梅六七百株，夭矫离奇，横斜古怪，或根干盘曲，或孤枝挺秀，莫不撑空蔽日，下可坐二十余人，望之奇形诡状，惊心骇目，真大江以南所希觐者。闻主人系武夫，不审子孙何以能守而勿失？想当有鬼神为之呵护也。余与松陵徐君，冒寒往访，坐卧其下，几不忍别，因题其壁云：“韩家池馆何空阔，石磴崢嶸树缪结。荔墙松径半摧颓，廿亩寒梅犹绕列。撑空蜿蜒几百株，阅岁荒唐傲霜雪。疏枝突兀山鬼骞，瘦干谿雷斧裂。侧出疑拖老蛟尾，凝脂似染妖螭血。高者森森耸孤秀，低处横行盘屈折。或偃或立那能状，皮脱苍鳞肌锈铁。遥想开时万玉妃，幽香迥与凡花别。我今重到坐其下，夭矫腾拏惊吐舌。天公巧植幻诡怪，一一姿标擅奇绝。藐姑仙人作守护，纵有精灵敢偷窃。奚须远探罗浮春，日日来看休暂辍。”

黄沙

二月十八日酉刻，天雨黄沙，濛濛如雾，窗户几席，以及密室之内，重茵复幕，无不堆积。逾两日始止。

日晕

六月初五日午刻，日晕，内作青色，外有赤黄晕二重，至申始灭。据《观象玩占》曰：“日有赤晕两重，主旱。”又曰：“赤晕再重，其地蝗旱多盗。黄晕再重，岁灾兵起。青晕再重，谷贵。”时久旱，东南风不息，民情皇皇，天变屡见。尝阅释典，曰阎浮提中，除大海水，中间大小国不可胜数，一国人同感恶缘，一切不祥境

界，或见二日，或见两月，乃至晕适佩、慧孛星流、负耳虹霓，种种恶相，但见此国，彼国众生，不闻不见。岂上天悬象，果有见、有不见耶？抑我乡独感恶缘，故再三垂示耶？世尊之说，或不诬也。

鸡四足

华亭尹署，育一雏，四足，后二足联接尾间，不能立。有周生馆于其家，亲见之。

闺中自缢

八月，江南秋闱首场，有岁字六十一号生，系上江人，年方强仕，气貌雄伟。既入号房，与邻号生剧谈，久而不倦。丙夜，忽寂然。既而闻涕泣声，又闻跳掷声。亟起视之，则已解带自缢死矣。

鼯精

九月初二日昏刻，忽风雨暴至，有物从东南来。东关居民，阖户潜窥，睹黑气亘天，中一物蜿蜒，尾垂及地，两目大如箕，火光四射，一路拖倒殿宇庐舍，不计其数。榆柳大数围，俱从空掉下。有夜航方行，吸至高岸，老幼压溺死者甚众。或言乃妖鼯为怪，鼯驾风前行，有金甲神骑马执戈，率兵千馀，从后逐之，旌旗蔽空，向西北而去。

冥犯

春申浦有渡，曰巨漕，官置渡船，以便行旅往来，其来已久。有农民十九人问渡，已解缆，后有二人续至。岸傍一小儿，牵其衣谓曰：“舟中想系犯罪之人，皆锁颈铐手，尔可勿往。”二人谓其戏言，且见在舟者半属相识，遂叱小儿去，奋身登舟。至中流，天气晴和，舟忽自覆，十九人俱死，惟二人获免。

杀夫

有一民家妇，与邻人奸，情好甚密。其夫久客，一夕归。醉之以酒，与奸夫持斧砍杀，复碎剝其骨肉，纳二大瓮中，将乘黑夜抛诸河。为捕人所觉，执送官。时奸夫已逸，命将此妇去衣服，立时杖死。惜刑未蔽厥辜耳。此又地方一异事也。

犬怪

左邻畜一牝犬，一乳四犬，中一犬三足，一犬头有两角。

三冈续识略小引

予年十八，喜弄铅槧，顾弱龄多病，父母怜之，禁勿入书馆。每遇奇文异说，夜半起，帐中挑灯，以方寸纸记之。积久，纵横败簏中，因次第汇为《识略》。私念此事无穷，此身有限，获成十卷，幸齿登六十八，老矣可以止矣，而宿习所缠，犹未能免。今附录数十则，拟为《续识》，终以来日苦短，目眩手颤，不暇多载。俯仰时序，流连景光，聊用自怡而已。甲戌暮春，赘客识。

三冈续识略卷上

遂园禊饮

甲戌上巳，玉峰徐尚书乾学、中允秉义、盛侍御符升，续修禊事于遂园。执简而招者共十五人，赴者十二人，其三人期而未至，予其一也。遂园为尚书别业，亭池弘广，竹木深秀，当天气清和，诸贤列坐其间，清醇在壶，嘉肴载御，管弦迭奏，舞袖双回。相与登山临水，剪烛赋诗，致足乐也。予以儿病，未获追随杖履，一观盛事，何遇之厄哉！先以二诗奉寄云：“诸公高会寄耆英，愧我新从谷口耕。佳节即忘元巳约，不才偏系故人情。林泉寂寞青云隔，岁月栖迟白发生。闻道登临能作赋，挥毫应许野夫赓。”“暂卷丝纶狎钓竿，春来游胜共追欢。尊前击钵催银管，树底行厨捧玉槃。冠盖东山双履健，莺花南国袷衣寒。幔亭遥羨神仙会，咫尺风尘到更难。”尚书拟登高节再订良晤，而首秋已歌薤露之什矣。惜哉！

产芝

予书斋之东，向植蜡梅一株，老干蟠屈，枝叶四映。忽于七月，根产一芝。初出土，仅如钱。不数日，大半尺许，其色正黄，亭亭独峙。此物不常有，郡人士来观者踵相接。顷之，一小婢偷采梅萼，蹴之而倒，折之供胆瓶，劲质如故也。按诸书所种载，是名金芝，乃瑞草也。和气感神则芝草生，予有何德，乃致斯异乎？尝见唐杜荀鹤庭生一芝，明年及第，号为“科名草”。予老矣，无能为矣，不知诸儿能效荀鹤之事否耶？口占二绝以纪之云：“灵芝宫殿锁仙山，尘世何缘觅九还。应是群真怜雪鬓，一株移赠到人间。”“玉树乌衣敢自夸，灵根三秀异凡葩。庭前已长科名草，莫遣文章让杜家。”

生孙

十二月二十九日，第一孙生，时予年已七十矣。三朝浣儿，为汤饼会，适晋陵顾太守岱在座，好谈星命，取生辰细推，叹赏曰：“此君家千里驹也，二十年后必为伟器！”恨我老不及见耳。予年近五十无子，颇有以伯道相讥者，今乃抱孙焉，何其幸乎！醉后口占自慰云：“七十生孙未是迟，新条伫见拂云时。魏公尚有传家笏，留取他年付阿芝。”是秋庭产芝，故小名芝郎。

海溢

丙子六月初一日，大风，暴雨如注。时方忧旱，顷刻沟渠皆溢，欢呼载道。二更馀，忽海啸，飓风复作，潮挟风威，势汹涌，冲入沿海一带地方，几数百里。宝山纵亘六里，横亘十八里，水高于城丈许。嘉定、崇明、吴松、川沙、柘林八九团等处，漂没海塘五千丈，灶户一万八千，淹死者共十馀万人。黑夜惊涛猝至，居人不复

相顾，奔窜无路。至天明水退，而积尸如山，惨不忍言。按松郡志，万历十七年八月，海潮溢过捍海塘，漂没人畜，不计其数。又十九年七月，上海海溢，及百姓，漂没庐舍人畜无算，城门昼闭。盖百余年无此变矣。

痘神

西夷变乱，贼锋颇锐，上下诏亲征，先命大将军统众十馀万为前驱，旌旗蔽空，车从塞路。其地去京师辽远，苦于无水，或担负，或掘土饮其汁，食糗噉肉，士卒气愈壮。上一夕假寐，忽睹一神，身据甲冑，鞠躬拜跪曰：“帝此行，必大捷，当鼓行而前矣。”俄见云旂露旆，横戈跃马者，充斥前后，不计其数。上问曰：“尔何神？”曰：“臣痘神也，特来护跸。”拥众去。上醒，甚喜，果大败逆兵，因思神佑，遂加敕封。于是凡痘神庙俱行改建，塑冕旒像，丹□一新。

风变

二十三日，天未明，大风忽发，暴雨倾注。近午势愈甚，半空中赤光烁灼，声若霹雳，砰簸荡，排墙倒屋，大木皆连根拔出，檐瓦飞空，状类鸟雀，居人走避无所。抵暮，水没过膝，天气昏黑，势如混沌，少长辟集大哭。至夜半，势稍缓。官署民房，雕楼杰阁，半被摧折，民压死者，比比而是。东关外数里，有大树，据郡志云，阅岁已千年，大数十围，每岁易一花，变怪莫测，土人筑大树庵以奉香火，至是亦被吹折。时东北风急，敝庐数椽，适当其冲，倒塌尤甚。耳中夜但闻崩裂之声，竟夕不卧。东方渐明，见四壁俱无，举家徬徨无措，真异变也。予薄田二顷，连遭荒歉，今木棉、豆花，尽行脱落，何其厄乎！风潮每岁有之，此变则几至陆沉，百岁老人，目所未睹。惊魂稍定，聊赋二诗以纪之曰：“天意真难料，宽租负主恩。蠲诏屡下，连遭岁荒。一廛何处受，四壁总无存。骤雨千江决，狂飚万马奔。妻孥莫惊涕，头在手还扞。”“千里同灾难，惊传压死多。苍髯坠隔径，庭前孤松，树来六十余年，从空拔出。翁仲卧前坡。先少宰公墓上翁仲，倒卧数十步外。混沌疑重凿，怀襄恐未过。残骸何处避，拚共葬江波。”

张公清严

丁丑。张公鹏翮，庚戌进士，为浙江抚军。上以其有清望，擢江南督学，盖特简也。接郡任。时适当科试，奔竞者纷纷，公信心直行，矢公矢慎，终其任无一人私者，虽要路不敢以一札仰干。即有一二京师来函，亦逡巡踟躅，不暇投而去。后士子思之不置，皆以为能踵郡任云。

前任邵公，字嗣尧，清廉严正。岁试，选拔孤寒力学者居多。壬子谒见，宛如家人父子，谆谆劝谕，各赐《聊存草》、《易图》二本。至澄江，卒于公署。士民思之，各输金，准造刹。设像在大寺东首，至今瞻拜者歔歔流涕焉。

火药

浙江火药局军人碾石，焰发，烧死匠役数十名，延及文庙门庑，并毁火药八万八千六百餘斤。时防卫甚严，莫解其故。因忆先祖巡按顺天，蓟州军戴光，带家丁数人，同领火药，药凝结成块，以铁瓢挖之，用力过猛，搏击生火，盛药十三缸，同时震发，光等皆死。典守者不可不知。

髯长拂地

从来髯最长者，或称过腹，或垂至膝，至矣。吾乡有沈生沧雨者，眇一目，髯长丈许，自胸以下，连绾三大结，而拂地者尚尺餘，总而计之，殆逾一身有半矣，真世所罕见。其人小有才，然厥状狰狞，淫污无耻。是冬，为按君杖，折股而死。相法：美髯者主兵死。亦一验也。

紫竹庵发冢

相传松郡北郭，向系郊外埋骨之地。张士诚据吴日，嫌地仄，筑入城，至今坟墓垒垒相望。敝庐东数武，有紫竹庵，乃尼僧所居。屋后古冢，岁久露砖，上覆以石，庵中老尼，性贪悍，疑有伏藏，闭门发冢。掘数日，始启，见内立一碑，乃宋季某尚书之墓也。珍玩充斥，便房贮玉带一围，尼悉盗取，抛骨后河。棺坚固如新，并□为器，随复以砖封之。比邻有觉者，报知县官。尼挟赀而遁，竟未得尚书姓名。予作诗吊之曰：“白杨雨，苍苔烟。何人冢，古道边。石烂斑，带碧色。碑上铭，不能识。昨见墓门闭，今见墓门开。玉衣灰飞扬，日暮牛羊来。寂寂春风吹野马，离宫复道何为者。沙邱台畔新鬼啼，铜雀西陵无片瓦。君不见，漳水上，骊山下。

四书五经欠字

老儒张元威，博学饱经史，以砚田为业。据云，《论语》无“此”字，《四书五经》无“真”字。

三字名字

古以三字为名者，战国时有董之繁青，见《升庵外集》。三字为字者，《史记》有程伯休父，又张天锡字公纯嘏，刘敞字中原父。此外不多见。

好货为缙绅一蔽

《五杂俎》曰：“缙绅好货，亦是一蔽。近有一绅，巧取善藏，坐卧起居，言动食息，无往非阿堵也。一日病革，强起阅库藏，白镪满前，抚摩不忍释，呼其子属曰

：我死，幸内十火锭于棺中！子性吝，对以金入木不刊，且启发议之端，不若以楮代之。其人凝泪叹息，不能言而逝。”噫，亦可怜矣！

赠歌童【如皋人，名灵郎。】

阳羨陈其年维崧，馆于冒氏，与一歌童狎。童将合卺，赋《贺新郎》一阕赠之曰：“小酌醪醑酿，喜今朝钗光簪影，灯前漾。隔著屏风喧笑语，报道雀翘初上。又俏把，檀奴偷相。扑朔雌雄浑不辨，但临风私取弓鞋量。送尔去，揭鸳帐。六年孤馆相依傍。最难忘，红蕤枕畔，泪花轻。了尔一生花烛事，宛转妇随夫唱。努力做，藁砧模样。只我罗衾浑似铁，拥桃笙难得纱窗亮。休为我，再惆怅。”见者绝倒。

产异

柘林有金姓者，妻产一子，四手四足，目生额间，两耳俱在额上。

寿数一定

己丑进士成君亮，予座主青坛相国之冢嗣，文穆公之文孙也。弱冠时，梦文穆语之曰：“汝无虑通籍，而享龄不永，年三十，某月某日当卒。可谨识之。”后果中甲科。期将迫，先遣二妾，并令夫人别嫁。不可，强之始去。于是散家财，力行善事。一夕，又梦文穆，曰：“汝美行日积，上帝怜汝，赐一子，更延十年，至四十某月某日当卒，今幸无事矣。”届期果无恙。相国乃召还夫人，曰：“前者恐挂汝意，筑别馆处之。彼贞妇也，安肯醮乎？”奈未有嗣，复谋纳宠。夫人为买二妾，择日舆至家。定情之夕，秉烛细视，即前所遗之妾也。二妾不忍去，夫人携之同居。一家相对，宛如再生。都人士说为异事，竟为诗歌以记之。后举一子。至四十，果以某月某日，猝患心痛而卒。

狱中诗

是狱也，我郡单君恂、常州蒋君曜，及僧豁堂俱下狱，后惟三人获免。恂有才名，被系时有诗寄所知云：“春晚园林笋筑肥，阖闾城外噤双扉。鹧鸪掠絮喃喃语，蝴蝶粘花款款飞。点易秣陵三月暮，栽尝燕市十年稀。故人居近罗含宅，庭压松醪待客归。”

妖僧

陕西同州澄城县有妖僧雪野，聚众倡乱，捕送官。将到，随身有黑云一片，覆盖县庭，火用利目，冰雹乱下，观者皆走避。县尹命取黑狗一、斑牛一，杂以秽物，将血遍涂之，墨云随散。遂伏法。

相思鸟

相思鸟产越山中，飞必成双。弋人罗得其一，则其二自至。宋莱阳持归见贻，一处笼中，一置笼外，百计驱之，终不去，属余作歌曰：“吴兴城东山缭绕，中有灵禽羽衣小。翠衿僂捷落岩前，红嘴玲珑翔树杪。人言此鸟名相思，虞人弋得雄与雌。削成柘弹休轻打，放入金笼好护持。携归试挂帘钉下，一去一留长不舍。高逐仍依翡翠屏，低飞只傍鸳鸯瓦。相思原自别离生，孤鸾寡鹄空悲鸣。经年饮啄不暂弃，对此偏增伉俪情。人情那得常相守，夕趋路傍朝聚首。纷纷眼底变爱憎，谁肯将新更怜旧。叮咛莫学买臣妻，好向韩凭墓上啼。照影不惭鱼比目，回头休妒燕双栖。”宋为之击节。

晚达

巩昌杨君纯臣，与王修撰豫嘉之相同举于乡。至顺治辛丑，又与修撰同捷南宫，年七十五。

破婚削籍

海盐举人郑旦复，端简公孙也。将赴礼闱，乏路资。适邑中一富人，以女许贫士，已委命矣，复改，许其以百金贿。郑乞邑令批照，即日成婚。旦复梦其祖责之曰：“汝作事大谬，本应登第，今拆人婚姻，上帝削汝禄籍，不惟不能上进，且客死矣。”问：“何从知之？”曰：“贫士祖宗，为此事日来相争，我理屈而退，故知之。”郑惊寤，急访女，欲还初聘者，而已无及。随呼贫士，以前银给之，使别娶，深自愧悔。及计偕，被斥，呕血数升。买舟言旋，不数程，一痛而卒。

梦天榜

大名黄之鼎，与交河王琯同赴公车。一夕，谓之鼎曰：“夜梦天榜，会元姓黄，其名模糊，不暇详视，可预为子贺矣！”及榜发，之鼎仅登榜魁，而元乃崇明黄君仍绪。

不云而雷

十八日午刻，姑苏城外不云而雷，击碎金相国之俊第四公子居上鹄首，细如栗米。

火鸡

荷兰国噶吧王油，具本进贡方物。中有琥珀，重五斤八两。又有火鸡二，能食火，投炽炭于地，如啄粟麦。按《十洲记》，有火鼠、火雀。《西域记》：富浪有火鸟

，食火炭。《原化记》曰：蜗牛，兽也。如火而食火。又暹罗国贡六足龟二。

宝珠

六月，泖滨民龚叟夜登厕，见沙际有白光，高丈馀，达曙始灭。明夜，复然。因识其处，于丛荻中获一蚌，巨如箕，负归剖之，得一珠，大如龙眼，光彩莹澈，夜置匣中，有白气腾上数尺。总戎梁公，以百金易之。

九峰主人

吾乡峰泖之胜，传播遐迩。自陈徵君没后，烟霞寂寞，四方游屐，无过而问者。予同年诸进士嗣郢，好奇士也，筑室九峰间，自号九峰主人。创建园亭池馆，蜿蜒十馀里，延致方外，俾职掌其中，鼎彝书画，灿然半陈。每逢佳节，则飞笺召客，胜流云集。尤爱岑阆，布衣芒屨，啸歌自得，其视富贵人，真不翅腐鼠也。又性好道，茹斋戒杀，力为善事。还来士大夫大抵口谈名教，实与行违，若诸君者，岂易得哉。后自知死期，临终书遗嘱数纸，端坐而逝，远近异之。

穿井

洛中人家穿井，忽黑雾蓊郁，见有物蜿蜒，似蛟而蛇尾，似蛇而顶有两肉角，长三尺许，腾空而去，竟不知何物。

天狱

元人《真腊风土记》云：真腊地广七千里，其国富庶，商贾往来，谓之“富贵真腊。”土人为盗，不肯招承，迹涉疑似者，取铁铛熬油极热，令置手其内，如果盗物，顷刻糜烂，否则皮肉如故。又两家争讼，或挟诬设诈，王宫对岸有小石塔十二座，令各坐一塔，互相堤防，三四日内，理屈者必大病，理直者无恙。百不爽一，故号“天狱”。今中国百姓造孽者多，官府明断者少，刑章冤滥，是非混淆，安得移此风于中土，一剖曲直哉。

三冈续识略卷下

拾簪

东关外有季叟者，家甚贫，喜为善事。岁暮无聊，遍从亲朋丐贷，得白金二两四钱，拟为卒岁之资。归途忽遇一故人，为营债所迫，将赴水自沉。叟力为解劝，而探囊以赠。归语其故，妻孥交谪，叟暂出避之。薄暮，行至紫霞宫，见道旁有光灿然，拾视乃一遗簪也。金甚赤，货之，适值二两四钱，与前数无异。盖此叟一念之善，为天所佑，似以此偿之。然则为善亦何损哉。

遇九逢灾

今人逢九，云是年必有灾，俗传已久，愚夫愚妇信之。予窃笑此说，不知原本于《灵枢》曰：凡人最患年忌，由九而推之，年忌相加，则感之而病作。故人方七岁，是阳之少也，再加九岁为十六，再加九岁为二十五，再加九岁乃三十四，再加九岁乃四十三，再加九岁乃五十二，再加九岁乃六十一。九为老阳，阳极必变，此皆人生之大忌，勿为奸淫之事，犹可自勉云。但以七岁为始，非若今之人，竟以九积算耳。

卫公清修

曲沃太师卫公文锡，清修雅操，冠绝百僚，好贤下士，延访不倦。予会榜，公为主司，殿对后偕同年数辈往访，见其寓馆湫隘卑湿，仅可容膝。少顷公出，衣佩如儒生，谈及鄙巷，极口奖借。同坐者共六七人，公不顾也。后病归，朝论必欲起公，复晋元辅，终始一节。及致政，泽州说岩陈公有诗送之曰：“复起明光蹑旧踪，连章请急未从容。重来父老看司马，此去乾坤有卧龙。梦绕细旃闻夜雨，春回长乐远疏钟。知公未稳江湖兴，民隐还须达九重。”

淫报

宿松令朱维高，江南人。内帘取中一卷，明晨拟首荐。夜梦寿亭关公，谓曰：“某人不可中。”因手书一“淫”字。叩其详，曰：“奸继母女，已干天谴矣。”次日忘之，以卷呈主司。初加称赏，忽以笔抹“险阻”二字。朱坚请曰：“中卷有此字者甚多，似不应弃。”即令洗去，及洗而墨迹透数层矣。竟被摈。

濮孝廉

濮孝廉鳌，李人。为诸生，甚有声，密友李生，一夕梦鳌父来访，揖生曰：“吾子久宜荐，因父母歿四十余年，风雨暴露，殊恨恨。诉之冥司，黜去其名。今科，不

肖子又应列三十一名矣。”生曰：“贤嗣之不葬亲，以贫故也。翁当默助，奈何反致恨乎？”其父颔之。生以梦语醵，醵诣柩前设誓。是秋果捷，名次无异。既屡促之，醵不应。至是恫恍见父。偶往武林，夜半，舟无故自覆。岸上人赴救，见一老叟，曳船使沉。因槌破船底，引出之。仆从十馀皆无恙，而醵死矣。孝廉生平无大过，止以不葬亲，遂获斯谴。吁，可畏哉！

药名闺情诗

长夏无事，友人有以药名索和者，戏拈三诗，附记于此：“故纸南窗曙色通，葳蕤烟树影濛濛。未甘流落同瓜蒂，拚寄生涯逐断蓬。翠竹沥浪堪当茗，紫兰煎浴要防风。鬓蝉退后心情减，消尽腰肢半夏中。”“飘零红紫草痕荒，五味嫌尝病未苏。比翼鸟分难独活，石莲根断怕全枯。空房胆小频呼子，客馆书成早寄奴。拟织锦缣传远志，回文藁本至今无。”“碧纱人静掩香闺，会面从来又独栖。蜀地路遥情结梗，前湖风急影凄迷。针头熊胆连心苦，机上流黄背母啼。锦字未成空白纸，回乡音仗雁书题。末首为药名别音。”

端午夏至

旧谚：“夏至难逢端午日，百年难遇岁朝春。”言节气相值之难，非以为瑞也。至日端午，岁庚戌，予始一遇。至元旦立春，按崇祯元年朔立春，适际改元，咸以为天人一新，千载罕遇，真太平之兆。未几，寇盗纵横，祸乱四起。古语之不足信如此。

洞庭蜃气

洞庭五月，君山侧蜃气见，楼阁旌旗，人物牛马，无一不备。食顷乃散。蜃气惟海有之，谓之海市，今见湖中，此不可解。

白鸦

江南六合县获白鸦一对，贡于京师。

吴翰林

毗陵吴翰林本立，为孝廉时，贫甚，馆于吴大参家。为一狐所迷，每晚必至，体为之惫，自恨将来必无功名之望。是科，将赴春闱。狐曰：“今晚一会，缘已尽，不敢复至矣。”挥泪而去。是年吴登第。江南无狐，或系他魅。

屠牛报

泰和县王公选，以屠牛为业。凡盗牛者牵至其家，酬以薄价，岁以为常，所杀无算。后为人出首，县尹颞孙君重惩枷示。忽谓众云：“前夜将半，梦一妇人，披发向我诉曰：‘怀胎在身，乞缓一死。’及觉，有人叩门，牵一牛至。我说：‘夜梦妇人，想就是你了！’这孽畜双膝跪下，两眼垂泪，被我一刀砍剖，腹中果有一犊。今日行刑，必此牛之报也。”言讫瞑目，呼腹痛，叫号如牛，半日而死。

捕鱼报

松陵傍湖居民，聚而居者数千家，大率以渔为业。庭中掘深池，捕鱼畜之，取利最厚。闻水初至时，深池中忽见水怪腾跳，或如兽形，或作魍魉状，大鱼皆跃出，小鱼继之，如雪片飞空，霜刃乱掷。波浪随之而兴，此方罹祸尤惨。说者以为好杀之报云。

濮阳王墓

娄县小蒸西五六里，相传为汉濮阳王墓。墓傍隙地半亩，土人黑夜每见上有光怪，故弃而不治。九月初，有老叟欲除积秽，始举锄，见青气自下腾上，去土三尺，获古钱万馀。其制不一，以铁条贯之，文曰“五铢”，曰“半两”，曰“泉货”。尝考秦钱文曰“半两”，汉行“五铢”，王莽作钱布名曰“宝货”，想即濮阳所藏，计二千馀年矣。

戏赠聋者

族兄众孚，少年喜结纳，雅多兴趣。今老矣，且重听矣，索拙句为赠：“终朝兀坐懒逢迎，有酒还须社日倾。席上麈挥惟见笑，窗前叶落不闻声。虚传磁石能通窍，漫采菖蒲为益精。入仕尚堪充著作，世间仍有杜台卿。”

淫奔

毗陵庄氏，巨室女也，适同邑季生，性不慧。逾年，生一子。入都援纳，女与家奴三人奸。一婢甚美，亦有风情，每夜张灯联榻，达曙不息。恐有觉者，于是挂帆而遁。后避迹至松郡。三奴皆长大伟岸，二人侍寝，则一人与婢狎。邻人疑之，未发。月馀，其家移牒，捕送有司。庭鞫之日，观者四集，袒服行缠，俱为轻薄子脱去。女美而荡，其夫在家，与仆辈通，不能禁也。既系名族，抑且抱子，乃弃之而逃。岂淫情所钟，割爱越礼，一至此耶？后诸奸皆伏法。

醉虎

福山戍卒，遇一醉虎，缚献于大将军辕门。剖肉分送郡绅，云小儿食之可以稀痘。

胡僧见梦

吴伟业，年垂耳顺，体康强。一夕，梦胡僧突入，似熟识者，揖先生曰：“公可束装，我将与公同行。”惊寤，以为不祥。不三日，病卒。

龙伤禾

六月二十日，有赤龙自嘉定飞至上洋，抵蔡家口出海。冰电随作，大如桃李。所过百馀里，田禾悉坏。

省元神告

费之逵，于六月初梦人曰：“今科省元乃太末李开，尔后科解元也。然昨见上帝填榜，已易置今科矣。”警然而觉，意将信未信，已而果然。李以他误，名在副榜末。愚谓两君必各有所以致此，故两易之。然则功名得失，原可信之我心，毋徒索诸冥冥中也。

杯中鬼

熊光裕者，楚人，顺治乙未进士，由县令擢杭严道。性贪愎，一人法不当死，受怨家金，屈杀之。后裁缺归，将抵家，见前所杀之人，鞠躬岸侧，声言迎接。同坐者俱不见，光裕心甚恶之。后庭花盛开，与妻妾列坐其下。一宠姬捧金卮送酒，饮未及半，其人忽从杯中跃出，长数寸，披发浴血，怒目四顾，堕地而没。光裕惊仆，立死。

乌衣佳话

长洲有一翁，子怠于奉养，大书堂壁曰：“人生七十强支持，帘卷西风烛半枝。传语儿孙好看待，眼前光景不多时。”子大惧，恳请洗去，供奉有加。古人云“树欲静而风不息”，今人解此者鲜矣。

孝廉评诗

顾宸，晋陵人，有声公车间。其所评制举义，盛行于时。至风雅一道，或未深究。尝痛贬王弼州先生曰：“诗人荒谬，至元美极矣。”于是弹毁翦集。予笑解之曰：“弼州操文章之柄，奔走海内，且《四部稿》中，岂遂无佳作？君宜细心阅之。”顾大怒拍案，连呼“不通”而起。又曾作不通诗赠当事，县尹一百二十韵、郡守二百四十韵、总戎三百六十韵。以官之大小，为韵之多寡，识者笑之。

人首鱼

海滨渔人获一鱼，人首鱼尾，重三十斤。嘉靖时，上海北宫前有大鱼，人首鱼尾，乘潮而入，潮退不能去。渔人畏，不敢入。一商贱价买之，煎油数百斤，其骨长三四丈，至今尚存。

科场冤报

盐官查贡生雍，有族叔死，无子而家富。雍利其产业，逼婢冯氏再醮。冯誓守节，坚迫之，投缳死。后雍赴试，首场已毕五草，婢忽突至前，且哭且詈，以手掩其卷。随觉头旋目眩，不终场而出。乙卯秋，复与浙闱。才构思，婢至，哭詈如前。推之仆地，亟出驰归，因发病。婢屡来索命，未几死。雍子数岁，临绝时见婢戟手骂曰：“当并其种去之。”后亦暴亡。尝闻场屋中有神兵竞护，诸魅莫敢近，惟感恩、报怨两种精魂，得直入无禁。意者其然欤？

猛兽杀虎

慈谿县山中出一猛兽，群虎聚而斗之。猛兽连杀三虎，馀散走。古称兹白酋耳，黄腰渠搜，俱能杀虎豹，此岂其类耶？

大雪

腊月二十八日，黑虹见。是冬严寒，大雪屡降，堆积至三四尺。登高四望，如玉树银田。或云，此丰岁之兆也。时一人往五里桥，为雪所压，村人见雪中有物动摇，亟趋视，则已僵矣。

煞神

郡邑传递柬帖者曰农民，其役最贱。北关外徐姓，以此致富。其子援监，又纳运判，纱舆绣补，扬扬自得，挥金交结当事，俨然荐绅矣。然形状侏儒，小器易溢，骄矜之气，盎于颜面，对之欲呕。予族人市房一所，运判以二千金买之，鸠工改葺，金碧烂然。临徙，公服，四人舆，缓步登堂，徘徊四顾，谓仆辈曰：“贵人之居，不可不如是也。”复累石为山，石忽动摇有声，一石从空飞堕，几为所伤。运判惊仆，呕血数升，旦夕纱中。见门外一巨鸡，高四五尺，绛冠铁距，上骑一道士，长及屋梁，鼓翼昂首，从外而入。运判大呼，家人急往救之。自言所睹，若为物击，宛转欲绝，未几死。或曰：此即所谓煞神也。其父初亦乘舆，遇邻里不复拱揖，至是遭众唾骂，垂首而避之。古语云：“升不受斗，不败则覆。”夫人之分量，各有厚薄，以小人乘君子之器，而又以不善处之，欲不亡，得乎？

财有定数

余世父善心计，性爱窖藏，积镪数十万。一日，持五千金，偕次子侃至丙舍，瘞密室中。入土六七尺，上覆巨砖，人无知者。侃后迫他用，乘父在郡城，私地丈馀，无所见。于是遍掘室中，仅馀东北角数尺，以相去稍远，窃疑父先期取去，兴尽而止。父闻亟往，复疑子窃，试于东北掘之，不三尺，窖藏宛然，比前地□二丈许矣。侃卒以贫死。又姊丈张孝廉士绅，家人汲水，见井中有元宝二，屡沉屡浮，举家悉见。百计钩致，不可得，乃竭泉求之，仅获碎银四十三两，元宝不复出。夫以父之所有，子尚不可以幸取；井中之银几何，而多寡大小，毫不可假人，奈何妄觊他人之物，并图及分外哉？二事予亲见之。

伶人被刺

枫泾镇上已赛神最盛，架高台，演秦桧杀岳忠武父子，曲尽其态。一人从众中跃出，登台，挟利刃直前刺秦桧，流血满地。执缚送官，讯杀人之故。其人曰：“民与梨园，从无半面，实因一时愤激，愿与桧同死，初不暇计真与假也。”有司怜其义愤，竟以误杀薄其罪。

记梦

余自少懒散，不善治生。放弃以来，家贫累重，不无忧生之嗟。窃念兢兢自好，而境遇抑郁，天之报施，疑不可信。一夕，雨窗独酌，漏三下始就枕。梦一青衣人排闥直入，手持片纸，呼予名曰：“王召，宜速行，予尔衣冠。”随之去，约千馀里，至一域，中有天殿，丹楹刻桷，金碧辉映。倏而入，见一王者南面坐，赤面紫髯，佩服如天帝状，傍列侍卫数百人。予跪谒屏息，忽闻殿上属声呵曰：“尔碌碌庸儒，穷通得失，各有定分，何得妄生怨尤？且尔欲富乎？欲登仕版乎？抑将野处以适志乎？”予伏不敢对，有人从旁趋之。予回头曰：“世乱才拙，不愿为官，欲得富耳。”王微哂，左右顾。左一人，绣衣束带，如世之所谓贵人，趋而前曰：“若欲富，已领王命。但随我往足矣。”于是扶之出。俄顷抵家。其人形貌侏儒，神气昏浊，执手慰藉良厚，坐定，讯余平日所为何事？仿佛以近所读书一册呈之。接置座侧，若不识一字者。良久，见褭蹄麟趾，从地涌出，烂然盈庭。予询曰：“此从何来？”曰：“若患贫，故王命以此畀尔，尔宜悉心经营，纤啬为贤，义狭为贼，猗顿鸟草，可翹足待也。”语毕起别，仆从拥之去。予亟持金入，呼童具锺，思穴地藏其半，又思以半之半权子母，半置一产为子孙计。既富思贵，又欲乘时入货，以取功名。自旦至暮，千筹万算，饮食都废。入夜，虑有不虞，手自键户，令家人更番击柝，终夕踟蹰，目不交睫。倦而假寐，眼方合，闻有声剖然，以为盗也，矍然惊起，则晓钟鸣矣，一灯倚壁，竹床纸帐，依然如故。觉而细思，向者贫而忽富，今者富而忽贫，向者何劳，今者何逸？然则神之默示，其爱我者至矣。乃徐起盥嗽。于时榴花盛开，苍翠绕屋，松风冷然，与稚子读书声相应。适内子挹黄梅水瀹

茗，遣小玉送至，披襟而饮之，因忆梦中之事，自悔复自笑。因援毫以识。时丁巳五夏夏至后一日。

前生孽报

洞庭陈生，家贫，挈妻及弟徙洙泾。不数年，累千金。忽染疾，伏枕数日，蹶起谓妻及弟曰：“我三人前生俱为僧，共奸一妇而杀其夫，手刺之者即我也，今冤将偿，拘讯期迫，我先行，汝二人亦不免矣。”言毕，自拔其发，并髭髯俱尽，复取刀割舌，又以两指将眼珠剔出。少顷气绝。今不知其弟及妻若何？当续访之。

廉吏为神

山左梁浩然，由贡知严州府，廉介有守，退衙，课仆艺蔬以自给，百姓德之。擢宁绍道，初莅任，见一白须老人，手持稟帖，跪谒岸左。喝司阁何不传报？众悉无睹。三日后，方视事，忽闻空中鼓乐声，仿佛见驺从骈集，云迎新官赴任。即日无病而卒。父老有梦者，知即为彼土之神云。

九华忏罪

张给谏惟赤加徵贻害，前载已详。今五月二十二日初过午，其家老仆，忽闻虚处驰骤声甚厉。惊视，见数鬼卒以银铛惟赤头，手执铁槌撞其背。号哭呼仆曰：“我罪重，受刑最酷，可速报大相公当面语之！”仆曰：“主人他出，奈何？”言未绝，鬼卒拽之登屋，回顾曰：“前午复来，可语汝主，待我少顷。”主人归，仆泣告。大怒，责其谤主，命与杖。仆诉曰：“明若不来，受杖未晚，愿系颈以待。”乃释之。翌午，声响如前，檐瓦震动，则鬼卒复驱张至矣。亟入趋报，出果见父，伏地大哭。张抚之曰：“起起！可速款公差，并多焚楮帛，庶免目前之苦。”于是立办盛饌三席，二燕鬼卒，其一以享父。食将毕，复切嘱曰：“我罪孽深重，不可幸脱，速向九华山某洞请某僧为我忏罪。然冥王怒甚，恐亦难解也。”言罢泪如雨，从空掷杯于地，鬼卒复推之去。惟子及老仆见之，他人俱无睹。

牛鬼

南闾乡试初场，晃一巨牛，无首，历阶升堂，众共追觅，不知所之。

三冈续识略补遗华亭董含著

梦仙纳心

长儿威宝，能文，有至性。春暮，以哭弟伏枕，潦倒药囊者数月。及秋弥甚，百病

丛生，诸医皆束手相视，自分不可复治矣。忽于仲冬之十二日，夜将半，梦至一处，仿佛似宫观，遇一老叟，素袍青巾，白须飘扬，倚槛独立。意中以为此必仙真也，亟前拜之，并诉痛苦之状，恳祈救援。叟谓曰：“汝心已偏矣，念汝年少，兼多善念。”袖中出一白石子示之曰：“此即汝之心也。”令解衣，以指剖胸，将石子纳入。良久曰：“心已无恙，奈五脏六腑俱受病何？”于是复以手探入腹中，抚摩再四。痛剧，口作呻吟声。值宿者闻之，呼之醒。具述所梦，犹恍恍在目。自後渐有起色，因屏去药饵。至春，诸疾以次而愈。嗟乎，威宝特一孱弱书生耳，不知何幸而仙灵默为之佑，岂宿生有善缘乎？平生虔事文昌，回思道貌，疑是帝君垂救云。

秦中地陷

康熙三十四年乙亥六月初四日，陕西宁夏等处，山崩地陷，上、中、下三卫官民田庐，压毁陷没者无数。是日变起仓猝，黑雾障空，天气惨淡，军民奔窜塞路，死者不可胜计。我郡有吴生德兮者，向游四方，齿逾古稀矣，一武弁宦秦，遣使相订，恋其厚币，策蹇行。亦陷入地底，竟与之同祸。先是，卜日将发，宗党以其年老，且无子，互谏阻之。吴不为止，试叩日者。日者曰：“此行大不利，当闭门却避，不然，吾见其往而不返也。”至是其言果验。

句容水发

七月二十一日，江宁句容县暴雨不止，山水忽发，平地水深四尺，郭外势更汹涌，城堞不没者仅存三板。变起仓猝，漂没者千余人。时督学张公方试士，诸生苦僦居价昂，寓城外者，淹死亦数十人。

风变

二十三日，天未明，大风忽发，暴雨倾注。逮午，势愈甚，半空中赤光灼烁，声若霹雳，砰砰簸荡，排墙倒壁，大木皆连根拔出。檐瓦飞空，状类鸟雀，居人走避无所。抵暮，水没过膝，天气昏黑，势若混沌，少长群聚大哭，皆自分必死矣。至夜半，势稍缓，官署民房，雕楼杰阁，半被吹塌。四乡民压死者比比而是。东关外有大树，据郡志云，阅岁已千年，大数十围，每岁易一花，变怪莫测，土人筑大树庵以奉香火，至是亦被吹折。时东北风急，敝庐数椽，适当其冲，倒塌尤甚。耳中但闻崩裂之声，竟夕不卧。东方渐明，见四壁俱无，举家徬徨无措，真异变也。予薄田二顷，连岁荒歉，今木棉、豆花，尽行脱落，何其厄乎！风潮每岁有，此变则几至陆沉，百龄老人，目所未睹。惊魂稍定，聊占二诗以记曰：“天意真难料，宽租负主恩。蠲诏屡下，连遭岁荒。一廛何处受，敝居相传三世，今悉摧坏。四壁总无存。四壁仅有存者。骤雨千江决。顷刻衢巷皆没。狂飙万马奔。拔树倒屋，风势可畏。妻孥莫惊涕，头在手还扞。昔有人惊极，以手扞首曰：吾头不知尚在否。”“

千里同灾难，惊传压死多。苍髯堕隔径，庭前孤松，种来六十载，今从空拔去。翁仲卧前坡。先少宰公墓上翁仲，倒卧数十步外。混沌疑初凿，怀襄恐未过。残骸何处避，拼共葬江波。”

张公清严

康熙三十六年丁丑，张公鹏翮，庚戌进士，为浙江抚军，官已高矣。上以有清望，擢江南督学，盖特简也。时适当科试，奔竞者纷纷。公信心直行，矢公矢慎，终其任无一人私者，虽要路不敢以一札仰干。即有一二京函，亦逡巡踟躅，不敢投而去。去后士子思之不止，每谈及，辄为欷歔流涕云。

地动

十一月十五日，京师地动。十七日，又动，其声如雷。

绣球

腊月中旬，予庭前绣球一株，忽作花数朵，开时姿极烂熳，因与客沽酒赏之。

附录

杜说霖藏本跋语

华亭董榕城先生著《三冈识略》十卷，余友杜说霖明经购得之，已佚其半。此书不知何人所钞订，前后无图记，无跋语，每页俱有衬纸，每句俱用朱点，想亦一嗜古之士也。今秋，余从杜君借阅，漫识数语于此。同治壬申秋七月下浣桐溪吴树年识于鹃湖旅舍。（铃“吉茹”朱文方印）

予与杜君，已交八载，知君藏书何至（止）万卷。予好书癖日，尝乞借于君，而君宽宏大度，无不俯允。其新购及秘藏异种，经史之外，即稗史小传，均属正人心术，至于邪淫等目，从无一册。设有来售者，即古板世稀，先生亦极力购之，皆付祖龙。是书虽属吉光片羽，未窥全豹，览其言语简朴，不徒华饰，真有关世道人心者，非可一例而论，以稗史观之，宜君置于斋口，口同拱璧，若非知己，决不轻许假之。偶见吴君片跋，小子不揣愚昧，聊书数行，殆（贻）笑大方，以博后来阅者高明一粲。时在同治壬申中秋日，东海顽民胡福乾志。（铃“少斋”朱文圆、“少斋翰墨”朱文方印）

榕城先生著此书，本名《三纲（冈）识略》，后为吴口坛先生载入《说铃》，略有删节，易名《莼乡赘笔》，盖后来所易，亦先生所自序云。全书具在，不至有遗佚之憾。惟录是书者，积功匪易，而仅存其半，负伊一片苦心矣，宁非恨事。同治甲戌武原戴陈畴识于鹃湖旧舍。